



Lauren

350

DE OFFICIO
PRINCIPIS
CHRISTIANI

LIBRI TRES:

AUCTORE

ROBERTO S.R.E. Card. BELLARMINO
è Societate Iesv.

AD SERENISS. PRINCIPEM
VLADISLAVUM
SIGISMUNDI III.

Poloniæ & Sueciæ Regis filium.



ANTVERPIÆ,
EX OFFICINA PLANTINIANA,
Apud Balthasarem Moretum, & Viduam
Ioannis Moreti, & Io. Meursium.

M. DC. XIX,

SERENISSIMO
PRINCIPI
VV LADISLAO
SIGISMVNDI III.

Poloniæ & Sueciæ Regis filio,
ROBERTVS S. R. E. CARD.
BELLARMINVS.
S. P. D.



SCRIPSI Librum
de officio Principi
Christiani, non
mea sponte, sed ab
ijs rogatus, quibus
eiusmodi Opusculum negare
non potui. Scripsi autem non
vt Principes nostri sæculi ad-
monerem officij, sed vt ijs opti-
mum

mum regimen gratularer, at-
que ad perseverandum in pia
& iusta gubernatione cohort-
tarer. Siquidem nostra ætate
(quod singulari Dei benigni-
tatitribuendum est) Eccle-
sia Catholica Reges omnes,
aliosque Principes primarios,
egregios omnino, & singulari
pietate iustitiaque conspicuos
se habere meritò gloriari po-
test. Cur autem tibi potissi-
mum, Sereniss. VVLADISLAE,
librum hunc dicare voluerim,
illa causa est, quia vnus tu in
primò flore iuuentutis, ac si
veteranus Imperator esses, ex-
ercitum sapienter ducis, bella
grauissima strenuè geris, &
omnia

omnia munia prudentissimi
Imperatoris adimple. Neque
id mirum nobis videri debet,
cùm Te prouidentia Dei non
ad Regnum vnum gubernan-
dum, sed ad multa simul &
maxima primùm acquirenda,
deinde administranda, delegis-
se & vocasse videatur. Te
enim Poloniæ Regnum expe-
ctat amplissimum. Tuum est
hereditario iure Regnum Sue-
ciæ ; quod iniustè ereptum,
Deus iustus Iudex, & Princeps
Regum terræ Tibi iustissimo
heredi tempore suo restituet.
Tibi magnus Moscouiæ Duca-
tus, qui instar maximi Imperij
à Septemtrione ad Orientem

* 3 vsque

vsque per vastissimas regiones
protenditur , electionis iure
debetur. Te igitur quasi in ve-
stibulo tot Regnorum colloca-
tum, & ad piè sancteque re-
gnandum à glorioso parente
tuo, non solùm verbis, sed et-
iam exemplis eruditum ; ego
quoque vt senex, & Sacerdos,
in bono proposito confirmare
volui, non ex mea, quæ nulla
est, sapientia, sed ex verissimis
atque sanctissimis diuinæ Le-
gis oraculis. Scriptum est enim:

Malach. 2.

*Labia Sacerdotis custodient scien-
tiam, & legem requirunt ex ore
eius.* Atque vt feliciter & in-
offenso pede per semitas iusti-
tiæ gradereris , adieci in meo

Libro

Libro Vitas Principum sancto-
rum non paucas ; quorum
Principum exempla sequens,
omnino errare non poteris.
Opportunè autem accidit , vt
Vita sancti Principis nostræ æ-
tati proximi, fuerit sancti Ca-
simiri , quem Leo Decimus
Pont. Max. in numerum San-
ctorum retulit. Hic enim san-
ctissimus iuuenis , cùm Regis
Poloniæ filius fuerit , vt Tu ip-
se nunc es ; & plurimis maxi-
misque virtutibus clarus, breui
tramite in cælum conscende-
rit ; idoneus Tibi vitæ mo-
rumque magister esse poterit:
cuius vestigiis si continenter,
vt facis, inhærere volueris ; ni-

hil erit, quod Te à vera pieta-
tis & iustitiæ via, quæ ducit ad
cælum, auertere possit. Accipe
igitur, Princeps magne, mu-
nusculum perexiguum, sed
non exigua voluntate dona-
tum ab eo, qui Tibi sic diutur-
num & felix Regnum optat in
terris, vt sine fine & felicissi-
mè cum Christo regnare possis
in cælis.



I N.

INDEX LIBRORVM,
E T
partium principalium.



LIBER PRIMVS

Continet documenta spiritualia
ex Scripturis sanctis. *pag.1.*

LIBER SECVNDVS

Continet exempla ex Vitis san-
ctorum Principum Testamenti
veteris. *pag.161.*

LIBER TERTIVS

Continet exempla ex Vitis sancto-
rum Principum Testamenti
nouj. *pag.259.*

* 5 IN

hil erit, quod Te à vera pietatis & iustitiæ via, quæ ducit ad cælum, auertere possit. Accipe igitur, Princeps magne, munusculum perexiguum, sed non exigua voluntate donatum ab eo, qui Tibi sic diuturnum & felix Regnum optat in terris, vt sine fine & felicissimè cum Christo regnare possis in cælis.



I N.

INDEX LIBRORVM, E T

partium principalium.



LIBER PRIMVS

Continet documenta spiritualia
ex Scripturis sanctis. *pag.1.*

LIBER SECVNDVS

Continet exempla ex Vitis san-
ctorum Principum Testamenti
veteris. *pag.161.*

LIBER TERTIVS

Continet exempla ex Vitis sancto-
rum Principum Testamenti
noui. *pag.259.*

* 5 IN

Libri Secundi Vitæ.

I.	I oseph Patriarchæ Principis Aegypti.	165
II.	Moyſis primi Ducis Hebræorum.	175
III.	Iofue ſecundi Ducis Hebræorum.	191
IV.	David Regis Hebræorum.	201
V.	Ezechia Regis Hebræorum.	231
VI.	Iofia Regis Hebræorum.	238
VII.	Iofaphat Regis Hebræorum.	240
VIII.	Iuda Machabæi Summi Sacerdotis & Principis Hebræorum.	246

Libri Tertij Vitæ.

I.	T heodoſij ſenioris Imp. religioſiſſimi, ex Hiſpania. Obiit anno Domini 395.	259
II.	Tiberij Iunioris Imp. Romani piſſimi, ex Græcia. Obiit anno 586.	294
III.	S. Venceſlai Regis Bohemiæ. Obiit anno 938.	310
IV.	Sancti Henrici Imp. Romani, ex Ba- uaria. Obiit anno 1024.	333.
V.	S. Stephani Regis Hungariæ. Obiit anno 1034.	365
VI.	S. Eduardi Regis Angliæ. Obiit an- no 1066.	408
	Sancti	

VII. *Sancti Leopoldi Marchionis Austria.*
Obiit anno 1136. 450

VIII. *S. Ludouici Regis Gallia.* *Obiit an-*
no 1270. 463

IX. *B. Amadei Ducis Sabaudia.* *Obiit*
anno 1472. 498

X. *Sancti Casimiri filij Regis Polonia.*
Obiit anno 1484. 512

Imprimatur, si videbitur Reuerendiss.
P. Mag. Sac. Pal. Apost.

Cæsar Fidelis Vicesg.

Imprimatur. Fr. Hyacinthus Petronius
Romanus, Ordinis Prædicatorum, Sa-
cri Palatii Apostolici Magister.

denique ad seipsos. Et quamvis labor hic
meus ad Principes potissimum dirigatur,
eorumque aeternam salutem propriè intuea-
tur : tamen communis quoque ceteris ho-
minibus esse poterit , cum nemo sit usu ra-
tionis præditus , qui suos non habeat supe-
riores , vel pares ; & rari sint , qui non
habeant inferiores aliquos ; & nullus , qui
sui ipsius rationem habere non debeat.



LIBER I.

DE

OFFICIO PRINCIPIS CHRISTIANI.

CAPVT PRIMVM.

*De officio Principis Christiani
erga DEVM.*



HIC ITUR cū Princeps Christianus negotiū habeat cum superioribus, cum inferioribus, cum paribus, & ipse secum: ordo ipse poscit, vt à primo negotio principium faciamus. Et quia Princeps quatuor agnoscere debet superiores, si verè Christianus dici & haberi velit, Deum optimum maximum, Pontificem summum, Episcopum proprium, & proprium Confessarium; à primo superiore, qui est omnium supremus & eminentissimus, incipiemus.

Oportet igitur Principem, qui officio suo rectè fungi velit, & ad Regnum æternum

A

verè

2 De officio Principis Christiani

Pfal. 5.
Pfal. 43.
Pfal. 83.
1. Tim. 6.
Apoc. 17.
Apoc. 19.

Sap. 6.
Rom. 13.

verè & ex intimo corde aspiret & suspiret, pro comperto habere ; & non verbo solùm & lingua , neque sola externa veneratione , sed opere & veritate , & illuminato corde agnoscere , & sapè ac sapiùs intra se cogitare & recogitare , Deum esse Regem Regum , & Dominum Dominantium : hoc enim disertis verbis Sacræ paginæ multis in locis prædicant . Porro Principes terræ multis modis subiecti esse debent Deo Regi Regum , & Domino Dominantium . Primum enim , Principes terræ sunt quasi Proreges Dei , vel potius ministri principales Dei , iuxta illud , *Cùm essetis ministri Regni illius , non rectè iudicatis* : & illud Apostoli , *Dei minister est* ; vbi loquitur de summo Principe temporali . Itaque Reges terræ principatû suum non vt absolutè suum , sed vt sibi à Rege supremo ad tempus gubernandum traditum , obtinent , sub conditione rationis reddendæ in tremendo nimis iudicio eiusdem viuentis & omnipotentis Dei . Quare longè abesse debet à Principe Christiano , quantumuis summo , illa turpissima adulatio , Si libet , licet . An nescis te Imperatorem esse , & leges dare , non accipere ? quod refert Ælius Spartianus dictum Antonino Caracallæ à nouerca , quam in vxorem ducere cupiebat , sed non audebat .

Debet

Debet igitur in primis Princeps Christianus subiectus esse legibus Dei Regis Regū. Hoc docuit Moyſes quando in Deuteronomio deſcripſit officium Regis. Sic enim ait: *Postquam ſederit Rex in ſolio Regni ſui, deſcribet ſibi Deuteronomium legis huius in volumine, accipiens exemplar à Sacerdotibus Leuitica tribus, & habebit ſecum, legetq; illud omnibus diebus vitæ ſuæ, ut diſcat timere Dominum Deum ſuum, & cuſtodire verba & caerimonias eius, quæ in lege præcepta ſunt.* Vbi Moyſes non ſimpliciter dixit, Debet Rex legem Dei cuſtodire: ſed addidit multa verba, ut ſignificaret magnitudinem negotij huius. Primū iuſſit, ut ipſe ſibi deſcriberet legem Dei, ut non poſſet vñquam dicere, Non vidi legem Dei, nec ſcio quid in ea contineatur. Deinde addidit, ut exemplar diuinæ legis acciperet à Sacerdotibus Dei veri: ne fortè pro lege Dei veri acciperet leges falſorum prophetarum; quales hoc tempore ſunt, qui dicuntur Politici, & multò magis hæretici omnes, qui legem & cultum Dei pro ſuo capite populis obtrudunt, & non ab Eccleſia illa vera accipiunt, *quæ eſt* 1. Tim. 3. *columna & firmamentum veritatis.* Tertiò addidit, ut habeat ſecum, & legat omnibus diebus vitæ ſuæ; videlicet ut idemtidem legat, ne fortè obliuiſceatur mandata Dei.

4 De officio Principis Christiani

Denique adiungit, vt discat timorem Domini, & ex eo timore sollicitus sit obseruare mandata Dei, tum ea quæ pertinent ad Religionem, tum illa quæ spectant ad Iustitiam. Decet enim, vt Princeps in omni lege diuina seruanda, exemplo suo populum præcedat.

Hoc idem quod Moyſes docuit, docuit postea etiam Samuel, & quidem comminatione grauiſſima. Nam cum Saul Rex primus Hebræorum mandatum quoddam Domini, sub specie pietatis, non impleuiſſet, reprehendit eum Propheta Samuel, dicens:

1. Reg. 15. *Quia proieciſti sermonem Domini, proiecit te Dominus ne ſis Rex. & ibidem: Numquid vult Dominus holocausta & victimas, & non potius vt obediatur voci Domini? & paulò poſt, Scidit, inquit, Dominus regnum Iſrael à te hodie, & tradidit illud proximo tuo meliori te. Oſtendit igitur hoc exemplo Deus, ſe Regem Regum eſſe, & Reges terræ, non tam Reges quàm miniſtros dici debere: quippe quos ipſe regnandi poteſtate nullo negotio priuat, vt re vera Saulem cum omni progenie ſua regno priuauit, & regnum eius in Dauidem & eius poſteros tranſtulit. Quo exemplo edoctrus Dauid, in Pſalmo ſecundo Reges omnes admonuit, dicens: *Et nunc Reges intelligite, erudimini qui indicatiſ terram: ſeruite**

Pſal. 2.

uite Domino in timore, & exultate ei cum tremore. Et in alio Psalmo dicit, Deum esse qui ^{Psalm. 75.} *auferit spiritum Principum*, & ideo esse terribilem apud Reges terræ. & idem ipse Dauid filio suo Salomoni, tunc primùm regnare incipienti, sic locutus est: *Ego ingredior* ^{3. Reg. 2.} *viam vniuersæ terræ: confortare, & esto vir; & obserua custodias Domini Dei tui, ut ambules in viis eius, ut custodias carimonias eius, & precepta eius, & iudicia, & testimonia, sicut scriptum est in lege Moysi.* Quibus verbis Rex optimus & sapientissimus filiū admonet, ut si velit feliciter regnare, Deo Regi Regum fideliter seruiat: & prima illi cura sit, ut in ijs quæ ad Religionem pertinent, nihil omnino prætereatur, & exemplo suo populos sibi subiectos in vera Religione contineat: deinde leges Dei, quæ ad mores vel iudicia pertinent, diligenter obseruet: ac denique sic ipse Deo subiectus & obediens esse studeat, quemadmodum cupit sibi ab administris suis promptè fideliterque seruire.

Sed operæpretium est attendere, quàm grauitè Sapiencia diuina Reges admoneat. *Audite, inquit, Reges & intelligite, discite iudices finium terræ: præbete aures vos, qui continetis multitudines, & placetis vobis in turbis nationum: quoniam data est à Domino potestas vobis, & virtus ab Altissimo, qui interrogabit* ^{Sap. 6.}

A 3 opera

6 De officio Principis Christiani

opera vestra, & cogitationes scrutabitur. Quoniam cum essetis ministri Regni illius, non recte iudicastis, nec custodistis legem iustitiae, neque secundum voluntatem Dei ambulastis. Horrendè & citò apparebit vobis; quoniam iudicium durissimum his, qui praesunt, fiet. Exiguo enim conceditur misericordia: potentes autem potenter tormenta patientur. Hæc Sapientia diuina docet, quæ breuiter explicanda sunt. Primùm admonentur Reges, vt cogitent, potestatem in alios homines habere se à Deo, quocumque titulo regnent. Nam, vt Apostolus docet in Epistola ad Romanos,

Rom. 13. *non est potestas, nisi à Deo.* Ipse enim solus non ab alio potestatem habet, cum vnus ipse sit *Legislator, & Iudex*, vt loquitur Apostolus Iacobus, id est, qui omnibus dat leges, & omnes iudicat, & ipse à nemine iudicatur, & à nemine legem accipit. Itaque siue populus potestatem suam in Principem transferat, siue per hereditariam successionem potestas acquiratur, siue iure belli aliquis Princeps fiat: semper erit verum, non esse potestatem nisi à Deo; & vnum Deum esse supremum Legislatorem & Iudicem. Hinc verò colligit Sapiens, omnes Reges, omnesque Principes ministros esse Dei, & à Deo iudicandos, ac præmium vel pœnam accepturos, prout in Regno Dei administrando

Rom. 13.

Iac. 4.

strando se gesserint. Addit prætereà, non de solis factis, sed etiam de cogitationibus iudicandos : & quoniam multum interest inter peccata Principum & priuatorum, quòd illa ad multos, ista ad paucos pertineant; adiungit Sapiens terribilem sententiam illam , *Iudicium durissimum his , qui præsumunt , fiet : & , Potentes potenter tormenta patienter.*

Sed veniamus ad ea quæ sunt ministri principalis propria, cum iam ex Diuinis literis satis apertè demonstratum sit , Reges hominum esse ministros Dei . Principio minister debet , si quid sapit, non ex capite suo leges populis dare , sed iuxta leges sibi à Rege datas, populos regere. Non enim populos propriè & absolutè suos, sed populos Dei , Regis æterni , gubernandos suscepit. Quare cauere debet ; ne aliquid iubeat, quod legi diuinæ repugnet. Et quoniam Reges non solum legibus & edictis, sed etiam exemplo & factis populos regunt, valdè cauere debent, ne ipsi leges diuinas vlllo modo transgrediantur. Certè enim si minister, Regis nomine edictum publicè proponat, ne vllus audeat transire ad hostes, aut eos armis vel commeatu iuuare; certè ipse minister primus esse debet in edicto eiusmodi obseruando. Eodem igitur modo debent

8 *De officio Principis Christiani*

Reges terræ, vt ministri Dei, diligentissimè cauere, ne adulteria vel sacrilegia vlla committant, ne peierent, ne blasphement, nec iniuste vllum opprimant; denique ne malo exemplo suo populos ad peccandum prouocent. Rex enim Deus nimium irascitur, cum videt eos transgredi leges suas, quos ministros Regni sui esse voluit, vt populos in officio, & in legum diuinarum obseruatione contineant. Deinde ministri vel Præfecti Regum, si fortè diuites fieri velint, quia sciunt senò diu in Regno futuros, cum successorem breuî venturum expectent; propterea non solliciti sunt de coëmendis in eo Regno palatiis, aut vineis, aut agris, aut hortis, quæ secum auferre & asportare non possunt; sed pecunias & res pretiosas, quæ faciliè asportari possunt, cumulare satagunt, vt cum recedendum erit, & potestas successori tradenda, diuites reuertatur in patriam: neque id solùm curant si sapiunt, sed vt ea solùm asportent, quæ iuste lucrati sunt; alioquin Rex non solùm eos potestate & Præfectura priuat, sed omnia malè parta aufert, & eos vt latrones vel morti tradit, vel in exilium mittit, vt pœnas luant prouinciæ malè administratæ. Hæc non semper Reges terræ in Præfectos malos statuere possunt, quia vel eorum peccata nesciunt, vel metu peiorum

rum tacent, vel certè ipsi quoque rei sunt scelerum multorum: & ideò dissimulant peccata aliorum, ne ipsis exprobrentur sua. At Rex Regum Deus neque peccata vlla non videt, neque potentiam vllius timet, neq; iniustus est, vt iniustitiam aliorum dissimulare velit. Itaque Reges terræ, quia Præfecti & ministri estis Dei, si quid sapitis, successorem quotidie expectate; cum timore & tremore Regnum Dei administrate, tamquam rationem de singulis actis vestris reddituri: quærite ex vestro labore iustas diuitias, quæ sunt bona merita. Sic enim fiet, vt cum desideritis esse Præfecti Regij in terris, ipsi Regi Regum felicissimè conregnentis in cælis. Id enim nobis promittit, qui nõ mentitur Spiritus Dei: *Si sustinebimus, & con-*^{2. Tim. 2.}
gnabimus. & iterum: *Qui vicerit, dabo ei se-*^{Apoc. 3.}
dere mecum in throno meo; sicut & ego vici, &
sedi cum Patre meo in throno eius.

CAP. II.

De eodem officio.

CONSIDERAVIMVS Principem Christianum, vt vicarium in temporalibus Dei Regis magni: nunc considerare volumus eundem, vt filium eiusdem Dei per adoptionem, quæ adoptio cõmunis est Principibus

10 De officio Principis Christiani

Rom. 8.

pibus Christianis cum eorum subditis. sic enim loquitur Apostolus: *Accepistis spiritum adoptionis filiorum, in quo clamamus, Abba Pater. Ipse enim Spiritus testimonium reddit spiritui nostro, quod sumus filij Dei: si autem filij, & heredes; heredes quidem Dei, coheredes autem Christi.* Hinc verò sequitur, vt Christianus Princeps debeat Deo reuerentiam & obedientiam filialem; & simul debeat subditis suis fidelibus fraternam charitatem, vt coheredibus in Regno cælorum futuris. De reuerentia filiali dicit ipse Dominus apud Malachiam: *Si pater ego sum, ubi est honor meus?* Debet igitur Princeps Christianus, vt filius Dei, ardentissimo zelo procurare honorem tanti patris, non solum ipse abstinendo manum, & linguam, & cor ab omni cupiditate, verbo, & opere, quod in iniuriam & irreuerentiam tanti Patris cedere possit: sed etiam diligentissimè procurando, vt populi regimini eius subiecti, caueant ab omni blasphemia, & periurio, & ab omni opere sacrilego, quibus violari possit honor diuinus. Hoc zelo sanctus

Malac. 1.

Moyſes blasphemos omnes, sine vlla misericordia, iubebat ab omni populo lapidari. Et sanctus Ludouicus Rex Francorum, non patiebatur blasphemos vllos impunitos abire, quin saltem candenti ferro labia

Leuit. 24.

labia

lâbia sacrilega continuò adurerentur.

Nec minus debet Princeps, si se verum Dei filium esse sperat, obedire in omnibus Patri tam amabili, & tam amanti. Nam, si parentibus carnis iubet Apostolus, vt filij Colos. 3. obediant per omnia: quantò magis debent Principes obedire Patri cælesti, planè per omnia? præsertim cùm Pater cælestis nihil iubere possit, nisi bonum per omnia. Huius obedientiæ exemplum habemus illustrissimum in Dauide Rege, qui sic in omnibus obediuit Deo, vt Deus ipse hanc obedientiam præuidens, testatus sit, ob hanc potissimum virtutem illum à se fuisse electum in Regem. Sic enim loquitur Apostolus Paulus; *Suscitauit illis David Regem: cui testimonium perhibens dixit, Inueni David filiū Iesse,* Act. 13. *virum secundum cor meum, qui faciet omnes voluntates meas.* Sed illustrius adhuc habemus exemplum in Christo filio Dei naturali, qui vsque adeò delectabatur in obedientia exhibenda Deo Patri, vt diceret: *Meus cibus est, vt faciam voluntatem eius, qui misit me.* & in alio loco: *Quæ placita sunt ei,* Ioan. 4.
Ioan. 8. *facio semper.* Et non solum in rebus facilibus, sed etiam in re omnium difficillima, & maximè horribili, *humiliauit semetipsum factus obediens.* Philip. 2. Quid enim est horribilius morte, ignominie & doloris plenissima?

Atque

12 *De officio Principis Christiani*

Atque ad hoc extremum peruenit obedientia Filij Dei, nimirum vsque ad mortem, & mortem crucis. Quòd si Filius Dei naturalis, & Princeps Regum terræ, obediuit Patri vsque ad mortem crucis; in qua re obedire non debet filius adoptiuus, & vnus ex Principibus terræ? Profectò nulla tentatio carnis, nullum dispendiũ facultatum, nulla iactura honoris Principem Christianum impedire posse deberet ab obedientia Patris cælestis. Neque solùm Princeps debet, si legitimum Dei filium se præbere cupit, obedire Patri per omnia; sed etiam totis viribus contendere, vt omnes eius subditi id ipsum faciant. Denique idem Princeps subditis suis, quos nouit fideles & pios, fraternam charitatem debet, vt coheredibus regni cælestis. Videmus enim hîc in terris, Principes omnes longè benigniùs & humaniùs agere cum fratribus suis, quàm cum aliis subditis, quos in ditione sua habent. Sic igitur Princeps sapiens & pius longè aliter agere debet cum subditis suis facinorosis & sceleratis, qui non sunt filij Dei, sed filij diaboli, quàm cum religiosis & sanctis, qui ius habent ad Regnum æternum, & quos post breue tempus habebit in patria cælesti consortes Regni, & sibi dignitate pares, vel etiam superiores. Proinde hîc etiam eos
magni

magni faciat, & honore prosequatur, vt fratres; neque sinat eos à malis hominibus iniuste vexari. Proderit autem hæc demonstratio amoris in subditos pios, non parum ad conuertendos impios ab impietate sua.

Quod si fortè (quod absit) Princeps aliquis Christianus, propter admissum scelus exciderit à gratia Dei, & per hoc amiserit ius adoptionis & filiationis diuinæ: eum obsecro, vt cogitet & recogitet, quale erit ei, nisi maturè resipiscat, in die obitus sui, & postea in die vltimi Iudicij dedecus, & confusio, & dolor; cum viderit multos ex subditis suis vocari ad Regnum, & se dominum eorum detrudi in gehennam ignis; & impleri illud ex cantico Matris Dei: *Deposuit Luc. 1. potentes de sede, & exaltauit humiles.* Consideret, obsecro, qui talis est; quàm ingenti pretio & quàm seria pœnitentia redimeret, si posset tunc, eam ignominiam & calamitatem, qua nulla maior inueniri vel cogitari potest; & gratias agat Deo, quòd adhuc non permisit eum exire de corpore cum letali crimine, & spatium pœnitentiæ illi concessit. Neque solum gratias agat, sed accingat se ad seriam pœnitentiàm agendam, vt lætus mortem & iudiciũ expectare, & Principatum non amittere, sed in maiorem & diuturniorem commutare possit.

C A P.

C A P. III.
De eodem officio.

RESTAT postrema consideratio, quæ est Principis Christiani, ut serui Dei. Idem enim ipse homo, qui ut præest populis, est quasi vicarius & Præfectus Regis omnium Regum; & ut gratiam adoptionis per Baptismum accepit, est filius & heres Dei, & coheres Christi; idem, inquam, est servus Dei, & servus, non vno modo tantum, sed quinque, quot videlicet reperiuntur genera servitutis. Est enim servus Dei per naturam, est mancipium, est servus emptitius, est vernaculus, est mercenarius. Et tamen, quod admirabile esse videtur, tam multiplex servitus, quæ omnia genera servitutis comprehendit, non pugnat cum filiatione adoptiva, neque cum dignitate Præfecti, imò neque cum consortio Regni Dei.

Explicemus breuiter, & probemus hæc omnia. Serui per naturam, dicuntur illi qui carent ratione, ut bruta animantia; vel usu rationis, ut infantes & fatui. De primis canit Propheta, *Omnia subiecisti sub pedibus eius* (hominis videlicet) *oves & boves universas, insuper & pecora campi: volucres celi, & pisces maris.* Et multò ante Deus ipse dixit: *Faci-*
mus

Psal. 8.

Gen. 1.

*mus hominem ad imaginem & similitudinem nostram, & præsint piscibus maris, & volatilibus celi, & bestiis, vniuersaq; terra; omniq; reptili quod mouetur in terra. Ac ne fortè existimaremus, per peccatum primi hominis ablatum fuisse dominium bestiarum, aut certè per peccata filiorum Adam, ob quæ factum est generale diluuium, amisisse homines imperium in animantia bruta, repetiuit Deus post diluuium eamdem prerogatiuam, dicens: Crescite & multiplicamini, & re- Gen. 9.
plete terram. Et terror vester ac tremor sit super cuncta animalia terra: & super omnes volucres celi, cum vniuersis quæ mouentur super terram. Omnes pisces maris manui vestra traditi sunt. De iis qui carent vsu rationis, dixit Apostolus: Quanto tempore heres paruulus Gal. 4.
est, nihil differt à seruo; sed sub tutoribus & actoribus est. & Salomon scripsit: Qui stultus Prou. 11.
est, seruiet sapienti. Denique seruiunt naturaliter artificii opera, quæ ipse arte sua, & ex re sua fecit, dicente Apostolo: An non habet Rom. 9.
potestatem figulus luti, facere aliud quidem vas in honorem, aliud verò in contumeliam? Iam verò mancipia dicuntur homines, qui capiuntur ab hostibus in bello; de quibus dicit sanctus Petrus: A quo quis superatus est, huius 2. Pet. 2.
& seruus est. Dicuntur autem mancipia, quia manu capiuntur. Serui autem emptitij sunt illi,*

illi, qui pretio emuntur. Vernaculi sunt ij, qui nascuntur ex seruis & ancillis. Denique mercenarij, qui pro constituto salario, siue mercede seruiunt ad tempus, sed alioqui non serui, sed liberi sunt.

Psal. 2.

Psal. 118.

Esther 13.

1. Mach. 8.

Iam igitur omnis homo naturaliter seruus est Dei, à quo factus est, vt vas à figulo, ac proinde potest eum Deus, si velit, confringere, & in puluerem redigere, iuxta illud Psalmi: *Reges eos in virga ferrea, & tamquam vas figuli confringes eos*: & præterea hac ratione non solus homo, sed omnes res creatæ naturaliter seruiunt Deo, iuxta illud, *Omnia seruiunt tibi.* & illud, *Dominus omnium es.* & illud, *Potest Deus vniuersum mundum vno nutu delere.* Et rursus alia ratione omnis homo seruus est Dei: quoniam licet iudicium rationis ex munere Dei fortitus sit, id tamen si compareretur ad iudicium rationis quod est in Deo, omnis homo, quantumuis sapiens inter homines, est veluti infans & lactens puerulus. Eodem modo omnis homo est mancipium Dei, etiam si alioqui magnus in terris sit Princeps: quoniam in bello, quod Christus Imperator noster cum Principe tenebrarum gessit, *captiuam duxit captiuitatem*: id est, eos, qui erant captiui diaboli, fecit Christus victor captiuos suos. Quod ipse Dominus in Euangelio explica-
uit

uit, dicens: *Cùm fortis armatus custodit atrium suum, in pace sunt ea quæ possidet: si autem fortior eo superveniens vicerit eum, uniuersa arma eius auferet, in quibus confidebat, & spolia eius distribuet.* Atrium Principis tenebrarum est infidelitas: eo enim atrio benè munito, omnes qui intus erant, securè possidebantur à diabolo. Sed atrio expugnato, omnia arma diaboli, id est, superbia, auaritia, luxuria, & cetera vitia paulatim erepta sunt, & in eorum locum successerunt virtutes, humilitas, charitas, continentia, & ceteræ. Et tunc demum spolia, id est, homines liberati à potestate tenebrarum, & translati in Regnum Christi, distributi sunt per varias mundi regiones, vt multitudinem gentium ad fidem conuerterent, & Christi Regno adiungerent. Iam verò iidem homines, non solum serui capti in bello, sed etiam serui emptitij facti sunt, quia Christus Dominus eosdem redemit ab ira Dei iusta, pretio Sanguinis sui. Sic enim loquitur Apostolus: *Empti estis pretio magno.* & rursus: *Pretio empti estis, nolite fieri serui hominum.* & sanctus Petrus: *Non corruptilibus auro vel argento redempti estis, sed pretioso Sanguine agni immaculati Christi, & incontaminati.* Addo etiam, nos omnes esse vernas, siue seruos vernaculos Dei, quia filij seruorum & ancillarum

LUC. II.

1. Cor. 6.

1. Cor. 7.

1. Pet. 1.

B

eiusdem

- Psal. 115. eiusdem Dei, dicente Propheta: *Ego seruus tuus, & filius ancille tue.* Denique sumus omnes serui mercenarij, quia non sine magno stipendio seruimus Deo. Primum enim ille nos alit & vestit, & vt Apostolus loquitur, *ipse dat nobis vitam, & inspirationem, & omnia.* Et quasi hoc parum esset, promittit Deus seruis suis mercedem magnam pro omni labore eorum. Sic enim loquitur Ecclesiasticus in extremo libro suo: *Operamini opus vestrum, & dabit vobis mercedem vestram in tempore suo.* & Apostolus Paulus, *Vnusquisque, inquit, propriam mercedem accipiet secundum suum laborem.* Et Dominus ipse de mercede bonorum operum loquens ait: *Mensuram bonam, & confertam, & coagulatam, & supereffluentem dabunt in sinum vestrum.*
- Act. 17.
- Eccli. 51.
1. Cor. 3.
- Luc. 6.

Porro hæc tam multiplex seruitus omnium hominum erga Deum, non pugnat cum potestate Regia, neque in terris, neque in cælo; sicut etiam non pugnat cum vera filiatione, & adoptione. Sanctus enim Ioannes in Apocalypsi beatos homines introducit dicentes: *Fecisti nos Deo nostro Regnum, & Sacerdotes, & regnabimus super terram.* & alibi introducit Christum dicentem: *Qui vicerit, dabo ei sedere mecum in throno meo: sicut & ego vici, & sedi cum Patre meo in throno eius:*

eius : & tamen idem sanctus Ioannes in eodem libro de iisdem dicit : *Ideo sunt ante* Apoc. 7.
thronum Dei, & seruiunt ei die ac nocte. Vbi videmus, eosdem in cælo & sedere in throno, & regnare cum Christo, & simul seruire Deo stantes ante thronum die ac nocte. Et non solum sancti homines, sed etiam sancti Angeli, seruos Dei, & conseruos hominum se esse confiteri non erubescunt, dicente Angelo ad Ioannem : *Conseruus tuus sum, &* Apoc. 19.
fratrum tuorum.

Ex his habemus, Reges & Principes terræ, vt verè & propriè populis suis præsumt, sic etiam verè & propriè seruos esse Dei, & conseruos subditorum suorū, & tales etiam futuros in cælo, si illuc peruenerint, sed felicissima, & omni acceptione dignissima seruitute. Ex qua consideratione illud consequetur, vt pium Principem non erigat in superbiam thronus & corona, neque sceptrum & purpura, sed in eius animum ingeneret consideratio tam multiplicis seruitutis, veram, & profundam, & Christo Domino amatissimam humilitatis virtutem. Ex quo sequetur, vt vicissim ipse Princeps à Deo diligatur, & exaltetur, & sub alis eius securè quiescat. Nihil enim magis placet Altissimo, quàm humilitas virorū magnorum, & nihil magis displicet, quàm superbia

20 De officio Principis Christiani

Isai. 66.

Iac. 4.

Mat. 23.
Luc. 14, &
18.

vilium personarum. Sic enim ipse loquitur per Isaïam: *Ad quem respiciam, nisi ad pauperculum, & contritum spiritu, & tremmentem sermones meos?* Quod aliis verbis docet sanctus Iacobus dicens, *Deus superbis resistit: humilibus autem dat gratiam.* Quorum sententias confirmat Dominus dicens, & sæpè ac sæpiùs repetens: *Omnis qui se exaltat, humiliabitur; & qui se humiliat, exaltabitur.*

Nunc, vt in summâ redigamus quæ scripsimus in his tribus capitibus de officio Principis Christiani erga Deum, dicimus, Principem Christianû, vt ministrum Dei, debere Deo plenam subordinationem; vt filium adoptiuum & heredem Regni cælorum, debere eidem Deo, præter subordinationem, reuerentiam & obedientiam filialem; vt seruum, debere eidem non solum subordinationem, reuerentiam & obedientiam, sed etiam profundam & veram cordis & corporis humilitatem.

C A P. I V.

De officio Principis Christiani erga Summum Pontificem.

SUMMUS Pontifex officio fungitur in Ecclesia vniuersa, Patris, Pastoris, Doctoris, Speculatoris, & summi Sacerdotis. De officio

cio Patris loquitur sanctus Augustinus in epistola ad Glorium & Eleusium, in qua de sancto Melchiade Papa loquens, vocat eum filium Christianæ pacis, & patrem Christianæ plebis. De hoc officio loquitur Cócilium Africanum in epistola ad sanctum Damasum Papam, cum S. Damasum appellat Patrem patrum; & mos est Christiani populi, ut summum Pontificem Patrem sanctum appellet: qua appellatione non vulgus tantum, sed omnes Principes Christiani, etiam summi, utuntur, cum ad Romanum Pontificem scribunt, aut cum eo loquuntur. Iure autem summus Pontifex pater omnium fidelium dicitur, quia ipse est, qui per se vel per alios, per verbum Dei & Sacramentum Baptismi, filios spirituales gignit. Quod enim B. Paulus dicebat Corinthiis, *Si decem millia pedagorum habeatis in Christo, sed non multos Patres: nam in Christo Iesu per Euangelium ego vos genui*, idem dicere potest summus Pontifex fidelibus omnibus: atque ad hoc significandum voluit Deus, ut primus omnium, qui tum ex Iudæis, tum ex gentilibus filios spirituales per verbum Dei & Baptismum genuit, sanctus Petrus fuerit: ipse enim primus, accepto Spiritu sancto in die Pentecostes, publicè Euangelium prædicavit Iudæis, & conuersos ad fi-

Epist. 162

Tomo 1.
Conciliorū
in epistola
Stephani.

1. Cor. 4.



Act. 2.
Act. 10. &
15.

dem baptizari iussit; & ipse idem primus Cornelio Gentili, & eius familiæ prædica-
uit, & credentes iussit baptizari. Pater ergo
patrum Petrus fuit: in cuius locum Pontifi-
ces Romani succedunt. Quod ipsum ritus
declarat; qui in coronatione Pontificis ad-
hibetur, cum Decanus Cardinalium orans
pro Pontifice, vocat eum Patrem Regum ac
Principum Christianorū. Atque hæc etiam
causa est, cur Reges Christiani in creatione
noui Pontificis, Legatos siue Oratores mit-
tant, qui reuerentiam & obedientiam Pon-
tifici recens creato promittant, tamquam
Patri spirituali: ut omnes intelligant, eos
quoque ad familiam Christi pertinere, quæ
est Ecclesia Catholica, cui vice Christi Pon-
tifex Maximus, ut paterfamilias, præsidet.

Alterum officium significatur in nomine
Pastoris, cuius est pascere & nutrire filios
iam natos. Quamuis enim multi sint in Ec-
clesia Pastores, qui verbo & Sacramentis fi-
deles pascunt; tamen omnes à Principe pa-
storum pendent, & ab illo diriguntur: & si
non bene fungantur officio, ab illo remo-
ueri à munere pastoritio possunt. Neque so-
lūm pastores ceteri Principi pastorum sub-
iecti esse debent; sed etiam oues dici possunt
summi Pastoris. Nam ea causa est, cur Do-
minus Petro non solū agnos, sed etiam
oues,

oues, agnorum matres, pascendas commiserit. Et sanctus Hieronymus, qui Sacerdos & Doctor insignis in toto Christiano orbe habebatur, à sancto Damaso Romano Pontifice pabulum spirituale petens, dicebat: *A Pastore praesidium ouis flagito.* & in epistola sequenti, *Flagito, inquit, ut paruum magnus aspicias, ut diues Pastor morbidam non contemnas ouem.* Quòd si pastores & Doctores à summo Pontifice, ut à summo Pastore, pabulū aliquando petunt; non mirum esse debet, si Principes saeculi, qui inter oues, vel potius inter arietes gregis Christi numerantur, ab eodem Principe pastorum, Christi quē in terris Vicario, doctrinae pabulum libenter accipiant.

Ioan. 2.

Tom. 2.
epist. 57.
& 58.

Tertium est nomen, Doctoris, quo nomine vsum fuit Concilium Florentinum, cū in decreto suo Romanum Pontificem appellandum censuit Doctorem omnium Christianorum. Id verò propriè locum habet in doctrina fidei Catholicae, quam non solum docere, sed etiam definire cum potestate debet, ut simul & Doctor & Iudex haberi debeat. Nam quia Dominus sancto Petro dixit, *Ecce satanas expetinit vos ut cri-* Luc. 22.
braret sicut triticum: ego autem rogaui pro te ut non deficiat fides tua: & tu aliquando conuersus confirma fratres tuos; ideo in dubiis

B 4 fidei

24 De officio Principis Christiani

fidei ad sedem Petri recurrendum omnibus est, in qua fides nō potest habere defectum, Epist. 190. vt scribit S. Bernardus; & ad quam perfidia habere non potest accessum, vt loquitur Libro 1. S. Cyprianus. Tale aliquid multo antea do-
 epist. 5. ad
 Cornelium
 Eccl. 12. cuit Salomon, dicens: *Verba sapientium sicut stimuli, & quasi clauī in altum defixi, quae per magistrorum consilium data sunt à pastore vno: his amplius fili mi ne requiras.* Et clariùs in lege definitum est à Spiritu sancto per Moy-
 Deut. 17. sem dicentem: *Qui superbierit, nolens obedire Sacerdotis imperio, qui eo tempore ministrat Domino Deo tuo; & decreto Iudicis, morietur homo ille, & auferes malum de Israel: cunctusq; populus audiens timebit, vt nullus deinceps intumescat superbia.* Loquitur autem Moyses de rebus dubiis in lege Domini & doctrina. Hoc praeceptum Spiritus sancti non obseruarunt quidam Principes Germaniae, quando surrexit Martinus Lutherus, & contra Sacerdotis imperium, qui eo tempore ministrabat Domino, nouas doctrinas in populum seminare coepit: sed illi Principes verè pij seruarūt mandatum Dei, qui cum piissimis Gratiano & Theodosio seniore dixerunt: *Cunctos populos, quos clementia nostrae regit Imperium, in tali volumus religione versari, quam diuum Petrum Apostolum tradidisse Romanis religio vsque adhuc ab ipso*

erga Pontificem Max. LIBER I. 25
ipso insinuata, declarat, quamq̃ Pontificem Da-
masum sequi claret, &c.

Et tanè mirabile est, quòd apud aliquos
Principes plus fidei inuenerit in rebus fidei,
vna ouis errans ab ouili, quàm summus Pa-
stor ab ipso Domino constitutus & Doctor
& Iudex. At, inquires, Lutherus verbum Dei
pro sua sententiâ proferebat. Ita est; sed
cùm de intelligētia verbi Dei quæstio esset,
cur non obseruatum est aliud verbum Dei,
apertissimè docens, vt ad Sacerdotem ire-
tur, qui eo tempore ministrabat Domino
Deo suo? Et posteaquam de consilio sapien-
tum Pastor primarius sententiam dixit, &
Lutherum hæreticum pronuntiauit: vbi est
verbum Dei, quod anteponi doceat hæreti-
cum declaratum ipsi Iudici summo, ab ipso
Domino constituto? Hoc idem dici potest
de Principibus illis, qui Ioannem Calui-
num tamquam nouum Apostolum recepe-
runt, cùm nulla signa sui apostolatus ostē-
dere posset, nisi viuentem hominem verè
mortificatum, quem ex morte ad vitam fal-
sò à se reuocatum credi voluerat: qui si fi-
dem potius habere voluissent Doctori om-
nium Christianorum, à Christo ipso Eccle-
siæ dato, & in cathedra sua collocato, pro
cuius fide vt non deficeret orauerat; certè in
reprobum sensum dati nõ fuissent. Ergo *Re-* *Psal. 2.*

B 5

ges in-

26 De officio Principis Christiani.

Luc. 22.

Math. 16.

ges intelligite , erudimini qui iudicatis terram , illi Doctori fidem habete in contro- uersis fidei, cui Veritas dixit , Rogauit pro te ut non deficiat fides tua ; & illam Ecclesiam requirite, de qua dictum est à Domino: Por- ta inferi non preualebunt aduersus eam.

Lib. 2. de
confider.
ad Euge-
nium.
Ier. 1.

Quartum nomen Pontificis, Speculator est. Ipse enim propterea in altissimo fastigio sedet speculæ pastoralis, ut sanctus Augu- stinus loquitur in ipso principio librorum quattuor ad Bonifacium Papam ; quoniam ad illū pertinet, speculari ex alto quid agant Christiani, ut inde malos admoneat, ut redeant in viam bonam ; & bonos hortetur, ut perseuerent in cursu, & perueniant ad brauium . Huius speculatoris figura fuit propheta Ieremias, sancto Bernardo teste : sic enim loquitur Deus ad Ieremiam : *Ecce constitui te hodie super gentes, & super regna, ut euellas, & destruas, & disperdas, & dissipas, & adifices, & plantes.* Neque significant hæc verba Prophetæ, mandari à Deo, ut bella gerat cum Regnis & Regibus, & ea sibi ar- mis subiiciat ; sed ut in alto sedens obseruet malos mores, & corruptelas omnes Regum & Regnorum, & clamando & vociferando liberrimè increpet vitia, præsertim publica Regum & Principum & populorum ; & pœ- nas à Deo paratas prædicat, & ipse quoque cen-

cenſuris pœniſque aliis coërceat contumaces: & eo modo diſperdat & deſtruat peccata Regum & populorum; & ædificet & plantet virtutes ac mores bonos. Quod

idem clariùs explicat Ezechiel dicens: *Fa-* Ezech. 3.

Etum eſt verbum Domini ad me, dicens: Fili hominis, ſpeculatorem dedi te domui Iſrael, & audies de ore meo verbum, & annuntiabis eis ex me. Si dicente me ad impium, Morte morieris; non annuntiaueris ei, neque locutus fueris, ut auertatur à via ſua impia, & viuat: ipſe impius in iniquitate ſua morietur; ſanguinem autem eius de manu tua requiram. Si autem tu annuntiaueris impio, & ille non fuerit conuerſus ab impietate ſua: ipſe quidem in iniquitate ſua morietur; tu autem animam tuam liberaſti.

Hæc ipſa quæ Dominus de Prophetis, qui prædicatores illius temporis erant, dicit, eadem omnino intelligi debent de Episcopis, ad quos præcipuè pertinet officium prædicationis. Episcoporum autem caput & princeps eſt ſummus Pontifex. Solebant autem Pontifices Maximi, & Episcopi reliqui, quæ mala ex ſpecula cernebant, in concionibus ad præſentes, per litteras ad abſentes nuntiare. Hinc ſanctus Ambroſius in epiſtola ad Theodoſium Imperatorem ſcribit, ſe non poſſe vlllo modo tacere, ſi qua mala facta de ipſo audierit, & ideo æquo ani-

Trid. Cœc.
Sess. 5. c. 2.
& Sess. 24.
de Refor.
c. 4.

Epist. 29.
lib. 5.

animo ferat reprehensiones suas.

2. Tim. 4. Quæ cum ita sint, & Episcopi ac Princeps Episcoporum, cuius totus mundus Diœcesis est, debent & verbo & epistolis non tacere vitia Principum, sed, ut Apostolus loquitur, arguere, obsecrare, increpare, opportunè, importunè, in omni patientia, & doctrina. Sed non minùs Principes debent præbere aures obedientes, & cogitare Pontificibus & Episcopis molestissimè accidere, si quando ad huiusmodi reprehensiones venire cogantur; neque illos sponte hoc agere, sed coactos, tum à comminatione diuina, quæ sanguinem animarum de manu eorum requirendum clamat, nisi denuntient pœnas peccantibus debitas; tum ab ipsa charitate paterna, quæ cogit medelas morbis adhibere, quamuis amaras, ne filij eorum, ac præsertim honorabiliores, miserè pereant. Et certè si Principes Christiani libenter acciperent paternas admonitiones, præsertim ex vera charitate prodeuntes, multa fortasse discerent, quæ ignorant, & multis detrimentis futuris & impendentibus remedia adhiberent, quæ non adhibent, quia non est qui illos admonere audeat. Utinam multos haberemus Theodosios, & multos simul Ambrosios! Iste enim ex charitate nihil vtile tacebat: & ille
ex

ex obedientia libentissimè omnia audiebat,
& executioni mandabat.

Postremum nomē est, Sacerdos Magnus,
siue Pontifex Maximus, quod est nomen
honorificentissimum, vsque adeò, vt etiam
apud Romanos Ethnicos maximi fieret no-

men Pontificis Maximi: quæ causa fuit, vt

Suetonius
in Augusto

Cæsares Augusti Pontifices etiam Maximi
nominari voluerint. Et in Testamento ve-

teri, cum primùm à Moyse, qui simul erat
Princeps & Pontifex, diuisæ sunt istæ po-

testates, & Pontificatus Aaroni, & post eum
Eleazaro collatus fuit, & Principatus Iosue;

Num. 34.
Ios. 14.

ab eo tempore semper præpositus fuit Pon-

tifex Principi; vt ex libro Numerorum &
Iosue potest intelligi. Ratio verò huius ex-

cellentiæ est, quia Pontifex præest rebus di-

uinis, & Princeps rebus humanis: cui etiam
addi potest, quòd regiones Principum terre

definitæ sunt certis prouinciis; regio sub-

iecta Pontifici Maximo, omnes prouincias,
& omnia Regna Christianis subiecta com-

plectitur. Hinc ille Pius Episcopus Pataren-

Liberatus
Abbas in
Breuiario
cap. 22.

sis, cum vidisset sanctum Pontificem Sil-
uerium ab Imperatore hæretico parum ho-
nestè habitum, exclamauit, multos esse Re-
ges in mundo, sed nullum talem, qualis est
ille Pontifex Romanus, qui præest Ecclesiis
totius mundi. Quanta verò sit eminentia

pote-

30 De officio Principis Christiani

potestatis Pontificiæ super potestatem Regum & Principum terrenorû, docent multi Patres. Sed ego hoc loco contentus ero testimonio sancti Bernardi, qui sic loquitur ad Epist. 183. Imperatorem Conradum: *Legi, inquit, Omnis anima potestatibus sublimioribus subdita sit; & qui potestati resistit, Dei ordinationi resistit. Quam tamen sententiam cupio vos & omnimodis moneo custodire in exhibenda reuerentia summa & Apostolica Sedi, & B. Petri Vicario, sicut ipsam vobis vultis ab vniuerso seruari Imperio.* hæc ille, qui Pontificem Petri Vicarium nominat, non quòd non sit Christi Vicarius, sed quòd Vicarium pro successore acceperit. Nam in secundo libro de Consideratione aperte vocat eundem Pontificem, potestate Petrum, & vnctione Christum.

C A P. V.

De officio Principis Christiani erga Episcopum proprium.

BEATA ciuitas, cui ex magno dono Dei contigit, vt haberet Principem pium, & Episcopum sanctum, & qui inter se coniuncti animis & studiis, toti essent in populo sibi commissio rectè gubernando occupati. Sed vtinam non quotidie audiremus Principes cum Episcopis rixantes, vel de præcedentia,

dentia, vel de emolumentis temporalibus, quasi non essemus Christiani, & non quotidie in templis audiremus magistrum Deum nobis dicentem: *Qui se exaltat, humiliabitur; & qui se humiliat, exaltabitur. & Discite à me, quia mitis sum, & humilis corde. & Qui maior est in vobis, fiat sicut minor; & qui praeceptor est, sicut ministrator.* Hæc autem est veritas, (quidquid introduxerit in variis locis vel ambitio vel consuetudo) Episcopus est Pater, & Pastor, & Doctor tam Principis quàm reliqui populi: & secundùm hæc nomina Princeps subiectus esse debet Episcopo, non Episcopus Principi. Quamvis enim illa nomina magis conueniant summo Pontifici, quàm particularibus Episcopis: tamen nemo negare potest, quin pater sit honorabilior filio, & pastor ouibus, & Doctor discipulis; & Episcopo cuicumque nomina illa rectè conuenire erga eos omnes, qui ad eius curam & prouidentiam pertinent. Præterea Episcopus in Ecclesia sedet in throno, & ad altare Sacerdotio fungitur, quæ Principi nulla ratione conueniunt. Habemus præterea multos grauissimos Auctores, qui de excellentia dignitatis Episcopalis ita disputant, vt ostendant, Principum terrenorum eminentiam cum Episcopali fastigio nulla artione comparari posse. Hi sunt, S. Gregorius

Mat. 23.
Luc. 14. &
18.
Mat. 11.
Luc. 22.

30 De officio Principis Christiani

potestatis Pontificiæ super potestatem Regum & Principum terrenorū, docent multi Patres. Sed ego hoc loco contentus ero testimonio sancti Bernardi, qui sic loquitur ad Epist. 183. Imperatorem Conradum: *Legi, inquit, Omnis anima potestatibus sublimioribus subdita sit; & qui potestati resistit, Dei ordinationi resistit. Quam tamen sententiam cupio vos & omnimodis moneo custodire in exhibenda reuerentia summa & Apostolica Sedi, & B. Petri Vicario, sicut ipsam vobis vultis ab vniuerso seruari Imperio.* hæc ille, qui Pontificem Petri Vicarium nominat, non quòd non sit Christi Vicarius, sed quòd Vicarium pro successore acceperit. Nam in secundo libro de Consideratione aperte vocat eundem Pontificem, potestate Petrum, & vnctione Christum.

C A P. V.

De officio Principis Christiani erga Episcopum proprium.

BEATA ciuitas, cui ex magno dono Dei contigit, vt haberet Principem pium, & Episcopum sanctum, & qui inter se coniuncti animis & studiis, toti essent in populo sibi commisso rectè gubernando occupati. Sed vtinam non quotidie audiremus Principes cum Episcopis rixantes, vel de præcedentia,

entia, vel de emolumentis temporalibus, uasi non essemus Christiani, & non quotie in templis audiremus magistrum Deum uobis dicentem: *Qui se exaltat, humiliabitur; & qui se humiliat, exaltabitur.* &: *Discite à me, quia mitis sum, & humilis corde.* &: *Qui maior est in uobis, fiat sicut minor; & qui precessor est, sicut ministrator.* Hæc autem est veritas, (quidquid introduxerit in variis locis vel ambitio vel consuetudo) Episcopus est Pater, & Pastor, & Doctor tam Principis quàm reliqui populi: & secundùm hæc nomina Princeps subiectus esse debet Episcopo, non Episcopus Principi. Quamuis enim illa nomina magis conueniant summo Pontifici, quàm particularibus Episcopis: tamen nemo negare potest, quin pater sit honorabilior filio, & pastor ouibus, & Doctor discipulis; & Episcopo cuicumque nomina illa rectè conuenire erga eos omnes, qui ad eius curam & prouidentiam pertinent. Præterea Episcopus in Ecclesia sedet in throno, & ad altare Sacerdotio fungitur, quæ Principi nulla ratione conueniunt. Habemus præterea multos grauissimos Auctores, qui de excellentia dignitatis Episcopalis ita disputant, ut ostendant, Principum terrenorum eminentiam cum Episcopali fastigio nulla actione comparari posse. Hi sunt, S. Gregorius

Mat. 23.
Luc. 14. &
18.
Mat. 11.
Luc. 22.

32 De officio Principis Christiani

rius Nazianzenus, & S. Ioannes Chrysostomus, Græci; S. Ambrosius, & S. Gregorius, Latini.

S. Gregorius Nazianzenus in Oratione ad Ciues suos timore perculsos, & Principem irascentem, *An me, inquit, liberè loquentem, aequo animo feretis? Nam vos quoque mea potestati meisq; subselliis lex Christi subiecit. Imperium enim ipsi quoque gerimus; addo etiam, præstantius & perfectius. Nisi verò æquum sit, spiritum carni fasces submittere, aut caelestia terrenis cedere.*

S. Ioannes Chrysostomus libro tertio de Sacerdotio sic loquitur: *Sacerdotium Regno tanto est excellentius, quantum spiritus & carnis interuallum esse potest.* & hoc multis argumentis probat. Loquitur autem de summo Sacerdotio, id est, de Episcopatu. Ex multis rationibus vnā præterire nolo: *Habent, inquit, & terrestres Principes vinculi potestatem; verum corporum solum: id autem quod dico Sacerdotis vinculum, ipsam animam contingit, atque ad calos vsque pervadit.* Et infra: *Nam quasi iam in calum translati, ac supra humanam naturam positi, atque à nostris affectibus exempti, sic illi ad principatum istum perducti sunt. Quid multa? Rex aliquis si cui ex subditis honorem hunc detulerit, ut potestatem habeat quoscumque volet in carcerem coniiciendi,*
eos-

eosdemq; rursus laxandi, beatus ille & admirandus iudicio omnium fuerit: at verò qui à Deo tanto maiorem accepit potestatem, quanto calum terra pretiosius est, quanto etiam animæ corporibus præstant, hic vilem dignitatem accepisse videri potest?

S. Ambrosius in libro De dignitate Sacerdotali cap. secundo, *Honor, inquit, & sublimitas Episcopalis nullis poterit comparationibus adæquari. Si Regum fulgori compares, & Principum diademati, longè erit inferius, quàm si plumbi metallum ad auri fulgorem compares. Quippe cùm videas Regum colla & Principum submitti genibus Sacerdotum, & exosculatis eorum dextris, orationibus eorum credunt se communiri.*

S. Gregorius in epistola ad Mauritium Imperatorem, quæ est trigesima prima libri quarti, *Quid mirum, inquit, si illos vestra pietas dignetur honorare, quibus in suo eloquio honorem tribuens, eos aut Angelos, aut Deos ipse etiam appellat Deus? Ecclesiastica quoque testatur historia, Quia cùm pia memoria Constantino Principi in scripto oblata accusationes contra Episcopos fuissent, libellos quidem accusationis accepit, & eosdem qui accusati fuerant Episcopos convocans, in eorum conspectu libellos quos acceperat, incendit, dicens: Vos Dij estis, à vero Deo constituti; ite, & inter vos causas*

C vestras

34 *De officio Principis Christiani.*

vestras discutite , quia dignum non est , ut nos iudicemus Deos.

Sed si haberemus sanctos Episcopos, non egeremus eiusmodi testimoniis. Ipsa enim sacra potestas cum vera sanctitate coniuncta, cogit ad sui venerationem non solos Principes minores, sed etiã summos. Certè Magnus Constantinus, cùm Concilio Episcoporum interesse vellet, non solum sublime sibi erigi voluit, sed parvam sedem: neque antea sedit, quàm Episcopi illi annuissent ut sederet. Et cùm aliàs ad concionem in templo interesse vellet, vbi solus Episcopus, qui concionabatur, sedebat in throno, & populus de more illius temporis stabat, oblata est sedes Imperatori; sed recusauit, & cum reliquo populo semper stare voluit. Vide Eusebium in Vita Constantini libro 2. cap. 10. & libro 4. cap. 33. Sanctus Martinus Episcopus Turonensis sic honoratus est ab Imperatore Maximo, ut in conuiuio ipsi etiam Imperatori præpositus fuerit. Et sanctus Patritius Episcopus Hibernorum sic Regibus imperabat, ac si verè parens & dominus ipsorum esset. De sancto Dunstano Archiepiscopo Cantuariensi scriptum est in Vita ipsius, id quod non meis verbis, sed Auctoris historię referre volo. *Quadam vice Rex in Monasterium virginũ venit, ibiq; captus amore cuius-*

cuiusdam puella, quæ inter Moniales non vela-
 ta nutriebatur, eam ad suum colloquium adduci
 secretius voluit. Illa cum duceretur, timens pu-
 dori suo, raptum ab una Sanctimonialium, capi-
 ti suo velum imposuit, eo modo se protegi spe-
 rans, si fortè Rex quid inhonestè ab ea exigere
 vellet. Quam ipse velatâ intuens, Quàm subi-
 to, inquit, sanctimonialis effecta es, arreptumq;
 velum ab ea detraxit; illa conatu, quo poterat,
 frustra obnitente, sic illa abusus est. Vbi verò
 res Dunstano innotuit, acerbo mærore percussus
 est. Igitur cum in re non segnis ad Regem ve-
 niret, & ille venienti pro more occurreret,
 eumq; per manum ad solium suum perducere
 vellet, manum Dunstanus turbato vultu retra-
 xit, nec eam ab homine contingi passus est. Ad
 quod ille attonitus, (non enim illum scire puta-
 bat quod clanculò à se factum existimabat) cur
 manum sibi non daret, inquirebat. Sed Dunsta-
 nus ad eum ait: Tu postposito omni pudore adul-
 terium commisisti; tu despecto Deo, signum ca-
 stitatis non veritus, nunc virgini suam integri-
 tatem præripuisti; & cur manum, summo Patri
 Virginis filium immolantem, impuris manibus
 tuis non tradam, quæris? Laua prius per pœni-
 tentiam manus tuas à sordibus tuis, & tunc de-
 mum quò gratiæ reconcilieris, honora & am-
 plectere manum Pontificis. Territus ille ad hac,
 terra procumbit, pedes Antistitis petit, se pec-

36 De officio Principis Christiani

casſe, gemitu verba interrumpente, conteſtans. Quod Dunſtanus videns tantum in Rege humilitatis exemplum, eum amplectitur, & erigit, & quæ ad ſalutem animæ operarentur, loquens, ſeptennem ei pœnitentiã iniunxit. Hic Lector primùm obſeruet, Epifcopo veniente, Regem non in cubiculo eum expectaſſe; ſed illi occuſſiſſe, manum porrexiffiſſe, atque ad ſolium deducere voluiſſe: deinde Regem ad reprehentionem publicam non iratum ex-canduiffiſſe, ſed humiliſtratũ, pedes Epifcopi cum lacrymis & ſingultibus apprehendiſſe; pœnitentiam ſeptem annorum libentiſſimè acceptaſſe; & quod in hiſtoria ſequitur, multis bonis operibus ſuperadditis, peccatum illud expiaſſe.

Multa eiufmodi adduci poſſent de ſanctis Epifcopis, quos Reges & Principes terrę, vt par erat, in honore maximo habebant: quos ſi temporis noſtri Epifcopi imitari velint, non erit, cur de Principibus ſæculi conquerantur. Verè enim non deeſſent multi Theodoſij, ſi multos haberemus Ambroſios.

C A P.

C A P. VI.

*De officio Principis Christiani
erga suum Confessarium.*

SACERDOS Principis Confessarius , non sine ratione ponitur à nobis inter eos, quos ut suos superiores Princeps Christianus venerari debet. Siquidem Sacerdos in audiendis confessionibus pœnitentiũ , quicumque illi sint, siue Principes, siue priuati, Iudex est loco Dei , & potestatem habet in foro conscientie ligandi & soluendi : cuius potestatis signum euident est, quod in eo iudicio Sacerdos sedet capite tecto ; pœnitens autem quicumque ille sit, etiam si Rex , aut Imperator, genibus flexis, & capite detecto, corde contrito & humiliato , ut reus læsæ maiestatis diuinæ, absolui petit. Porro salus æterna Principis, mirum in modum à Confessario pender ; & leguntur exempla non pauca horroris plena Confessariorum , qui cum ipsis suis Principibus ad gehennæ supplicia destinati feruntur. Magnum omnino opus est, Principum conscientias regere, & requirit hominẽ non solum valdè peritum, sed etiam valdè prudentem , & valdè fortem, & quod caput est, qui nihil cupiat, nihil ambiat, nihil quærat, nihil velit omnino

nisi salutem æternam Principis sui, & populorum eius.

Sed vt per partes de hoc officio differamus, Confessarius duas gerit personas, Iudicis, & Medici; & Princeps duas alias, priuatam, & publicam. Confessarius, vt Iudex loco Dei, non debet nec potest absolvere à peccatis, nisi videat pœnitentem suum verè esse pœnitentem. Nam si fortè non vult dimittere id quod illum in cœno peccati detinet; certè fingit pœnitentiam, non agit, cùm peccatum confitetur. Quòd si Confessarius non audet absolutione negare tam magno viro, audiat Spiritum sanctum clamantem:

Eccli. 7.

Noli fieri iudex, nisi valeas virtute irrumperè iniquitatem, ne fortè extimescas faciem potentis. quod idem in multis aliis peccatis locum habebit. Sic etiam non potest Confessarius absolvere pœnitentem, nisi confessionem integram faciat: non autem est integra confessio Principis, si peccata confiteatur, quæ ad ipsum, vt priuatum hominem, pertinent, vt peccata gulæ, luxuriæ, inuidentiæ, & alia id genus; peccata verò quæ fecit vt Princeps, fortè non agnoscat. Non desunt enim Principes, qui quod ad personam propriam attinet, piissimi & iustissimi sunt, sed peccata ministrorum suorum principalium, qui Rempublicam administrant, nesciunt quidem,

dem, & interim opprimuntur pauperes, peruertuntur iudicia, scandalizantur pusilli; & ignorantia Principis non excusat illum apud Deum, nisi fortè sit inuincibilis. Debet enim seriò cogitare quos habeat administratos, & inuestigare quomodo se gerant, & quemadmodum Rempublicam administrarent.

Confessarius igitur, qui est Iudex loco Dei, non debet esse contentus ea confessione quam facit Princeps vt homo priuatus, præsertim si ex fama publica, vel aliunde nouit quàm malè administrati sui in Republica administràda se gerant. Quòd si Confessarius ipse timet administratos illos offendere, audiat Spiritum sanctum dicentem: *Noli Eccli. 7. fieri iudex, nisi valeas virtute irrumperè iniquitatem, ne fortè extimescas faciem potentis.*

Denique non potest Confessarius absolvere pœnitentem suum, quantumuis magnum Principem, nisi satisfacere seriò sit paratus: nec solùm satisfacere Deo per iuncta ieiunia, eleemosynas, preces, & alia pœnitentiæ opera; sed etiam satisfacere ijs quibus fortè debet in restituenda fama, in resarciendis detrimentis, in ære alieno soluendo, in stipendiis suo tempore non tributis. Sæpè enim Principes multa debent subditis, quæ illi exigere non audent, ne fortè

iram Principis incurrant. Hic verò vigilare debet iustitia Iudicis, qui locum Dei tenet; ne fortè ipse audiat in exitu de hac vita: Cur fieri voluisti Iudex, cùm non valeres virtute irrumperè iniquitatem, & cùm extimesceres faciem potentis? Atque hæc de Confessario, vt Iudex est.

Addamus aliquid de eodem Confessario, vt Medicus est. Medicus animarum nullus esse deberet, nisi ipse optimè valeret, ne fortè dicatur illi, *Medice cura te ipsum*. Ideò qui ambiunt confessiones Principum audire, hoc ipso digni sunt qui repellantur, vtpote qui morbo grauissimo laborant; & quod miserabilius est, morbum suum in se ipsi non agnoscunt. Itaque sapiens Princeps, & qui de salute æterna sollicitus est; primùm omnium Confessarium quærat, qui hoc officium numquam ambiuerit. Deinde qui ex publica fama, & ex priuata informatione, verè pius, id est verè sanus à morbis vitiorum sit. Ad hæc, vt peritus sit medicinæ spiritualis, nec solùm legerit quæ scribunt Theologi de Sacramento Pœnitentiæ, & de casibus quos vocant conscientiæ, sed etiam praxim & vsum nouerit huius doctrinæ. Prætereà, vt non sit frequens in Aula, nec se immisceat negotiis aulicorum, ne & ipse ex medico animarum, aulicus & curialis fiat. Denique,

vt

vt cum vera humilitate & sanctitate coniunctam habeat modestam libertatem admonendi Principis; neque timeat expelli ab officio Confessarij; quin potius gaudeat, si hoc acciderit, se à tam periculoso onere liberatum. Et si fortè videat, se in aliquo Principe operam perdere, quòd suis iustis admonitionibus acquiescere nolit; ipse facultatem abundi humiliter petat, & etiam non obtentam, per se arripiat: minùs enim graue est, iram Principis mortalis sustinere, quàm Dei.

Atque vt hæc Confessarius efficere possit, oportebit, vt Princeps aditum & libertatem Confessario tribuat, vt se fidenter moneat, & pro ratione officij sui imperet, quæ necessaria sunt ad salutem, nec metu ac reuerentia retardetur. Illud quoque necessarium esse videtur, vt Confessarium Princeps admoneat, ne se admisceat gubernationi, aut negotiis status, vel regendæ familiæ domesticæ, nisi ab ipso Principe consilium ab eo petatur; multo minùs, ne officia publica, aut Magistratus pro aliquo petat. Sic enim erit minùs odiosus alijs, minùsq; superbus; gratus omnibus, nulli molestus. Denique si Confessarius sit regularis, caueat Princeps, ne illum subducatur ab obedientia Prælatorum, neque ab obseruantia regulari, neque

occasionem ullam ei præbeat dominandi inter suos , vel ambiendi prælaturas . Id enim neque Principi , neque Religioni , neque Confessario expedit : sed omnibus , atque in primis ipsi Principi nocet , cui religiosissimus atque optimus Confessarius necessarius est.

C A P. VII.

De charitate paterna Principi necessaria ad regendos populos.

EXPOSUIMVS breuiter, quod sit officium Principis Christiani erga superiores: sequitur nunc , vt explicemus officium eiusdem erga inferiores, qui sunt multi ; sed ad sex ordines reuocari possunt, videlicet ad populos, ad domesticos, ad amicos & consiliarios, ad iudices , ad milites, & famulos.

Quod ad primum attinet, considerandum est diligenter , quæ sint virtutes , quæ requiruntur, vt Princeps officio suo ritè fungatur . Et quamuis virtutes plurimæ requirantur ad benè regendos populos , tum secundum Scripturas sanctas, tum secundum leges Philosophorum ; tamen vna est principalis, quæ secum alias omnes trahit . Ea dici potest charitas paterna, quam vt administrare

nistræ sequentur virtutes Cardinales, prudentia, iustitia, fortitudo, temperantia, quæ sunt communes Principi cum populo; denique aliæ Principum propriæ, sapientia, magnificentia, clemētia, misericordia, quas in Deo Regum omnium Rege Scriptura sacra frequentissimè commendat.

Incipiamus à Charitate paterna, quæ nobis tam à Philosophis, quàm à Theologis, & ab ipso Deo in sacris eloquiis sic laudatur, ut sola sufficere videatur. Charitatem paternam esse Principi in primis necessariam, docet Philosophus in libro de Moribus Lib. 8. Ethic. cap. 1. octauo: ubi ponit differentiam inter Regem & Tyrannum; quòd Tyrannus in omnibus quærat quæ sua sunt, Rex verò quæ sunt populi: siue quòd finis propositus Tyranno sit utilitas propria, finis propositus Regi sit utilitas Reipublicæ: & quòd Tyrannus habeat subditos pro mancipiis, Rex habeat pro filiis: denique quòd regimen Tyranni sit despoticum, gubernatio Regis sit politica. Hoc ipsum sensisse Romanos, perspicuum est ex eo, quòd Senatores, apud quos erat magna ex parte regimen Reip. dicebantur Patres conscripti: & cùm regimen tempore Augusti redactum esset ad Imperium vnus, ille vnus Pater patriæ amabat dici, iuxta illud Horatij: *Hic ames dici Pater,*
atque

atque Princeps. & deinceps ex nominibus honorificis quę dabatur Principi recens electo, vnum erat Pater patrię, vt cognosci potest ex Lampridio in Vita Alexandri Seueri. Hinc est illa sententia Senecę in primo libro de Clementia: *Vnum est inexpugnabile munimentum, amor ciuium. Quid haeres? frustra te terrore succinxeris, nisi septus charitate fueris; armis enim arma irritantur.* Cui similis est illa Marci Antonij Imperatoris apud Herodianum: *Neque enim aut pecunię vis, aut stipantia satellitum agmina tueri Principem possunt; nisi illi ipsi quos regas, animum imperanti beneuolentiámque accommodent.*

1. Tim. I.

Rom. 12.

Sed quidquid sit de Paganis, certè apud Christianos omne bonum regimen super charitate fundari debet sic, vt in primis detur opera ab his qui regunt populos, vt ametur Deus propter se, & proximus propter Deum. Nam *finis omnis precepti charitas*, inquit Apostolus. & rursum: *Omne mandatum in hoc verbo instauratur, Diliges proximum tuum sicut teipsum.* & in eodem loco: *Dilectio proximi malum non operatur; plenitudo ergo legis est dilectio.* Adde, quòd Regna terrena, si benè gubernanda sint, respicere debent ad regnum cæleste, quod est exemplar omnis boni regiminis. In Regno verò

verò cælorum vna viget charitas pro omnibus legibus & statutis: nam ideò dicuntur omnes plateæ cælestis Ierusalem esse ex auro purissimo, quo charitas significatur. De- Apoc. 21.
bent igitur omnes Principes, si benè regnare cupiunt, ex vera & magna charitate paterna diligere omnes homines sibi subiectos vt filios, non vt seruos, non vt extraneos; ac per hoc operam dare vt non grauentur à Præsidiis prouinciarum, neque à Gubernatoribus ciuitatum, neque ab vllis Iudicibus præter iustitiam; & non imponantur vectigalia non necessaria, vt quietam & tranquillam vitam ducant. Hoc obseruauit Tiberius II. Imp. cuius vitam descripsimus in secundo libro accuratissimè, & ideò amatus fuit à populis ardentissimè, vsque ad mortem.

Narrat Eusebius Cæsariensis in libro primo de vita Constantini Magni, patrem eius Constantium, qui vnus erat ex Cæsaribus, & regebat Britaniam, & aliquas alias partes Imperij, reprehensum fuisse per homines ad eum missos à Diocletiano Imperatore, quòd non haberet ærarium pecuniis satis refertum. Ille verò respondit, post triduum se demonstraturum, habere se ærarium refertissimum auro & argento, & fortasse magis copiosum, quàm ipse Diocletianus haberet.

beret. Verè enim Constantius vir erat optimus, & populorum suorum amator, quos proinde non vexabat nouis vectigalibus vel tributis; & propterea vicissim à populis, & præsertim à potentioribus, vehementissimè diligebatur. Significauit igitur amicis suis locupletibus, se indigere pecuniis ob aliquà ingruentem sibi necessitatem: continuò verò tantæ ad eum peruenere pecuniæ, vt ærarium plenissimum redderetur. Ergo ad diem conditum ostendit iis, quos Diocletianus miserat, ærarium plenum, & ait: *Referte hoc Diocletiano Imperatori*. Sed ego arbitror eum significare voluisse, verum ærarium esse amorem populorum; & vim ac robur Imperij non esse positum in multis pecuniis, sed in fide & charitate subditorum: amor autem amore conciliatur: proinde qui velit Imperium stabile & forte, curet, vt ciues & milites, & reliqui Imperio subiecti, intelligant Principem esse patrem, seque ab eo vt à vero parente diligere; & tutissimum erit Imperium. Hæc sententia erat Constantij viri quidem nondum Christiani, sed prudentis & probi, & qui Christianos non persequabatur vt collegæ eius omnes faciebant; & ea fortasse causa fuit, vt ipse ante obitum in verum Deum crederet, & vt filius eius Constantinus diuino miraculo
ad

ad fidem Christianam vocaretur ; & non partem Imperij , vt eius parens, sed totum omnino multis annis felicissime gubernaret, & filiis suis post se gubernandum relinqueret. Hæc igitur prima virtus, quæ est regina virtutum , cordi sit Principibus : ament populos, vt filios; & pacem, & abundantiam illis procurent: non sinant eos à Præsidibus & Iudicibus iniuste vexari. Si enim populi intelligent à Principe se amari; & ipsi vicissim Principem suum diligant, & pro eo facultates suas, & vitam ipsam, si fuerit opus, exponant. Sic Moyſes populum suum, ex vera charitate, vt filios diligebat, cùm Deum contra eos iratum alloquebatur, dicens: *Aut dimitte eis hanc noxam, aut si* Exod. 32. *non facis, dele me de libro tuo quem scripsisti.* Sic etiam Dauid Moyſis æmulator, videns populum ab Angelo Domini gladio feriri, clamabat: *Ego sum qui peccaui, ego iniquè egi;* 2. Reg. 24. *isti, qui oues sunt, quid fecerunt? Vertatur, obsecro, manus tua contra me.* Vterque autem facile obtinuit quod petebat; *Deus enim* 1. Ioan. 4. *charitas est, & charitatem diligit in omnibus* sed in Principibus maxime, qui Dij in Scripturis vocantur. Psal. 81.

CAP. VIII.

*De prudentia Principi necessaria
ad regendos populos.*

PRUDENTIA virtus est Cardinalis , sed Principi in regimine populorum in primis necessaria ; quemadmodum obedientia necessaria est subditis , vt rectè omnia fiant. Hinc Dauid filio suo Salomoni Regi , tunc primùm inuncto , precatur à Deo virtutem illi in primis necessariam , dicens : *Det tibi Dominus prudentiam & sensum , vt regere possis Israel , & custodire legem Domini Dei tui : tunc enim proficere poteris , si custodieris mandata & iudicia , quæ præcepit Dominus Moyfi.* Vbi sanctus Dauid prudentissimè docuit filium suum , prudentiam non solum esse necessariam ad regendos alios , sed etiam ad regendum se. Qui enim se ipse regere nescit , quomodo alios regere sciet ? Prudentia verò ad se regendum necessaria , illa est , quæ docet , seruandâ esse in primis legem Domini. Siquidem prudentia virtus est , quæ dirigit media ad finem. Porro finis noster est vita æterna : medium ad hunc finem est observatio mandatorum , dicente Domino : *Si vis ad vitam ingredi , serua mandata.* Ideò rectissimè Dauid docuit filium suum , in hoc sitam esse

1. Paral. 22.

Mat. 19.

esse veram prudentiam vniuscuiusque nostrum, ut pro viribus contendamus custodire quàm accuratissimè leges & mandata Domini; & postea regamus eos qui nobis subiecti sunt, efficiendo pro viribus, ut etiam ipsi per obseruantiam mandatorum diuinorum currant ad finem, ad quem à Deo conditi sunt, qui est felicitas sempiterna. Hæc est prudentia quam Spiritus sanctus prudentiam iustorum appellat; & distinguitur à Luc. 1; prudentia carnis, quam mortem esse dicit Apostolus, quia ad mortem æternam perducit; & non prudentia, sed astutia dici deberet. Prudentia enim vera, secundum eundem Apostolum, est prudentia spiritus, quæ Rom. 8. vitam & pacem adducit. Rom. 3.

Princeps ergo Christianus sequatur Regem Dauidem; verè prudentē; non Regem Ieroboam, astutum potius quàm prudentem. Dauid Rex sanctus docuit filium suum, ut secundum prudentiam iustorum mandata Domini obseruaret, & obseruari à subditis suis iuberet: quæ sunt vera media ad verum finem, qui est vita sempiterna. Ieroboam Rex callidus astutè cogitans, populos suos à se faciliè recessuros, & ad Regem Iuda 3. Reg. 12. reuersuros; si irent in Ierusalem ad sacrificia offerenda, & ad Deum patrum suorum adorandum secundum legem Moysis; erexit

D aliud

aliud altare in Bethel, & vitulos aureos fabricauit in deos, & proclamauit: *Ecce dñi tui Israel*. Itaque vt conseruaret Regnum, abiecit veram Religionem, & introduxit idololatriam. Hæc est prudentia huius sæculi, quæ propter temporalia negligit sempiterna; & quia non est consilium contra Dominum, vtraque breui tempore amisit. Nam propter hoc peccatum Ieroboam, quod successores eius imitati sunt, breui totum illud Regnum euersum est. Venit enim Salmanasar Rex Assyriorum, & in carcerem coniecit Regem; & totum populum cum ipso Rege transtulit in Assyrios, vnde numquam amplius redierunt. Hunc exitum habuit versutia politica Regis Ieroboam, & successorum eius: corripit Religionem, vt conseruaret Regnum, & breui vtrumque perdidit, neque vnquam recuperauit.

4. Reg. 12.

Hanc astutiam Ieroboam imitati sunt Scribæ & Pharisei, cum Principe Sacerdotum Caipha: sciebant enim, neque vlllo modo negare poterant, Iesum Nazarenum, verum esse Messiam in Lege promissum, & à Prophetis omnibus prænuntiatum: neque negare poterant, ab eo, præter alia signa innumerabilia, cæcum natum fuisse curatum; & Lazarum ante quatuor dies mortuum & sepultum, coram ingenti multitudine ad vitam

tam solo verbo reuocatum : tamen ne prætextu noui Regis, Romani Imperatores bellum eis inferrent, & ex propria ciuitate pellerent ; persuasit illis Caiphas, expedire, vt Messias falsis criminibus obrutus, occideretur, ne ciuitatem & Rempublicam illam suam, qualiscumque tunc esset, amitterent. Christum igitur occidi non solum passi sunt, sed ipsi Pilatum Iudicem suis clamoribus & minis, vt eum occidi iuberet, compulerunt. Et quid tandem ista eorum stulta prudentia, & ne status eorum politicus mutaretur anxia sollicitudo, consecuta est? Christum quidem Saluatorem amiserunt, sed statum suum politicum non conseruauerunt. Breui enim, ira Dei illos persequente, ciuitas illa, ob quam conseruandâ Dei Filium occiderunt, à Romanis capta, & funditus euersa est : & habitatores eius vel occisi, vel capti, vel dispersi fuerunt: Christus autem resurrexit triumphator mortis & inferni, & orbem terræ fidei, & imperio suo subiecit: & adhuc non intelligunt homines, quàm inanis sit falsorum politicorum illa versutia, quæ vera prudentia dici & haberi cupit.

Ad hæc duo exempla falsæ prudentiæ, addam vnum prudentiæ veræ. Constantius pater Magni Constantini, de quo supra locuti sumus, cum audiuisset à Diocletiano &

Euseb. lib. 5
de vita
Constantini
cap. 11.

Maximiano cogi Christianos, ac præsertim Palatinos, ut Christum abnegarent; finxit ipse quoque velle, ut ex palatio suo illi exirent, qui fidem Christi abnegare nollent. Itaque iussit illis significari, ut qui secum esse vellent, Christo renuntiarent. Multi qui rem gratam se facturos Principi arbitrabantur, si Christum abnegarent, promptos se ad abnegandum exhibuerunt. Sed prudens Imperator omnes illos abiecit, qui Christo renuntiare parati erant, dicens: Si Deo fideles non fuistis, quando sperare potero, ut mihi, quem hominem mortalem esse non dubitatis, fideles futuri sitis? Hoc igitur documentum est veræ prudentiæ, ut sinceris & probis hominibus confidamus, à perfidis & proditoribus, quamvis nobis amicissimi videantur, penitus caueamus.

C A P. I X.

*De iustitia Principi necessaria
ad regendos populos.*

IUSTITIA multis modis tum in Scripturis sanctis, tum in libris Philosophorum & Theologorum accipi solet. Sed ad rem nostram duæ significationes maximè faciunt. Prior, qua per iustitiam intelligitur communis virtus, quæ leges omnes adimpler, secundum

dùm quam is dicitur iustus, qui est probus, quiq̃ue leges omnes adimplet, de qua disputat Philosophus in libro quinto de Moribus: & hanc sanctus Augustinus in libro de natura & gratia propè extremo scribit, esse eandem virtutem cum charitate, cum qua iniquitas esse non potest. De hac loquitur sanctus Lucas in principio Euangelij sui, cùm de Zacharia & Elisabeth dicit: *Erant Luc. 1. iusti ambo, incedentes in omnibus mandatis & iustificationibus Domini, sine querela.* Et Dominus in sermone suo, què habuit in monte, *Beati qui esuriunt & sitiunt iustitiam.* & in Mat. 5. iudicio, *ibunt hi, id est, iniusti, in supplicium Mat. 25. aeternũ; iusti autem in vitam aeternã.* & S. Ioannes in Epistola prima, *Filioli, inquit, nemo 1. Ioan. 3. vos seducat; qui facit iustitiam, iustus est: qui facit peccatum, ex diabolo est, quoniam ab initio diabolus peccat.* Et in eodem loco paulò superius: *Omnis qui facit peccatum, & iniquitatem facit; & peccatum est iniquitas.*

Altera significatio iustitiæ magis angusta illa est, quæ iustitiam particularem designat, secundum quam diriguntur commutationes rerũ, vel distribuuntur pro meritis præmia. Et quidem iustitia omnibus modis ad Principem maximè pertinet. De priore dicit Sapiens in Prouerbiis: *Abominabiles Regi, Prou. 16. qui agunt impiè, quoniam iustitia firmatur so-*

Ierem. 23. *lium.* De posteriore scribit Ieremias: *Regnabit Rex, & sapiens erit; & faciet iudicium & iustitiam in terra.* Porro, Principem debere esse exemplar omnis iustitiæ, ac præcipuè iustitiæ generalis, docent omnes qui de his rebus scripserunt Auctores sacri & profani.

Deut. 17. Primus Moyses præueniens creationes Regum, dat eis præcepta, vt legant assiduè legem Domini, vt discant timere Dominum, & custodire mandata eius omnibus diebus vitæ suæ, & non eleuentur in superbiam super fratres suos, & non declinent in partem dexteram, vel sinistram.

Psal. 2. Deinde Dauid in Psalmo secundo, *Et nunc*, inquit, *Reges intelligite, erudimini qui iudicatis terram; seruite Domino in timore, & exultate ei cum tremore.* Salomon in Prouerbiis præter alia admonet Reges sobrietatis, dicens: *Noli Regibus dare vinum, quia nullum secretum est ubi regnat ebrietas; & ne forte bibant & obliuiscantur iudiciorum, & mutant causam filiorum pauperis.*

Prou. 31. Et liber Sapientiæ vehementissimè reprehendit malos Reges: quod ipsum liberrimè fecerunt omnes Prophetæ, etiam si scirent sibi propterea carceres & vincula, & mortes horribiles, esse parata. Sed ne ipsi quidem! Scriptores Ethnici tacuerunt, Principes debere esse viros optimos, & custodes legum, & exemplaria om-

nium

nium virtutum. Nota est sententia Aristotelis in libro quinto Politicorum, vbi laudat veteres, quòd Reges eligerent semper ex viris bonis, & propter excellentiam virtutum, aut res præclare gestas. Similis est sententia Xenophontis in libro de Expeditione Cyri Regis, vbi dicit, nulli homini, sed præsertim ei qui in alios imperiũ habet, vllas esse opes honestiores quàm iustitiam, & animi magnitudinem, & virtutes ceteras: qui rursus addit, Imperium nemini conuenire, qui non sit melior illis quibus imperat. His adde Senecam, qui in epistola vigesima aperte scribit, summam felicitatem esse apud illas gentes, in quibus non potest esse potentior, nisi melior.

Lib. 5. c. 10.
Politic.

Lib. 7. de
Exped. Cyri.

Lib. 8.

Sed his omiſſis, ratio naturalis apertissimè clamat, eum qui præest ceteris, debere esse omni ex parte perfectum. Princeps officium habet in populo, quod habet caput in corpore. Porro caput habet omnes sensus; reliquum corpus vnum tantum, eumque infimum. Quale igitur monstrum esset, si caput, cuius est regere omnia membra, neque videret, neque audiret, neque loqui posset, neque discerneret odores ab fœtoribus, neque dulcia ab amaris; & ex membris inferioribus aliud videret, aliud audiret, aliud olfaceret, aliud gustaret. Neque solùm esset

monstrum, sed frustra locum illum excelsum occuparet, cum nō solū regere membra non posset, sed ipsum dirigi ac duci opus haberet. Quis igitur non intelligit, quanta virtutum perfectio requiratur in Principe, ad cuius officium pertinet, sic populos regere, vt membra reguntur à capite?

Psal. 77.

Deinde Princeps non solū est quasi caput in corpore, sed etiam quasi pastor inter oues. Sic enim loquitur Deus in Psalmo: *Et elegit Dauid seruum suum, & sustulit eum de gregibus ouium, de post fætantes accepit eum, pascere Iacob seruum suum, & Israel hereditatem suam. Et pavit eos in innocentia cordis sui, & in intellectibus manuum suarum deduxit eos.*

Isai. 44.

Vbi Dominus dicit, se exercuisse Dauidem in arte pastoritia ouium irrationabilium, ac deinde eum transtulisse ad officium pascendi populos ratione præditos. Nec solum Dauidem Regem Hebræorum, Deus pastorem vocat; sed etiam, quod est magis admirandum, Cyrum ipsum Regem Persarum apud Isaiam vocat Deus pastorem suum. *Qui, inquit, dico Cyro, Pastor meus es, & omnem voluntatem meam complebis.* Denique, vt alia

Ezech. 34.

prætermittam, apud Ezechielem conqueritur Deus de pastoribus Israel, id est, de Regibus, qui cum essent ipsi deterrimi, populum ad exitium perduxerunt: & tandem adiungit,

git, *Et suscitabo super eas, oues videlicet gregis sui, pastorem unum, seruum meum David. Ipse pascet eas, & ipse erit eis in pastorem.* Neque Scriptores Ethnici abhorruerunt à nomine pastorum, cum de Regibus agerent. Certè Homerus Agamemnonem Regem, pastorem populorum appellare solet. Hæc verò similitudo Regis ad pastorem, satis apertè docet, Reges debere sapientia & virtutibus, sic eminere in populis quos regunt, vt eminent homines ratione præditi in gregibus ouium, quas pascunt. Ex quo sequitur vt Sardanapalus, Nero, Vitellius, Heliogabalus, Commodus, & alij eorum similes, non pastores, sed lupi, vel vrsi, aut canes rabidi dici potuerint.

Ad hæc Princeps non solùm est caput, & pastor, sed deus quidam terrestris, dicente Spiritu sancto in Psalmis: *Ego dixi, Dñs es, & filij Excelsi omnes.* Et non sine magna causa Ethnici, qui deos colebant qui delectabantur stupris, adulteriis, furtis, & qui inter se bella gerebant, & vnus alium Regno pellebat, ipsi quoque licere sibi existimabant, eiusmodi facinora perpetrare. Sanctus Augustinus in libris Confessionum ponderat id quod est apud Terentium, adolescentem quemdam excitasse se ad vim inferendam virgini, exemplo Iouis principis deorum,

Psal. 81.

Lib. 1.
Confess. 16

D 5 cuius

cuius stuprum in tabella depictum cernebat: *Vide, inquit, quemadmodum se concitat ad libidinem, quasi caelesti magisterio. At quem deum? inquit. Qui templa cali summo sonitu concutit. Ego homuncio id non facerem? ego verò illud sponte feci, ac libens.*

Isai. 6.

1. Ioan. 1.

Psal. 10.

Iob 25.

At nos Christiani Deum habemus, cui Angeli canunt, *Sanctus, Sanctus, Sanctus*: & qui lux est, in qua tenebræ non sunt ullæ. & de quo David canit: *Iustus Dominus, & iustitias dilexit.* & cuius tanta est puritas, ut Iob dicat: *Stelle non sunt munda in conspectu eius.* Proinde necesse est, ut Principes, cum quibus Deus nomen suum communicare dignatur, ea puritate nitere procurent, quæ tanto nomini conuenit.

Præterea, Principes in terris sunt quasi specula, vel exemplaria, in quæ subditi omnes respiciunt, sequæ eorū moribus accommodare satagunt: ea de causa, si Principes iusti sint, casti, sobrij, pij; multos ex subditis, cum magna sua laude, & cum ingenti merito apud Deum, tales efficient. Contrà verò, si sint iniusti, ebriosi, adulteri, parum pij, parumque religiosi, plurimos exemplo suo trahent ad inferos.

Denique, Princeps est Iudex supremus in suo Regno: & si quidem sit ipse probus, & ab omni scelere immunis, liberè omnino, & aperta

aperta fronte poterit sceleratos omnes iustis
pœnis mulctare : sed si fortè sit ipse adulter,
qua fronte adulteros condemnabit? si periur-
rus, aut blasphemus ; quando audebit de si-
milibus pœnas publicas sumere ? si furore
percitus hominem innocentem occiderit ;
quomodo audebit reos eiusdem delicti car-
nifici occidendos tradere ? Sin autem crimi-
na ista , & alia ijs similia non puniet ; ciuita-
tem adulteriis, periuriis, blasphemis, homi-
cidiis, & aliis flagitiis & facinoribus replebit.
Si verò puniet, se ipse damnabit, iuxta Apo-
stolum, qui scribit in Epistola ad Romanos:
*Inexcusabilis es , ô homo omnis qui iudicas ; in Rom. 2.
quo enim iudicas alterum , te ipsum condemnas ;
eadem enim agis qua iudicas.*

Compellitur ergo Princeps , si nomen
suum villo modo tueri velit, iustitiæ generali
operam dare, id est virtutes omnes colere,
vitia omnia vitare. Est autem felix necessi-
tas, quæ ad meliora compellit. Sed neque
compelli opus habebit, si fretus auxilio Dei,
incipiat viam virtutis ingredi, cum piis ho-
minibus versari; perniciosos amicos, ut pestes
fugere, precibus, ieiuniis, eleemosynis, Nu-
men diuinum sibi conciliare, Sacramenta
cælestia cum seria præparatione frequenter
sumere. Via enim virtutis, quæ initio angusta
videtur, semper magis ac magis dilatatur,
cùm

Psal. 118.

cùm cor ipsum charitas ipsa delatat . *Viam,*
inquit Propheta , *mandatorum tuorum cu-*
curri, cùm dilatasti cor meum.

CAP. X.

De iustitia particulari Principi ne-
cessaria ad regendos populos.

DIXIMVS de iustitia generali ; nunc de particulari dicendum est . Iustitia particularis est etiam duplex , altera quæ in commutationibus posita est , quæ propriè ad priuatos pertinent , inter quos exercentur emptiones , venditiones , locationes , mutua , & alia id genus , de quibus nos hoc loco non agimus . Est tamen etiam commutatiua iustitia , quæ consistit in inflictione pœnarum ; & hæc ad Principes & Iudices pertinet , ex S. Thoma 2. 2. q. 108. art. 2. ad primum . Altera particularis iustitia est , quæ in præmiis vel aliis bonis communibus distribuendis consideratur . Atque hæc est quæ propriè ad Principis officium pertinet ; de quo officio nos disputamus . Primum igitur agemus de distributione bonorum , deinde de inflictione pœnarum .

In distributione bonorum tota difficultas in eo posita est , vt euitetur acceptio personarum : hoc enim est vitium propriè contrarium

trarium iustitiæ distributiæ. Est autem acceptio personarum vitium, quo Iudex, siue S. Tho. 2.2
q. 63. Princeps in distributione bonorum, quæ ex iustitia debentur, non considerat veram causam meritoriam, sed loco causæ, considerat aliquam personæ qualitatem, vt cognitionem, vel amicitiam, vel aliquid aliud cuiusmodi, quod ad rem non pertinet. Ponam exemplum in re in qua grauius peccari solet. Habent multi Principes ius nominandi personas ad Episcopatus. Et quidem si nominet personas idoneas; nominatio, & collatio rata est, etiam si aliæ personæ adessent notæ Principi magis idoneæ: sed tamen Princeps ipse, qui nominat personam minùs idoneam, minùs dignam, minùs vtilem; vtiliore, & digniore, & magis idonea Sess. 24. de
refor. c. 1. prætermissa, mortaliter peccat, vt Synodus ipsa Tridentina declarat. Nam & Ecclesiam lædit, & ipsi personæ nominatæ parum prodest; & si fortè sit indigna, plurimum nocet, dum illi prodesse se putat. Et si is qui minùs dignum nominat, peccet tam grauitè; quàm grauitè peccabit qui indignum nominat? Sanctus Gregorius, vir sapientissimus & optimus, numquam se immiscere voluit in electionibus Episcoporum, vt ipse testatur, ne videlicet esset particeps peccati grauissimi, quod illi committunt,

Libro 3.
epist. 29.

Vide Chro-
nicon Ge-
nebrardi
ad annum
Christi
1258. &
Io. Bote-
rum in vi-
ta S. Ludo-
uici.

mittunt, qui quoquo modo indignum eli-
gunt. Et sanctus Ludouicus Rex eadem de
causa recusauit accipere à Summo Pon-
tifice priuilegium nominandi Prælatos.
Videant igitur, si qui sunt, qui eiusmodi
priuilegia ambiunt, quàm periculofam
rem ambiant.

Idipsum intelligi debet de aliis distribu-
tionibus dignitatum, honorum, graduum,
emolumentorum, quæ ex iustitia pendent:
nam vbi non habet locum iustitia, sed gra-
tia; ibi non est vitiosa acceptio personarum.
Siquidem apud Deum non est acceptio
personarum, vt Scripturæ passim clamant:
& tamen Deus cuius vult miseretur, &
quem vult indurat. Et Christus in parabola
vineæ, murmurantibus operariis, quòd
mercedem eandem reddidisset iis qui la-
borauerunt horæ vnus spatio, cum iis qui
tota die portauerant pondus diei & æstus;
respondit: *Amice non facio tibi iniuriam; nòn-
ne ex denario conuenisti mecum? tolle quod
tuum est, & vade: volo autem & huic nouissi-
mo dare sicut & tibi: an oculus tuus nequam
est, quia ego bonus sum?*

Iam verò quod attinet ad redditionem
pœnæ iis qui malè agunt, iustitia quidem
vindicatiua necessaria est Reipublicæ, vt
ex pœna vnus multi desistant ab iniuriis
infe-

2. Par. 19.
Rom. 2.
Ephes. 6.
Coloss. 3.
1. Pet. 1.
Rom 9.
Mat. 20.

inferendis, & sic fiat opus iustitiæ pax, vt loquitur Isaias Propheta, hoc est, ex iustitia oriatur pax, & tranquillitas. Et quidem rigor iustitiæ non est contrarius lenitati & mansuetudini, quando nascitur, non ex crudelitate erga homines, sed ex zelo erga Deum. Moyses mitissimus erat super omnes homines, qui morabantur in terra, & tamen ex zelo honoris Dei, iussit occidi multa millia hominū, qui vitulum aureum adorauerant, & rursus aliās suspendit omnes Principes populi in patibulis; & iussit occidi multa millia ex plebe, ob aliud peccatum idololatricæ. Et Dauid tantæ mansuetudinis erat, vt de eo scriptum est, *Memento Domine Dauid, & omnis mansuetudinis eius.* & tamen ipse de se dicit, *In matutino interficiebam omnes peccatores terræ, vt disperderem de ciuitate Domini omnes operantes iniquitatem.* Itaque non pugnat zelus iustitiæ cum mansuetudine; neque pugnat etiam cum misericordia. Quamuis enim iustitia & misericordia contrariæ videantur: tamen sic vnitæ inter se sunt, vt sorores amantissimæ dici possint. Nam cum puniuntur per iustitiam homines scelesti, liberantur per misericordiam homines probi, quos scelesti illi iniuste vexabant. Et ipsi etiam improbi, si saperent, intelligerent, secum misericorditer agi, cum poenis

Isai. 32.

Num. 12.

Exod. 23.

Num. 25.

Psal. 131.

Psal. 100.

pœnis coguntur temperare à peccatis, quæ maiora sunt mala, quàm ipsa supplicia. Neque tamen negamus quin aliquando, iustis de causis, possit Princeps misericorditer vel diminuere, vel omnino condonare pœnam homini peccanti: sed, vt plurimum, iustitiæ seueritas in Principe laudatur, tum vt ceteri timentes caueant à peccatis; tum vt homines probi, sine timore, vitam quietam & tranquillam ducant.

Vnum est peccatum, in quo seuerissimè puniendo, ego quidem valdè optarem, vt Christiani Principes omnes maximo zelo exardescerent. Blasphemia est peccatum, de quo loquor: hoc enim crimen ex sententia S. Thomæ, Doct̃oris verè Angelici, est peccatum maximum: quod ille probat, quia *opponitur confessioni fidei, & idèò habet in se grauitatem infidelitatis; & aggrauatur peccatum si superueniat detestatio voluntatis, & adhuc magis si prorumpat in verba: sicut & laus fidei augetur per dilectionem, & confessionem. Vnde cum infidelitas sit maximum peccatum, secundum suum genus; consequens est, quod etiam blasphemia sit peccatum maximum ad idem genus pertinens, & ipsum aggrauans.* Hæc sanctus Thomas, ex cuius ratione sequitur, vt blasphemia sit peccatum quodammodò maius maximo; quia pertinet ad genus infideli-

2.2. q. 3.
art. 3.

fidelitatis, quæ est peccatorum omnium maximum, ut idem docet, & illud etiam ^{2.2.9.3. art.3.} aggrauat, cum illi addat detestationem voluntatis. Deinde peccatum blasphemie in Deum, in lege diuina non dubiam habet poenam, sed manifestam, & atrocissimam. Sic enim loquitur Dominus, quem confuluerat Moyses de poena blasphemie: *Educ* ^{Leuit.24.} *blasphemum extra castra, & ponant omnes qui audierunt, manus suas super caput eius, & lapidet eum populus vniersus.* Deinde per hanc occasionem, ne forte existimaret Moyses, aut populus, solum illum primum blasphemum eo modo fuisse puniendum; addit Deus legem vniuersalem, dicens: *Homo qui maledixerit Deo suo, portabit peccatum suum; & qui blasphemauerit nomen Domini, morte moriatur: lapidibus opprimet eum omnis multitudo, siue ille ciuis, siue peregrinus fuerit.* & iterum repetit Dominus ad legem confirmandam: *Qui blasphemauerit nomen Domini, morte moriatur.* & mox adiungit idem Dominus: *Qui percusserit, & occiderit hominem, morte moriatur. Qui percusserit animal, reddet vicarium, id est animam pro anima.* Vbi videmus differentiam peccatorum & poenarum. Qui occidit animal brutum, non ipse occiditur, sed reddet viuum pro mortuo: qui occidit hominem, ipse occiditur,

E fed

sed non lapidatur ; quod est genus mortis atrox , & turpe: qui Deum blasphematur ab omni populo , in argumentum vniuersalis detestationis, vt nullus sit , qui blasphemi misereri debeat . Quæ cum ita sint, mirum certè videri debet, quòd apud Christianos homicidium ordinaria morte puniatur ; blasphemia, quæ est crimen longe grauius , minori pœna vt plurimum castigetur.

Epist. 95. Neque solùm lex diuina , sed etiam humana Imperatoris Iustiniani , blasphemos in Deum vel Sanctos, vltimo supplicio affici iubet ; vt legi potest in Authenticis collatione sexta , titulo quinto, Nouella septuagesima septima . Porro lex Ecclesiastica ; quæ cruentas refugit vltiones, vt scribit sanctus Leo in epistola ad Turbium Episcopum Asturicensem ; tamen eodem Leone auctore , seueris Principum constitutionibus adiuuatur, dum ad spirituale nonnumquam recurrunt remedium , qui timent corporale supplicium. Et tamen ipsa Ecclesia non adedò leuem pœnam blasphemis constituit : iubet enim Gregorius Nonus in cap. Statuimus, in titulo De maledicis, hac pœna mulctari blasphemos. *Statuimus, inquit, vt si quis contra Deum, vel aliquem Sanctorum suorum ; & maximè beatam Virginem,*
lin-

linguam in blasphemiam publicè relaxare praesumpserit, per Episcopum suum pœna subdatur inferius annotata: videlicet, ut septem diebus Dominicis præ foribus Ecclesiæ in manifesto, dum aguntur Missarum solennia, blasphemus existens, ultimo illorum die Dominico pallium & calceamenta non habeat, ligatus corrigia circa collum; septemq; precedentibus sextis Feriis in pane & aqua ieiunet, Ecclesiam nullatenus ingressurus. Quolibet quoque prædictorum dierum tres, si poterit, alioqui duos reficiat pauperes, vel unum; & si neque ad hoc illius suppetant facultates, id in pœnam aliam commutetur: cui etiam, si renuerit recipere, ac peragere pœnitentiam supradictam, Ecclesiæ interdicatur ingressus, & in obitu Ecclesiastica careat sepultura. Per temporalem præterea potestatem, coactione, si necesse fuerit, Episcopi diocesani abhibita contra eum, quadraginta solidorum, alioqui triginta, vel viginti, vel saltem quinque pœna mulctetur, nullam in hoc misericordiam habiturus. Hæc in eo canone habentur: cuius summa est, ut blasphemus puniatur quoad honorem, per publicum dedecus; quoad corpus, per ieiunium in pane & aqua; quoad substantiam, per multam pecuniariam; maiorem vel minorem, pro censu quem possidet.

Quod si diligentia pastorū Ecclesiæ has

68 *De iustitia Principis erga populos.*

pœnas mitiores non facilè remitteret ; & si his non corrigerentur blasphemi, Principes sæculi ad leges suas blasphemos pertraherent, in quibus habent præcurrentem legem Dei viui ; spes aliqua esset , morbum hunc animarum , morborum omnium grauissimũ, procul à Christiano populo esse pellen- dum . Certè quidem nulla ratio permittit, vt Christianus populus minùs sit in Deum religiosus & pius , quàm populus Hebræorum , qui seruitutis spiritu agebatur , cùm Christianus spiritum filiorum acceperit, *in quo clamamus „ Abba Pater, vt Apostolus loquitur.*

Rom. 8.

Neque dubium esse potest , quin si Principes statuerent hoc vitium exterminare , facillimè id assequerentur . Si enim populi intelligerent, hoc esse Principi omnino decretum ; nemo auderet linguam ad blasphemandum soluere : cùm nihil inde lucri , nihil vtilitatis, nihil voluptatis, nihil honoris accedat ; & contrà certò sciant, vel facilè scire possint , Deum per hoc vitium ad iracundiam maximè prouocari, & ab eius iustitia supplicia nimis horrenda blasphemis omnibus esse parata.

CAP.

CAP. XI.

*De fortitudine Principi necessaria
ad regendos populos.*

FORTITVDO virtus est Cardinalis , quæ S. Tho. 2. 2. q. 23. ar. 5. 6. & 11. resistit doloribus impediētibz opera, quæ fieri debent ab homine secundum rationem ; quemadmodum temperantia resistit voluptatibus propter eandem causam. Differunt tamen hæc virtutes , quòd fortitudo resistit doloribus, eos tolerando & sustinendo viriliter: temperantia resistit voluptatibus, eas declinando ac fugiendo. Et quoniam pericula mortis dolores vehementissimos excitant, & hæc pericula non casu, aut fortuitò, sed ordinariè occurrunt in bellis; ideò fortitudo potissimum locum habere videtur in bellis. Et quamuis ad milites omnes pertineat hæc virtus fortitudinis ; tamen præcipuè pertinere videtur ad Principem, qui est Dux, & Imperator, quem omnes milites intuentur, & qui fortitudine sua militum animos erigit, & debilitate deprimit.

Ceterum non sola sunt bella hominum aduersus homines, in quibus fortitudo requiritur: sed sunt bella grauiora & atrociora dæmonum aduersus animas ; de quibus loquitur Apostolus in Epistola ad Ephesios, di-

E ; cens:

Ephes. 6.

cens: *Induite vos armaturā Dei, ut possitis stare aduersus insidias diaboli: quoniam non est nobis colluctatio aduersus carnem, & sanguinem; sed aduersus principes, & potestates, aduersus mundi rectores tenebrarum harum.* In hoc bello claruerunt olim fortissimi Martyres: qui sustinendo viriliter cruciatus & mortes pro confessione Christi, videbantur quidem à persecutoribus hominibus vinci & superari; sed persecutores inuisibiles dæmones, & eorum principem diabolum gloriosissimè superabant, & de illis coram Deo & Angelis triumphabant. Neque desunt hoc tempore Martyres sancti, qui pro fide Catholica aduersus infideles dimicantes, multis in locis vitam & sanguinem fortiter fundunt; & de diabolo, qui ab initio fuit mendax, & pro viribus zizania seminare non cessat, gloriosè triumphant.

Epist. 48.

In hoc igitur bello spirituali debent Principes Christiani non minùs Ecclesiā Christi iuuare, quàm in bello corporali prouincias suas vel Regna protegere, De qua re scribit sanctus Augustinus in epistola ad Vincen-
tium Donatistam, vbi ostendit, iustè paganos & hæreticos puniri à Principibus temporalibus. Scribit etiam sanctus Gregorius in epistola ad Præfectum Africæ Pantaleonem, ut Donatistas hæreticos comprimat:

Lib. 3. ep.
32.

& in •

& in epistola ad Mauritium Imperatorem, Lib. 5. ep. 63.
 & in alia ad Brunichildem Reginam Fran- Lib. 7. ep. 5.
 corum, vt idololatrias & hæreticos perfe-
 quantur.

Neque verò solùm in bellis, quamuis in
 ijs potissimùm, fortitudo necessaria est: nam
 in labore etiam gubernandi prouincias &
 Regna, non exigua fortitudo requiritur. Oc-
 currunt enim curæ & sollicitudines grauissi-
 mæ & molestissimæ in audiendis personis
 miserabilibus, quæ de iniustitia Iudicum
 queruntur: item in audiendis Officialibus,
 qui casus asperos & inopinatos sæpè refe-
 runt: prætereà in legendis epistolis de tu-
 multibus variis in locis excitatis: denique in
 audiendis nuntiis, defectiones ciuitatum aut
 prouinciarum significantibus. Quæ omnia,
 & alia id genus multa, si Princeps negligat,
 vt voluptates suas & priuata gaudia non in-
 terrumpat; negligentie nomine non carebit,
 & inuisus incipiet fieri populis, vt alter Sar-
 danapalus; & denique neque Deo, neque
 hominibus satisfaciet; & fieri poterit, vt de
 ipso principatu periclitetur. Quòd si vigi-
 lantiam & diligentiam in gubernando Prin-
 cipatu, quam oportet, adhibere voluerit; la-
 borem non exiguum tolerare eum oportebit,
 & non rarò noctes insomnes ducere, co-
 gitando & recogitando remedia, quæ malis

imminentibus adhiberi oporteat. Paterfamilias, qui vnicam domum regendam suscepit, nisi naturali amore uxorem & liberos valdè diligeret, & charitas illa fortem eum redderet ad sustinendos labores, quos secum adfert sollicitudo benè administrandæ domus; certè sub onere caderet. Quàm fortis ergo debebit esse bonus Princeps, si velit, vt debet, audire clamores pauperum & oppressorum; legere tantam multitudinem supplicum libellorū; adhibere remedia malis tam multis, & tam diuersis? Laboriosa igitur est vita boni Principis, si officio fungi velit; periculosa verò, si iugum sibi à Deo impositum excutiat; & honore tamen & opibus frui velit, quæ Principatum sequuntur.

Mat. 24.
Luc. 12.

Extat apud Euangelistas Matthæum & Lucam similitudo quædam de seruo præposito toti domui à domino domus: quæ similitudo communis est tam Principi temporali, quàm spirituali. Vterque enim præpositus est à Deo, siue Regno, siue Ecclesiæ; & vterque rationem Deo reddet de administratione sua; & vterque præmium vel pœnam, secundum merita sua, recipiet. Et de vtroque Principe, tam spirituali quàm temporali, intelligit & explicat verba Domini S. Ioannes Chrysostomus, cum scribit in caput Matthæi vigesimumquartum; & cum sequun-

Hom. 78.
in Math.

sequuntur Episcopus Iansenius, & alij. Est igitur hæc similitudo : *Quis, putas, est fidelis seruus, & prudens, quem constituit Dominus super familiam suam, ut det illis cibum in tempore? Beatus ille seruus, quem cum venerit Dominus, inuenerit sic facientem. Amen dico vobis, quoniam super omnia bona sua constituet eum. Si autem dixerit malus seruus ille in corde suo: Moram facit Dominus meus venire: & ceperit percutere conseruos suos; manducet autem & bibat cum ebriosis: veniet Dominus serui illius in die qua non sperat, & hora qua ignorat; & diuidet eum, partemq; eius ponet cum hypocritis; illic erit fletus, & stridor dentium.*

Hæc est similitudo, quam breuiter exponemus, quia vtilissimam doctrinam continet. Initio declarat Dominus qualitates duas bonas, quas requirit in omnibus quos assumit ad regimen; siue Ecclesiasticum siue temporale, quæ sunt fidelitas & prudentia: quarum vna pertinet ad voluntatem, altera ad intelligentiam: & prior, id est, fidelitas, nascitur ex charitate, posterior partim est naturalis, partim acquiritur vsu & doctrina: & prior est magis necessaria, quam posterior, quia posterior potest vtcumq; suppleri per alios, prior non potest. Itaque Dominus cum præficere vellet sanctum Petrum toti Ecclesiæ, de sola charitate illum interrogauit, di-

E 5

cens:

74 De fortitudine Principis.

Ioan. 21.

cens: *Simon Ioannis diligis me plus his?* Deinde ostendit Dominus, regimen siue Ecclesiasticum siue temporale, quomodocumq; acquiratur, siue electione, siue alio modo, principaliter dari à Deo. *Quem constituit*, inquit, *Dominus super familiam suam.* Omnia enim quæ fiunt in terris, pendent à prouidentia Dei, neque possunt aliquid secundæ causæ sine prima. Itaq; loquens Daniel ad Regem Nabuchodonosor, qui suis viribus pugnando arbitrabatur se monarchiam obtinuisse,

Dan. 2.

dixit: *Tu Rex Regum es, & Deus cali Regnum & Imperium dedit tibi.* Si ille, qui Deum non nouerat, & solis suis viribus existimabat se Regnum peperisse; tamen Propheta testante, Regnum illud à Deo acceperat: quanto magis fideles Principes Principatum suum à Deo se habere confiteri debēt? Apud Isaiam

Isai. 45.

dicit Dominus Cyro: *Hæc dicit Dominus christo meo Cyro, cuius apprehendi dexteram, ut subyciam ante faciem eius gentes, & dorsa Regum vertam, & aperiam coram eo ianuas, & portæ non claudentur. Ego ante te ibo, & gloriosos terra humiliabo; portas areas conteram, & vinctes ferreos confringam: & dabo tibi thesauros absconditos, & arcana secretorum, ut scias quia ego Dominus, qui voco nomen tuum, Deus Israel.* Certè si Cyro Deus dedit Regnum amplissimum, ipso neque sciente, neque cogitante:

gitante: quis negare poterit, à diuina prouidentia Regna & Imperia distribui ijs, quibus sibi benè placuerit? Itaque rectè dicit Dominus in parabola Euangelica, se constituisse seruum fidelem & prudentem super familiam suam. Nam omnis Princeps præponitur à Deo super familiam, non ipsius Principis, sed Dei, vt eam pascat & regat, redditurus Deo rationem de administratione sua. Et si quidem rectè gubernauerit familiam sibi commissam, beatus erit seruus ille, quia Dominus super omnia bona sua constituet eum, dicens: *Quia super pauca fuisti fidelis, Mat. 25. super multa te constituam; intra in gaudium Domini tui.* Sed si dixerit seruus ille in corde suo, *Moram facit Dominus meus venire; & cæperit percutere conseruos suos; manducet autem, & bibat cum ebriosis.* hoc est, si Princeps ille incipiat delinitus bonis presentibus, obliuisci rerum futurarum, mortis, & iudicij; & diuino timore postposito, subditos suos, qui verè conserui eius sunt, malè gubernare, iniustis oneribus aggrauare, causas eorum in longum trahere, denique loco mancipiorum habere: & his non contentus incipiat manducare, & bibere cum ebriosis, id est, dimissa cura populorum, & tota in alios reiecta, incipiat totum se luxuriæ & illicitis voluptatibus tradere: quid tum fiet? *Veniet Dominus*

Luc. 12.

minus in die qua non sperat, & hora qua ignorat, & diuidet eum, partemq; eius ponet cum hypocritis & infidelibus; (hanc enim vocem addit sanctus Lucas) *ibi erit fletus, & stridor dentium. Veniet, inquit, Dominus eius in die qua non sperat, & hora qua ignorat:* id est, quando minus cogitat, & sperat adhuc se diu victurum, morbo letali corripietur: & cum etiam Medici salutis recuperandę spem illi dabunt, antequam incipiat de confessione peccatorum, & pœnitentia seriò agenda cogitare, adueniet hora postrema, & repentè imparatus, & nihil minus cogitans ad tribunal Iudicis æterni rapietur. Iudex autem iustus, qui non respicit personas, & qui coronis & sceptris non terretur, continuò diuidet eum in partes duas, separans animam à corpore: & partem vnā, id est corpus, vermibus tradet; & partem alterā, id est animam, ponet cum infidelibus & hypocritis, qui quamuis nihil credant, tamen credere se fingunt: ponet autem in gehennam, vbi erit fletus & stridor dentium, & vbi vermis non moritur, & ignis non extinguitur.

Hęc est explicatio parabolę, si agatur de iudicio particulari, quod exercetur in morte. Sed potest etiam exponi de iudicio vniuersali, & tunc illa verba, *Diuidet eum, partemq; eius cum infidelibus & hypocritis ponet,* hunc

hunc sensum habebunt: Diuidet eum Iudex à iustis & piis, & partem eius, id est, sortem eius, ponet cum infidelibus & hypocritis, qui in gehennam proiiciuntur, vbi fletus & stridor dentium sine fine durabunt.

Vtinam hæc parabola ad paucissimos, vel nullos Christianos Principes pertineret, quo ad hanc partem posteriorem, quæ malos Principes tangit; & ad plurimos, vel etiam omnes, quo ad priorem, quæ bonis Principibus conuenit. Sed terrent me verba Scripturæ: *Intrate per angustam portam: quia lata porta, & spatiosa via est, quæ ducit ad perditionem, & multi sunt qui intrant per eam. Quàm angusta porta, & arcta via est, quæ ducit ad vitam, & pauci sunt qui inueniunt eam!* Et in specie de Principibus: *Horrendè, & citò apparebit vobis; quoniam iudicium durissimum, his qui præsumunt, fiet. Exiguo enim conceditur misericordia: potentes autem potenter tormenta patientur.* Quæ omnia illuc pertinent, vt Principes intelligant, fortitudinis virtutem sibi potissimum esse necessariam, vt fortiter labores omnes ferant, quos regimen populorum requirit: nec minùs fortiter cum passionibus animi sui, quas locus altus nutrit & auget, assiduè bellum gerant.

CAP.

C A P. XII.

*De temperantia Principi ad
regendos populos necessaria.*S. Tho. 2. 2.
q. 141.

POSTREMA virtus ex Cardinalibus est Temperantia, quæ propriè posita est in moderanda concupiscentia sensuū gustandi & tangendi, quæ quando sine fræno aguntur, pariunt crapulas & ebrietates, necnon fornicationes, adulteria, & alia id genus multa, quæ usque adeò turpia sunt, ut nominari honestè non possint. Hæc verò virtus multis de causis Principi necessaria est. Primum quidem, quoniam Scriptura sacra virtutem hanc in Principe vehementer laudat, & contrarium vitium execratur. Salomon

Eccl. 10.

in Ecclesiaste sic loquitur : *Va tibi terra, cuius Rex puer est, & cuius Principes manè comedunt. Beata terra, cuius Rex nobilis est, & cuius Principes vescuntur in tempore suo ad reficiendum, & non ad luxuriam.* Vbi reprehenditur comestio ante tempus, quia signum est voracitatis : & Rex nobilis appellatur, qui non est puer levis & contemptibilis, sed vir maturus & grauis, ad cuius exemplum Principes comedunt ad reficiendum, non ad luxuriam. Idem Sapiens in Prouerbiis, *Luxuriosa, inquit, res est vinum, & tumultuosa ebrie-*

Prou. 20.

tas;

tas; quicumque his delectatur, non erit sapiens.

At Rex in primis sapiens esse debet, vt infra dicemus. Et de Christo Ieremias dicit: *Re-* Ier. 23.

gnabit Rex, & sapiens erit, & faciet iudicium & iustitiam. Idem Salomon in eodem libro:

Noli Regibus dare vinum; quia nullum secre- Prou. 31.

tum est, ubi regnat ebrietas: & ne fortè bibant,

& obliuiscantur iudiciorum, & mutant causam

filiorum pauperis. In Testamento nouo, Apo-

stoli in Epistolis suis passim execrantur luxu- Ephes. 5.

riam, & omnia vitia carnalia, & omnem im-

pudicitiam, sic, vt ne nominari quidem ve-

lint apud Christianos. Fornicatio, & omnis Rom. 13.

immunditia nec nominetur in vobis, sicut decet

sanctos, inquit B. Paulus. & alibi: Non in

comessationibus, & ebrietatibus, non in cubili-

bus, & impudiciis. Et denique Christus ipse

grauissimis verbis admonens omnes, vt pa-

rati sint ad vltimū diem, tamquam in sum-

ma dicit: *Attendite vobis ne fortè grauentur* Luc. 21.

corda vestra in crapula, & ebrietate; & super-

ueniat in vos repentina dies illa.

Deinde exempla Scripturæ sanctæ certè

terrere deberent, tamquam tonitrua quæ-

dam cælestia, omnes homines, præsertim

verò Reges & Principes. Peccatum primum,

quod inuidia diaboli intrauit in orbem terra-

rum, & quod aditum aperuit morti tempo-

rary & sempiternæ, certè inobedientia fuit

erga

- Gen. 2. erga cibum vetitum. *Vidit enim Eua, quòd bonum esset lignum ad vescendum, & pulchrum oculis, aspectuq; delectabile; & tulit de fructu illius, & comedit, deditq; viro suo, qui comedit.*
- Gen. 19. Deinde Lot, qui iustus dicitur, nihil aliud ad incestum cum filiabus induxit, nisi ebrietas. Sed, quod longè miserabilius est, & notum omnibus, Samson Iudex siue Princeps Hebræorum, qui victorias admirabiles de Philisthæis retulerat; amore captus mulierculæ, & ab ea circumuentus, captus ab hostibus, & oculis erutis, ad molam in pistrino vertendam adiudicatus fuit. Atque huc respexisse videtur Ecclesiasticus, cùm capite decimo octauo scripsit: *Si prestes anima tua concupiscentias eius, faciet te in gaudium inimicis tuis.* Salomon verò Rex felicissimus & sapientissimus, qui à Deo dona plurima & maxima consecutus fuerat, tandem in senectute mulierum amore ardentissimè captus, ad eam mentis cæcitatem peruenit, vt in gratiam concubinarum suarum aras erexit idolis plurimis, &, quod grauius est, coluerit ipse Astarthem deam Sidoniorum, & Moloch idolum Ammonitarum. Hoc certè exemplum terrere deberet omnes Principes, ne præter legitimam vxorem, mulierem vllam vinqum aspicerent; neque vllam nisi fidelem & probam ducerent. Neque prætere
- mittere

mittere volo Dauidem Regem, qui cum tot virtutibus præditus esset, & tam multa cantica diuini amoris edidisset, & Christi Domini mysteria pænè omnia Spiritu sancto plenus prædicere potuisset: tamen, à concupiscentia carnis deuictus, in adulterium incidit, quod ei plurimorum postea malorum causa fuit. Et fortasse permisit Deus, vt Dauid in adulterium laberetur, quia curiosè nimis aspexit mulierem se lauanti. Debuisset enim continuò auertere oculos ab eo spectaculo, quod periculi plenum esse dubitare non poterat. Idè enim sanctus Iob pepigerat fœdus cum oculis suis, *vt ne cogitaret* Iob 31. *quidem de virgine*, id est, firmiter proposuerat nullam virginem aspicere, ne aspectus cogitationem, & cogitatio libidinosum desiderium pareret. Quod fœdus si pepigissent cum oculis suis duo illi senes apud Da- Dan. 13. nielem, qui Iudices erant populi, & debuissent exemplum pudicitiae iuuenibus omnibus dare; neque tam curiosè Susannam se lauanti aspexissent, neque tam fœdè in concupiscentiam eius exarsissent, neque tam miserè tandem periissent. Sed exempla eiusmodi pænè innumerabilia proferri possent; quibus probaretur, necessariam esse Principibus omnibus temperantiæ virtutem; non solum quod attinet ad peccata gu-

F

la.

læ atque luxuriæ, sed etiam ad omnem immoderantiam.

Ephes. 5.

Accedat iam tertia ratio ex occasione peccandi, quam in hac re Principes habent, & qua priuati homines vt plurimum carent. Principes enim mensam refertam cibis pretiosis & vinis optimis habere solent: proinde facile est, vt crapula & ebrietas, aut certè nimius cibus & nimius potus illis subrepat. A crapula verò & nimio potu vini, facillimus transitus est ad libidinem; cùm magna vicinitas sit ventri ad ea membra quæ sub ventre sunt: & notum sit illud Apostoli, *In vino est luxuria*. Neque desunt Principibus multæ viæ ad explendas libidines suas, siue pecuniis, siue aliis muneribus res agenda sit. Hæc igitur tanta facilitas explendi libidines suas, magna infelicitas mihi semper visa est, & contrà, magna felicitas ista facilitate carere. Quare maxima laude digni sunt Principes illi, qui cum abundantia rerum sobrietatem & continentiam coniungere possunt.

Alia quoque ratio Principes mouere deberet ad temperantiæ virtutem colendam, quòd ipsi dati sint populis in exemplum, & quodammodò in magistros bonorum morum; & graue & notorium scandalum accipiant populi, cùm Principes suos, qui leges continentiae præscribunt aliis, & seuerè aliquando

quando puniunt adulteria, sacrilegia, peccata contra naturam, oppressionem virginum, & alia id genus incontinentiæ peccata; si ipsos eadem patrare, vel probabilis suspicio, vel certa fama demonstret. Nota est Saluatoris nostri, Principis Regum terræ, diuina sententia in Euangelio: *Qui scandalizauerit* Mat. 18.
unum de pusillis istis, qui in me credunt; expedit ei, ut suspendatur mola asinaria in collo eius, & demergatur in profundum maris. Væ mundo à scandalis; & væ illi per quem scandalum venit. Nihil hîc addo, quia satis per se nota est grauitas huius sententiæ: & necesse est vt sensu vel mente careant, qui grauitatem poenæ huius non timent.

Addo vltimam rationem, cur Principem deceat temperantiam ex animo colere. Nihil est quod magis impediat adeptionem donorum præcipuorum spiritus, quæ dicuntur sapientia & intellectus, quàm viria ista Isai. 14.
carnalia ebrietatis & fornicationis, ne grauiora nominare cogar. Siquidem homines animales & carnales, non capiunt spiritualia & diuina; sed, vt loquitur Apostolus, *Stulti- 1. Cor. 2.*
tia sunt illis, & non possunt intelligere, quia spiritualiter examinantur. Principes autem, si munere suo rectè fungi velint, sapientiæ dono præ ceteris hominibus maximè indigent, vt in sequenti capite demonstrabimus.

84 *De temperantia Principis.*

Neceſſe igitur eſt, vt Principes nō refugiant diſpoſitiones ad ſapientiam neceſſarias, quæ ſunt temperantia, ſobrietas, caſtitas, carnis mortificatio, iugis oratio, rerum cæleſtium meditatio: quæ ſunt omnino contraria comellationibus, ebrietatibus, impudiciis, cantibus laſciuis, iocis, & ludis, & aliis id genus carnis oblectationibus. Nam vt ſanctus Baſilius ſcribit in Oratione de ieiunio, *Non aliter fumus carnalium deſideriorum Spiritum ſanctum fugat ex anima, quàm fumus ex viridibus lignis alueario admotus fugat apes, quæ mellis fauos dulciſſimos & pretioſiſſimos conficiebant.*

Orat. 1.^o de
ieiunio.

C A P. XIII.

De ſapientia Principi neceſſaria ad regendos populos.

SA P I E N T I A Principibus quaſi propria eſſe videtur, cū inferioribus Magiſtratus prudentia ſufficere poſſe videatur. Hoc enim intereſt inter prudentiam & ſapientiam, quòd ſapientia conſiderat finem altiſſimum ſimpliciter, qui eſt Deus; prudentia conſiderat finem altiſſimum, non ſimpliciter, ſed in genere bonorum humanorum: & ſapientia eſt virtus ſpeculatiua, pru-

S. Tho. 2. 2
q. 45. & 47.

prudencia est virtus practica. Donum tamen Spiritus sancti, quod sapientia dicitur Isaie 11. apud Isaiaam, vtrumque habet, & speculationem & praxim, vt Doctor Angelicus 2.2.9.45. art. 3. recte docet. Illud tamen est verum, in Scripturis sanctis saepe confundi sapientiam cum prudentia. Nam in libro Prouerborum aperte dicitur, sapientiam esse prudentiam; vtraque enim virtus dirigit media ad finem, & ex fine de mediis iudicat. Sed quidquid de vocibus sit, duo sunt extra controuersiam, sapientiam altiore esse, quam sit prudentia, & sapientiam ad Principes maximè pertinere. Sic enim loquitur in Prouerbiis ipsa Sapientia: *Per me Reges regnant.* & in libro Sapientiae eadem Sapientia clamat: *Ad vos Reges sunt hi sermones mei, vt discatis sapientiam, & non excidatis.* & in eodem loco: *Concupiscentia sapientiae deducit ad regnum perpetuum. Si ergo delectamini sedibus, & sceptris, o Reges populi, diligite sapientiam, vt in perpetuum regnetis.* Ecclesiasticus quoque admonet Reges, dicens: *Rex insipiens perdet populum suum.* Et Ieremias Propheta inter laudes praecipuas Regis Messiae ponit: *Regnabit Rex, & sapiens erit.* Eccli. 10. Et de Dauide Rege optimo dictum est, quod haberet sapientiam, sicut Angelus Jerem. 23. Dei; & Deus ipse laudauit Salomonem, 2. Reg. 14.

quòd non petiuiſſet à Deo diuitias, neq; dies multos, neq; vltionem de inimicis ſuis, ſed ſapientiam neceſſariã ad regendũ populum; 3. Reg. 14. & ait: *Quia poſtulaſti tibi ſapientiam ad diſcernendum iudiciũ, ecce feci tibi ſecundũ ſermones tuos, & dedi tibi cor ſapiens, & intelligẽs in tantum, vt nemo ante te ſimilis tui fuerit, nec poſt te ſurrecturus ſit. ſed & hæc, quæ non poſtulaſti dedi tibi; diuitias ſcilicet, & gloriam; vt nemo fuerit ſimilis tui in Regibus cunctis retrò diebus.* Habemus igitur ex ipſius Dei ſententia, Salomonem, qui à Deo ſolam ſapientiã poſtulauit, rem optimã, & Deo gratiſſimam, & ipſi Regi maximè neceſſariam poſtulafſe: ad quam reliqua bona, diuitias, gloriam, pacem diuturnam, & beneuolentiam populorum, cõſecuta eſſe Scriptura ſancta commemorat. Quis igitur in dubiũ iam reuocare poterit, an Regi ſapiẽtia neceſſaria ſit, & an non debeat Rex eã à Deo ardẽtibus precibus poſtulare; & animũ ſuũ ad eam deuotè ſuſcipiendã præparare, & eamdem lectione piorũ librorũ & iugi meditatione alere?

Sed hoc ipſum donũ tam magnum communicatum à Deo Salomoni, admonet nos, vt dum ſumus aduenę & peregrini procul à cæleſti patria, & inter hoſtes, non confidamus, hoc tantum donum non poſſe nobis auferri, niſi in eius custodia diligentiſſimè

tiffimè vigilemus . Ille enim ipse Salomon in senectute, quando sapientia eius vsque ad summum crescere debuisset, sapientiam prorsus amisit, & stultissimus factus est. Causam reddit Ecclesiasticus, cùm ait : *Vinum* Eccli. 19.

& mulieres apostatate faciunt sapientes . Et quæ maior apostasia fieri pòtest, quàm relicto Deo vero, colere idola Gentium? quod fecit Salomon in gratiam mulierum suarum, quibus amore ardentissimo adhæsit. 3. Reg. 11.

Oportet igitur Principem sapientem in hac re potissimum sapientiam suam ostendere, vt donum Dei longè pretiosissimum diligentissimè custodiat . Custodiet autem, si assiduè illud exerceat, ac semper illud, vt sic loquar, præ manibus habeat, ne fortè obliuioni tradatur, & in eius locum sapientia humana succedat . Rectissimè enim Apostolus Iacobus distinguit sapientiam quæ Iac. 3. de cælo est, ab illa quæ nomen sapientiæ præfert, sed est terrena, animalis, diabolica, ac per hoc falsa sapientia est : nam vera sapientia, vt sanctus Iacobus loquitur, *primum pudica est, deinde pacifica, tum modesta, suadibilis, bonis consentiens, plena misericordia, & fructibus bonis*. Itaque consilium callidum datum Principi de ratione expugnandæ castitatis mulieris pudicæ, sine strepitu, & periculo; non est consilium veræ sapientia,

tia, sed astutia diabolica; quia vera sapientia primum *pudica* est. Sic etiam consilium irritandi Principem debiliorem, ut illa occasione exoriatur bellum, & bellando Principatus augeatur; non est consilium verae sapientiae, sed versutiae serpentis antiqui; quoniam vera sapientia *pacifica* est. Ad hanc consilium arripiendi novos titulos honoris, & illos per fas & nefas defendendi, ut eo modo Princeps ascendat ad altiorem gradum; & si quis fortè adsit alius Consiliarius, qui contrarium suadeat, iste extrudatur, ut inimicus Principis; non est consilium verae sed falsae sapientiae, quia vera sapientia est *modesta, suadibilis, & bonis consentiens*. Denique consilium quodcumque, quo impediuntur opera misericordiae & pietatis, sub praetextu aliquo fucato, & falso; non est consilium verae sapientiae, sed falsae, quia vera sapientia *plena est misericordia, & fructibus bonis*. Illud ad extremum adiciam, si quis facile internoscere velit sapientiam veram à falsa, conetur purgare cor suum ab amore proprio, & attentè ac seriò, in rebus dubiis consideret quod magis requirat gloria Dei, & utilitas proximi; & illud eligat. Nihil enim est, quod magis impediat in rebus dubiis electiones bonas, & Deo beneplacentes, quàm proprius amor.

Cha-

Charitas enim non querit quæ sua sunt; & I. Cor. 13.
semper vera sapientia cum vera charitate
coniungitur.

CAP. XIV.

De magnificentia, quæ Principi necessaria est ad regendos populos.

MAGNIFICENTIA virtus est Principibus propria, quoniam exigit maximos sumptus, quos nisi Principes facere non possunt. Et quidem ad Principes magnificentia pertinet, quia sunt Dij quidam terrestres; ut supra demonstrauius ex illo loco Psalmorum: *Ego dixi, Dij estis, & filij Excelsi omnes.* Magnificencia enim maxime propriè Deo conuenit, iuxta illud: *Elevata est magnificentia tua super celos.* & illud: *Ut notam faciant filiis hominum potentiam tuam; & gloriam magnificentie regni tui.* & illud: *Date magnificentiam Deo nostro: Dei perfecta sunt opera.* Hæc enim est propria causa, cur Deo magnificentia in primis conueniat, quia facit opera magna, & ex omni parte perfecta. Possunt enim etiam priuati homines inchoare opera magna, sed perficere, nisi opulentissimi, quales sunt Reges, minimè possunt. Porro Deus, Rex magnus super omnes Deos, quatuor in rebus magni-

S. Th. 2. 2.
q. 134. a. 3.

Psal. 81.

Psal. 8.

Psal. 144.

Deut. 32.

ficentiam suam ostendit. Primum quidem in fabrica mundi totius, quæ si pecuniis perfici debuisset, omnes omnium. Regum thesauri non fuissent satis ad fundamenta iacienda. Deinde in alenda familia propè infinita Deus magnificentiam suam demonstrat : alit enim Deus omnes herbas, & omnes arbores; alit omnia animantia terrestria, & aquatilia, quorum non est numerus; & alit non ad vnum vel alterum diem, sed ad plurimas annorum centurias, & posset, si vellet, in æternum alere: tanta illi subest annonæ vbertas. Alit denique Angelorum exercitum propè innumerabilem.

Tob. 12. Quamvis enim Angeli cibo & potu visibili non utantur, dixit tamen Angelus Raphael ad Tobiam : *Ego cibo inuisibili, & patu qui ab hominibus videri non potest, utor.* Tertiò demonstrat Deus magnificentiam suam in operatione miraculorum, quæ sunt opera tam eximia, ut nisi ab infinita potentia fieri non possint, cum sint præter ordinem iam ab ipso Deo toti naturæ datum. Eiusmodi opera fuerunt, cum Deus solem & lunam stare fecit ad verbum Iosue serui sui; & cum solem eundem retrocedere iussit ad verbum Isaia Prophetæ; & cum mortuos non paucos reuocauit ad vitam; & cæcis visum, & surdis auditum restituit, contra ordinem
toti

Ios. 10.

Isai. 38.

toti naturæ datum, vt à priuatione ad habitum regressus non detur. Quartò denique magnificentiam suam manifestabit Deus in nouissimo die, cùm fabricam mundi huius magna ex parte corrumpet, & nouos cælos, & nouam terram nobis in momento exhibebit, dicente sancto Petro, *Adueniet autem dies Domini ut fur, in quo cali magno impetu transient: elementa vero calore soluentur: terra autem, & quæ in ipsa sunt opera, exurentur.* Quàm sit autem laboriosum & difficile, ædificia benè fundata & constructa euertere, quotidie experimur.

Iam verò soli inter homines, Principes magni, in his omnibus rebus, magnificentiam Dei, Regis Regum, imitari aliquo modo possunt. Ipsi enim soli ædificia publica & maxima ad vsum totius populi, quæ sumptus maximos requirunt, erigere solent. Eiusmodi erant olim apud Romanos Thermæ, Theatra, Basilicæ, Tempia, quorum adhuc vestigia cernimus; & nunc quoque Principes magni Palatia, Fora, Ecclesias, Xenodochia, Scholas publicas, & alia sumptuosa ædificia erigunt, quæ profectò nulli priuati erigere possent. Certè sanctus Ludouicus Rex Francorum in Palæstina magnificentiam suam planè ostendit, cùm ciuitates nonnullas propriis sumptibus restaura-

Prou. 19.

stauravit. Idem Principes, ad imitationem magnificentiæ Dei, soli possunt integros exercitus alere; & sæpè etiam ingentem pauperum multitudinem sumptibus propriis sustentare. Id quod magna cum laude idem sanctus Ludouicus præstabat; & qui eum imitari cupiebat, beatus Amadeus Sabaudia Dux tertius. Iste enim, quod multi Principes in canibus venaticis & auibus rapacibus alendis infumunt, id totum, & multo etiam amplius quotidie in turba pauperum sustentanda magnificentissimè infumebat. Et quoniam, qui miserentur pauperum, scelerantur Domino; ex tanta opum profusione, ærarium publicum nihil detrimenti patiebatur.

Neque deest Principibus terræ ratio aliqua imitandi magnificentiam Dei in rebus ingenio humano excogitatis, & magnis sumptibus ad vsum humanum reuocatis, quæ miracula humana dici possint. Tale mihi videtur nauium onerariarum constructio. Quis enim crederet, nisi vidisset, naues maximas, & rebus grauissimis onustas, super aquas subsistere, ybi lapilli exigui sustineri non valent? Et rursus, quis vllò modo suspicari posset, nisi experimèto proprio didicisset, immensa illa pondera solo flatu ventorum vela impellentium, velocissimè

eiffimè non tam currere,quàm volare? Neque solum est hoc quasi miraculum nature; sed innumerabilia sunt alia, quæ ingenium humanum, addita Principum magnificentia, excogitauit. Denique illud etiam assecuta est humana sagacitas, per Principum magnificentiam sumptus maximos suppeditantem, vt firmissima ædificia dicto citius prosternantur. Quas enim turres, quæ mœnia ciuitatum amplissimarum non euertūt facili negotio ictus bombardarum? quas arces munitas, quas portas etiam ferreas non subruit momento temporis, copia subiecta pulueris tormentarij? Quare magnificentia Principum terrenorum imitatur suo quodam modo magnificentiam Principis cælestis. Sed illud optandum est, vt Principes creati & terreni imitentur in operibus bonis magnificentiam Principis cælestis, & Creatoris: nam si fortè velint abuti magnificentia ad vanitates & peccata, melius erat eis, si priuati & pauperes semper fuissent. *Quid enim prodest homini si mundum vniuersum lucretur, anima verò sua detrimentum patiatur?* Matth. 16

Vnus ex malis imitatoribus magnificentiae diuinæ fuit Imperator Caius Cæsar, qui Caligula cognominatus est; qui in cœna vna ducenta quinquaginta millia ducatorū con-

consumpsisse dicitur. Eius imitatores fuerunt Nero, & Aulus Vitellius, & Domitianus; quorum immensos thesauros fuisse consumptos in fabricis, vestibibus, & cœnis, refert Suetonius Tranquillus. Ad eosdem accessit, nisi etiam omnes superauit, Marcus Antoninus Heliogabalus, ut Ælius Lampridius & alij referunt. Fructus huius falsæ magnificentiae fuit egestas ingens, ad quam arcendam omnes isti Principes rapacissimi facti sunt bonorum alienorum, malis artibus acquiritorum, ut ex iisdem Auctoribus intelligi potest. Sic falsa magnificentia in veram avaritiam, & falsa liberalitas in veram rapacitatem, quæ mater est odij populorum, commutata est.

Discant igitur Christiani Principes magnifici esse, ubi & quâdo oportet, ad gloriam Dei, & commoda populorû; ut apud Deum, & apud homines, non auram leuem ad tempus, sed gloriam solidam & veram in omnem æternitatem acquirant.

C A P. X V.

Declementia, quæ Principi necessaria est ad regendos populos.

S. Tho. 2. 2.
q. 157. &
159.

CLEMENTIA virtus est amabilissima, quæ crudelitati opponitur, quod vitium omnes horrent. Siquidem clementia in eo posita

fita est, vt pœnas minuat, iniurias obliuiscatur, & vindictam omnino refugiat. Est verò hæc virtus quasi propria Deo, Principi omnium Regum, ac per hoc Regibus & Principibus terræ valdè honorifica, nec minùs amabilis. Nam priuati homines si non vlciscuntur iniurias, causa esse videtur, quia sine periculo non possunt: Princeps verò, qui facile posset, si vellet, vlcisci iniuriam, si non facit, ex virtute clementiæ non facit: ac per hoc similis Deo esse dignoscitur. De Deo sic loquitur Ezechias Rex in literis suis ad populos, exhortans illos ad pœnitentiam: *Clemens est Dominus Deus vester, & non auertet faciem suam à vobis, si reuersi fueritis ad eum.* 2. Paral. 30.

Quibus verbis affirmat sanctus Rex, Deum non puniturum pro meritis peccata populorum, modò pœniteat eos scelerum suorum, ac per hoc auersurum flagellum imminens, quia clementissimus est, & facile obliuiscitur iniuriarum. De Rege sic loquitur Salomon: *Misericordia & veritas custodiunt Regem, & roboratur clementia thronus eius.* Prou. 10.

Et verè sic est: nullæ enim custodiæ militares sic stabiliunt Regnum, & vitam Regis faciliùs conseruant, quàm clementia nota regnantis. Probat hoc ipsum Seneca in libro priore De clementia, egregia ratione. Nam id est in Regno Princeps, quod animus in corpore: animus

animus enim corporis membra mouet , regit, gubernat , & naturaliter amat membra sua; & quidquid noxium accidit, statim conatur illud auertere , & corpus suum integrum sanumque seruare : & denique totum corpus suum clementer fouet , & nutrit , & de illius incolumitate assidue cogitat: propterea vicissim membra omnia , si sit opus, pro spiritu siue anima periculis se exponunt, & patiuntur amputari potius manus, aut pedes, aut alia membra corporis, quam vt animus à corpore separetur. Sed si fortè animus ad altiora raptus, incipiat inclementer & duriter corpus suum ieiuniis & vigiliis nimium atterere; corpus quoque, quasi rebellans, officio suo fungi recusat. Sic igitur, si Princeps, instar animi siue spiritus, populos, vt membra sua, clementer & leniter regat, imponat iugum siue onus quod ferre possint; ad se venientes amanter audiat, negotia eorum breuiter & iuste tractari iubeat; experietur vicissim populos amantes, & obedientes, & sine vlla dubitatione fidelissimos. Sin autem contrà non vt clementem patrem , sed vt durum dominum , Principem suum experiantur, mirari non debet Princeps, si odio habeatur, & cum maximè opus habebit defensione , à subditis deferatur. Amor enim amorem conciliat, & clementia beneuolentiam

tiam parit. Et contrà, vt Sapiens loquitur, *odium suscitatur rixas*: & ideò mirum videri Prou. 10. non debet, si hi, qui non diligunt, sed oderunt Principem suum, occasionem rixarum & dissensionum quærant. Exempla sunt ad manus. Salomon pacificus & clemens, annis quadraginta sine vlla rebellionem regnavit; sed quoniam extremo tempore addidit aliquid ad solitas exactiones, ideò mortuo Salomone, populus à nouo Rege, qui dicebatur Roboam, petiit amoueri nouum vectigal: sed Rex nouus initium regnandi fecit à minis & terrore; & populo ante se congregato respondit: *Pater meus aggrauauit iugum vestrum; ego autem addam iugo vestro: pater meus cecidit vos flagellis; ego autem cadam vos scorpionibus*. Ea verò sæuitia & inclementia, causa fuit, vt deficeret statim ab eo plusquam dimidia Regni pars.

In historia verò Romanorum leguntur plurimi Imperatores, qui ob solam ferè crudelitatem adhuc iuuenes miserè extincti fuerunt; in quibus numerantur Caius, Nero, Vitellius, Domitianus, Commodus, Caracalla, Heliogabalus, & alij: contrà verò plures propter insignem clementiam & ad senium peruenerunt, & post obitum à memoria & amore ciuium non recesserunt, Augustus, Vespasianus, Traianus, Adrianus,

G

Anto.

Antoninus, Marcus, & alij: quibus addi debet Titus, qui quamuis ad senium non peruenierit, tamen non occisus, vt illi superiores; sed naturali morte extinctus, sic semper amatus est, vt deliciæ generis humani nominari meruerit.

Hæc certè exempla facilè possent Principes omnes ad clementiam adamandam, & ad crudelitatem odio habendam impellere, si attentè historias. perlegerent. Porro clementia, quamuis præclara sit virtus, tamen non in omnibus omnium iniuriis vel culpis habet locum. Verè enim scripsit Seneca:

Lib. 1. c. 2.
de clementia.

Lib. 1. c. 20.

Tam omnibus ignoscere crudelitas est, quàm nulli. & rursus rectè idem admonuit, clementiam potius iniuriam propriam respicere, quàm alienam. Quemadmodum enim non ille liberalis est qui rem alienam donat, sed qui suam; sic etiam, qui iniuriam alteri factam condonat, non est tam propriè clemens, quàm is qui iniuriam sibi factam facilè dimittit. Sed in vniuersum illud cauendum est, ne clementia iustitiam lædat: virtutes enim sorores sunt, seque inuicem iuuant, proinde virtus in vitium degenerat, si virtutem aliam lædit. Ergo in iniuriis alienis clementia non interuenit, vt reus absolutè non puniatur, sed vt vel ex æquitate pœna diminuat, vel ex consensu eius qui iniuriam accepit,

cepit, prorsus tollatur, si spes adsit, id ei, certis de causis, vtilius esse futurum, neque Reip. obfuturum. Cùm verò iniuria ipsi Principi facta est, laudabilis clementia erit, si Princeps excelso animo vindictam respuat; nisi fortè periculum sit, ne reus ex impunitate deterior fiat. Tunc enim æquitas postulat, vt Princeps sinat ab ordinariis Iudicibus de reo pœnam aliquam sumi.

C A P. XVI.

*De misericordia Principi necessaria
ad regendos populos.*

POSTREMA virtus, ex ijs quas considerandas suscepimus, misericordia est. Sed antequam de ea scribere incipiamus, remouenda est calumnia, vt sic loquar, Senecæ: qui quoniã addictus erat disciplinæ Stoicorum, affirmare non dubitauit, misericordiam non virtutem esse, sed vitium. Sic enim loquitur in libro posteriore De clementia: *Ad rem*, Lib. 2. c. 4. inquit, *pertinet hoc loco, quærere quid sit misericordia: plerique eam vt virtutem laudant, & bonum hominem vocant misericordem; hæc autem vitium animi est. Vtraque circa seueritatem circaq; clementiam posita sunt: quæ vitare debemus, ne per speciem seueritatis in crudelitatem, nève per speciem clementiæ in misericordiam incidamus.*

- Lib. 2. c. 5. *cidamus. & paulò pòst, Ergo, inquit, quemadmodum Religio Deos colit, superstîtio violat; ita clementiam omnes boni præstabunt, misericordiam autem vitabunt. Est enim vitium pusillè animi ad speciem alienorum malorum succidentis. Itaque pessimo cuique familiarissima est. Hæc sanè opinio Christianis hominibus omnino fugienda est, cùm Scriptura diuina misericordiam multis in locis amplissimè laudet, & ipsi Deo familiarè & gratissimam in primis esse testetur, & ipsi clementiæ, quam Seneca laudat, vt comitem fidissimam adiungat. In libro Exodi Moyses dicit: Domine Deus misericors, & clemēs; patiens, & multa miserationis, qui custodis misericordiam in millia. & rursus in libro secundo*
- Exod. 34. *Esdra legimus: Tu autem Deus clemens, & misericors, longanimis, & multa miserationis, non dereliquisti eos: & quidem cùm fecissent sibi vitulum conflatilem, & dixissent, Iste est Deus tuus, qui eduxit te de Aegypto. Ionas quoque*
2. Esd. 9. *Propheta Deum sic alloquitur: Scio quia tu Deus clemens & misericors es; patiens, & multa miserationis. Fallitur igitur Seneca, dum misericordiam à clementia ita separat, ac si prior vitium, posterior sola virtus esset.*
- Ion. 4.

Deinde in vtroque Testamento misericordia sic laudatur, vt vix alia virtus tot in locis decantata reperiatur, de qua re paulò pòst

pòst agemus. Ecclesia denique fidelium omnium Mater in publicis precibus, sic misericordiam prædicat, vt eam Deo propriam esse significet. *Deus, inquit, cui proprium est misereri semper & parcere.* Vbi vox, *misereri*, ad misericordiam; vox, *parcere*, ad clementiam pertinet. Sic enim Ecclesia ex Diuinis literis edocta, misericordiam cum clementia coniungit; non separat vnā ab altera, vt vitium à virtute. Valeat igitur cum suis Stoicis Seneca, qui homines non vt carneos, sed vt ferreos ægritudinem animi sentire non patitur, & in mediis ignibus, & in ipso tauro Phalaridis sapientem suum lætari & gestire contendit.

Porro misericordia virtus eximia, communis quidem est Principi cum populo, sed tamen in Principe longè amplius elucet, & in Deo sic eminet, vt ipsi propria dici possit, vt paulò antè ex prece Ecclesiastica demonstrauimus. Solus enim Deus omnes omnino misérias tollere potest, & tollit etiam, non omnes ab omnibus rebus, sed omnes quas secundum sapientiam suam iudicat esse tollendas. Secundus à Deo est Princeps, qui multa genera miseriarum, non ab vno aut altero homine, sed ab integris ciuitatibus & prouinciis tollere potest, & re ipsa tollit, quando similis Deo in misericordia & mise-

Gen. 41.

rationibus fieri studet. Quantas miseras vno verbo Princeps tollit à populis suis, quando bellum gesturus, ex misericordia populi sui, pacem præoccupat, ne mala innumerabilia populi suæ ditioni subiecti patiantur ex bello? Sic etiam à quanta miseria populos suos Princeps liberat, quando imminente caritate annonæ, prouidentia sua facit, vt annona in prouincia sua vel ciuitate abundet? Hanc laudem olim Iosephus in Ægypto promeruit, vnde & Saluatoris mundi nomen obtinuit, quoniam prudentia sua non Ægyptum tantum, sed etiam vicinas prouincias ab extrema frumenti penuria liberauit. Omitto similes alias rationes subleuandi populi à comuni miseria, quas Princeps misericors, & populorum suorum verus amator, excogitare poterit. Neque solum populum vniuersum, sed etiam singulos de populo Princeps misericors à miseriis variis liberabit, si prouiderit diligentia sua, vt Iudices causas miserorum quam citissime expediant; & non permittat, vt pauperes expendant in libris sæpè multo amplius, quam id sit, quod recuperare desiderant.

Et quoniam Spiritus sanctus in Diuinis literis encomia tam eximia misericordiæ posuit, vt ad ea nihil addi possit: sententias aliquot referam, & finem disputationi siue cohorta-

hortationi imponam. Primus incipiat Moy-
ses, & legem ferat de misericordia erga ini-
micum: vnde colligatur, qualis misericordia
requiratur erga miserum amicum. *Si occur-* Exod. 23.
reris, inquit, boui inimici tui, aut asino erranti,
reduc ad eum. Si videris asinum odientis te, ia-
cere sub onere; non pertransibis, sed subleuabis
cum eo. Secundus sit sanctus Iob, qui dicit:

Qui tollit ab amico suo misericordiam, timorem Iob 6.
Domini derelinquit. Tertius Dauid, qui de-

scribens hominem iustum, inter alia eius en-
comia ponit misericordiam: *Iucundus homo,* Psal. 111.
qui misereatur, & commodat. & paulò post: *Di-*
spersit, dedit pauperibus: iustitia eius manet in
seculum seculi: cornu eius exaltabitur in gloria.

Vbi Dauid primùm laudat misericordiam
in dimittendis iniuriis, & commodandis pe-
cuniis, cùm dicit, *Qui misereatur, & commo-*
dat, vt sanctus Augustinus in eum locum do-
cet: deinde addit misericordiam in doñan-
dis abundanter eleemosynis pecuniarum,
cùm ait, *Dispersit, dedit pauperibus:* & addit
præmium duplex, quòd iustitiæ eius meri-
tum *manet in æternum,* & quòd in præsentì
sæculo potens & gloriosus euadet. Eleemo-
syna enim non facit hominem pauperem &
despectum, sed inclytum & potentem, si id
eius salutì æternæ conducat. Quartus sit Sa-
lomon sapientissimus: is in libro Prouerbio-

104 De misericordia Principis.

Prou. 13. rum: *Iusti, inquit, misericordes sunt, & miserantur.* Item: *Qui miseretur pauperis, beatus erit.* Item: *Fœneratur Domino qui miseretur pauperis.* Quintus est Tobias, qui instituens filium suum, dicebat: *Quomodo potueris, ita esto misericors. Si multum tibi fuerit, abundanter tribue: si exiguum tibi fuerit, etiam exiguum libenter impartiri stude. Præmium enim bonum tibi thesaurizas in die necessitatis: quoniam elemosyna ab omni peccato, & à morte liberat, & non patietur animam ire in tenebras.* Vix addi potest aliquid ad magnitudinem huius præmij; & tamen pigri sunt homines ad opera misericordiæ, cum propter minora præmia laborent vsque ad mortem. Sextus, Ecclesiasticus plenus est encomiis misericordiæ: inter
 Eccli. 28. alia sic ratiocinatur: *In hominem similem sibi non habet misericordiam, & de peccatis suis deprecatur? ipse cum caro sit, reseruat iram, & propitiationem petit à Deo? quasi dicere velit, Iste frustra laborat, cum sit immisericors in fratrem, & misericordiam petat à Deo.* Omitto Prophetas, qui pleni sunt testimoniis.

Accedo ad Testamentum nouum. Sanctus Matthæus Scriptor primus refert verba Domini in Sermonem in monte habito, ubi dicit: *Beati misericordes, quoniam ipsi misericordiam consequentur.* Quam autem misericordiam consequentur, docet Dauid in Psalmo
 mo

Matt. 5.

mo cùm ait: *Qui coronat te in misericordia, & miserationibus; qui replet in bonus desiderium tuum.* Et audet homo alioqui sapiens dicere, misericordiam esse vitium, non virtutem? quasi possit vitium apud Deum aliquid mereri, aut possit Deus in præmium reddere aliud vitium? Verè stulta facta est sapientia huius mundi. Secundus sit alter Euangelista, qui refert verba illa eiusdem Christi: *Estote misericordes, sicut & Pater vester misericors est.* Tercius sanctus Paulus Apostolus in Epistola ad Ephesios, *Estote, inquit, misericordes, donantes inuicem, sicut & Deus in Christo donauit vobis.* & idem ad Colossenses: *Induite vos, sicut electi Dei, sancti & dilecti, viscera misericordie, supportantes inuicem, & donantes vobismetipsis, si quis aduersus aliquem habet querelam: sicut & Dominus donauit vobis, ita & vos.* Quartus S. Petrus in Epistola prima: *In fine autem, inquit, omnes vnanimis, compatiētes, fraternitatis amatores, misericordes, modesti, humiles; non reddentes malum pro malo, nec maledictum pro maledicto, sed è contrario benedicentes, quia in hoc vocati estis, ut benedictionem hereditate possideatis.* Quintus sanctus Iacobus in Epistola sua: *Iudicium, inquit, sine misericordia illi, qui non fecit misericordiam: superexaltat autem misericordia iudiciū.* Quæ verba paulò sunt obscuriora, sed hunc ha-

Psal. 102.

Luc. 6.

Ephes. 4.

Colos. 3.

1. Pet. 3.

Iacob. 2.

bent sensum: Iudicium sine misericordia, id est, seuerum iudicium reportabunt, qui misericordes in proximos non fuerunt; sed viri misericordes iudicium mitissimum inuenient, quia misericordia exaltat se super iustitiam, vel, vt in Græco legitur, *superexultat iudicio*, siue gloriatur supra iudicium. *Miserationes enim Domini super omnia opera eius*, vt Dauid canit. Sanctus enim Iacobus cum hoc diceret, respexisse videtur ad ea, quæ de ultimo iudicio Dominus ipse prædixit. Videmus enim in Iudicio solos misericordes iudicari cum summa misericordia, cum dicitur, *Possidete regnum: esuriui enim, & dedistis mihi manducare, & quæ sequuntur.* & contra solos immisericordes sine misericordia iudicari, cum dicitur, *Discedite à me maledicti in ignem æternum; esuriui enim, & non dedistis mihi manducare, & quæ sequuntur.* Vltimus sit sanctus Ioannes, qui quamuis neque in Euangelio, neque in Apocalypsi, neque in Epistolis suis misericordiam nominauerit: eam tamen in radice, & fonte, siue in matre sua charitate, frequentissimè prædicauit. Quid enim significant illa verba in Epistola prima? *Ille animam suam pro nobis posuit, & nos debemus pro fratribus animas ponere. Qui habuerit substantiam huius mundi, & viderit fratrem suum necessitatem habere, & clauserit viscera*

Psal. 144.

Mat. 25.

1. Ioan. 3.

viscera sua ab eo; quomodo charitas Dei manet in eo? Filioli mei, non diligamus verbo, neque lingua, sed opere & veritate. Quid enim est claudere viscera; nisi non misereri? & quid est diligere verbo, non veritate; nisi compassionem habere in ore, nō in corde? Ideo enim præclara illa virtus, qua compatimur proximis nostris, misericordia dicitur, quia vera cordis affectio, non mendax linguæ professio est.

Habemus igitur duodecim testes omni acceptione dignissimos, & omni exceptione maiores, qui Spiritu sancto dictante, encomia misericordiæ nobis scripta reliquerūt, quibus & Stoicis ora obstruere, & Principes Christianos ad eam virtutem, quæ Deo gratissima est, exhortari sine vlla dubitatione possimus.

CAP. XVII.

De officio Principis Christiani erga domesticos suos.

EXPOSVIMVS quæ sint partes Principis Christiani erga populos sibi subiectos: nunc maiori breuitate addemus, quæ sint partes eiusdem Principis erga alios subditos, qui non comprehenduntur sub nomine populi:

populi: tales sunt in primis domestici, vxor, filij, fratres: tales sunt etiam amici, & consiliarij: tales Iudices, qui prouincias vel ciuitates regunt: & tales denique milites, & alij, quibus stipendia dari solent.

Gen. 3. Igitur, vt à domesticis incipiamus, primus locus coniugi debetur, quippe quę particeps est nominis Regij, & solij, & coronę; quamuis re ipsa subdita sit, cū in prima parente sibi quoque dictum à Deo audierit: *Sub viri potestate eris, & ipse dominabitur tui*. Igitur de coniuge Principis hoc solum admonendum esse censeo, vt vir omni animi prouisione caueat, ne vxor, quamuis sapiens videatur, ipsi viro dominari incipiat. Habemus exempla in Diuinis literis, ex quibus discere liceat, quanta sit mulieris impotentia, & ad quā horrenda præcipitia viros suos adegerint. Prima Eua non quidem Adamo dominari voluit, sed consilium ei dedit, vt pomum à Deo vetitum gustaret, vnde mors & exitium totius posteritatis consecutum est. Consilium autem illud Adamus accepit, neque ausus est respondere quod Iob coniugi suę respondit, *Quasi una de stultis mulieribus locuta es*; quia Eua valde diligebat, & (vt sanctus loquitur Augustinus) *delicias suas contristare nimium timuit*. Exemplum Euę secuta est Dalila vxor Samsonis, Iudi-

Iob 2.

Libro 11.
de Gen.
cap. vlt.
Iudic. 16.

Iudicis, ac Principis Hebræorum; quæ tam absolutum imperium in virum accepit, vt vir nihil ei negare posset, & tandem per eam Principatum & vitam amisit. Salomonem autem olim felicissimum & sapientissimum Regem, amor mulierum ad eam infelicitatem & insipientiam adduxit, vt septingentis vxoribus, & trecentis concubinis, quasi ^{3. Reg. 13.} mancipium vile seruiret. Quid de Achab Rege & Iezabel eius coniuge dicam? Ad- ^{3. Reg. 20. & 21. & 4. Reg. 9. & 10.} dictus erat Achab valdè vxori suæ idololatræ; itaque ipse quoque idola coluit, & consentiens sceleribus grauissimis vxoris suæ, atque dominari eam in Regno sinens, causa fuit, vt & ipse, & ipsa, & omnes filij, qui erant numero septuaginta, occiderentur, & Regnum ad alios transfiret. En quantorum malorum causa femina vna fuit, quæ sub viri potestate esse noluit. Sed Achab meritas pœnas luit; quia ad ipsum pertinebat, coniugem in officio continere, & (quod caput est) numquam committere debuit, vt contra legem Domini, vxorem falsæ religionis cultricem duceret.

Veniamus ad filios. Filij Principum educari deberent in timore Domini; & obsequentes non solum parentibus, sed etiam Magistris morum & doctrinæ. Habemus exemplum insigne apud Metaphrastem, qui

Sur. in Vita
S. Arsenij,
die 19. Iul.

qui describens res gestas Arsenij, qui fuit Magister Arcadij, filij Theodosij Imperatoris, refert, Theodosium venisse aliquando in scholam, vbi filij eius Arcadius & Honorius adhuc pueri instituebantur ab Arsenio viro probò & erudito: & cùm vidisset filios suos sedentes, & Magistrum stantem; reprehendit filios, quòd auderent pueri & discipuli coram sene & Magistro stante sedere; & iussit, vt Arsenius sederet, & Arcadius atque Honorius starent: & profuit ista bona educatio filiorum; vterque enim bonus postea Imperator fuit, quamuis Arcadius vxori nimium addictus, sancto Ioanni Chrysostomo parum fauerit. Contrà verò Dauid Rex sanctus, vel non potuit rectè educare filios suos, vel quæcumq; causa fuerit, vnus videlicet Amnon, sororem propriam stuprauit; alius, id est Absalom, occidit fratrem, persecutus est patrem, vt eum e Regno pelleret, & vxores patris publicè violauit. Huius rei nulla causa fuisse videtur, nisi mala educatio. Fuit enim Dauid quasi perpetuò in bellis occupatus.

Illud etiam certè valdè admirandum est, Regibus valdè piis filios impiissimos successisse. Iosaphat Rex optimus reliquit filium successorem Ioram Regem deterrimum. Ioathan Rex bonus genuit Achaz virum
malum,

malum, qui ei successit in Regnum. Ezechias Rex clementissimus & optimus habuit heredem Regni Manassem Regem crudelissimum & pessimum. Iosias Rex sanctissimus successores habuit filios valdè malos Ioachaz & Eliakim, quorum prior regnavit solùm mensibus tribus, & abductus est captivus in Ægyptum; posterior regnavit annos vndecim, & propter peccata sua ductus est catenis vinctus in Babylo-nem. Summa est, providendum esse Principibus, vt optimos educatores prospiciant filiis suis, si volunt & Deo rem gratissimam & populis rem vtilissimam facere.

Reliqui sunt fratres ex domesticis, qui sæpè valdè adiuuant Principem, quando charitas fraterna inter eos viget: sed non desunt aliquando ambitiosi, qui desiderio regnandi vel insidias struunt Principi, vel bellum apertè mouent. Et quoniam charitas fraterna minùs viget inter Turcas, quàm inter Christianos; videmus iam à lógo tempore inter Turcas crudelem illam legem vigere, vt fratres Principis sub ipsum initium interimantur, sine vlla culpa sua, tantùm vt Rex nouus non timeat defectiones prouinciarum ad aliquem ex fratribus, si quando imperium maioris fratris graue videri incipiat. Inter Christianos rarum est,

vt

vt aliquid eiusmodi contingat . Contigit tamen B. Amadeo Duci Sabaudiaꝝ auorum nostrorum memoria, vt vnus ex fratribus non semel à Principe defecerit, & bellum aduersus eum gerere cœperit. Sed, vt in vita eius postea referemus, incredibili benignitate & charitate B. Amadeus germanum suum ex hoste fratrem verum sincerumque reddidit . Ad cauenda eiusmodi pericula, nulla excogitari potest regula tutior, quàm vt Princeps fratres suos, vt fratres cognoscat, non vt seruos, neque vt dominos. Non despiciat, neque suspiciat . Vbi enim iustitia viget, ibi etiam pax viget.

CAP. XVIII.

*De officio Principis Christiani erga
amicos & consiliarios.*

ADIUNGO amicos consiliariis, quia non loquor de publico Senatu, neque de quibuscumque amicis; sed de amicis intimis & prudentibus, cum quibus Principes solent secreta sua communicare, & sine quorum consilio nihil omnino agunt. Talis erat apud Dauid Achitophel, quo deficiente ad Absalonem, Dauid in maximo timore erat. Siquidem, vt dicitur in libro secundo

do Regum, *Consilium Achitophel quod dabat* 2. Reg. 16.
in diebus illis, quasi si quis consuleret Deum. Esse

autem Principi necessarium consilium fidelissimorum & prudentium amicorum, & cum iis liberè & simpliciter agendum esse, sic vt intelligant amici, Principem in eis multum omnino confidere; docet in primis Tobias senior: qui, quamuis non Principibus, sed filio præcepta daret; tamen erat vir sanctus & sapiens, vt eius documenta omnibus prodesse possint. Sic igitur Tobias loquitur: *Consilium semper à sapiente perquire.* Tob. 4.
Omni tempore benedic Deum; & pete ab eo vt vias tuas dirigat, & omnia consilia tua in ipso permaneant. Quibus verbis monet prudentissimus senex, vt sine consilio sapientis nihil agamus: sed vt ille sapiens nos fortè non fallat, vel ignorantia, vel malitia; iterum monet, vt Deum precemur, vt vias nostras dirigat, & omnia consilia, quæ nobis dantur à sapientibus, ab ipso Deo dirigantur, & in ipso permaneant, id est, ab ipso stabiliantur & confirmentur, si recta sunt.

Deinde hoc idem Salomon in Prouerbiis scribit, cum ait: *Inter superbos semper iurgia sunt: qui autem agunt omnia cum consilio, reguntur sapientia.* Prou. 13. Significat autem Salomon, superbos esse qui consilia sapientum respuunt, & idè inter eos semper esse

H iurgia

- Prou. 19. iurgia. Idem: *Audi consilium, & suscipe disciplinam, ut sis sapiens in nouissimis tuis.* Idem:
- Prou. 20. *Sicut aqua profunda, sic consilium in corde viri; sed homo sapiens exhauriet illud.* Significat autem hoc prouerbum, consilium non facile inueniri, nisi diu & attentè cogitando. Illi enim, qui statim ad interrogata respondent, facile decipiuntur: sed qui diu cogitando scrutantur omnia, illi, quasi ex profundo, aquam puram verissimi consilij hauriunt, & ideo sapientes vocari possunt. Idem: *Ynguento, & variis odoribus delectatur cor: & bonis amici consiliis anima dulcoratur. Amicum tuum, & amicum patris tui ne dimiseris.* videlicet, ne perdas bona consilia eorum.
- Prou. 27.

Ecclesiasticus quoque, vir sapiens, ut cauere monet ab amicis non fidelibus; sic omnino iubet adhærere amicis fidelibus: *Multi, inquit, pacifici sint tibi, & consiliarius sit tibi unus de mille. Si possides amicum, in tentatione posside eum, & ne facile credas ei.* id est, proba illius fidelitatem tempore tribulationis tuæ, & non facile credas illi, antequam probaueris eum. Pergit Ecclesiasticus: *Est enim amicus secundum tempus suum, & non permanebit in die tribulationis. Et est amicus, qui conuertitur ad inimicitiam,* id est, instabilis, qui facile ob leuem iniuriam efficitur inimicus. Addit Ecclesiasticus: *Est autem amicus socius mensæ, &*
non

non permanebit in die necessitatis. Addit postea idem Ecclesiasticus de veris amicis: *Amicus fidelis, protectio fortis: qui autem inuenit illum, inuenit thesaurum. Amico fideli nulla est comparatio; & non est digna ponderatio auri & argenti contra bonitatem fidei illius. Amicus fidelis, medicamentum vitæ, & immortalitatis: & qui metuunt Dominum, inueniunt illum.* Verè magnum donum à Deo accipit, qui fidelem & sapientem amicum inuenit, præsertim in tanta turba adulatorum, quæ in aulis Principum inuenitur. Idem Ecclesiasticus alio loco prudenter monet, dicens: *Fili, sine consilio nihil facias, & post factum non pænitebis.* Eccli. 32.

Hæc omnia, quæ diximus, confirmari possunt exemplis. Roboam filius Salomonis 3. Reg. 12. non alia de causa infelicissimè regnauit, nisi quia reliquit consilia senum qui assistebant patri eius; & accersiu it iuuenes amicos suos, à quibus seductus, exacerbauit populum, antequam Regnum sibi stabiliuisset. Itaque non alia de causa, quàm ex consilio insipienti amisit continuò maiorem partem regni sui. Id verò præuidisse videtur Salomon, cùm ait: *Amicum patris tui ne dimiseris.* Prou. 27. Roboam enim non amicum vnum, sed amicos omnes patris sui dimisit. Sed vt plurimum mali consiliarij, & infideles amici Princi-

Esther 7.

Tacitus
l. 5. AnnalSeneca l. 6.
De bene-
ficiis c. 32.

pum, non diu fruuntur potentia sua. Scimus enim, Aman amicum & consiliarium primarium Regis Assueri, post detectas fraudes eius, in ligno suspensum periisse. Scimus etiam, Seianum, qui inter amicos & consiliarios Tiberij Imperatoris primus erat, & usque adeò dilectus, ut pænè par esset Imperatori, paulò post ob superbiam, & insatiabilem cupiditatem, ex altissimo loco ad imum decidisse, sic, ut vnco tractus in Tiberim fuerit. Contrà autem, Mæcenæ & Agrippa Augusti Cæsaris amici & consiliarij fidelissimi, sic amati sunt usque ad mortem, ut etiam post ipsorum mortem Augustus in calamitate quadam sua dixisse memoretur: Horum mihi nihil accidisset, si aut Mæcenæ aut Agrippa vixisset.

C A P. X I X.

*De officio Principis Christiani
erga Iudices.*

IUDICVM nomine intelligo omnes qui causis diiudicandis præsent, siue sint Iudices primarij, ut ij qui cum potestate ciuitatibus vel prouinciis præsent, siue secundarij, ut ij quibus ipsi causas minoris momenti diiudicandas permittunt. Porro ipsis omnibus duo præcepta Spiritus sanctus in Sacris literis assignat;

assignat ; vnum, vt iustè iudicent , sine acceptione personarum; alterum, vt à muneribus omnino manus abstineant. Vtrumque complexus est paucissimis verbis Iethro socer Moysis : *Provide, inquit, de omni plebe viros* Exod. 18. *potentes, & timentes Deum, in quibus sit veritas, & qui oderint auaritiam : qui iudicent populum omni tempore. quidquid autem maius fuerit, referant ad te, & ipsi minora tantummodò iudicent. Quibus auditis, Moyses fecit omnia quae ille suggererat.* Itaque primùm requiritur in Iudicibus, vt sint *viri potentes*, id est, strenui, graues, docti, sapientes, honorati, vt non contemnantur à populo, & possint onus portare quod eis imponitur. Deinde, vt sint *viri timentes Deum*, id est, vt non solum coram hominibus, & propter timorem hominum iustè iudicent; sed vt verè coram Deo sint Iudices iusti, & intelligant se à Deo videri, qui scrutatur renes & corda, & posse ac velle de iudiciis ipsorum iudicare, eosque præmiis vel poënis afficere. Addit præterea Iethro, *In quibus sit veritas*: id est, qui verè sint iusti, & verè ac iustè iudicare possint ac velint. Denique addit, *Qui oderint auaritiam*; id est, non solum quia lex vetat accipere munera, abstineant manus à muneribus; sed multò magis, quia ipsi ex se auaritiam oderunt, vtpote viri iusti & liberales. Ipse verò Moyses in libro

- Deut. 1. Deuteronomij, *Nulla erit, inquit, distantia personarum; ita paruum audietis, ut magnum: nec accipietis cuiusquam personam, quia Dei iudicium est.* Dicitur autem esse omne iudicium Dei, quia solus Deus est supremus Iudex, cuius auctoritate omnes iudicant.
- Iac. 4. *Vnus est, inquit S. Iacobus, legislator, & Index, qui potest perdere, & liberare.* Porro Rex & Propheta Dauid in Psalmo octogesimo primo idipsum admonet exhortatione grauissima. Primum enim docet, Deum communicasse cum Iudicibus terræ nomen & officium suum: ut ad tantum honorem euecti erubescerent ob temporale lucrum tam sublimis officium infamare.
- Psal. 81. *Deus, inquit, stetit in synagoga Deorum, id est, Deus Deorum Dominus, consortes nominis & officij sui Iudices fecit, neque abesse voluit ab eorum cœtu, cum ad iudicandum conueniunt.* Itaque ubicumque Iudices, qui Dij ab ipso magno Deo vocantur, Iudicium funguntur officio, Deus ipse Princeps Deorum inuisibili præsentia maiestatis assistit. Deinde addit Propheta, Deum magnum non otiosè assistere, sed ipsa iudicia discutere, & Iudices ipsos terribiliter iudicare, puniturus si à rectitudine deflectant; præmiis affecturus, si non deflectant.
- In medio autem, inquit, Deos diiudicat.* O beatos Iudices, si oculo fidei, cum sedent

dent iudicaturi, summum Iudicem assistentem cernerent, & rectitudinem diuini iudicij seridè atque attentissimè cogitarent! Sed quoniam plerique vel muneribus excæcati, vel acceptione personæ corrupti, Deum præfidentem non cernunt: idèd subiungit Propheta, vel potiùs spiritus Domini per Prophetam: *Vsquequò iudicatis iniquitatem, & facies peccatorum sumitis?* Psal. 81. ac si dicere velit, Quamdiu perseuerabitis in hac voluntaria cæcitate, ob quam iniqua iudicia iudicatis? & quamdiu in iudicando non attendetis ad merita causæ, sed ad personas quibus placere desideratis? quæ radix est iudiciorum iniustorum. Nominat autem Propheta personas, siue facies peccatorum; quoniam etsi possit aliquando vitium acceptionis personarum inueniri sine peccato personæ acceptæ; tamen vt plurimùm persona, cuius gratia peruertitur iudicium, conscia est peruersionis iudicij, & in eam liberè libenterque consentit. Addit Propheta crimen aliud, in quod Iudices facilè incidunt, cùm sine charitate Dei & proximi officio suo funguntur. Expediunt enim diligenter causas diuitum & magnatum, à quibus expectant munera; causas inopum, & egenorum, & viduarum, & pupillorum in longum trahunt; & sæpè contra illos sententiam ferunt, quia non di-

Psal. 81.

ligenter merita causæ discutere voluerunt. Ideò clamat & dicit Spiritus sanctus per os Prophetæ: *Iudicate egeno & pupillo, humilem & pauperem iustificate*; id est, Causam pauperis, & præsertim pupilli, libenter suscipite, diligenter discutite, sollicitè expédite, ne cogantur bona sua litigando consumere: humilem, id est, hominem abiectum, qui negligitur à procuratoribus & aduocatis; & pauperem, qui non potest muneribus sibi viam ad iustitiam aperire, gratis iustificate, Vbi non significat Spiritus sanctus, vt pauper semper contra diuitem victoriam in iudicio

Leuit. 19.

debeat obtinere; cùm scriptum sit, *Non consideres personam pauperis, neque honores vultum potentis; iuste iudica proximo tuo.* sed hoc iubet, vt cùm pauper iustum petit, & à diuite opprimitur; Iudex efficiat, vt iustitia pauperis emineat, & præualeat. Quod apertius docet in sequenti versiculo: *Eripite, inquit, pauperem, & egenum de manu peccatoris liberate.*

Psal. 81.

Sed quoniam reverà pauci Iudices omni ex parte iusti inveniuntur, cùm alij ex malitia, alij ex ignorantia peccent: ideò Spiritus sanctus, accusata malitia in superiori versiculo, in sequenti deplorat per Prophetam suum Iudicium cæcitatem & perversitatem, clamans & dicens: *Nescierunt, neque intellexerunt: in tenebris ambulant: movebuntur omnia fun-*

Psal. 81.

fundamenta terra. Duo illa verba, *nescierunt*, *neque intellexerunt*, hoc propriè significant, non cognouerunt quid facti, neque intellexerunt quid iuris. Verba enim Hebraica, quæ hoc loco habentur, eam vim habent, quam habent apud Latinos, cognoscere & intelligere. Et quoniam ex ista ignorantia facti & iuris, quæ sæpè voluntaria est, fit vt Iudices in tenebris ambulent, id est, errent in iudicando, quo modo cæci errant in ambulando: ideo sequitur perturbatio maxima in Republica, defectio, seditio, tumultus, & alia eiusdem generis multa. Ideò adiungit Spiritus sanctus: *Moueuntur omnia fundamenta terra.* Nam sublata iustitia, turbatur, & quasi fluctuat orbis terrarum vniuersus. Cuius rei exemplum habemus in ipso Regno Dauid. Nam, vt legimus in libro secundo Regum, 2. Reg. 15. nulla alia causà fuit, cur totum Regnum Israel à Dauide aliquando deficeret, nisi quia filius eius Absalom populis persuaferat, Dauidem senio confectum non ampliùs intendere causis cognoscendis, neque sibi substituisse Iudices sapientes & iustos, qui causas populi iustè & celeriter expedirent.

Explicatis malorum Iudicum grauissimis culpis, ex acceptione personarum; ex iniustitia & ignorantia procedentibus; concludit Propheta orationem suam, prædicens casum,

H s

sum,

Psal. 81.

sum, siue potiùs præcipitium Iudicum ex altissimo gradu ad infimum; & implorans Deum, ut ipse descendat, & iudicet per se orbem terrarum, quando eius ministri iustum iudicium iudicare vel noluerunt, vel nesciuerunt. *Ego dixi, Dij estis, & filij Excelsi omnes: vos autem sicut homines moriemini, & sicut unus de Principibus cadetis.* Ego, inquit, exaltaui vos, ut nomine meo appellaremini, & officio meo fungeremini; sed quoniam & nomine & officio indignos vos esse demonstrastis, prædico vobis, quod breuè ut ceteri homines moriemini. Non enim estis Dij immortales, sed mortales: & quod longè miserius est, *sicut unus de Principibus cadetis*; id est, non solum ex naturæ corruptione moriemini propter Adæ peccatum, sed propria iniquitate cadetis ex altissimo gradu ad infimum; & ex altissima celsitudine ad profundissimam gehennam, ut Principes cælestes, Angeli reprobis, ceciderunt. Horrenda planè, sed iusta comminatio Dei ad Iudices. Iustum enim est, ut qui iniusto iudicio multos oppresserunt, iusto Dei iudicio de sede iudiciaria deiiciantur, & cum reprobis Angelis ad gehennam profundissimam demittantur. Sed quod superat omnem admirationem, est, quod sanctus Propheta quasi desperans de emendatione huius generis hominum,

minum, clamat ad Deum in vltimo versiculo, dicens: *Surge Deus, iudica terram, quoniam tu hereditabis in omnibus gentibus.* ac si dicere velit: Quia spes non est, vt Iudices homines iustè iudicare incipiant; tu Iudex summe & iustissime, descende ad generale postremumque iudicium, & redde vnicuique secundum opera sua: tu enim es verus Dominus, & possessor vniuersæ terræ, quam Gentes inhabitant. Verbum enim *hereditare* in Scripturis passim accipitur pro *possidere*. Hæc est sententia Dauid de Iudicibus, quæ sine dubio maximi facienda est, cum ipse, vt Rex, nouerit per experimentum, quàm sit periculosum officium Iudicum; & per spiritum prophetiæ locutus sit, quæ scripsit in hoc Psalmo, de cuius Scripturæ veritate nefas sit dubitare. Veniamus ad alios Prophetas.

Certè omnes Prophetæ, qui erant nuntij Dei ad populum, nihil ferè tam acriter reprehendunt, quàm negligentiam, vel iniquitatem in iudiciis pauperum, viduarum, & pupillorum. Isaias in ipso principio, *Pupillo*, Isai. i. inquit, *non iudicant, & causâ vidua non ingreditur ad illos.* Propter hoc ait Dominus Deus exercituum: *Heu, consolabor super hostibus meis, & vindicabor de inimicis meis.* Ieremias quoque iisdem pænè verbis: *Præterierunt*, inquit, Ierem. 5. *sermo-*

sermone meos pessimè: causam vidua non iudicauerunt, causam pupilli non direxerunt, & iudicium pauperum non iudicauerunt. Numquid super his non visitabo? dicit Dominus; aut super gentem huiusmodi non ulciscetur anima mea?

1. Tim. 6. *Sed radix omnium malorum est cupiditas; ideo Scriptura sancta in iudiciis nihil magis detestatur, quàm acceptionem munerum. Audi Moysen in Exodo: Non accipies munera, quæ etiam excacant prudentes, & subuertunt verba iustorum. Audi eundem in Deuteronomio: Non accipies personam, nec munera; quia munera excacant oculos sapientum, & mutant verba iustorum. Audi Salomonem in Prouerbiis: Conturbat domum suam, qui sectatur auaritiam: qui autem odit munera, viuet. Audi Prophetam Isaiam: Qui projicit auaritiam ex calumnia, & excutit manus suas ab omni munere; iste in excelsis habitabit, &c. Audi Dauidem: Domine quis habitabit in tabernaculo tuo? aut quis requiescet in monte sancto tuo? & post multa bona opera adiungit: Qui munera super innocentem non accepit. & concludit: Qui facit hac, non mouebitur in æternum.*
- Exod. 23.
- Deut. 16.
- Prou. 15.
- Isai. 33.
- Psal. 14.

- Sed operæpretium erit audire, quàm diligenter purgat se Samuel à crimine acceptionis munerum pro toto tempore quo fuerat Iudex in populo Hebræorum. Sic enim loquitur: Ecce, inquit, præsto sum: loquimini de
1. Reg. 12.

de me coram Domino , & coram christo eius ,
 utrũ bouem cuiusquam tulerim , aut asinum : si
 quempiam calumniatus sum , si oppressi aliquem ,
 si de manu cuiusquam munus accepi ; & contem-
 nam illud hodie , restituamq; vobis . Et dixerunt ,
 Non es calumniatus nos , neque oppressisti , ne-
 que tulisti de manu alicuius quippiam . Dixitq;
 ad eos : Testis est Dominus aduersum vos , & te-
 stis christus eius in die hac , quia non inueneritis
 in manu mea quidpiam . & dixerunt : Testis . Ec-
 ce quàm puras manus habuit sanctus Sa-
 muel , & tamen non legitur stipendium vl-
 lum habuisse ex publico erario , neque aliun-
 de pro labore tam diuturno & tam conti-
 nuo iudicandi tot centena millia hominum
 non optimorum . Quare hoc tam insigni
 exemplo , & tot sacræ Scripturæ testimoniis
 admoniti Principes , debent in Regnis suis
 dare operam , vt omnes Iudices excutiant
 manus ab omni munere ; & contenti stipen-
 diis suis , mercedem operum bonorum non
 requirant à pauperibus & miseris homini-
 bus , qui ad tribunalia eorum accedunt ; sed
 expectent ab eo , qui diues est in misericor-
 dia , & iustitiam diligit , & reddere paratus
 est magna pro paruis , & pro temporalibus
 sempiterna .

CAP. XX.

De officio Principis Christiani erga milites, & domesticos famulos.

SUPERSVNT milites , qui inter subditos Principis numerantur, quique vel in bello militant, vel in pace custodiunt arces, aut portas, aut personam ipsam Principis. Porro de istis tam plenè locutus est sanctus Ioannes Baptista , vt vix aliquid supersit quod addere debeamus. Referam igitur ; & vbi necesse videbitur, explicabo sententiam sapientissimi Præcursoris . Prodierat sanctus Ioannes Baptista nuper ex deserto, vbi multis iam annis delituerat, & tamquam ad hominem nouum videndum & audiendū turbæ concurrebant ex omni parte: qui quamuis ab infantia per tot annos cum hominibus versatus non esset , neque literas ab vllō magistro didicisset ; tamen à Spiritu sancto edoctus testimonia Scripturarum proferebat, & singulis hominum generibus pro eorum institutione documenta varia tradebat. Igitur venerunt ad eum etiam milites , dicentes: *Quid faciemus & nos?* Et ait illis: *Neminem concutiatis , neque calumniam faciatis; & contenti estote stipendiis vestris.* Hæc est doctrina brevis , & plena , qualis decebat eum,

Luc. 3.

cum, qui studebat sic vitam suam traducere, vt *ne leui saltem maculare vitam fame possset*, vt Ecclesia in eius laudibus canit. Non admonet sanctus Ioannes milites, vt strenuè se gerant in prælio, neque vt obediētes Imperatori suo se præbeant, neque alia id genus, ad quæ satis illos impellere poterat partim amor laudis, partim pœnæ timor. Siquidem in castris pœna contumaciæ, mors est. Itaque ea solum attingit, quæ ex abusu licentiæ militaris aut non puniuntur, aut leuissimè puniuntur, cum tamen apud Deum sint peccata grauissima.

Primum igitur reprehendit concussionem. *Neminem*, inquit, *concutiatis*. Frequens enim apud milites esse solet, vi cogere eos apud quos agunt, aut eorum vicinos, quamuis amici sint, non hostes, vel ad onera ferenda, vel ad præbendas escas, quas ipsi sibi parauerant, vel ad cedendum eis stratum, vel certò cubiculum, quod ipsi vnicum habent, vel ad ministrandū illis, ac si famuli eorum essent. Hæc & alia permulta comprehenduntur in illo verbo, *neminem concutiatis*, id est, neminem vi adigatis ad ea facienda vel toleranda, quæ nullo iure tenentur agere vel pati. Et hæc iniuria tam frequens est apud milites, vt ego ipse testis esse possim. Nam cum aliquando iter facerem per regionem, vbi
bellum

- bellum gerebatur , & peterem à rusticis, vel etiam à ciuibus, à qua parte starent ; respondabant, A neutra; omnes enim inimici nostri sunt; & sæpè nobis magis sunt infesti qui dicuntur amici , quàm qui dicuntur hostes. Deinde reprehendit sanctus Ioannes militum calumnias; dicens: *Neque calumniam faciatis.* hoc est alterum vitium , quo milites passim laborant. Sæpè fit, vt obuios quosque calumnientur esse exploratores , vel hostes, vel transfugas ; & sine vlla ratione iustitiæ spolient, aut vulnerent, vel captiuos faciant. Et quoniam infelices illi non habent testes innocentiae suæ , coguntur vel redimere vexationem multa summa pecuniæ , vel certè pati crudelissimam vexationem. Ac vtinam ista non essent in castris Christianorum frequentia! Pro quibus tollendis de medio, boni Principes pro viribus laborare deberent. Ad extremum docet beatus Præcursor Domini milites omnes, vt contenti stipendiis suis , aliena non rapiant. Sed vtrum milites, qui sanctum Ioannem audierunt , hæc præstiterint, nescimus: illud scimus, temporibus nostris , non solum in castris hæc tam salubria documenta rarè & à paucis obseruari, sed etiam in ciuitatibus , in quibus hiemare vel ad tempus morari milites necesse est, non leue detrimentum ciuibus adferri. At
fortasse

fortasse non numerantur militibus stipendia in tempore, & ea causa est, cur ciues cogantur ad ea subministranda, quibus milites indigent.

Hoc quidem fieri potest, ut milites non habeant in tempore stipendia sua; sed interim iustitia locum suum non habet; & Deus, qui omnia videt, & in statera iusta appendit, seuerè puniet eos, qui malè agunt. Debent igitur Principes dare operam, ut militibus debita stipendia tempore suo numerentur; & tunc, si sancti Ioannis præcepta milites non implent, in eos sic animadvertere, ut discant stipendiis suis contenti esse, & ciuibus apud quos habitant, molestiam nullam adferre.

Atque hæc, quæ dicta sunt de militibus, transferri possunt ad famulos omnes palatinos, qui & ipsi stipendio suo contenti esse debent; & si quid aliud præter stipendium accipiunt, agnoscere liberalitatem Principis, non debitam retributionem. Alioquin exemplum esse deberent modestiæ, & benignitatis, & iustitiæ omnibus aliis, qui priuatis heris seruiunt, & in priuatis domibus commorantur. Nam non rarò accidit, ut Princeps sit modestus & clemens, & famulos habeat arrogantes & asperos: & Princeps iustitiæ sit tenax, & nulli homini iniuriam

riam faciat, & famuli eius non contenti stipendio proprio muneribus inhient, & quasi vendant aditum ad Principem, vel alia, ad quæ ex officio suo tenentur. Ad eiusmodi vitiis, quæ aliquo modo redundant in bonam Principis existimationem, facile prospici posset, si Princeps serîo & sæpè commendaret principali œconomo disciplinam domesticam, eique iniungeret, ut per se, vel per alios diligenter curaret, ne quid fieret in palatio, quod in iniuriam Dei vel famam Principis redundaret.

Illud etiam magni momenti est, ut Princeps serîo interdicat familiaribus ac domesticis suis, ut Iudicibus publicis non commendent eos, qui causas habent siue criminales, siue ciuiles, neque admisceant se distributionibus officiorum aut magistratuum. Hinc enim fit, ut vis quædam afferatur iudiciis, dum Iudices non audent contemnere commendationes familiarium Principis, & interim familiares ex bonis pauperum ditescunt. Illud etiam sæpè contingit, ut officia publica quasi vendantur ab auaris, & emantur ab ambitiosis, in magnum iustitiæ publicæ detrimentum.

Vnum restat vitium, quod est commune militibus cum aulicis domesticis, ut Principi suo facile adulentur, & quidquid ille dicat

cat vel faciat, in cælum tollant, vt sapientissimè dictum, vel præclarissimè gestum. Quæ adulatio, tamquam dulce venenum, facilè penetrat in animum, nisi cor verè humile & Deo planè subiectum inueniat. Vbi verò venenum assentationis animum Principis occupauerit, incredibile dictu est, quàm multa & quàm graua detrimenta inde oriatur. Qui enim assentatoribus aures præbet, primùm præ superbia tumens, ambulat, vt Scriptura loquitur, in magnis & in mirabilibus super se, & omnia sibi facilia esse ducit: deinde contemnit consilia sapientum; & vel eos spernit, vt timidos; vel inuidere gloriæ suæ censet, si fortè deterreant eum ab operibus, quæ plus periculi quàm vtilitatis habeant. Aduersus hoc genus hominum habemus exemplum insigne Magni Kanuti Regis Angliæ & Daniæ, quod ex Polydoro Virgilio ad instructionem magnorum Principum hîc adiungam.

Psal. 130.

Rex igitur Kanutus, aliquando animi recreandi gratia, secundùm Oceani littus deambulabat.

Lib. 7. hist. Anglicanæ

Ibi per orium à milite, auribus seruiente, appellatur Rex Regum omnium longè potentissimus, qui mari & terræ latè imperitaret. Tum Rex tacitus, animo repentinè ad Dei potentiam contemplandam erecto, vt suorum Principum & militum vanas assentationes aliquo argu-

mento coargueret; vestem exuit, ac ex ea globum fecit, superq; sedit, quàm proximè aquam, astu tum fortè ex alto se incitante: ac inquit, Vnda tibi iubeo, ne pedes meos tangas. Quæ ubi dixit, suis demirantibus, quorsum ista faceret, vnda insurgens totum madefecit. Tum ille retrò progressus, En, inquit, Principes, vocatis me Regem Regum, qui terræ & mari imperare possim; & tamen hanc paruulam vndam meo imperio cohibere vel remorari non potui. Nullus mortalium est tali nomine dignus. Vnus Rex est, Pater Domini nostri Iesu Christi, cum quo ille regnat, cuius nutu cuncta reguntur. Hunc veneremur, hunc Regem appellemus, hunc cali, & terræ, & maris Rectorem profiteamur. Post hæc Vintoniam profectus, coronam quam gestabat, capiti imaginis Christi crucifixi, quæ in templo Apostolorum Petri & Pauli pendebat, manibus suis imposuit, numquam posthac eiusmodi ornamento capitis vsus insigni. hæc Polydorus. Hinc discant pij Reges, assentatores suos non solùm repellere, sed etiam docere; & ex adulationibus non erigi in superbiam, sed in humilitate proficere, & de solius Domini sui vera gloria gaudere.

C A P. XXI.

*De officio Principis Christiani
erga pares.*

SCRIPSIMVS, solita breuitate, de officio Principis Christiani erga superiores, & erga inferiores: sequitur nunc, vt consideremus, quemadmodum gerere se debeant cum paribus. Pares autem hoc loco intelligimus eos, qui non sunt inter se, neque præpositi, neq; subiecti, quales sunt omnes illi, qui dicuntur Principes absoluti. Et quamuis omnino æquum sit, vt qui titulis honorû minoribus gaudent, cedant iis qui titulis maioribus potiuntur, vt Comites Marchionibus, Marchiones Ducibus, Duces Regibus, Reges Imperatori: & rursus rationi congruum sit, vt inter Principes eiusdem tituli, illi præcedant, qui vel ab antiquiore tempore titulo illo gaudēt, vel latius dominantur, vel absolutè maiores & potentiores habentur; tamen nos hoc loco de eiusmodi rebus non disputamus. vim suam habeant iura, vel consuetudines iam receptæ, quas nos in hoc Opusculo non consideramus. Illud solum ad nos pertinet, vt ex charitate admoneamus Principes potentiores, vt cum Principibus debilioribus, in quos ius

nullum habet, cum sint Principes absoluti, conseruent Christianam charitatem, & pacem . Nam Principes qui verum Deum ignorant, & dulcedinem diuinæ charitatis non gustauerūt; arbitrantur sibi valdè gloriosum esse, si debiliores quosque sibi subiiciant, & eorū ditiones ad imperium suum adiungant . Isti verò non se vt homines gerunt, sed vt bestię siluarum, in quibus iure quodam naturali robustiores imbecillioribus dominantur . Sic leo iure quodam suo lupum occidit & comedit, & lupus ouem, & ouis herbas . Homines verò, qui libero arbitrio naturaliter præditi sunt, nascuntur liberi; neque subiici possunt vnus alteri, nisi iusto aliquo titulo, quales sunt electio, successio, & alij omnibus noti . Itaque Nemrod, qui primus *cæpit esse potens in terra*, vt Scriptura loquitur, & regnavit in Babylone, & vicinas gentes vi & armis sibi subiecit; proprio vocabulo dicitur à Spiritu sancto, *robustus venator coram Domino*; quia videlicet homines vt bestias siluestres sibi violenter seruire coëgit.

Gen. 10.

Iudith 7.
& 2.

Talis fuit postea Nabuchodonosor, qui, vt legitur in libro Iudith, regnabat in Ninive, & habuit consilium cum satrapis suis, vt omnem terram suo subiugaret imperio: & misit nuntios ad eos qui habitabant in Ciliciā,

cia, & Damasco, & Libano, & Galilæa, & usque ad Ierusalem. Sed cum omnes eorum locorum habitatores negarent se velle subiici illius imperio; iuravit per thronum & regnum suum, quod defenderet se de omnibus regionibus illis. Mira res; iurat Nabuchodonosor quod defenderet se, quasi iniuriam accepisset ab illis, qui nihil in eum commiserat, sed duntaxat cum liberi essent, iugo duræ servitutis premi recusabant. Neque desunt hoc tempore Turcæ Mahometi sectatores, qui sola imperandi libidine magnam imperij Romani partem sibi subiecerunt, & subiicerent etiam totum orbem terrarum, sine vlla iusta causa, nisi Principes Christiani, & qui eundem Mahometum colunt Persæ, libidini illorum resisterent. Ista igitur feritas barbara longissimè abesse debet à moribus Principum Christianorum, qui præter iudicium rationis (quod iubet non fieri alteri, quod nobis fieri nolumus) habent sanctissimam legem Dei viui & veri, cuius finis est *charitas de corde puro, & conscientia bona, & fide non ficta*: & qui post huius brevissimæ vitæ curriculum expectant Regnum æternum, quod piis omnibus promisit qui non mentitur Deus.

I. Tim. I.

Primum igitur Princeps potentior non

Lib. 5. de
Ciuir. Dei
cap. 26.

debet vlla ratione vel vllo prætextu opprimere Principem imbecilliores, etiam si facillimè possit. Cuius rei habemus insigne exemplum in Imperatore Theodosio apud sanctum Augustinũ in libro quinto de Ciuitate Dei. Nam cùm esset Theodosius in Imperio Romano collega Valentiniani iunioris, & Valentinianus iste expulsus fuisset à Maximo Tyranno; & Theodosius Maximum occidisset, & potuisset, nullo impediēte vel resistente, Valentinianum de medio tollere, & ipse, nullo contradicente, Imperium vniuersum tenere, noluit, quia Christianus & pius erat: sed Valentiniano collegæ partem Imperij sui, propria virtute recuperatâ continuò restituit, & ipsum Valentinianum optimis præceptis & admonitionibus instructum à se dimisit. Sic igitur debet Princeps verè Christianus Principem imbecilliores non solum non lædere, sed etiam adiuuare, si possit: hoc enim lex iustitiæ & charitatis præcipit.

Ac vt paulò diligentius de hac re tam graui Principes admoneamus, illud pro comperto habere debent, non licere vllo modo bello pulsare Principem vicinum, aut alium quemcumque, nisi conditiones iusti belli adsint. Conditiones illæ, quatuor numerari solent, auctoritas legitima, causa iusta, intentio

tio bona, & modus rationabilis. Auctoritas legitima, est in Principe libero. Sic enim scribit sanctus Augustinus in libris aduersus Faustum: *Ordo ille naturalis mortalium paci accommodatus hoc poscit, ut suscipiendi belli auctoritas penes Principem sit.* Cuius rei causa est, quia priuati ciues, si fortè iniuriam ab alio ciue accipiunt, habent communem Iudicem, ad quem recurrant: Principes verò liberi, non habent. Causa iusta belli, est iniuria: accepta ab alio Principe, vel Republica etiam libera, quæ superiorem non habet. Sic enim idem sanctus Augustinus docet in libro Quæstionum in Iosue: *Iusta bella, inquit, definiri solent, quæ ulciscuntur iniurias, si qua gens, vel ciuitas, quæ bello petenda est, vel vindicare neglexit quod à suis improbè factum est, vel reddere quod per iniuriam ablatum est.*

Sed illud attentissimè considerandum est, iniuriam, quæ bello vindicanda est, esse debere neque dubiam, neque leuem, sed certam, & grauem: alioqui periculum est, ne plus detrimenti bellum adferat, quàm sit utilitas quæ inde speratur. Proinde Princeps potentior, non sit facilis ad iudicandum de causa iusti belli cum Principe debiliore; ne fortè cupiditas ampliandi principatus, cogat eum iustam causam suscipiendi belli existimare, quæ reuerà non sit: neque in hac re

Doctores suis domesticis nimium fidat;
 sed quærat consilium ab externis, & qui viri
 graues, & benè periti, non venales, & leues,
 & parum docti, communi consensu habeantur.
 Agitur enim de peccato magno, quod
 plurima peccata secum inuoluit. Intentio
 bona, quæ est tertia conditio, valdè necessaria
 est: nam cum finis belli sit pax & tranquillitas
 Reipublicæ, non licet bellum suscipere, nisi ob
 commune bonum, etiam si fortè legitima auctoritas
 & causa iusta non desit. Sic enim loquitur sanctus
 Augustinus in
 Epist. 207. Epistola ad Bonifacium Comitem: *Pacem
 habere debet voluntas, bellum necessitas: non
 enim pax quaritur ut bellum geratur, sed bellum
 geritur, ut pax acquiratur. Esto ergo etiam
 bellando pacificus, ut eos quos expugnas, ad
 pacis unitatem vincendo perducas.* & in libris
 contra Faustum: *Necendi cupiditas, ulciscendi
 crudelitas, impacatus atque implacabilis animus,
 feritas debellandi, libido dominandi, & si
 qua similia, hæc sunt, quæ in bello iure culpantur.*
 Hæc tamen conditio tertia si fortè desit,
 non facit bellum esse iniustum, sed malum,
 tametsi iustum: in quo multum distat conditio
 hæc tertia à duabus superioribus, quæ
 nisi adessent, redderent bellum non solum
 malum, sed etiam iniustum; quoniam esset
 manifestè contra iustitiam: cum bellum ex
 iusta

Lib. 22.
 c. 74.

iusta causa & ex auctoritate Principis motum, sed ex intentione non bona sit contra charitatem, non contra iustitiam.

Hoc etiam loco illud est diligenter considerandum, quòd cùm bellum sit suscipiendum, ut medium ad pacem, & tamen medium sit valdè graue & periculosum; non continuò suscipiendum est, sed tentanda priùs sunt alia media faciliora & meliora, quale est, quod in Deuteronomio demonstrat Moyses: *Si quando, inquit, accesseris ad expugnandam ciuitatem, offeres ei primùm pacem.* & sanctus Augustinus in Epistola ad Bonifacium Comitem, *Pacem, inquit, habere debet voluntas, bellum necessitas. Fortasse enim ciuitas inimica malet plenissimè satisfacere hosti armato, quàm experiri discrimina belli.* Deut. 20.

Restat extrema conditio, quæ pertinet ad modum. Sic enim bellum gerendum est, ut illi solùm puniantur, qui iustè puniri debent. Ac primùm excipiendi sunt ij, qui non sunt ex numero inimicorum, ut qui ad Rempublicam hostium non pertinent: ex quo excusari milites non possunt, qui vexant, spoliant, percutiunt, capiunt eos, per quorum loca transeunt, vel apud quos hospitantur, quibus sæpè reddunt mala pro bonis: neque iure excusari possunt, quòd stipendia eis non soluantur in tempore; nam non propterea mili-

Epist. 207.

militibus obligata sunt bona eorum, qui nihil eis nocuerunt; neque luere debent pœnas ciues, aut rustici amici, quia Princeps stipendia militibus suis non soluit. Deinde excipiendi sunt minores natu, feminæ, viri senes, & alij, qui arma gestare non possunt. Quamuis enim isti, qui bellare non possunt, capi & spoliari possint, si ad Rempublicam hostium pertineant: certè tamen occidi iure non possunt, nisi fortè casu, & præter intentionem aliquis huiusmodi occidatur; ut si fortè miles in cuneum hostium sagittam iacit, & casu puerum, vel senem imbellem occidat. Nam Deus ipse hoc Hebræis mandabat, cùm bella gererent, ut parcerent paruulis & mulieribus. Et ratio naturalis hoc ipsum docet: quorsum enim occidantur qui pugnare nequeunt, nisi ad crudelitatem ferinam ostendendam? Neque obici debent aliqua Scripturarum testimonia, in quibus Deus ipse iubeat, neque paruulis, neque feminis, neque pecoribus ignosci. Quod enim Deus iubet, omnino faciendum est; cùm ei nemo dicere possit, Cur ita facis. Denique excipiendi sunt iuxta canones Ecclesiæ, Presbyteri, Monachi, Cōuersi, peregrini, mercatores, rustici euntes vel redeuntes, vel in agricultura existentes, & animalia quibus arant, & femina portant ad agrum: hos enim decet,

Deut. 20.

Deut. 2.

3. Reg. 15.
 Cap. In-
 nouamus,
 de Treuga.

debet , vt congrua securitate lætentur.

Hæ sunt igitur conditiones belli iusti, sine quibus nullo modo deberet Princeps ullus alium Principem vexare : sed multò minùs potentior imbecilliorum. Alioqui timeat iudicia Dei , qui non rarò facit , vt Princeps imbecillior robustiorem facillè vincat. Cuius rei exemplum legi potest in Vita Theodosij senioris.

Theod. l. 5.
cap. 24.

Neque solùm in ijs rebus , quæ ad iurisdictiones & dominia pertinent, lex iustitiæ obseruanda est inter Principes Christianos; sed etiam in ijs ritibus , qui ad honorificentiam pertinent , siue in verbis , siue in factis positi sint; nisi fortè aliquando à magnis viris maiori cum laude contemnantur, quàm requirantur. Exemplum habemus in sancto Henrico Primo Imperatore. Nam cùm aliquando necesse esset, vt Henricus Imperator cum Roberto Rege Francorum de rebus publicis ad Christianam Rempublicam pertinentibus inter se conferrent, vterque venit ad flumen , quod erat in finibus vtriusque Regni. Sed orta est dubitatio, vtrum Rex ad Imperatorem , an ad Regem Imperator deberet accedere. Et quidem viri sapientes ab vtraque parte inter se collocuti, consilium dederunt , vt vterque Princeps , vnusquisque in sua nauicula ad medium flumen eodem ipso tempore

Glaber l. 3.
cap. 2. &
Baronius
to. 11. ad
annũ Do-
mini 1023.

tempore simul accederet. Sed Imperator ægre ferens propter huiusmodi nugas differri negotium principale, & alioqui sanctæ humilitatis amicus, quam à Christo Domino adamatam semper nouerat, statim cōscensa nauicula ad Regem properauit, à quo humanissimè exceptus, familiarissimè de negotio publico cum Rege tractauit. Altera postera die Rex ad Imperatorem venit, à quo vicissim humanissimè Rex exceptus, de negotio inclinato pacificè & concorditer egerunt. Sic pius Imperator humilitate vicit, & pius Rex Imperatori gloriam humilitatis inuidit. Erat enim vterque Princeps adeò religiosus & pius, vt Rex Robertus cognomen sancti apud suos inuenerit; & Imperator Henricus, vt verè sanctus in Ecclesia colatur.

Hos igitur imitentur Principes Christiani, & non tanti faciant inanes quasdam honoris significationes, vt propter earum omissionem iurgia & inimicitia, & sæpè etiam vulnera & mortes hominum exoriantur. Certè Christus Dominus non solum Magister & Doctor, sed etiam Rex noster & Imperator est; proinde eum imitari, non turpe, sed decorum nobis videri deberet. Ille autem neque extollebatur cum publicè laudaretur, neque contristabatur cum publicè blasphemaretur. Et Rex Dauid cum à Semei maledice-

diceretur maledictione pessima , vt ipse Dauid eam vocat ; non tamen respondit, Mentiris ; neque reddidit maledictum pro maledicto ; neque permisit , vt aliquis ex suis , qui non pauci , & armati aderant , eidem Semei maledicenti noceret . Hæc & alia exempla monere nos possunt , vt non tanti faciamus iniurias verborum , quanti hoc tempore fieri solent. Quamuis negare non possim nec velim , iniurias Principum non passim esse permittendas , quin etiam suo tempore & loco seuerè puniendas , etiam si verborum tantum iniuriæ sint : sed per alios vindicta sumenda est , non per ipsum qui patitur , ne patientiæ bono , & mercede diuina priuetur.

C A P. X X I I.

De officio Principis Christiani erga seipsum.

RESTAT pars quarta nostræ disputationis , in qua considerandum est , quomodo se gerere debeat Princeps erga personam suam . Hæc verò consideratio multum adiumenti Principibus adferre poterit , si & nobis detur à Deo gratia explicandi quæ vera sunt ; & illis cum attentione legendi & cogitandi , quæ ad ipsorum salutem maximè perti-

pertinent. Adferam igitur considerationes quinque.

Prima consideratio erit de ultimo fine, & summo bono tum animæ tum corporis. Siquidem homines mortales ut plurimum nihil altius, nihil melius, nihil optabilius esse arbitrantur imperio super alios homines; ad quod consequi vident opes, & honores, ac per hoc etiam voluptates, & commoda. Et quidem verissimum est, summum bonum hominis in Regno positum esse, sed non in regno temporali. Siquidem Regna & Imperia temporalia, ut experimento discimus, non ultra spatium vitæ corporalis se extendunt. Animus autem hominis immortalis est, & corpus etiam post resurrectionem immortale erit, neque vllum finem viuendi faciet. Et quid proderit homini, Regnum obtinuisse ad paucos annos, si per infinitum annorum numerum Regno cariturus erit? Non igitur summum hominis bonum in Regno temporali positum esse potest, sed in Regno sempiterno, quod sempiternæ diuitiæ, & deliciæ, & honores consequuntur. Quod Regnum Christus Princeps Regum terræ piis omnibus præstabit, cum dicet in die Iudicii: *Venite benedicti Patris mei, possidete paratum vobis Regnum.* & de quo alibi dicit: *Quærite primum Regnum Dei, & iustitiam*

Mat. 25.

Mat. 6.

tiam eius; & hæc omnia adycentur vobis. Atque hæc veritas theoricè, vt sic loquar, omnibus Christianis notissima est; sed practicè paucissimis est nota. Sic enim homines pro Regnis terrenis acquirendis vel propagandis laborant & sudant, ac si in eis summa eorum felicitas posita esset. Si quis ergo cupiat hanc veritatem tanti momenti planè cognoscere, colligat aliquando se; & dimissis ad tempus negotiis & cogitationibus omnibus, in secreto cubiculo postulet à Deo gratiam cognoscendæ veritatis de summo suo bono, & ad quem finem eum Deus sapientissimus, & nostri generis amantissimus creauerit: & simul examinet ab vna parte promissiones Dei de cælesti Regno, & ab altera, breuitatem & angustias Regni terreni: & ille, qui iusta petentes semper exaudit, sine dubitatione illum docebit.

Altera consideratio erit de veris mediis ad finem tam sublimem, & qui solus explere potest capacitatem desiderij nostri: & sine dubitatione, si quis hæc media diligenter inquirat, inueniet Regnum temporale non solum non esse finem, id est, summum bonum hominis, sed neque esse medium ad illud acquirendum satis accommodatum. Vt autem hoc facilius intelligatur, explicandam mihi esse putaui historiam diuinam de ratio-

K ne

Lib. 21.
c. 10.

ne gubernâdi populos, id est, quam formam regiminis sapientissimus Deus in populo suo maximè probauerit. Igitur animaduertendum est, ab initio non placuisse Deo, ut fideles sui præessent hominibus extra familiam suam; sed solùm pecoribus; fortasse propter periculum quod est in regendis populis. Nam ante diluuium, per mille & sexcentos annos, nullus fuit Rex hominum: deinde à diluuiio per multos annos soli Gētiles dominabantur aliis hominibus. Rationem reddit sanctus Gregorius in libris *Moralium*, dicens: *Antiqui Patres nostri non tam Reges hominum, quàm pastores pecorum fuisse memorantur. Et cùm Noë Dominus filijsq; eius diceret, Crescite, & multiplicamini, & implete terram; subdidit: Et terror vester ac tremor sit super cuncta animalia terræ. Non enim ait, Sit super homines qui futuri sunt; sed, Super animalia terræ. Homo quippe animalibus irrationabilibus, non ceteris hominibus natura prælatus est.* Postea verò quàm Hebræi in Ægypto multiplicati, & à Moysè à seruitute Pharaonis liberati creuerant in gentem magnam; dedit illis Deus Moysen in Principem, à quo regerentur, non tamen sub nomine Regis: & Moysè defuncto subrogauit illi Deus Iosue Ducem: & post obitum Iosue gubernauit Deus ipse Rempublicam Hebræorum per

per Iudices, quos subinde vocabat cū Hebræi à vicinis Gentibus opprimerentur. Sed cū Hebræi Regem sibi dari petiissent, non placuit Deo petitio illa populi, sed tamen permisit v̄t Regem sibi sorte eligerent. Itaque Deus in libro primo Regum multis modis declarauit, non sibi placuisse quod populus suus Regem habere voluisset, sicut reliquæ gentes habebant. Sic enim legimus:

Dixerunt maiores natu Israël ad Samuelem: Constitue nobis Regem, vt iudicet nos, sicut & vniuersæ habent nationes. Displicuit sermo in oculis Samuelis, eò quod dixissent, Da nobis Regem, vt iudicet nos. Et orauit Samuel ad Dominum. Dixit autem Dominus ad Samuelem: Audi vocem populi in omnibus quæ loquuntur tibi. non enim te abiecerunt, sed me, ne regnem super eos. Ecce quàm apertè Deus improbat petitionem populi petentis Regem. Deinde, vt populum ab hac petitione auerteret, iussit Samueli, vt prænuntiaret populo ius Regis, id est, graue iugum, quod Reges imponere solebant super ceruicem populorum. *Nunc ergo, inquit Deus, vocem eorum audi: verumtamen contestare eos, & prædic eis ius Regis, qui regnaturus est super eos. Dixit itaque Samuel omnia verba Domini ad populum, qui petierat à se Regem, & ait: Hoc erit ius Regis, qui imperaturus est vobis; Filios vestros tollet, & ponet*

1. Reg. 8.

in curribus suis, facietq; sibi equites & præcursores quadrigarum suarum, & constituet sibi tribunos, & centuriones, & aratores agrorum suorum, & messorum segetum, & fabros armorum & curruum suorum. Filias quoque vestras faciet sibi unguentarias, & focarias, & panificas. Agros quoque vestros, & vineas, & oliueta optima tollet, & dabit seruis suis. Sed & segetes vestras, & vinearum redditus addecimabit, ut det eunuchis & famulis suis. Sernos etiam vestros, & ancillas, & iuvenes optimos, & asinos auferet, & ponet in opere suo: greges quoque vestros addecimabit; vosq; eritis ei serui. Et clamabitis in die illa à facie Regis vestri, quem elegistis vobis, & non exaudiet vos Dominus in die illa, quia petistis vobis Regem.

Hæc omnia sanctæ Scripturæ verba eò pertinent, ut populus intelligeret, non esse sibi utile habere Regem, ut habent Gentiles: cum antea haberent Iudices à Deo electos & vocatos, omnes viros fortes & prudentes, & qui nihil à populo acciperent, & nullum vexarent. Quia tamen populus mansit in sententia, & voluit Regem; dedit illis Samuel Regem Saul. Sed Rege constituto iterum Samuel dixit ad populum:

1. Reg. 12.

Sed & nunc state, & videte rem istam grandem, quam facturus est Dominus in conspectu vestro. Numquid non messis tritici est hodie? inuocabo

Domi-

Dominum, & dabit voces (tonitruorū videlicet, quæ eo tempore erant inusitata in Palestina) & pluuias; & scietis, & videbitis quia grande malum feceritis vobis in conspectu Domini, petentes super vos Regem. Et clamauit Samuel ad Dominum, & dedit Dominus voces & pluuias in illa die. Et timuit omnis populus nimis Dominum, & Samuelem; & dixit vniversus populus ad Samuelem: Ora pro seruis tuis ad Dominum Deum tuum, vt non moriamur. addidimus enim vniuersis peccatis nostris malum, vt peteremus nobis Regem. Dixit autem Samuel ad populum: Nolite timere: vos fecistis vniuersum malum hoc: verumtamen nolite recedere à tergo Domini, sed seruite Domino in omni corde vestro. Hæc omnia satis apertè indicant, non placuisse Deo, vt populus suus haberet Reges absolutos, quomodo habebant Gentes.

Et quæ est ratio, dicet aliquis, cur Deus nō probauerit Regale imperium in populo suo? Ratio est, quia præuidebat Dominus, Reges illos malè vsuros absoluta illa potestate. Nam à Moyse vsque ad Reges, omnes Duces & Iudices qui populum gubernauerant, viri optimi fuerant. Nam & Apostolus in Epistola ad Hebræos ferè omnes Iudices cum ipso Moyse numerat inter Hebr. xi. Sanctos Testamenti veteris. Sed vbi regi-

men venit ad Reges, primus Saul, cū priuatus ciuis esset, erat omnium optimus; factus Rex, euasit omnium pessimus, & ideo Regnum, corpus, & animam perdidit. Secundus Dauid, antequam Regnum obtineret, inimicum Saulem numquam lædere voluit, cū facillimè posset; factus Rex, militem optimè de se meritum occidit, & eius coniugem adulterio polluit: sed tamen ex corde pœnitentiam egit, & gratiam Dei recuperauit. Tertius Salomon, initio bonus, in senectute idola coluit, & salutem suam æternam in dubio reliquit. Et satis constat ex libris Regum & Paralipomenon, post diuisionem Regni in Regnum Israel & Iuda, ex Regibus Israel nullum fuisse bonum, sed omnes impios & idololatrias, ac per hoc omnes ad gehennam esse damnatos: ex Regibus Iuda duos fuisse absolutè bonos & sanctos, Ezechiam & Iosiam; sex ex parte laudatos, & ex parte reprehensos; Asam, Iosaphat, Ioam, Amasiam, Oziam, Ioatham: reliquos omnes absolutè malos & impios, improbos & reprobos. Quæ cū ita sint, nemo mirari debet, cur neque Deus, neque Samuel Propheta, probare uoluerint Regiam potestatem in populo Hebræorum. Porro ex hac historia quis non videat, quàm sit periculosa potestas Regia

&

Eccli. 49.

& quæ illi simillima est, potestas Principum omnium absolutorum? Adde, quòd idem dici potest de Principibus Testamenti noui. Nam ex tanto numero Imperatorum, Regum, Principum absolutorum, qui vixerunt his mille & sexcentis annis in Ecclesia Christi, in numerum Sanctorum relati, paucissimi sunt; cùm Principum spiritualium, id est, Episcoporum, ferè infinitus sit numerus. Sanè in Martyrologio Romano inueniuntur Episcopi sancti circiter nongenti; Principes verò sæculi sancti solùm viginti. Hæc si Principes sæculi seriò apud se cogitent, inuenient, vocationem suam, siue statum & conditionem suam non esse tam beatam & felicem, vt vulgus existimat; neque esse medium satis idoneum ad Regnum æternum comparandum: & ipsi non insolescent, neque priuatos homines contemnent; sed illis potiùs ex animo inuidebunt, & cum timore & tremore sceptrum suum, non vt sceptrum honorificum & leue, sed vt crucem grauissimam durissimamque portabunt.

Tertia consideratio vtilissima Principibus esse potest, si seriò & sæpè considerent, se dominari & præesse hominibus eiusdem speciei cuius ipsi sunt: & fieri posse, vt non pauci subditorum sint prudentiores & san-

etiores, & imperio digniores, quàm ipsi sint; præsertim cum maior pars ipsorum non sint electi ad Principatum ex multis, quomodo eliguntur Episcopi, in quorum electione habetur ratio ætatis, scientiæ, prudentiæ, morum optimorum, & sanctitatis vitæ, & aliorum Magistratuum, in quibus antea versati sint. Principes enim ut plurimum succedunt parentibus: & non rarò parenti probo succedit filius improbus, & parenti prudenti succedit filius stultus, & parenti maturæ ætatis succedit adolescētulus vel puer. Sic Daudi seni successit Salomon puer, Salomoni sapientissimo successit Roboam stultus, & Ezechix sancto successit Manasses perditissimus. Itaq; deberet Princeps, ista omnia cogitās, humilis esse in oculis suis, & non contemnere neque conculcare per superbiam subditos, quorū aliqui fortasse sint imperio digniores, quàm ipse sit. Sed habet Principatus ut plurimum hūc morbum annexum, ut Princeps, quia sedet altius quàm ceteri, verè se reputet naturæ cuiusdam excellentioris, quàm sint reliqui homines, & evanescat in cogitationibus suis. Notum est, Alexandrum Magnum facilè sibi persuaderi suuisse, se non Philippi Regis Macedoniæ, sed Iouis filium esse, atque adeò immortalem Deum. Sed paulò
pòst

pòst mors immatura declarauit quid esset.

Quod idem Caio Imperatori Romano-

Philo de
legatione
ad Caium.

rum accidisse legimus, qui miserebatur stul-

titiam Iudæorum, quòd se Deum esse sibi

persuadere non possent; cùm tamen pau-

Suetonius
in Domi-
tiano.

lò pòst à coniuratis occisus, experimento

didicerit, se verè fuisse mortalem. Idipsum

de Domitiano dici potest, qui cùm Domi-

nus ac Deus appellari uellet, paulò pòst non

tantum falsam diuinitatem, sed etiam ve-

ram humanitatem interfectus amisit. Ergo

Princeps Christianus si sapit, humilis sit in

Apoc. I.

oculis suis: & quòd ipse sedeat in throno,

cùm alij stent, vel procumbunt in genua; &

quòd ipse imperet, alij dicto obediant; non

merito suo tribuat, sed beneficio Dei: & in-

telligat, subditos suos eiusdem esse naturæ,

cuius ipse est, & multos eorum maiores esse

in oculis Dei, qui Princeps est Regum ter-

ræ; & se quidem ad breuissimum tempus

regnaturum, illos autem participes futuros

Regni Christi, cuius nullus erit finis.

Quarta consideratio in eo posita est, ut

prudenter cogitet pius Princeps, se non esse

debitorem soli Regno administrando, vel

subditis benè regendis; sed etiam sibi, id est,

saluti sempiternæ comparandæ. Et quem-

admodum nemo accusare potest Principem,

quòd aliquando intermittat negotia

Regni vel Principatus, vt corporis sui salutem conseruandæ vel reparandæ vacet, ac per hoc nonnumquam venationi det operam, aut honesto ludo se oblectet, vel certè musica instrumenta aut cantorum voces audiat, aut denique legendis libris historicis vel philosophicis incumbat: sic etiam laudandus est Princeps, si sepositis interdum temporalibus curis, salutem animæ suæ seriò vacet. Hoc in primis consulit sanctus Bernardus Eugenio, suo quondam in Christo filio, ac postea patri suo & omnium Christianorum. Nam cum is ex Abbate Summus Pontifex factus esset, & in Ecclesia vniuersali regenda dies ac noctes excubaret; admonuit illum sanctus Bernardus in libris de Consideratione, vt non ita totum se daret gubernationi Ecclesiæ, vt obliuisceretur spiritualis profectus animæ suæ. Quod si timuit non sine ratione Sanctus ille vir, ne Ecclesiastica negotia, quamuis spiritualia & necessaria, nimis continuata suffocarent spiritum internæ deuotionis, & charitas Pastoris erga Ecclesiam, imminueret charitatem animæ deuotæ erga Deum: quanto magis periculum est, ne Princeps temporalis nimium distentus & distractus erga negotia temporalia Regni terreni, remittat ardorem charitatis erga Deum; & dum con-

consulit rebus temporibus Regni terreni, detrimentū faciat Regni cælestis? Christus Rex & Dominus noster non erat occupatus in rebus temporalibus vllis, sed in prædicatione verbi Dei, & in conuersione animarum; & tamen, vt exemplum nobis daret, pernoctabat vt plurimum in oratione. Id enim significant illa verba sancti Lucæ: *Erat pernoctans in oratione Dei.* & illa: *Erat autem diebus docens in templo; noctibus verò exiens, morabatur in monte.* Neque tamen erat illi periculum, ne tepesceret spiritus eius, aut ne detrimentum aliquod spirituale pateretur. Itaque vt nobis exemplum daret, dies consumebat in operando, & noctes in orando. Et si nobis Sacerdotibus vel Religiosis exemplum hoc tanti magistri necessarium est; quanto magis necessarium erit Principibus sæculi, qui toti sunt in rebus téporalibus occupati? Et si Dauid Rex & Imperator, septies in die reuocabat animam ad laudandum Deum, & media nocte surgebat ad confitendum Domino; quam excusationem habebunt Principes illi, qui toti sunt diebus ac noctibus in rebus temporalibus occupati? Certè enim si qui sunt qui indigeant gratia Dei, & conuersatione frequenti cum ipso, Principes sunt, qui vt Vicarij eius in temporali regimine, volunta-

Luc. 6.

Luc. 21.

Psal. 118.

luntatem eius assidue indagare debent.

Eligat igitur Princeps tempus & locum aptum colloquendi cum Deo, magis corde quàm voce. Ac primùm ab eo petat, vt lumen cordi suo infundat, in quo manifestè videat statum animæ suæ: & si quidem viderit animam suam letali peccato obnoxiam, atque adeò ipsi Deo inuisam; cum Maria Magdalena sese ad eius pedes abiiciat, & lacrymis cordis medicinam quærat. Et quia remedia nota fidelibus tria illa sunt, contritio, confessio, & satisfactio; in eo sciat summam veræ conuersionis positam esse, vt ista non solùm fiant, sed benè fiant. Quid enim prodest flere peccatum admissum, & illud Sacerdoti aperire, & impositam multam implere; nisi peccati radicem funditus extirpet? Habet aliquis domi concubinam, habet rem alienam, læsit personam vel famam proximi sui? quid, inquam, prodest flere, & confiteri peccatum, & impositam pœnam subire; si neque concubinam eiiciat, neque restituat rem alienam, neque pro iniuria satisfaciatur? An non hoc est simulare, non agere pœnitentiam? Postea verò quàm Princeps verè cum Deo in gratiam rediit, pergat inquirere ab ipso Deo in oratione, non quacumque, sed valdè seria & attenta, cum fide & fiducia, gratiam perseuerandi, & pro-

& proficiendi, atque ad perfectionem vitæ Christianæ tandem aliquando perueniendi. Neque enim existimare Principes debent, perfectionem vitæ Christianæ ad solos Sacerdotes & Monachos pertinere. Pertinet enim ad omnes, qui cupiunt in Regnum cælorum rectâ ex hoc mundo transire, cum nihil coinquinatum in Regnum illud ad- Apoc. 21. mitti queat, & ad Principes maximè pertineat exemplum virtutum omnium populis, quos regunt, præbere. *Regis enim ad exemplum totus componitur orbis. &, Qualis est rector ciuitatis, tales & inhabitantes in ea.* Proinde vita improba, vel etiam remissa & relaxata Principum multò magis Deo nostro displicet, & grauius sine dubitatione punietur, quàm vita mala, vel minùs bona priuatorum.

Accedit ad hæc (quod certè Principibus omnino persuadere deberet vitæ perfectæ desiderium) quòd ipsi in maiori periculo mortis æternæ versantur, quàm homines priuati, & pœna gehennæ molestior eis accidet, quàm priuatis. De maiori periculo nulla dubitatio esse potest, cum Sapientia Dei manifestè dicat: *Horrendè & citò apparebit vobis, quoniam iudicium durissimum his, qui præsumunt, fiet. Exiguo enim conceditur misericordia: potentes autem potenter tormenta patientur.* Sap. 6.

Into-

Intolerabilia verò multò magis futura tormenta gehennæ Principibus quàm priuatis, maximè pauperibus & vilibus, ratio manifestissima docet : Principes enim magis sunt assueti diuitiis, deliciis, hōnoribus; in alto loco sedent, molliter cubant, delicatè viuunt, impatientes sunt omnis iniuriæ ; cū viri pauperes faciliè pane & aqua contenti sint, & humi cubare non valdè recusent, & ad alta & excelsa munia non aspirent. Quis igitur explicet quàm intolerabile sit futurū Principibus malis in die Iudicij, iacere humi ab omnibus despectos, & videre sanctos, olim pauperculos & viles in nubibus cæli, gloria & honore coronatos assidere Christo Iudici, & postea cum eo ad cælestia Regna conscendere; se autem cum dæmonibus ad æternas subeundas pœnas ad inferna detrudi? Itaque damnatio sempiterna, quæ parata est omnibus improbis & reprobis, nullis molestior & acerbior erit, quàm Principibus malis.

Quinta, atque adeò postrema consideratio, quæ Principibus multum prodesse poterit, illa mihi esse videtur, si tempus aliquod ponant in legendis attentè & diligenter historiis, quibus vitæ & res gestæ sanctorum Principum continentur. Siquidem vitæ Sanctorum sunt quidam quasi commentarij lucidissimi legum diuinarum vtriusque Testamenti.

menti. Et si quis velit quasi ipsis oculis cernere, quid oporteat Principem facere, si saluus esse velit, legat attentè sanctorum Principum vitas: ibi enim cernet præcepta & documenta Spiritus sancti, quasi ad praxim reuocata. Quod idem dici potest de Episcopis & Regularibus: nullus enim Doctor manifestius & facilius docet quid facto opus sit Episcopis & Regularibus, quàm historia scripta de rebus gestis sanctorum Episcoporum & Monachorum. Adde, quòd vitæ Sanctorum diligenter & verè descriptæ, sunt quasi vestigia in arena impressa, quæ per desertum huius vitæ tutò nos ducunt ad terram promissionis, si quis per ea vigilanter incedat, id est, si eas vitas attentè legat, & imitetur. Denique vitæ Sanctorum accuratè descriptæ, sunt veluti specula lucidissima: quæ si quis attentè consideret, facilè inueniet, quid in moribus suis corrigere, quid omnino deferere, quid magno animo complecti & sequi debeat, si ad perfectionem vitæ præsentis, & ad felicitatem futuræ pertingere velit.

Hæc causa fuit, cur ego vitas sanctorum Principum vtriusque Testamenti huic meo Opusculo adiungere voluerim, ut videlicet laborem eas inquirendi in variis Auctoribus,

bus, Principibus demerem. Et quidem vitas Principum sanctorum Testamenti veteris, ego ipse descripsi ex Libris sanctis & canonicis. Vitas sanctorum Principum Testamenti noui, ex variis Auctoribus fide dignis collegi. Quibus aliæ addi poterunt ab aliis, qui maiori otio, & pleniore bibliotheca abundant. Ego enim solùm pro numero Prouinciarum paucas elegi: & secundùm antiquitatem temporis eas disposui; vt qui prior ad Regnum cæleste peruenit, eius vita priorem in Libro meo locum habeat.



LIBER II.

P R A E F A T I O
in Vitas sanctorum
Principum.

DE officio Principis Christiani scripsimus in Libro priore ea, quæ vel in Scripturis sanctis, vel in probatis Auctoribus inuenire potuimus, aut certè quæ nobis cogitantibus & speculantibus occurrerunt. Sed quia magis mouent exempla quàm verba, & faciliùs persuadent res gestæ quàm disertis sermones; propositum nobis est, in sequentibus Libris proponere ante oculos mentis Principum Christianorum, egregias sanctorum Principum res gestas; tum eorum, qui Christum Dominum, qui est Princeps Apoc. i. Regum terræ, præcesserunt; tum eorum, qui postea secuti sunt. Sic enim fiet, ut dum

L

præ-

praecepta Virtutum principalium ad praxim redacta cernuntur, & quasi in speculo lucidissimo manifestissimè conspiciuntur, nemo dicere possit, ea praecepta grauiora esse, quàm ut ab homine mortali obseruari queant. Quod enim priores Principes omnibus saeculis, Dei gratia adiuuante, implere potuerunt; cur non possint Principes posteriores, eiusdem Dei adiuuante gratia, adimplere? Et si aliqui illorum sine praecedente exemplo optimi Principis gloriam meruerunt, cur non faciliùs possint posteriores Principes vestigiis praecedentium insistentes, eandem gloriam promereri? Primum igitur in medium adferam Vitas Principum sanctorum Testamenti veteris: deinde Vitas multò plures sanctorum Principum Testamenti noui.

Sed antequam ad Vitas Principum Testamenti veteris describendas accedam, videtur mihi obex quidam esse remouendus, qui fructum lectionis eiusmodi Vitarum impedire facile posset. Dicent enim Christiani Principes,

cipes, *superuacaneum sibi videri, velle cognoscere, quid in Republica Hebraica Testamenti veteris egerint Principes, siue Reges; cum nos ad Rempublicam Christianam Testamenti noui, per Dei gratiam pertineamus. Sed hic obex facile remoueri potest: docet enim sanctus Augustinus in Epistola ad Honoratum de gratia noui Testamenti, & alibi frequenter, sanctos viros Testamenti veteris, quales in primis fuerunt sancti Principes, Moyses, Iosue, Dauid, & alij, floruisse quidem tempore Testamenti veteris, sed reuera pertinuisse ad Testamentum nouum. Quemadmodum etiam plurimi Christiani viuunt in Ecclesia Testamenti noui, sed reuera pertinent ad Testamentum vetus. Hec enim est differentia duorum Testamentorum, quod vetus promittit bona temporalia & praesentia, quibus futura & spiritualia significantur: nouum autem Testamentum promittit bona spiritualia in praesenti tempore, gratiae dona, & virtutes, atque in pri-*

mis patientiam in tribulatione, sed in futuro gloriam & gaudia sempiterna. Quemadmodum igitur Viri Christiani, qui sub Testamento nouo viuentes, temporalibus bonis inherentes, spiritualia negligunt; viuentes in Testamento nouo, pertinent ad Testamentum vetus: sic etiam viri Hebraei, qui viuentes in Testamento veteri, contemnebant temporalia, & spiritualibus inhærebant; viuentes in Testamento veteri, ad nouum sine dubio pertinebant. Eiusmodi fuisse sanctos Principes Testamenti veteris, quorum Vitas legendas proponimus, usque adeò verum est, vt rarissimi Christiani Principes inueniantur, qui veteribus illis in virtutibus & sanctitate non cedant.

VITA

VITA ET VIRTUTES

SANCTI IOSEPH

PATRIARCHÆ.

PRIMVS omnium, qui inter cultores veri Dei principatum temporalem adeptus est, Ioseph Iacobi Patriarchæ filius fuit. Priores enim Patres ab Adamo vsque ad Iosephum, vel agrorum cultores fuerunt, vt Cain & Noë, vel ouium pastores, vt Abel & Abraham, & ceteri Patriarchæ, qui sine dubio artem regendi populos non attigerunt. Sic enim scribit sanctus Gregorius in libro vigesimoprimo *Moralium*, cap. 10. *Scimus, quod antiqui Patres nostri non tam Reges hominum, quam pastores pecorum fuisse memorantur.* Ioseph autem Regnum Ægypti, ipso Pharaone Rege potestatem suam illi tradente, administrauit. Sic enim legimus in libro *Genesis* Pharaonem dicentem ad Iosephum: *Ecce, constitui te super vni-* Gen. 41.
uersam terram Aegypti. tulitq; annulum de manu sua, & dedit eum in manu eius: vestiuitq; eum stola byssina, & collo torquem auream circumposuit: fecitq; eum ascendere super currum suum secundum, clamante præcone, vt omnes coram eo genu flecterent, & Præpositum esse sci-
 L 3 *rent*

rent uniuersa terra Aegypti. Et quoniam Pharaon Rex potestatem suam omnem cum Iosepho communicauerat, non ad tempus, vt cum Præfectis fieri solet, sed per omnem vitam; ideò Dauid de eo cecinit in Psalmis:

Psal. 108. Constituit eum dominum domus suae, & Principem omnis possessionis suae. & Philo Hebræorum doctissimus in libro de Vita Ioseph scribit, Iosephum à Pharaone creatum fuisse Proregem, vel potius Regem totius Aegypti; quia videlicet potestatem absolutam, & planè Regiam, cum Iosepho Pharaon communicauerat.

Huius igitur primi Principis vitam magnis virtutibus plenā, & planè dignissimam, in quam, velut in exemplar morum, Principes omnes intueantur, descriptam habemus primùm à Moyse in libro Geneseos, deinde à Philone Hebræo, postremò à sancto Ambrosio. Et quoniam liber Genesis notissimus omnibus est, & assiduè vel in Ecclesiis legitur, vel à concionatoribus explicatur; omiſſa vitæ serie, virtutes solùm huius præclarissimi viri Principibus inspiciendas & imitandas proponam.

Prima igitur ac pænè singularis Iosephi nostri virtus, Innocentia vitæ & morū fuit. Vixit annos centum & decem; ex quibus primos sexdecim in paterna domo consumpsit:

Gen. 37.

Gen. 39.

sumpsit: quatuordecim sequentes in summis Gen. 40.
angustiis, ærumnis, & carceribus duxit: reli- Gen. 41.
quos octoginta in summa potestate, & af- Gen. 50.
fluentia bonorum omnium, ac prosperitate
transegit. In tam longo tempore, & in tanta
rerum varietate, neque ærumnæ illum ad
impatientiam, neque felicitas ad dissolutio-
nem vel superbiâ adducere potuit. Id quod
ex eo manifestè potest intelligi, quòd Scri-
ptura diuina nullum omnino crimen sancti
Ioseph vsquam indicat, virtutes plurimas &
maximas vbique prædicat. Neque respon-
deri rectè potest, non ideò Iosephum exper-
tem omnis criminis vixisse, quia Scriptura
sancta nullum eius crimen detexit. Spiritus
enim sanctus in Scripturis suis neque adula-
tur improbis, neque iustis peccantibus par-
cit, & vbique tam bona quàm mala opera
detegit, vt sanctus Gregorius in principio li-
bri secundi Moraliū docet. Hinc non so-
lùm Dauidis Prophetæ sancti adulterium
& homicidium aperte describit, sed etiam
Saulis reprobi virtutes, quibus initio Regni
sui floruit, non minùs dilucidè enarravit. Et
quemadmodum sancti Petri fidem & cha-
ritatem in Christum eximiam prædicauit,
sic etiam negationem trinam cum iuramen-
to minimè tacuit. Igitur cùm veridica & li-
berrima Spiritus sancti vox peccata filiorum

Gen. 49.
Gen. 38.
Gen. 37.

Iacob in medium protulerit, vt incestum Ruben, crudelitatem Simeonis & Leui, fornicationem Iudæ, & odium filiorum Iacob in ipsum innocentem fratrem eorum Ioseph; certè si Ioseph ipse in aliquo deliquisset, Spiritus sanctus in Scriptura sua id minime tacuisset. Maneat igitur ratum & firmum, Iosephum innocentia vitæ mirificè claruisse.

Neque verò sola innocentia, quæ declinat à malo, in Iosepho fuit; sed etiam reliquæ virtutes omnes, quæ faciunt bonum. Porro virtutes primariæ sunt, Prudentia, Iustitia, Temperantia, Fortitudo. Prudentia non humana solum, sed etiam diuina in Iosepho apertè refulsit; atque eam potissimum ob causam à Pharaone super omnes homines iudicatus est dignus, qui Regnum administraret, vt intelligi potest ex capite quadagesimoprimo libri Geneseos. Nam cum Ioseph, ex diuina illustratione, somnia Regis diuinitus immissa de septem spicis plenis & septem tenuibus, & septem vaccis pinguibus & septem macilentis, interpretatus fuisset, illis significari septem annos fertilitatis eximiae, & septem alios inauditæ sterilitatis; adiecit etiam prudentissimum consilium, quo fieret, vt sterilitas futura, non solum Regis Ægypti ærarium non minueret, sed incre-

incredibiliter augeret : rectissimè Rex iudicauit, neminem esse in toto Regno suo, qui prudentia & sapientia Iosephum anteeret. Neque Regem fefellerit opinio de prudentia Iosephi concepta: Regnum enim illud, Iosepho viuente, per annos, vt suprà diximus, circiter octoginta, maximè floruit.

Altera virtus principalis, Iustitia est, quæ & fidelitas dicitur in Scripturis, eaque cum prudentia copulata efficit absolutum perfectumque Præfectum, siue domus, siue ciuitatis, siue Regni, iuxta verbum Domini: *Quis, putas, est fidelis seruus, & prudens, quem constituit Dominus super familiam suam?* Hæc fidelitas cum prudentia coniuncta sic in Iosepho nostro eminuit, vt vbicumque esset, mox in Præfectum eligeretur. Venditus fuit Ioseph in seruum à Madianitis Putiphari principi militiæ Pharaonis. vix ingressus erat Putipharis domum, cum statim cognita prudentia & fidelitate iuuenis, præpositus est vniuersæ familiæ. Missus postea fuit in carcerem, ob falsum illi imputatū crimen: sed ecce contiguo à principe carceris, creatur præfectus omnium vinctorum, & tamquam Rex captiuorum, omnium curam gerebat. Denique in ipsa veri Regni administratione ita prudenter fideliterque se gessit, vt vsque ad mortem cum laude magna toti

L 5

Regno

Gen. 47.

Regno præfuerit. Fidelitas enim siue Iustitia eius in eo potissimum apparuit, vt observauit etiam Philo in eius Vita, quòd cùm ex venditione frumenti cumulum pecuniarum immensum collegisset, nihil omnino sibi retinuit, sed intulit omnem illam pecuniam in ærarium Regis. Et rursus cùm patrem suum, & filios ac nepotes eius, vsque ad numerum septuaginta hominum in Ægyptum vocasset, non eos ditauit ex bonis Regis, quæ in manu eius erant omnia; sed fecit eos pastores armentorum regionum, vt ex labore proprio, non ex alienis bonis ditescerent.

Gen. 39.

Tertia virtus, quæ Temperantia dicitur, in Iosepho nostro non minùs quàm Prudentia & Iustitia fulsit. Id testari potuisset vxor Putipharis, si splendorem continentiae impudica mulier adamare potuisset. Nam vt in Genesi legimus, *erat Ioseph pulchra facie, & decorus aspectu*. Et cum eius amore capta esset vxor domini sui, & per dies singulos eum ad adulteriũ sollicitaret; castissimus iuuenis eam à scelere multis rationibus auertere nitebatur: sed tandem aliquando, cùm vi ab illa se cogi videret, relicto in manibus eius pallio, fugit. Scribit etiam Iosephus in secundo libro Antiquitatum, procacem illam feminam adolescenti prædixisse, se illum apud maritum accusaturam, quòd ipsi

ipsi vim adferre voluisset, & pallium eius in
signum fugæ demonstraturam: proinde aut
amori eius cum voluptate obsequeretur, aut
odium & pœnas grauissimas expectaret. Sed
vicit in castissimo pectore innocentia amor,
vicit Dei timor, vicit iustitia & fides omnia
blandimenta, & omnia tormenta, & ipsum
etiam crudelissimæ mortis impendens dis-
crimen. O quantum distabant mores huius
castissimi iuuenis à moribus multorû Prin-
cipum, qui nullam speciosam feminam vi-
dent, quam non concupiscant, & ad eam ra-
piendam potestate imperij abutantur. Testis
esse potest Abraham, de quo sic loquitur
Scriptura in Genesi c. 12. *Cùm ingressus esset
Abram Aegyptum, viderant Aegyptij mulie-
rem, quòd esset pulchra nimis: & nuntiauerunt
Principes Pharaoni, & laudauerunt eam apud
illum; & sublata est mulier in domum Pharao-
nis.* Testis quoque Maxentius Imperator,
qui matronas etiam nobilissimas vi rapie-
bat à maritis, easque vi oppressas & violatas
maritis remittebat, vt auctor est Eusebius
lib. 1. cap. 27. Vitæ Constantini. Iosephus au-
tem noster sicut in flore iuuentutis seniles
mores induit, & procacis dominæ blandos
contempsit amplexus, etiam cum vitæ peri-
culo, sic in omni vita, vnica vxore, quam ei
Rex ipse dedit, omnino contentus; ex-
emplum

emplum pudicitiae omnibus populis, quos regebat, fuit, nec solum praesentibus, sed etiam futuris.

Gen. 39. Porro Fortitudo & Patientia, quae quarta est virtus cardinalis, in Iosepho nostro sic fuit, ut prorsus admirabile sit. Primum sine ulla causa, nisi quod à patre ob suam innocentiam plus ceteris amaretur, à propriis fratribus in cisternam veterem proiectus, ut fame moreretur; deinde venditus Madianitis, & in Aegyptum delatus; tum iterum venditus Aegyptio sacerdoti, postremo in carcerem iniustissimè trusus; omnes illas calamitates tam forti animo tulit, ut neque de fratribus quereretur, neque Madianitas obiurgaret; neque mulieri, quae vinculorum eius causa fuerat, malediceret. Sed quod omnem admirationem superat, illud est, quod fratribus, qui in eum crudelissimi, & quasi latrones & homicidae fuerant, reddidit bona pro malis, excusavit peccatum eorum, ad complexum & osculum eos admisit, conuiuio illos excepit, aluit eos in fame illa tam diuturna, in Aegypto optimum terrae locum illis attribuit, denique bonis omnibus eos locupletauit. Quid quaeso sanctissimus iste Princeps fecisset, si Christum Dei filium in terris concionantem, & signis ac prodigiis coruscantem vidisset?

disset? Utinam Spiritui sancto placuisset, per Moysen sanctum Prophetam suum, huius sapientissimi atque optimi Principis res omnes gestas, in illa tam longa octoginta annorum gubernatione describi: plura enim in eius vita & rebus gestis legendis Principes Christiani de ratione Regni bene administrandi didicissent, quàm ex omnibus Platonis, vel Aristotelis, aut Plutarchi, & Senecæ libris discere nunc possint. Sed quod per partes Scriptura diuina non tradidit, compendio dixit, cùm perfectam charitatem, quæ usque ad inimicos extenditur, in Iosepho fuisse non tacuit. *Charitas* enim 1. Cor. 13. *patiens est, benigna est, non agit perperam, non inflatur, omnia suffert, omnia credit, omnia sperat, omnia sustinet.* & : *Qui diligit proximum,* Rom. 13. *legem impleuit. nam, Non adulterabis, Non occides, Non furaberis, Non falsum testimonium dices, Non concupisces, & si quod est aliud mandatum, in hoc verbo instauratur, Diliges proximum sicut teipsum. Plenitudo ergo legis est dilectio.*

Quam ardentem autem sanctus Ioseph inimicos suos dilexerit, verba eius testantur, quæ hîc breuiter referam, ut cum verbis Iosephi narrationem de Iosepho concludam. Sic igitur Iosephus ad fratres ingenti pauore concussos ait: *Nolite pauere,* Gen. 45. *neque*

neque durum vobis esse videatur, quod vendidistis me in his regionibus : pro salute enim vestra misit me Deus ante vos in Aegyptum. Non vestro consilio, sed Dei voluntate huc missus sum, qui fecit me quasi patrem Pharaonis, & dominum uniuersae domus eius, ac Principem in omni terra Aegypti. hæc Iosephus dixit, cum primùm fratribus suis aperuit, se esse quem vendiderant. Sed postquam mortuus est Iacob parens omnium illorum, iterùm metuentes ac trepidantes, accesserunt ad

Gen. 50.

Iosephum, eiꝛue dixerunt : Pater tuus præcepit nobis, antequam moreretur, vt hæc tibi verbis illius diceremus : Obsecro vt obliuiscaris sceleris fratrum tuorum, & peccati atque malitiam quam exercuerunt in te. Nos quoque oramus, vt seruis Dei patris tui dimittas iniquitatem hanc. Quibus auditis, fleuit Ioseph. veneruntque ad eum fratres sui, & proni adorantes in terram dixerunt : Serui tui sumus. Quibus ille respondit: Nolite timere, num Dei possumus resistere voluntati? Vos cogitastis de me malum: sed Deus vertit illud in bonum, vt exaltaret me, sicut in præsentiarum cernitis, & saluos faceret multos populos. Nolite timere, ego pascam vos & paruulos vestros. consolatusque est eos, & blandè ac leniter est locutus. hæc ille. Qui cum ad finem vitæ peruenisset, prædixit fratribus suis (nam & Propheta

pheta erat) post mortem suam filios Israel à Deo visitandos, & ex Ægypto perducendos in terram à Deo patribus eorum promissam. Cumque mandatum eis dedisset, ut abeuntes asportarent ossa sua, *Mortuus est, expletis centum decem vite sue annis. Et conditus aromatibus, repositus est in loculo in Ægypto.*

VITA ET VIRTUTES SANCTI MOYSIS

PRIMI DVCIS HEBRAEORVM.

MOYSES primus fuit Hebræorum Princeps, quem Philo Iudæus in extremo libro de Vita Moyfis iure vocat Regem, Legislatorem, Pontificem, & Prophetam. Res eius gestæ in quatuor sacris libris, Exodo, Leuitico, Numeris, & Deuteronomio continentur: ex quibus Philo Iudæus accepit, quæ scripsit in tribus libris de Vita Moyfis, & Gregorius Nyssenus quæ item literis mādauit de Vita Moyfis, ac vita perfectæ. Nos qui breuitati studeamus, virtutes Moyfis, quas Principes Christiani imitari possint & debeant, si Deo placere velint, breuiter percurramus.

Igitur

Igitur Moyses, ex nepotibus Leui, quintus à Patriarcha Iacob, natus est in Ægypto, quo tempore, iussu Pharaonis Regis, mascululi Hebræorum vix nati suffocabantur in flumine, & solæ feminæ conseruabantur. Sed prouidentia Dei factum est, vt mater Moysis viso elegantissimo puero sibi nato, non eum in flumine suffocauerit, sed in fiscella iunceâ inclusum in flumē proiecerit: paulò verò post accidit, vt filia Pharaonis Regis ad ripam fluminis fiscellam cum puero inuenerit, & eductum puerum in filium adoptauerit. Sed Moyses vbi adoleuit, *negauit se esse filium filiae Pharaonis; magis eligens (vt Apostolus loquitur) affligi cum populo Dei, quàm temporalis peccati habere iucunditatem; maiores diuitias aestimans thesauro Ægyptiorum, improprium Christi: aspiciebat enim in remunerationem.*

Heb. 11.

Atque hîc iam incipit prima, eaquæ nobilissima Moysis virtus. Nam, vt tradit Philo in Vita Moysis, filia Pharaonis, quæ Moysen adoptauit in filiū, vnica erat Regni heres, & Moyses in spē Regni educabatur, atq; ea de causa, vt sanctus Stephanus in Actis Apostolorum dicit, *eruditus est in omni sapientia Ægyptiorum.* neque modico tempore in aula Regia mansit, vt heres Regni futurus; sed per annos circiter quadraginta, vt

idē

Act. 7.

idem sanctus Stephanus loquitur. Hic igitur cum cognouisset se verè Israëlitam esse, & vnum ex populo Dei, quamuis eo tempore in magnis angustiis posito, apertè negavit se esse filium filiaë Pharaonis; & ex palatio Regis abscedens, maluit in vera Religione manēs affligi cum populo Dei, quàm cum idola colentibus, & sanctos persecutibus, frui omni temporali iucunditate. Neque insipienter egit, *maiores diuitias aestimans thesauro Aegyptiorum, improprium Christi*, id est, improprium illi simile, quod postea pertulit Christus. *Aspiciebat enim in remunerationem*, id est, sapienter cogitabat Moyses, iam tunc Spiritu sancto cor eius illustrante, tribulationes pro vera Religione susceptas, adferre fidelibus patientibus gloriam, & diuitias, & gaudia sempiterna. Adde, quòd Moyses contemnens thesaurum Aegyptiorum & gloriam Regni Pharaonis, non solum adeptus est gloriam Regni cælorum in sæculo futuro; sed hîc etiam in terris factus est Princeps populi Dei, & ipso Deo opem ferente, de ipso Pharaone & omni exercitu eius gloriosissimè triumphauit. *Viderunt enim Israelitæ, Duce Moyse,* Exod. 1. *inimicos suos Aegyptios mortuos super littus maris, & manum magnam, quam exercuerat Deus contra eos.*

M

Alter

Altera virtus Moysis fuit Humilitas eximia, ob quam non solum non affectavit Regnum aut Prefecturam ullam, sed à Deo vocatus ad regimen & Principatum populi, multis variisque rationibus conatus est effugere onus imperij, ut perspicuum est libro Exodi capite tertio & quarto. Et certe non poterat excusare ætatem; erat enim annorum plus quadraginta: neque imperitiam; cum esset educatus in Regno, & institutus in omni sapientia Ægyptiorum: neque debilitatem virium; nam paulò antea defenderat solus puellas soceri sui aduersus pastorum multitudinem, ut legimus in eodem libro Exodi capite secundo: neque ignorance[m] vocationis; perspicuè enim intelligebat, se vocari & mitti à Deo. Quid igitur impediēbat, quo minus audacter susciperet Principatum, nisi virtus humilitatis, per quam ita sese posuerat in nouissimo loco, ut omnibus cederet, & omnes se aptiores ad illud officium arbitraretur? Id ita esse, manifestum ex eo fieri potest, quòd Deo non fuit ingrata Moysis quasi recalci- tratio; quin potius, ut Philo scribit in primo libro, delectatus est Deus pudore ac verecundia Moysis, quippe quæ non ex contumacia, sed ex humilitate proficiscebatur. Non enim potest non Deo placere virtus illa,

illa, quæ Doctorem & professorem habuit ipsius Altissimi Filium. Ipse enim est qui dixit, *Discite à me, quia mitis sum, & humilis corde.* Et quoniam ipse idem dixit: *Qui se humiliat, exaltabitur*; ideo Deus Moysen tanto libentius exaltauit, quanto profundius ipse se humiliavit. Hæc si homines cogitarent, non tam ardentem ambirent imperia, neque tam multa prælia & strages hominû fierent.

Sed est etiam alia ratio, cur Deus Principem à se electum, humilem esse voluit; quia videlicet facturus erat per eum miracula plurima & maxima, ut virgæ conuerterentur in dracones, ut aquæ fluminum verterentur in sanguinem, ut ad verbum Moysis fierent tenebræ horribiles in omni terra Ægypti, ut vna nocte primogeniti omnium hominum illius regionis interirent; ac denique ut mare siccaretur, ut Hebræi per maris medium sicco pede transirent; & rursus ad nutum Moysis aquæ ad locum suum subito redirent, & Ægyptios insequentes obruerent: & periculum erat, ne tantorum mirabilium patrator in superbiam eleuaretur; ideo elegit hominem summa humilitate præditum, qui gloriam Deo daret, & nihil sibi tribueret.

Atque hoc ipsum omnibus Principibus valdè necessarium esse videtur, ut infirmitatem

Altera virtus Moysis fuit Humilitas eximia, ob quam non solum non affectauit Regnum aut Prefecturam vllam, sed à Deo vocatus ad regimen & Principatum populi, multis variisque rationibus conatus est effugere onus imperij, vt perspicuum est libro Exodi capite tertio & quarto. Et certe non poterat excusare ætatem; erat enim annorum plus quadraginta: neque imperitiam; cùm esset educatus in Regno, & institutus in omni sapientia Ægyptiorum: neque debilitatem virium; nam paulò antea defenderat solus puellas foci sui aduersus pastorum multitudinem, vt legimus in eodem libro Exodi capite secundo: neque ignorance vocacionis; perspicuè enim intelligebat, se vocari & mitti à Deo. Quid igitur impediēbat, quominus audacter susciperet Principatum, nisi virtus humilitatis, per quam ita sese posuerat in nouissimo loco, vt omnibus cederet, & omnes se aptiores ad illud officium arbitraretur? Id ita esse, manifestum ex eo fieri potest, quòd Deo non fuit ingrata Moysis quasi recalci- tratio; quin potius, vt Philo scribit in primo libro, delectatus est Deus pudore ac verecundia Moysis, quippe quæ non ex contumacia, sed ex humilitate proficiscebatur. Non enim potest non Deo placere virtus illa,

illa, quæ Doctorem & professorem habuit ipsius Altissimi Filium. Ipse enim est qui dixit, *Discite à me, quia mitis sum, & humilis corde.* Et quoniam ipse idem dixit: *Qui se humiliat, exaltabitur*; ideò Deus Moysen tanto libentiùs exaltauit, quanto profundius ipse se humiliavit. Hæc si homines cogitarent, non tam ardentè ambirent imperia, neque tam multa prælia & strages hominũ fierent.

Mat. 11.
Luc. 14.

Sed est etiam alia ratio, cur Deus Principem à se electum, humilem esse voluit; quia videlicet facturus erat per eum miracula plurima & maxima, vt virgæ conuerterentur in dracones, vt aquæ fluminum verterentur in sanguinem, vt ad verbum Moysis fierent tenebræ horribiles in omni terra Ægypti, vt vna nocte primogeniti omnium hominum illius regionis interirent; ac denique vt mare siccaretur, vt Hebræi per maris medium sicco pede transirent; & rursum ad nutum Moysis aquæ ad locum suum subito redirent, & Ægyptios insequentes obruerent: & periculum erat, ne tantorum mirabilium patrator in superbiam eleuaretur; ideò elegit hominem summa humilitate præditum, qui gloriam Deo daret, & nihil sibi tribueret.

Atque hoc ipsum omnibus Principibus valdè necessarium esse videtur, vt infirmita-

Dan. 4.

tem suam agnoscant, & non furentur gloriam quæ soli Deo debetur: & cum eis pareatur ad nutum, & ipsi ab aliis de geniculis adorantur, & vitæ & mortis arbitri esse videntur, intelligant ista omnia sibi tribui quia personâ Dei gerunt, non quia ob propriam excellentiam sibi debeantur. Exemplum habemus terribile, quod apud Daniele m legi potest. Nam quia Nabuchodonosor superbè locutus erat, ac sibi tribuerat potestatem quam à Deo acceperat, dicens: *Nónne hac est Babylon magna, quam ego adificaui in domum Regni, in robore fortitudinis meæ, & in gloriam decoris mei: Cumq; sermo adhuc esset in ore Regis, vox de celo ruit: Tibi dicitur Nabuchodonosor Rex: Regnum tuum transibit à te, & ab hominibus ciicient te, & cum bestiis & feris erit habitatio tua: fœnum quasi bos comedes, & septem tempora mutabuntur super te, donec scias quòd dominetur Excelsus in Regno hominum, & cuicumque voluerit, det illud. Eadem hora sermo completus est.* Itaque iusto Dei iudicio, qui per superbiam supra hominem se exaltauerat, infra hominem deiectus, ad humilitatem bestiarum deuenit. Et quamuis non sæpè ista videamus per mutationem naturæ; tamen non rarò videmus per tam ingentem mutationem morum, vt nonnulli non tam homines, quàm bestię humana facie

cie induti esse videantur. Itaque audiant Principes omnes consilium Sapientis: *Quanto magnus es, humilia te in omni- Eccli. 3. bus, & coram Deo inuenies gratiam.*

Tertia Moyſis virtus, & quidem valde ſingularis, fuit Manſuetudo ſiue Lenitas, quæ virtus filia eſt humilitatis, iuxta verbum Domini: *Mitis ſum, & humilis corde.* nam ex humilitate cordis naſcitur manſuetudo in opere & ſermone. Fuiſſe verò Moyſem excellenti manſuetudine præditum, teſtatur Spiritus ſanctus in libro Numerorum his verbis: *Erat Moyſes vir miſiſſimus ſuper omnes Num. 12. homines qui morabantur in terra.* Et quamvis hoc teſtimonium ſatis eſſe poſſit ac debeat, cùm impoſſibile ſit mentiri Spiritum ſanctum: tamen etiam res ipſæ & facta idipſum clamant. Fuit enim frequenter Moyſes ab ingrato populo, quem infinitis beneficiis affecerat, obiurgatus, reprehenſus, ac tantum non lapidibus obrutus. Sic enim legimus in libro Exodi dicentes Hebræos Moyſi: *Cur eduxiſti nos in deſertum iſtud, ut occideres Exod. 16. omnem multitudinem famem?* & rurſum in eodem libro, *Quid faciam, inquit Moyſes, populo huic? adhuc paululum, & lapidabit me? Exod. 17. Nec ſolus populus, ſed ipſe etiam Aaron, & Maria ſoror eius aliquando detraxerunt Moyſi, dicentes: Num per ſolum Moyſen locu-* Num. 12.

Ibidem.

tus est Dominus? nōne & nobis similiter est locutus? Sed quia vir mitissimus dissimulabat se audire, Deus ipse patrociniū eius suscipiebat; sic enim legimus in libro Numeri: Descendit Dominus in columna nubis, & stetit in introitu tabernaculi vocans Aaron & Mariam: qui cūmissent, dixit ad eos: Audite sermones meos: Si quis fuerit inter vos Propheta Domini, in visione apparebo ei, vel per somnium loquar ad illum; at non talis seruus meus Moyses, qui in omni domo mea fidelissimus est: ore enim ad os loquor ei, & palam; & non per enigmata, & figuras Dominum videt. Quare ergo non timuistis detrahere seruo meo Moysi? Iratusq; contra eos, abiit; nubes quoque recessit, quæ erat super tabernaculum: & ecce Maria apparuit candens lepra quasi nix. Porro sola Maria punita fuit, quia maius peccatum eius erat, cūm esset mulier. Sed mitissimus Propheta, iniuriæ oblitus, mox ad Deum conuersus clamauit: Obsecro Domine, sana eam. Dominus autem exaudiuit quidem orationem serui sui fidelis, sed iussit ad exemplum aliorum, eiici Mariam extra castra, ibique manere vsque ad diem septimum.

Sed non ideò sanctus iste Princeps, quia tam mitis erat erga eos à quibus accipiebat iniurias, negligebat quoque iniurias Dei: quin potius zelo incredibili puniebat offensas

fas Deo factas. In libro Exodi legitur, cùm populus absente Moyse fecisset sibi idolum vituli aurei, Moysen zelo diuini honoris accensum, iussisse vt Leuitæ armati occiderent obuios quosque Israelitas; & facta est cædes viginti trium millium. Et rursus, vt habetur in libro Numeri, cùm filij Israel iterùm peccassent adorantes idolum Beelphegor, clamauit Moyses: *Occidat vnusquisq; proximos suos, qui initiati sunt Beelphegor; & occisi sunt viginti quatuor millia hominum*, & cuncti Principes populi suspensi sunt in patibulis. Vtinam Christiani Principes hoc tam insigni exemplo edocti, proprias iniurias facile contemnerent; iniurias Dei, præcipuè blasphemias & hæreses, ardentissimo zelo persequerentur!

Sequitur alia virtus prorsus inusitata in Principe politico, Contemptus videlicet diuitiarum. de quo sic loquitur Philo Hebræus in libro de Præmiis & pœnis: *Moysem, inquit, solum memoriae proditum est, sine auro, argentiq; , ac reliquis opibus Regnum administrasse, confisum perspicaci, non cæca opulentia: & , vt nihil dissimulem, pro suo censu habentem, quidquid Deus possidet*. Sed quamuis videatur Philo diuitem paupertatem Moyse laudare, quòd esset verissimus Dei amicus, & Dei ope potuerit panem de cælo, & aquam de

petra, & coturnices ex aëre procurare, quæ multis millibus hominum in cibum & potum abundè sufficerent: tamen verè etiam & propriè sanctus Moyses argentum & aurum contempsit, & aulæ Regiæ ministeria non desideravit; & vno contentus administro, vitam pauperem duxit. Nam quemadmodum tributa & vectigalia à populis non exigebat, sic etiam stipendia militibus & famulis non dabat; sic liber à familiaribus curis, & à cupiditate acquirendi, paucissimis contentus, totus erat in officio consulendi Deum, & regendæ multitudinis occupatus. Hanc eximiam virtutem, non ignoro, Principibus nostri temporis re ipsa non conuenire; sed conuenire tamen in animi præparatione, & in exuenda cupiditate immensarum opum, atque vt necessariis thesauris contenti, superuacanea refecare discant. Hanc enim legem Regibus futuris ipse idem Moyses Deo iubente præscripsit in Deuteronomio:

Deut. 17.

*Cum fuerit, inquit, Rex constitutus, non multiplicabit sibi equos, non habebit uxores pluri-
mas, quæ alliciant animum eius; neque argenti
& auri immensa pondera. Nec eleuetur cor eius
in superbiam super fratres suos.* hæc ille. qui non sine causa coniungit superbiam cum magnis opibus; quia diuitiæ superbiam gignūt, vnde & Apostolus dicit: *Diuitibus huius
saeculi*

1. Tim. 6.

seculi præcipe, non sublime sapere, neque sperare in incerto diuitiarum.

Restat virtus postrema, sed verè magna, ac Regina virtutum, Charitas Dei & proximi, quæ Moyses animam sic totam repleuit, vt Deum in patrem, & homines sibi subiectos in filios habere videretur. Quid enim fecit, vt Moyses per totos quadraginta annos cum summo & perpetuo labore & dolore populum durissimæ ceruicis ita regeret, vt quasi in humeris propriis illum portare cogeretur, nisi charitas Dei, & proximi propter Deum? Quâ enim graue fuerit Moysi pondus regiminis gentis illius indomitæ, testantur illa verba in libro Numeri: *Intoleranda res visa est Moysi, & ait ad Dominum: Cur afflixisti seruum tuum? & cur imposuisti pondus vniuersi populi huius super me? numquid ego concepi omnem hanc multitudinem, vel genui eam, vt dicas mihi: Porta eos in sinu tuo, sicut portare solet nutrix infantulum, & defer in terram, pro qua iurasti patribus eorum? Non possum solus sustinere omnem hunc populum, quia grauis est mihi; sin aliter tibi videtur, obsecro vt interficias me, & inueniam gratiam in oculis tuis, ne tantis afficiar malis.* Hæc sunt verba Moyses, qui tamen ex vera charitate propter Deum, sic populum illum diligebat, vt illum per excessum quemdam propriæ

M 5 saluti

Exod. 32.

saluti antepondere videretur. Sic enim locutus est ad Deum, quando populus fecit sibi idolum vituli aurei: *Obsecro, peccavit populus iste peccatum maximum, feceruntq; sibi deos aureos: aut dimitte eis hanc noxam, aut si non facis, dele me de libro tuo quem scripsisti.*

Quamvis autem hunc locum non pauci Expositores intelligant de libro vitæ temporalis, ita ut optauerit Moyses mori potius, quàm ut videret populum illum extra gratiam Dei; ut sanctus Hieronymus, sanctus Io. Chrysostomus, sanctus Gregorius, & alij: tamen non pauciores docent, Moysen locutum esse de libro vitæ æternæ, non quoad culpam, sed quoad pœnam: idque, ut diximus, per quemdam excessum, ut Origenes, sanctus Augustinus, sanctus Bernardus, Rupertus, & alij: tamen maxima charitas est, secundum verbum Domini, ponere vitam temporalem pro fratribus; & plusquam maxima esse videtur, ponere vitam æternam, saltem quoad pœnam. Itaque negari non potest, quin Moyses summa charitate propter Deum dilexerit populum illum, à quo multas iniurias & offensiones acceperat. Ex quo facile potest intelligi, si tanta fuit charitas Moysis in ingratos & malos, multò maiorem fuisse charitatem erga Deum: & quia in charitate consistit perfectio, sequitur, ut sanctus

Hier. in
epist. ad Al-
gasia q. 9.
Io. Chryf.
Hom. 3. de
Lazaro, &
Hom. 79.
ad pop.
Antioch.
Greg. l. 10.
Moral. c. 7
Orig. in
c. 9. ad Ro.
Aug. in
Psal. 105.
& in Exo-
dū q. 147.
Ber. ser. 12.
in Cant.
Rup. l. 4.
in Exodū.

sanctus Moyſes fuerit vir vnde quaque perfectus. Atque hæc cauſa fuit, cur Deus in hunc hominem plurima & maxima dona contulerit: fuit enim ſingulari priuilegio primus Rex, primus Sacerdos magnus, primus Propheta, & primus Legiſlator in populo Dei. Nec ſolum fuit primus Rex, ſed à Deo, non à populo electus. Deinde fuit etiam ſummus Sacerdos, non ab hominibus electus vel conſecratus, ſed ab ipſo Deo propriè conſtitutus; & cum tam inſigni poteſtate, vt non ſolum Aaronem Sacerdotem & Pontificem conſecraret, ſed etiam ritu perpetuo ſtatueret, vt ex ſola eius familia Sacerdotes conſecrarentur, vt notum eſt ex libro Exodi. Exod. 28.

Propheta quoque fuit primus inter eos, qui prophetica oracula literis mandauerunt; ſic enim loquitur ſanctus Lucas: *Et incipiens à Moyſe, & omnibus Prophetis, interpretabatur illis in omnibus Scripturis, quæ de ipſo erant.* Luc. 24.

Denique Legiſlator eximius fuit, vt ipſe idem Spiritu ſancto inſpirante dicat in Deuteronomio: *Quæ eſt alia gens ſic inclyta, vt habeat caerimonias, iuſtæque iudicia, & vniuerſam legem, quam ego proponam hodie ante oculos veſtros?* Deut. 4.

Sed quæret aliquis, An Moyſes inter tot & tam magnas virtutes, & dona, ac priuilegia Dei, nullum peccatum admiferit, ob quod à Deo

Exod. 2.
Num. 20.

Deo puniri potuerit vel debuerit, ac per hoc vitæ innocentia cum Patriarcha Iosepho comparari potuerit? Duo leguntur in Scripturis, quæ peccata videri potuerint; homicidium patratum, & titubatio quædam, cum aquam de petra educere à Domino iussu esset. Sed homicidium Scriptura non reprehendit, fortasse, quia factum erat in defensione Hebræi innocentis ab Ægyptio violenter oppressi. Sanctus quidem Augustinus in libro 22. contra Faustum cap. 70. existimauit, homicidium illud fuisse culpabile: tamen postea scribens Quæstiones in Exodum, retractauit sententiam illam suam priorem, & Moysen à criminis culpa defendit. Titubatio verò, peccatum omnino fuisse legitur; sed crimen, id est, letale peccatum fuisse, credibile non est. Historia huius titubationis habetur in libro Numerorum, ubi iubente Deo ut Moyses & Aaron virga percuterent filicem, ut inde prodirent aquæ,

Num. 20. *Moyses dixit ad populum: Num de petra hac vobis aquam poterimus eijcere? & quamuis aquæ largissimæ continuò ex percussa filice profluxerint; tamen Dominus subiratus dixit: Quia non credidistis mihi, ut sanctificaretis me coram filiis Israel; non introducetis hos populos in terram, quam dabo eis. & in eodem ipso loco iussit Deus ut Aaron moreretur, dicens:*

cens: *Pergat Aaron ad populos suos: non enim intrabit terram, quam dedi filiis Israel; eò quòd incredulus fuerit ori meo ad Aquas contradictionis.* in eodem libro Numeri cap. 27. dixit Dominus ad Myosem : *Ascende in montem istum Abarim, & contemplare inde terrā, quam daturus sum filiis Israel: cumq; videris eam, ibis & tu ad populum tuum, sicut iuit frater tuus Aaron; quia offendistis me in deserto, &c. nec sanctificare me voluistis.* & denique in libro Deuteronomij dixit Dominus Moyfi: *Ascē- Deut. 32.
de in montem istum Abarim, id est, transituum, in montem Nebo, qui est in terra Moab contra Iericho, & vide terram Chanaan, quam ego tradam filiis Israel obtinendam; & morere in monte. quem conscendens iungēris populis tuis; sicut mortuus est Aaron frater tuus in monte Hor, & appositus populis suis; quia prauaricati estis contra me in medio filiorum Israel ad Aquas contradictionis.* Neque tamen existimandum est, hoc peccatum Moyfis fuisse letale: nam pœna eius non fuit propriè mors, sed solūm vt non ingrederetur in Terram promissionis; naturalis enim mortis eius tempus adueniat, vt etiam antea Aaronis; neque violenter, sed naturaliter mortui sunt. sed potuisset Deus vel prorogare illis vitam, vel anticipare tempus ingressus eorum in Terram promissionis. Id apertius intelligi potest ex capite

te

te primo Deuteronomij, vbi Moyses dicit:
*Nec miranda indignatio in populum, cum mihi
 quoque iratus Dominus propter vos dixerit:
 Nec tu ingredieris illuc, sed Iosue filius Nun
 minister tuus, ipse intrabit pro te.* Ex his aperte
 colligitur, peccata Moysis, in tam longa æta-
 te centum viginti annorum, paucissima at-
 que leuissima fuisse; & opera bona, plurima
 & maxima: & tamen noluisse Deum, Iudi-
 cem iustissimum, vt illa peccata leuissima
 impunita manerent. Quod si Deus in Moy-
 se amico suo intimo & fidelissimo titubatio-
 nem illam modicam tam seuerè puniuit, iu-
 re timere debent Reges ac Principes terræ
 iram omnipotentis Dei, nisi summo studio
 in lege Domini meditentur die ac nocte: &
 si peccando iram Domini commeruerint,
 illam per opera pœnitentiæ seriò placare, vel
 etiam in confessione præuenire procurent.
 Atque hîc finis sit Vitæ & virtutum sancti
 Moysis, Principis primi & clarissimi in po-
 pulo Dei. Vixit annos centum & viginti;
non caligauit oculus eius, nec dentes sunt emoti.
 Obit in monte Nebo. sepeliuit eum Deus,
 vt non inueniretur, neque sciretur sepul-
 chrum eius.

Deut. 34.

VITA

VITA ET VIRTUTES

SANCTI IOSVE

DVCIS SECUNDI

HEBRÆORVM.

IOSVE Dux secundus Hebræorum, à sancto Iosepho, vno ex duodecim filiis Israel, descendit, fuitq; de tribu Ephraim, septimus à Iosepho, vt legimus in libro Numeri. Num. 13. Minister fuit Moyſis longo tempore, & cum eo ascendit in montem Sinai, & fuit in eo loco quadraginta diebus. Postea Moyſes præuidens, Iosue fore sibi successorem, Exod. 24. & 32. non sine magno mysterio mutauit illi nomen (vocabatur enim antea Oſea) & voluit Num. 13. vocari Iosue, quod est idem nomen cum Iesus; Græci enim Iesum illum vocant, & ipse etiam Ecclesiasticus, Scriptor sacer, de eo sic loquitur: *Fortis in bello Iesus Naue successor* Eccli. 46. *Moyſi*. Et quidem sanctus Hieronymus in Commentario ad caput primum Oſeæ Prophetæ scribit, Oſeām significare saluatorem, Iosue significare saluatorem Domini, addita videlicet prima litera nominis Domini, quæ est Iod, apud Hebræos. Non reiicio sententiam sancti Hieronymi, sed existimo posse etiam dici, additam fuisse literam Iod,

Iod, ut fieret nomen veri Saluatoris: nomen enim Oseæ, significat saluatorem, accipiendo literam He, pro litera Iod; sed nomen Iosue, siue Iesus, propriissimè saluatorem designat. Quoniam igitur Iosue futurus erat figura manifestissima Domini nostri Iesu Christi, qui introducit nos in veram terram promissionis, ad quam Moyses nos introducere non potuit: ideò cùm mitteretur Iosue ad explorandâ Terram promissionis, & quodammodò inchoaret officium suum introducendi populum in terram illam; tunc primùm cœpit appellari Iosue, id est, saluator. Porro Iosue successit Moyfi in regimine politico, non per electionem Moyfis, sed per electionem ipsius Dei: sic enim legimus in libro Numeri, quando Deus prædixerat Moyfi, quòd breuì esset moriturus, respon-

Num. 27.

disse Moysem: *Provideat Dominus Deus hominem, qui sit super multitudinem hanc, ne sit populus Domini sicut oves absque pastore. Dixitq; Dominus ad eum: Tolle Iosue filium Nun, virum in quo est Spiritus, & pone manum tuam super eum. Qui stabit coram Eleazaro Sacerdote, & omni multitudine; & dabis ei præcepta cunctis videntibus, & partem gloriæ tuæ, ut audiat eum omnis synagoga filiorum Israël. Pro hoc si quid agendum erit, Eleazar Sacerdos consulat Dominum. Ad verbum eius egredietur & ingre-*

ingredietur ipse, & omnes filij Israel cum eo, & cetera multitudo. Fecit Moyses sicut praeceperat Dominus: cumque tulisset Iosue, statuit eum coram Eleazaro Sacerdote, & omni frequentia populi; & impositis capiti eius manibus, cuncta replicauit quae mandauerat Dominus.

Ex hac narratione Scripturae diuinæ non pauca discere possumus. Primum, in hac electione Iosue, diuisam fuisse in populo Dei potestatem temporalem à spirituali, siue politicam ab Ecclesiastica: Moyses enim utramque potestatem à Deo ipso acceperat; sed ab hoc tempore spiritualis data est Eleazaro Pontifici, & temporalis data est Iosue Duci: atque hæc est causa, cur Deus Moyfi dixerit, ut daret Iosue Duci partem gloriæ suæ, id est, vnā potestatem, non utramque. Discimus præterea, benedictionem, & quasi consecrationem Principum temporalium per manus Sacerdotum, esse antiquissimam, addo etiam vtilissimam: nam in libro Deuteronomij sic scribitur, *Iosue filius Nun repletus est Spiritu sapientiae, quia Moyses posuit super eum manus suas.* Deut. 34. Discimus postremo, potestatem spiritualesse præstantiorem temporali; siquidem ubique videmus Eleazarum Sacerdotem anteponi Iosue Duci. In libro Numeri: *Præcepit ergo Moyses Eleazaro Sacerdoti, & Iosue.* item: *Ter-* Num. 32.
Num. 34.

N ram

Ios. 14.
& 19.

ram vobis diuident , Eleazar Sacerdos , & Iosue. & in libro Iosue : Hoc est quod possederunt filij Israel in terra Chanaan , quam dederunt eis Eleazar Sacerdos & Iosue filius Nun.

Num. 27. denique in libro Numeri apertissimè Moy-
ses dicit : *Ad verbum eius (Eleazari) egre-*
dietur & ingreditur ipse (Iosue) & omnes fi-
lij Israel.

Num. 20.
& 27.
Deut. 33.

Venio nunc ad virtutes & priuilegia sancti Iosue. Primùm , fuit Iosue. Duci Innocentia communis cum Patriarcha Iosepho , à quo ipse descendit : & in hac parte superauit etiam Moysen ipsum. Moyses enim reprehensus fuit à Domino quòd offenderit , & non sanctificauerit ipsum Dominum ad Aquas contradictionis ; & ideò punitus fuit ea pœna , vt non intraret in Terram promissionis , quam tanto tempore desiderauerat , & tanto labore quesiuerat. At de Iosue nihil omnino legitur , quod reprehensum fuerit in Scripturis sacris : & tamen , vt suprà diximus , Scripturæ non solent omittere lapsus eorum , quorum res gestas narrant. Ea igitur innocentia decebat eum , qui Iesu Christi typum gerebat , *qui peccatum non fecit , nec inuentus est dolus in ore eius.*

1. Pet. 2.

Altera virtus , eaquæ ferè singularis , fuit in nostro Iosue Castitas virginalis , in qua superauit castitatem Patriarchæ Ioseph , &
domini

domini sui Moyſis: iſti enim, quamuis alio-
 qui viri caſtiſſimi, vxorem vnam duxerunt,
 & filios procrearunt. Fuiſſe autem noſtrum
 Ioſue, vt verum typum Ieſu Chriſti Domi-
 ni noſtri, virginem caſtiſſimum, ex eo poteſt
 intelligi, quòd in Scripturis nulla fiat men-
 tio filiorum eius: cùm tamen in Scriptu-
 ra veteris Teſtamenti accuratiſſimè de-
 ſcribantur generationes omnium tribuum
 filiorum Iſrael. Itaque ſanctus Ignatius in
 epiſtola ad Philadelphienses dum hortatur
 virgines, ponit exempla eorum qui in vtro-
 que Teſtamento virginitatem coluerunt,
 dicens: *Virgines, ſolum Chriſtum præ oculis
 habete, & eius Patrem, in animabus veſtris illu-
 minata à Spiritu ſancto. Memor ſum ſanctita-
 tis veſtræ, ſicut Eliæ, ſicut Ieſu Naue, ſicut
 Melchiſedech, ſicut Eliſai, ſicut Ieremie, ſicut
 Ioannis Baptiſta, ſicut dilectiſſimi Diſcipuli,
 ſicut Timothei, ſicut Titi, ſicut Euodij, ſicut
 Clementis, & aliorum, qui in caſtitate de vita
 exierunt.* Itaque ex ſententia ſancti Ignatij,
 primus, qui ex filiis Abrahæ trophæum ſan-
 ctæ virginitatis erexit, fuit ſanctus Ioſue:
 nam Melchiſedech non fuit ex filiis Abra-
 hæ, vt notum eſt ex libro Geneſeos. Porro
 ſanctum Ignatium ſecutus eſt ſanctus Hie-
 ronymus libro primo aduerſus Iouinianũ,
 vbi poſteaquam multis verbis probauerat,

Iosue virginem fuisse, concludit, dicens: *Moyſes moriens plangitur à filiis Iſrael; Ieſus autem quaſi victurus non plangitur: nuptiæ enim finiuntur in morte, virginitas poſt mortem incipit coronari.* Addamus & tertium teſtem, vt in ore duorum vel trium teſtium ſtet omne verbum. Sanctus Ioannes Chryſoſtomus in Sermone de Martyribus, proprias Sanctis veteribus laudes aſſignans, noſtro Iosue laudem caſtitaſis attribuit, dicēs: *Ab origine mundi innocens Abel occiditur, Henoch Deo placens transfertur, iuſtus Noë inuenitur, Abraham fidelis probatur, Moyſes manſuetus dignoſcitur, Ieſus caſtus, Dauid lenis, Elias acceptus, Daniel ſanctus, tres pueri victores redduntur.*

Iam verò, vt ad virtutes Theologicas veniamus, Fides in Deum nescio an in vlllo maior vmquam enituerit. Fides in miraculorū patratiōe maximè cernitur, Apoſtolo dicente: *Si habuero omnem fidem, ita vt montes transferam; charitatem autem non habuero, nihil ſum.* Porro in miraculorum patratiōe, præter ceteros Sanctos Teſtamenti veteris Moyſes maximè clauit; quippe qui mare diuiſit, ex petra aquas eduxit, manna de cælo deſcendere fecit, & alia id genus multa patrauit: Iosue noſter diuiſit Iordanem, de cælo lapides ſuper hoſtes populi ſui deſcendere

1. Cor. 13.

Ios. 10.

dere fecit: sed quod est omnium maximum, solem & lunam in cælo imperio suo à cursu cohibuit. Moyse iussus virga petram percutere, & ea percussione aquam elicere tam copiosam, vt homines & iumenta bibere possent, nonnihil in fide hæsitauit: Iosue noster magnitudine fidei sine vlla hæsitazione imperauit soli & lunæ, dicens: *Sol contra Gabaon ne mouearis, & luna contra* Ios. 10.
vallem Aialon: steteruntq; sol & luna, donec ulcisceretur se gens de inimicis suis. Stetit itaque sol in medio cali, & non festinauit occumbere spatio vnus dici. Non fuit antea nec postea tam longa dies, obediante Deo voci hominis, & pugnante pro Israel. Hic planè enituit fides maxima & eminentissima sancti Iosue, qui sine hæsitazione credidit sibi Deum adfuturum, & effecturum vt solem & lunam sisteret: nam idè non timidè & submissa voce, sed audacter atque altissimè clamauit: Sol ne mouearis, & tu luna pariter siste cursum tuum, certus videlicet, omnino futurum, quod ipse Dei amicissimus fieri iuberet. Nam quod subiungitur, *obediante Deo voci hominis*, nō significat, Deum propriè paruissè voci hominis, sed per Metaphoram dici obediuisse, quia fecit vt sol & luna obedirent voci hominis, serui & amici sui fidelissimi. Itaque præuenit Iesus

Mat. 21.

Naue promissionem illam Iesu Christi, cuius ille figuram gerebat: *Amen dico vobis, si habueritis fidem, & non hesitaueritis, & si monti huic dixeritis, Tolle, & iacta te in mare, fiet. Et omnia quaecumque petieritis in oratione credentes, accipietis.*

Nec minor fuit in Iosue Spes in Deum, quàm Fides: siquidem in ipso primo capite libri Iosue, Deus ipse non semel, sed secundo ac tertio dixit ad Iosue: *Confortare, & esto robustus, noli metuere, & noli timere, quoniam tecum est Dominus Deus tuus in omnibus ad quaecumque perrexeris.* Hæc enim verba Dei non solum significantia, sed etiam efficiencia sine dubitatione fuerunt. Itaque abstulerunt ab eo omnem pauorem & timorem, & induerunt eum fiducia incredibili, & fortitudine admirabili, ut facilè victor euaserit aduersus Reges plurimos, & expugnauerit omnes vrbes eorum.

Ios. 6.

Quid iam de Charitate ipsius erga Deum & proximum dicam? Iusserat Iosue, ut cùm caperetur prima ciuitas, quæ dicebatur Iericho, omne aurum & argentum quod in ea repertum fuisset, conseruaretur in thesauros Dei, reliqua omnia destruerentur in honorem Dei, & nemo quidquam attingere auderet. Sed cùm quidam vir, nomine Charmi, clàm abstulisset aliquid auri & argenti,

& ne-

Ios. 7.

& nescio quæ alia Deo dicata: hîc Iosue exarsit in zelum honoris Dei, quamuis alioqui mitissimus esset, & magna diligentia inuento reo, ipsum lapidari iussit, & omnia bona eius, id est, tabernaculum, oues, boues, asinos, & omnem substantiam flammis cremanda tradidit. Apparuit quoque zelus Religionis & charitatis in Deum, in fine vitæ eius, vbi incredibili ardore hortatus est populum ad persistendum in vera Religione vnius veri Dei, & ita infixit in cordibus audientium zelum Religionis, vt Scriptura dicat: *Seruiuit Israel Domino cunctis diebus Iosue, & seniorum, qui longo vixerunt tempore post Iosue.*

Ios. 23. &
24.

De amore eius & Charitate in proximos, duæ res in testimoniû adduci possunt: vna, quòd nulla vmquam ei contentio fuit cum Eleazaro summo Pontifice, neque cum vllò ex Principibus populi, sed incredibili concordia cum illis omnibus semper vixit. Altera, quòd cùm ventum est ad diuisionem oppidorum, & agrorum, ac vinearum, atque adeò rerum omnium, vi & armis acquisitarum; ille non elegit primus, vt par erat, optima quæque: sed posteaquam omnibus tribus filiorum Israel regiones assignatæ fuerant, tunc ipse petiit à populo locum aliquem vbi habitare posset. Sic enim loqui-

Ios. 19.

tur Scriptura: *Cùm compleisset sorte diuidere terram singulis per tribus suas, dederunt filij Israel possessionem Iosue filio Nun in medio sui, iuxta praeceptum Domini, urbem quam postulauit, Thamnath Saraa, in monte Ephraim, & ædificauit ciuitatem, habitauitq; in ea.* Fuisse autem locum illum horridum & asperum, testatur sanctus Hieronymus in Vita sanctæ Paulæ matronæ Romanæ, quam dicit admiratam fuisse, quando circuiuit Terram promissionis, quòd Iosue distributor possessionum, sibi montana atque aspera delegisset. Sed non est hoc admirandum, cùm Iosue non esset de hoc mundo, sed vir sanctissimus, & æmulator virtutũ Moylis magistri sui; qui non quærebat quæ sua erant, sed quæ aliorum: nec solum Moysen imitari volebat, sed multò magis Iesum Christum, quem spiritu venturum nouerat, & se illius figuram gerere, Deo reuelante, non ignorabat. Itaque, quod postea Philosophus scripsit, hoc esse discrimen inter Regem & Tyrannum, quòd Rex non suam, sed populi vtilitatem querit: Tyrannus contrà, suam, non populi: multò antea noster Iosue reipsa & factis demonstrauit, exemplo suo Reges informans, & Tyrannos detestans.

Lib. 8. Eth.

Omitto quæ dici poterant de prudentia
& for-

& fortitudine in bellis gerendis, quemadmodum videlicet exercitus suos semper in officio continuerit, à sceleribus compescuerit, in timore Domini erudierit : & quibus artibus hostes auerterit, vel prostrauerit, ac denique tam multas prouincias breui domuerit, & habitatoribus interemptis vel fugatis, filiis Israel habitandas possidendasque tradiderit. Hæc enim ex libro Iosue peti possunt. Vixit Iosue annos centum & decem; & genti Hebræorum cum imperio felicissime præfuit annis viginti sex.

VITA ET VIRTUTES SANCTI DAVID REGIS ET PROPHETÆ.

SANCTVS Daud speculum lucidissimum esse poterit Christianis Regibus omnibus. Nam diuitiis non caruit, vt Moyſes & Iosue; neque vitiis etiam caruit, vt Iosue & Ioseph : sed cùm auri & argenti copia abundaret, vsum legitimum diuitiarum ostendit, & cùm ex humana fragilitate peccata non leuia perpetrasset, sic tamen emendare culpas illas studuit, vt non minus post lapsum quàm ante lapsum, amicus Dei singularis dici atque haberi potuerit.

N 5

Ac

Ac ut in tanti Regis rebus gestis & virtutibus explicandis ordine procedamus, enarrabimus primum secundas res, quæ illi acciderunt in pueritia & adolescentia: deinde persecutiones & angustias, quas passus est usque ad annum ætatis suæ trigessimum: tum res eius gestas, dum regnaret per annos quadraginta: denique addemus virtutes eximias & plurimas, quibus illud obtinuit, ut post obitum à Spiritu sancto ita celebraretur, ut possit verissimè dici, ab ipso Deo in Sanctorum numerum relatus.

CAP. I.

1. Reg. 16.

Igitur primum Davidis priuilegium illud fuit, quòd adhuc puerulus, iussu Dei à Samuele Propheta fuerit inunctus in Regem. Nam cum Saul Rex primus Hebræorum non rectè fungeretur munere suo, neque mandata Dei, sibi per Samuelem Prophetam indicata, fideliter adimpleret: iussit Deus Samueli, ut vnum ex filiis Isai oleo sancto inungeret, qua vnctione significaretur, illum fore Saulis successorem. Profectus itaque Samuel ad Isai Bethleemitem, de tribu Iuda; & productis in medium septem eius filiis, Spiritus Domini indicauit Samueli, ad vltimum, qui erat David, puer paruulus, rufus, & facie decorus, regnum Israeliticum post mortem Saulis deuenturum; atque in huius rei signum, illum vnxit oleo

oleo sancto; ex qua vnctione repletus est Dauid Spiritu sancto, & indutus robur corporis & animi prorsus admirabile: nam adhuc adolescens & pænè puer, oues patris sui custodiens, leonem & vrsū inermis interfecit; & paulò pòst, singulari certamine cum gigante Goliath armato ipse puer inermis depugnauit, & vicit. Sed præstat audire verba eius ad Saulem Regem: *Non concidat, inquit, cor cuiusquam in eo (Goliath) ego seruus tuus vadam, & pugnabo aduersus Philisthæum.* Et ait Saul ad Dauid: *Non vales resistere Philisthæo isti, nec pugnare aduersus eum, quia puer es; hic autem vir bellator est ab adolescētia sua.* Dixitq; Dauid ad Saul: *Pascebat seruus tuus patris sui gregem, & veniebat leo, vel vrsus, & tollebat arietem de medio gregis: & persequabar eos, & percutiebam, eruebamq; de ore eorum: & illi consurgebant aduersum me, & apprehendebam mentum eorum, & suffocabam, interficiebamq; eos. Nam & leonem & vrsū interfeci ego seruus tuus. Erit igitur & Philisthæus hic incircumcissus quasi vnus ex eis. Ac vt sanctus puer non videretur de suo robore gloriari, & non de auxilio Dei, in quo præcipuè sperabat, adiunxit: *Nunc vadam, & auferam opprobrium populi: quoniam quis est iste Philisthæus incircumcissus, qui ausus est maledicere exercitui Dei viuentis?* Et ait Dauid:*

Domi-

Dominus qui eripuit me de manu leonis , & de manu ursi , ipse me liberabit de manu Philisthæi huius. Atque ita vt locutus est, sic res se habuit : nam procedens David ad singulare certamen cum Philisthæo , Deo adiuuante vicit puer inermis virum armatum , & proprio hostis gladio caput eius præcidit : neque solum de gigante triumphauit David adhuc adolescentulus , sed causa fuit , vt totis castris Philisthinorum trepidaretur , & Israëlitarum resumptis animis ac viribus fugientes persequerentur , & magna strage affectos è finibus suis eiicerent. Hoc fuit initium operum heroicorum Davidis, quod totum debetur magnæ fidei & fiduciæ innocentis & religiosi adolescentis in Deum.

CAP. II.

Sed hoc tam egregium facinus occasionem dedit grauissimæ persecutioni ; quam Deus permisit , vt virtus patientiæ ipsius Davidis , & pietatis in Deum , & charitatis in proximos , etiam inimicos & ingratos , perspicuè cerneretur : & omnes nos intelligeremus , fuisse Dauidem secundum cor Dei. Saul enim, audiens mulieres canentes, cum David reuerteretur à singulari illo certamine , caput Philisthæi portans in manibus, *Percussit Saul mille , & David decem milia*; inuidentiæ stimulis agitari cœpit : & eoque processit illa mentis egritudo, vt eum

bis

Act. 13.

1. Reg. 18.

bis lancea tentauerit interficere. Deinde amouit illum à se, & constituit tribunum super mille milites, sperans illum in prælio ab hostibus aliquando interimendum. Sed quò magis Dauidem Saul oderat, eò magis Deus eum diligebat, & hostibus formidolosum, & toti populo Israëlitico gratum & amabilem reddebat. Denique Saul non ferens ampliùs præsentiam Dauidis, locutus est ad Ionatham filium suum, & ad omnes seruos suos, vt occiderent Dauidem. Nimis autem longum esset hìc referre, quàm frequenter, & palàm & per insidias tentauerit Saul Dauidem occidere. Denique etiam integrum exercitum militum ad eum capiendum & interficiendum misit: ipse quoque armatis copiis filuas & montes circumdedit, in quibus latère Dauidem acceperat, vt eum de vita tollere posset. Sed videamus, quid contrà Dauid fecerit; an insidiatus vmquam fuerit Sauli, an vllum in eum incitauerit, an de fama vel honore eius detraxerit. nihil eiusmodi legitur in Sacris litteris; sed hoc solum, quòd fugerit, quòd latuerit, quòd insidias eius declinauerit. Sed quod pænè fidem superat, illud est, quòd cum posset eum sine periculo suo interficere, & Regnum eius inuadere, & hoc non semel, sed bis, & amicis cohortantibus, &

1. Reg. 19.

1. Reg. 23.
& 24.1. Reg. 24.
& 26.

occa-

occasionibus optimis se offerentibus ; semper recusauit. Quàm paucos reperiemus, etiam iam Euangelio coruscante, qui parcant hosti sæuissimo, si possint eum sine periculo suo interficere ? Sed quid dicam , si possint non solùm vitam suam conseruare , sed etiam amplissimum Regnum acquirere ? Hoc Dauid fecit , ad hoc culmen virtutis peruenit Dauid : idè de eo canitur , *Memento Domine Dauid , & omnis mansuetudinis eius.* Et non sine magna ratione Filius Dei, filius etiam Dauidis appellari voluit : nimirum mansueti patris mitissimus filius, & patientis patris patientissimus filius , *qui cùm malediceretur , non maledicebat ; cùm pateretur , non comminabatur.*

Psal. 131.

Marth. 9.

Mar. 10.

Luc. 18.

1. Pct. 2.

CAP. III.

1. Reg. 10.

Sed veniamus nunc ad tempus , in quo persecutionibus consummatis peruenit ad Regnum, & videamus quàm iustè & quàm sapienter Regnum administrauerit. Saul, qui cùm primùm electus fuit ad Regnum, optimus erat omnium , & tam humilis in oculis suis , vt oportuerit eum quasi compellere vt Regnum acciperet , quippe qui absconderat se ne Rex fieri cogeretur : tamen paulò pòst oblitus mandatorum Dei, & in sensum reprobum datus , non solùm Dauidem, fidelissimum sibi militem, ob inuidiam persecutus est tamquam hostem ;
sed

sed etiam Sacerdotes Domini, quòd suspi- 1.Reg.22.
 caretur amicos esse Dauidis, planè mites &
 innoxios, coram se interfici iussit; & perie-
 runt illa die Sacerdotes octoginta quinque:
 neque ea crudelitate contentus, ciuitatem
 Sacerdotum, quæ dicebatur Nobe, *percus-*
sit, vt Scriptura loquitur, in ore gladij; viros
& mulieres, & paruulos, & lactentes, bouemq;
& asinum, & ouem in ore gladij. En ad quan-
 tam barbariem & feritatem perduxit inui-
 dia, & carentia timoris Domini, eum Re-
 gem, qui priuatus cùm esset, erat omnium
 optimus. Sed neque his contentus, Religio- 1.Reg.28.
 ne diuina contempta, consuluit pythonif-
 sam. His igitur omnibus sceleribus prouo-
 catus Dominus, tradidit Saulem cum exer-
 citu suo in potestatem Philisthinorum, & 1.Reg.31.
 vna die ceciderunt interfecti Saul cum tri-
 bus filiis eius, & ingens populi multitudo.

Defuncto igitur impio Rege, translatum
 est Regnum ad pium & amicum Dei Da-
 uidem, cùm iam esset annorum triginta.
 Initium autem regnandi duxit Dauid à la-
 crymis & ieiunio & planctu magno, ob
 mortem Saulis inimici sui, & animaduertit
 gladio in eum, qui dixerat à se interfectum
 fuisse Saulem, dicens ei: *Quare non timuisti* 1.Reg.1.
mittere manum tuam vt occideres christum
Domini? Quid igitur mirum est, quòd Da-
 uid

Luc. 6.

Rom. 5.

uid diceretur vir secundum cor Dei, qui inimicum suum sæuissimum viuentem mortuumque ita dilexit, ac si amicissimus ei fuisset? sic enim & Deus *benignus est super ingratos, & malos*: & secundum Apostolum, *commendat charitatem suam in nobis, quoniam cum adhuc peccatores essemus, secundum tempus Christus pro nobis mortuus est.*

2. Reg. 23.

Act. 4.

Psal. 100.

Porro quam iuste Dauid, misericorditer, prudenterque regnauerit, explicat ipse in Psalmo centesimo. Neque miretur aliquis, quod ipsemet laudes suas decantet: neque enim ipse, sed Spiritus Domini per os eius loquebatur. sic enim ipse loquitur in secundo libro Regum: *Spiritus Domini locutus est per me, & sermo eius per linguam meam.* Et in Actis Apostolorum tota Ecclesia dicit: *Domine, qui Spiritu sancto per os patris nostri Dauid, pueri tui, dixisti: Quare fremuerunt gentes.* Itaque Dauid laudes suas, non ut laudes suas, sed ut beneficia gratiæ Dei Spiritu sancto inspirante verè scripsit, cum ait: *Misericordiam & iudicium cantabo tibi Domine;* hoc est, Ad laudem tuam, Deus, & ad instructionem Principum quos tu elegeris, cantabo misericordiam & iustitiam, ad quas reuocari possunt omnes virtutes, quæ sunt Principibus omnibus ad benè regendos populos necessariæ. Cantabo autem tibi,

tibi, quia dona tua sunt, in quocumque Principe inueniantur: tua enim gratia Principes boni misericordes sunt, sed non iniusti, sed non crudeles. *Psallam, & intelligam* Verba text.
in via immaculata, quando venies ad me. id

est, Canam non sola voce, sed etiam per instrumentum musicum, quando veneris ad me, Spiritu sancto tuo, inspirans mihi viam immaculatam, quæ consistit in misericordia & iustitia. *Vniuersa enim via Domini,* Psal. 24.

misericordia & veritas; quæ eadem cum iustitia est. *Perambulabam in innocentia cordis* Verba text.
mei, in medio domus mee. Hic iam incipit

Dauid explicare laudabiles mores suos, ut ceteri imitentur, tum successores, tum subditi. Ad hoc enim Principes in sublimi loco sedent, ut tamquam lucernæ in candelabro positæ, omnibus luceant. Ac primum declarat, qualis fuerit in oculis Dei, qui videt etiam in abscondito; deinde, qualis fuerit publicè in oculis hominum: *Perambulabam,* inquit, *in innocentia cordis mei:* id est, Perambulabam viam huius præsentis vitæ, conseruans in primis cordis innocentiam, nihil cogitans, & nihil appetens contra legis diuinæ mandata; ne fortè cor meum vitiosis cogitationibus vel desideriis inquinarem, Atque id faciebam etiam *in medio domus*

meæ, in penetralibus videlicet, vbi nemo

O

erat

erat qui me reprehendere posset. Multi enim in foro & in plateis modeste ac moderate se gerunt, sed in penetralibus domus fræna libidinibus laxant. Quanta igitur & quàm seuera disciplina Davidis erat, qui etiam in penetralibus domus suæ, & in ipso corde, vbi solus Deus videt, innocentiam custodiebat? & credibile est ab ipso didicisse

Prou.4.

filium eius Salomonem, qui scripsit, *Omni custodia serua cor tuum, quia ex ipso vita procedit.* Neque contentus David innocentia

Verba text.

interiore, addit: *Non proponebam ante oculos meos rem iniustam: facientes prauaricationes odiui.* Hæc enim pertinent ad innocentiam oculorum & manuum. Auertebat enim magna diligentia oculos David ab omni spectaculo vitioso, à ludis illicitis, à choreis impudicis, ab omni aspectu rerum quæ mentem inquinare possent; sed præcipuè auertebat oculos ab omni iniustitia, à muneribus quæ excæcant oculos sapientum, à contractibus vsurariis, ab omni negotiatione iniusta: nec solum ipse leges diuinas præuaricari nolebat, sed omnes subditos suos, quos præuaricatores nouerat, odio habebat, & si quo modo poterat, eos à præuaricatione compescebat. Addit postea: *Non adhasit mihi cor prauum: declinantem à me malignum non cognoscebam.* Tanta videlicet erat in populo

Verba text.

pulo sanctitatis opinio de Rege Dauide , vt improbi ad eum accedere non auderent. Magna laus Principis, cui deceptores, assentatores, lenones , atque alij scelerati homines appropinquare non audent. Non adhæsit mihi , inquit , homo prauī cordis & nequam; nouerant enim omnes, à me non diligi facinorosos: *Declinantem à me malignum non cognoscebam.* Sic enim erat omnibus notum , me non delectari societate improborum , vt per se declinarent improbi à confortio meo, etiam me nesciente. *Detrahentem secretò proximo suo, hunc persequabar.* Alia virtus planè regia hîc aperitur, in qua mirificè lucent misericordia & iudicium. Sæpè enim in aulis Principum regnat liuor & inuidia : inde multi exurgunt detractores vel adulescentes , qui detrahendo eiiciunt competitores , & adulando occupant eorum loca. Sed Dauid Rex sapiens & iustus, detrahentes secretò proximis suis non solum non audiebat, sed persequabatur, & ex aula eiiciebat. Addit: *Superbo oculo, & insatiabili corde, cum hoc non edebam.* Non enim solos detractores, sed etiam superbos & cupidos Dauid detestabatur : nihil enim tristius accidere populis potest, quàm si ministri Regum superbi aut auari sint. Abutuntur, qui eiusmodi sunt, publica potestate ad

Verba text. Verba text.

O 2 explen-

explendas cupiditates proprias , non sine magno detrimento populorum. Daud igitur ad mensam suam non admittebat, tamquam domesticos & familiares, homines elatos atque superbos, neque homines cupidos, qui opibus expleri nequeunt. *Oculi mei ad fideles terra, ut sedeant mecum: ambulans in via immaculata, hic mihi ministrabat.* Explosis à conuictu & familiaritate vel ministerio suo detractoribus, superbis, & avaris; eligebat & admittebat solos fideles & probos. Sæpè enim accidit, ut Principes sic delectentur fidelitate ministrorum quos utiles experiuntur vectigalibus & gazis suis, ut faciliè tolerant multa alia illorum vitia. Non sic Daud Rex sanctus, sed coniunctam volebat esse in ministris suis fidelitatem cum probitate, & probitatem cum fidelitate. Nolebat enim amicos habere, quos inimicos Domini sui esse non ignorabat; & qui sic diligenter conseruarent regias opes, ut simul flagitiis suis perderent animas proprias, & malo exemplo perderent animas populorum. Ideò subiungit: *Oculi mei ad fideles terra, quærendos videlicet & eligendos: sed simul eos qui ambulant in via immaculata, id est, qui fidelitatem cum probitate coniungunt, hos ad ministrandum mihi semper deligebam.* Denique

que addit: *In matutino interficiebam omnes peccatores terra, ut disperderem de ciuitate Domini omnes operantes iniquitatem.* Concludit Psalmum, demonstrans zelum suum in purganda ciuitate Dei: in qua purgatione faciebat misericordiam & iudicium: misericordiam erga bonos ciues, liberans eos ab oppressiōibus impiorum; & iudicium erga malos, debitis pœnis eos afficiens. Dicit autem, in matutino se hoc iudicium exercuisse, id est, in ipso principio erumpentium malorum, antequam radices figant: nam ubi mala crescendo inualuerunt, vix magno labore eradicari possunt. Dicit autē, se disperdere voluisse omnes peccatores terræ; omnes, inquam, qui mortem merebantur, & quibus vita concedi non poterat sine periculo innocentium. Quando enim è contrario non possunt omnes peccatores disperdi, nisi cum eis multi pereant innocentes; tunc parcendum est etiam impiis, ne simul cum illis pereant iusti, iuxta parabolam zizaniorum, in qua Dominus ait: *Sinite utraque crescere, ne fortè colligentes zizania, eradicetis simul cum eis & triticum.*

Verba text.

Matth. 13.

CAP. IV.

Neque solæ virtutes regiæ, misericordia & iustitia in Dauide nostro mirificè refulserūt; sed etiam pietas & charitas in Deum tanta, quanta vix in probatissimis Sacerdotibus,

tibus, & perfectis Monachis, Euangelio coruscante, inueniri poterit. Et tamen hic magnus vir non in templo Domini, vt Samuel; neque in desertis locis habitabat, vt sanctus Ioannes Baptista, & nostri Paulus & Antonius; sed aulam regiam tenebat, opibus abundabat, vxores & filios multos habebat, exercitum armatum ducebat, vrbes oppugnabat vt caperet, & captas euertebat: & tamen sic erat addictus colloquiis diuinis & orationi, vt septies in die laudes diceret Domino, & media nocte surgeret ad confitendum Domino; & Cantica illa spiritualia tam multa & tam pia scriberet, quæ fontes lacrymarum producunt, quæque iam per omnes Ecclesias suauissime concinuntur; vt factus iam sit David magister omnium Ecclesiarum & Monasteriorum.

Quid iam dicam de amore eius in Deum, & de contemptu mundi huius? Ita prorsus amor diuinus cor eius occupauerat, vt diceret: *Tibi dixit cor meum, exquisiuit te facies mea: faciem tuam Domine requiram.* item: *Quàm magna multitudo dulcedinis tuæ Domine, quā abscondisti timentibus te!* item: *Gustate, & videte, quoniam suavis est Dominus.* item: *Sitiuit anima mea ad Deum fortem viuum; quando veniam, & apparebo ante faciem Dei?* item: *Renuit consolari anima mea, me-*
mor

Psal. 118.

Psal. 26.

Psal. 30.

Psal. 33.

Psal. 41.

Psal. 76.

mor fui Dei, & delectatus sum. item: Quid ^{Pfal. 72.}
mibi est in celo? & à te quid volui super ter-
ram? Deus cordis mei, & pars mea Deus in æ-
ternum. item: Latifica animam serui tui, quo- ^{Pfal. 85.}
niam ad te Domine animam meam leuavi, quo-
niam tu Domine suavis & mitis, & multa mise-
ricordia omnibus inuocantibus te. item: Ego ^{Pfal. 103.}
verò delectabor in Domino.

Addidit quoque Dauid ad amorem erga
 Deum, pietatem & religionem erga ea quæ
 Dei sunt; & præparauit quæ ad templum
 magnificentissimum ædificandum necessa-
 ria esse videbantur; thesauros inmensos.
 Sic enim legimus in libro priore Paralipo-
 menon cap. 22. *Ecce ego, inquit, in paupertate* ^{1. Paral. 22}
mea præparauì impensas domus Domini; auri
talenta centum millia; & argenti mille millia
talentorum: æris verò & ferri non est pondus;
vincitur enim numerus magnitudine: ligna &
lapides præparauì ad vniuersa impendia. Ecce
in quos usus Dauid thesauros cõgessit suos:
non in voluptates suas, vel gloriam suam,
sed in obsequium Domini Dei sui. Neque
verò solum amabat Dominum Dauid ex
toto corde suo, sed etiam despiciebat om-
nia quæ extra Deum sunt, vt planè inania,
nihil solidi & veri boni in se habètia: quod
ex toto Psalmo trigesimo octauo intelligi
potest: Ecce, inquit, mensurabiles posuisti dies ^{Pfal. 38.}

meos, id est, breuissimos, qui quasi palmo vno mensurari possint. & Verumtamen vniuersa vanitas omnis homo viuens. & In imagine pertransit homo, sed & frustra conturbatur. Thesaurizat, & ignorat cui congregabis ea. & Tabescere fecisti sicut araneam animam meam. (aranea enim laborat in texenda tela vt capiat muscas; & ipsa interim exiccatur & consumitur.) Denique addit: *Aduena ego sum, & peregrinus, sicut omnes patres mei.* In quem locum sanctus Ioannes Chrysostomus scribens, exclamat: *Iure admirandus est magnus David, qui in Regno, opibus, & potentia, se ipse appellat inquilinum & viatorem; vt qui prosperitati nō fideret: reuera enim sunt hæc verba plena sapientia.* Neque solum Deū, sed etiam proximum sic ardentem diligebat David, vt pro eo vitam suam exponere paratissimus esset. Cum aliquando sæuissima pestis grassaretur in populū, clamauit David

2. Reg. 24. ad Deum: *Ego sum qui peccavi, ego qui iniquè egi: isti qui oues sunt, quid fecerunt? vertatur, obsecro, manus tua contra me, & contra domum patris mei.* Hæc nimirū est illa perfecta charitas, de qua loquitur Apostolus Ioannes, dicens: *In hoc cognouimus charitatem Dei, quoniam ille animam suam pro nobis posuit; & nos debemus pro fratribus animas ponere.*

1. Ioan. 3.

Insignis quoque fuit patientia & humili-

tas

tas Dauidis, tum etiam cùm Rex esset. Nam cùm fugeret Absalonem filium, qui vt Regnum patri eriperet, cum ingenti exercitu aduersus eum veniebat; accidit, vt vir quidam nomine Semei malediceret Regi, dicens: *Egredere, egredere vir sanguinum, & 2. Reg. 16. vir Belial;* & proiciebat lapides contra Dauid: cumq̃ue vnus ex Ducibus Dauid vellet confurgere aduersus eum, mortemq̃ue illi comminaretur; compescuit Dauid militem suum, dicens: *Dimitte eum vt maledicat iuxta praeceptum Domini: si forte respiciat Dominus afflictionem meam; & reddat mihi Dominus bonum pro maledictione hac hodierna.* Sic Dauid humiliter passus est vt vir priuatus pergeret maledicendo, & lapides contra se iaciendo, quamdiu voluit, etiam si facillimè posset per vnum ex militibus suis eum de medio tollere. Et cùm postea Dauidi ex praelio victori redeunti idem Semei occurrisset, & veniam petiisset; facillimè impetrauit. Et quid mirum si veniam impetrauit à Rege mitissimo & patientissimo, de quo scriptum est: *Memento Domine Dauid, & omnis mansuetudinis eius.* Psal. 131.

Porro mansuetudinis & patientiæ soror vel mater est humilitas; quarum virtutum magistrum ac doctorem se proficitur Christus dicens: *Discite à me, quia mitis sum, & Math. 11.*

O s

humi-

humilis corde. Atque ea causa mihi esse videtur, cur David in Psalmo quodam humilitatem suam apertissimè prædicauerit, quasi glorians, ea se virtute præditum ex insigni dono Dei fuisse, quam, ut Propheta eximius prænoscebat, in Christo, filio suo secundum carnem, primarium locum habituram: *Domine*, inquit humilis David, *non est exaltatum cor meum: neque elati sunt oculi mei*. Audacter hoc dicit ad eum, qui scit eum vera dicere: & eadem fiducia adiungit: *Neque ambulavi in magnis, neque in mirabilibus super me*. Ac ne fortè homines non facile crederent, in tanto Rege locum tantæ humilitati esse potuisse; addit iuramentum, dicens: *Si non humiliter sentiebam, sed exaltaui animam meam: sicut ablactatus est super matre sua; ita retributio in anima mea*. Tremendum iuramentum, si intelligatur per experimentum, quàm grauis sit pœna, priuatio lactis diuini. hæc enim sententia huius loci esse videtur, Sicut infans recens amotus à lacte, manet in sinu vel super genua matris suæ mœstus & plorans, quia priuatus est dulcedine lactis, quæ pro illo tempore summæ deliciæ illius erant; sic anima mea priuetur dulcedine visitationis diuinæ, quæ meæ purissimæ ac solæ deliciæ sunt, si spiritus superbiæ in anima mea locum

cum vllum habet. Quorsum autem hæc declaratio humilitatis regię tendat, intelligi potest ex conclusione Psalmi, quæ est: *Speret Israel in Domino, ex hoc nunc & vsque in sæculum.* hæc enim est sententia horum verborum: Si ego Rex & Propheta non me efferre audeo propter potentiam & sapientiam, neque de me ipse præsumo, sed omnem spem meam in Deo collocatam habeo; certè par est vt populus meus non in viribus suis confidat, sed speret in Deo in omni tempore, tam præsentì quàm futuro.

Restat ex rebus gestis Dauidis, peccatum eius & pœnitentia: quia enim multò plures sunt Reges qui egent exemplis pœnitentiæ, quàm innocentia; ideo placuit Deo, ad multorum Principum salutem, permittere, vt hic singularis eius amicus, & vir planè secundum cor eius, in graue peccatum aliquando laberetur, & per seriam pœnitentiam citò resurgeret: & peccatum eius ac pœnitentia literis publicis scriberetur, & per omnes prouincias legeretur & cantaretur, & ad memoriam sæculorum omnium mandaretur. Igitur peccauit Dauid sanctus peccatum grande, adulterium videlicet cum homicidio coniunctum. In quo peccato multę deformitates numerari possunt. Vna, ex numero personarum quas offendit, quæ plu-

2. Reg. 12.

plurimæ sunt ; offendit enim David primò Vriam, militem suum fidelissimū, cui vxorem & vitam eripuit; deinde offendit Bethsabeam, quam ad peccatum adulterij prouocauit, & spiritualiter interfecit; tum offendit vxores proprias, quibus fidem non seruauit; prætereà offendit populum vniuersum, imò etiam infideles ipsos exemplo pessimo. quod notauit Propheta Nathan, cum ait: *Blasphemare fecisti inimicos Domini.* Denique offendit Deum, cuius leges apertè præuaricatus est, videlicet, *Non occides, & Non mæchaberis.* Deinde grauitas peccati Davidis cognosci potest ex circumstantiis personarum : nam offendit David Vriam primò, innocentem, secundò, fidelissimum; tertio, qui tum Dauidi militabat; quarto, quia vxorem eius polluerat per adulterium, quasi puniendum censeret, quia iniuriam acceperat; quintò, quia ipsum eundem ministrum suæ mortis esse voluit, dans ei literas, quibus cædes ipsius continebatur; sextò, quia cum scripsit ad Ioab Ducem militiæ vt Vriam interficiendum curaret, existimari voluit, eum magni criminis reum, & eo modo famam eius maculauit. Sed ingratitude erga Deum, præcipua causa est magnitudinis peccati Davidis: Deus enim in Dauidem omnia ferè dona & priuilegia contulit,

tulit, quæ in hominem conferri posse videntur. Eum siquidem Deus ex pauperculo ouium pastore fecit Regem magnum, Prophetam eximium, Imperatorem felicissimum; donauit prudentia, robore, pulchritudine; cumulauit diuitiis, prolibus, denique rebus omnibus quæ in terris desiderari possunt. Adiecit ad hæc omnia Dauid, quòd non continuò resipuit, sed hæsit in cœno peccati multos menses: iam enim natus erat filius ex adulterio, quando primùm Dauid resipiscere cœpit; & nisi Deus singulari beneficio gratiæ suæ misisset ad eum Nathan Prophetam, diutiùs fortasse in luto peccati volutatus esset. Hæc tanta peccati grauitas, hominis alioqui tam pij, in Scripturis tam accuratè exponitur, vt nullus desperet, sed omnes ad pœnitentiã, eamque seriam, primo quoq; tempore reuertantur.

Alterum peccatum Dauidis in Scriptura sancta narratur, quòd numerari voluerit homines ad bellum idoneos in vniuerso Regno suo. Sic enim legitur in secundo libro Regum: *Et addidit furor Domini irasci contra Israel, commouitq; Dauid in eis dicens: Vade, numera Israel & Iudam, &c. Et inuenta sunt de Israel octingenta millia virorum fortium, qui educerent gladium; & de Iuda quingenta millia pugnatorum. Percussit autem cor*

2. Reg. 24.

cor David eum, postquam numeratus est populus, & dixit David ad Dominum: Peccavi valde in hoc facto, sed precor Domine, ut transferas iniquitatem serui tui, quia stultè egi nimis. Et mox adfuit Gad Propheta, qui nomine Dei dedit optionem David, ut eligeret in pœnam illius peccati, vel septem annos sterilitatis terræ, vel tres menses infelicis belli, vel tres dies pestis crudelissimæ. elegit autem David tres dies pestis. Ista numeratio potuisset videri sine culpa, cum Deus ipse in libro Numeri iusserit numerari omnes tribus Israel: sed pœnitentia David, & ira Dei per Gad Prophetam manifestata, & pœnitentia imposita; satis apertè indicat, & Regem & populum peccasse tumore superbix, vel saltem inanis gloriæ, ob tam ingentem numerum virorum fortium, in Regno alioqui non amplissimo. Sed cõstat etiam, maius fuisse peccatum populi quàm Regis. Id quod intelligi potest tum ex illis verbis: *Et addidit furor Domini irasci contra Israel, commouitq; David in eis dicentem: Vade, numera Israel & Iudam;* tum ex pœna subsequuta, ex peste videlicet, quæ personam Regis nõ attigit, & de populo sustulit septuaginta millia virorum. Atque hæc de peccatis David, quæ in Sacris literis manifestantur. Nunc pœnitentiam cognoscamus.

Primum

Primùm igitur Humilitas & Mansuetudo cognosci potuit ex eo, quòd cùm Nathan Propheta Dauidem reprehendisset nomine Dei, ac dixisset: *Hac dicit Dominus* 1. Reg. 12. *Deus Israel: Quare contempsisti verbum Domini, ut faceres malũ in conspectu meo? Vriam Hethæum percussisti gladio, & uxorem illius accepisti in uxorem tibi, & interfecisti eum gladio filiorum Ammon. Quamobrem non recedet gladius de domo tua vsque in sempiternum; & tollam uxores tuas in oculis tuis, & dabo proximo tuo, & dormiet cum vxoribus tuis in oculis solis huius. Tu enim fecisti absconditè; ego autem faciam verbum istud in conspectu omnis Israel, & in conspectu solis. Ad hæc Dauid neque negauit, neque factum excusauit, neque cum indignatione repulit nuntium illum; sed ait: *Peccaui Domino*. Et quoniam Deus, qui scrutatur corda, vidit vocem illam ex vera & profunda contritione prodiisse, respondit ei per eundem Prophetam: *Dominus quoque transtulit peccatum tuum; non morieris.**

Sed Dauid non contentus hoc Prophetæ responso, instituit omnes partes veræ pœnitentiæ adimplere. Partes veræ pœnitentiæ, hæ præcipuæ esse videntur, Contritio cordis, Confessio oris, Satisfactio per opera pœnitentiæ, ac demum Patientia in aduersis,

Psal. 50.

sis, quando præfertim satis constat, immitti illa à Deo, vt per eorum tolerantia peccata admissa purgentur. In his omnibus exemplar eximium verè pœnitentium videtur fuisse Dauid. Nam de contritione cordis, de qua testatur idem Propheta dicens: *Sacrificium Deo spiritus contribulatus, cor contritum & humiliatum Deus non despicias*; testantur flumina lacrymarum, quæ ipse fudit: nam in Psalmo sexto dicit: *Laborani in genuitu meo, lauabo per singulas noctes lectum meum, lacrymis meis stratum meum rigabo.* & apertius in Psalmo centesimo decimo octauo: *Exitus aquarũ deduxerunt oculi mei, quia non custodierunt legem tuam.* Quamuis enim hunc locum ego exposuerim aliàs cum Theodoretò & Euthymio de fletu pro peccatis aliorum: tamen maiori ratione possum nunc exponere cum sanctis Patribus, Ambrosio, Hieronymo, & Augustino, de peccatis propriis ipsius Dauidis. & in specie de peccato cum vxore Vriæ, de quo nunc agimus. *Exitus*, inquit, *aquarum deduxerunt oculi mei, quia non custodierunt legem tuam* ipsi oculi mei, quando vxorem alienam concupierunt. Notant autem sancti Patres, per *exitus aquarum* non significari guttas aliquas lacrymarum, sed riuos ingentes, siue potius flumina, vel, vt loquitur sanctus Ambrosius,

brofius, *continuum quoddam & iuge profluvium lacrymarum*. Sic nimirum diluuntur peccata, sic placatur Deus; non vt multi faciunt, qui mortem filiorum aut coniugum flumine lacrymarum deflere norunt; mortem animæ propriæ, ne vna quidem lacrymula plangere possunt. Et tamen verum est quod Veritas dicit: *Quid prodest homini si Mat. 16. uniuersum mundum lucretur, animæ verò suæ detrimentum patiatur?*

Neque verò sanctus Dauid solis lacrymis dolorem suum expressit, sed etiam libera confessione: neque solum Prophetæ Nathan dixit, *Peccaui Domino*: sed palàm in oratione clamauit: *Miserere mei Deus, secundum magnam misericordiam tuam: & secundum multitudinem miserationum tuarum, dele iniquitatem meam. Amplius laua me ab iniquitate mea, & à peccato meo munda me. Quoniam iniquitatem meam ego cognosco, & peccatum meum contra me est semper;* & similia in multis Psalmis leguntur. Neque ignorabat Dauid, hunc Psalmum cum ceteris in toto orbe terrarum vsque ad mundi consummationem esse legendum, & titulum eius futurum, *Quando intrauit Dauid ad Bethsabæe*. Itaque peccati confessio in Dauidis pœnitentia non desideratur.

Porro de ieiunio & oratione, nulla dubi-

P tatio

tatio esse potest, quin crebra ista fuerint apud Dauidem post hoc peccatum patratum: nam si in Psalmo trigesimoquarto de se ipse dicit, *Induebar cilicio, & humiliabam in ieiunio animam meam*; certè id fecit, cùm pro hoc maximo peccato satisfacere Deo voluit. Sanctus Ambrosius id quod legitur 2. Reg. 12. in libro secundo Regum, Dauidem iacuisse in terra, ieiunasse, & fleuisse, quando filius ipsius ex adulterio natus ægrotabat ad mortem, non tam tribuit morti propinquæ filij, quàm peccato contra Deum patrato. sic enim loquitur in Sermone septimodecimo super Psalmum centesimum decimum-octauum: *Denique, inquit, filio in ægritudine constituto, neque cibum sumpsit, neque regium thronum, aut cubile conscendit: sed stratus in terra, ieiuna ora lacrymis diluebat; non tam filij mortem, quàm peccati pœnam in illo lauare desiderans.* hæc ille, qui rectissimè iudicauit, si potuisset Deum placare ob eius peccatum offensum, filium non fuisse moriturum: proinde non tam filij mortem redimere, quàm Deum placare Dauid illo suo ieiunio & humi cubatione quærebat.

Restat postrema pœnitentiæ pars, quæ in flagellis Dei æquo animo suscipiendis & patientissimè ferendis posita est: Deus enim filios suos peccantes seuerè in hac vita flagellat.

gellat, non quia odit, sed quia diligit; nam & ipsis filiis longè vtilius est hîc flagellis purgari, quàm in alio sæculo hereditate priuari. Sic enim loquitur Apostolus ad Hebræos: *Quem diligit Dominus, castigat; flagellat autem omnem filium, quem recipit. In disciplina perseuerate. Tamquàm filijs offert se Deus. Quis enim filius, quē non corripit pater? Quod si extra disciplinam estis, cuius participes facti sunt omnes, ergo adulteri* (id est adulterini) & *non filij estis*, id est, non filij legitimi estis, ad quos solos pertinet hereditas. Deus igitur, qui Dauidem in filiis legitimis numerabat, flagellis grauissimis attriuit, præter ea quæ ipse sibi sponte assumpserat, lacrymas, ieiunia, humi cubationes, & alia id genus. Ac primum, quod per Nathan Prophetam illi comminatus est, quod in ultionem homicidij Vriæ, gladius, id est mors violenta, non exiret de domo eius; ad literam impletum est. Obiit enim continuò filius ex adulterio 2. Reg. 12. natus: deinde Amnon filius eiusdem Dau- 2. Reg. 13. dis, ab Absalone fratre occisus fuit; postea Absalom conspirauit contra patrem, & eie- 2. Reg. 16. cit eum ex vrbe Regia; & vt maiori iniuria illum afficeret, publicè expanso tentorio, 2. Reg. 12. incestauit vxores patris sui, quod Nathan futurum illi prædixerat: paulò post in præ- 2. Reg. 18. lio occiditur Absalom cum incredibili do-

lore patris, qui non tam interitum carnis, quàm mortem æternam animæ considerabat, cum sciret illum periisse reum scelerum grauissimorum. His accessit exprobratio &

2. Reg. 16. maledictio Semei, qui Dauidem fugientem maledicebat, vt Scriptura loquitur, maledictione pessima, quasi vsurpatorem alieni

2. Reg. 15. Regni: Accessit denique fuga Dauidis ex vrbe sua Regia, & fuga adeò repentina, vt coactus sit Rex nudis pedibus, operto capite, & flens per montem oliuarú iter facere.

Hæc sunt flagella, dura quidem, sed paterna, quibus Deus Dauidem sanctum exercuit. Et quidẽ mortem tot filiorum patientissimè tulit, ita vt intra se lugeret quidem, & sensum doloris ostenderet, sed absque murmure, absque comminatione, absque signo vlllo impatientiæ aut vindictæ. De vxorum siue concubinarum publica turpitudine à filio accepta, nulla mentio facta est, nisi quòd eas à sua consuetudine, vt æquum erat, remouit, & in locum vnum conclusis, alimenta subministrari iussit quoad viuerent. Exprobrationem & maledictionem pessimi Semei tulit summa animi æquitate, dum ipse viueret: sed quia res fuerat pessimi exempli, Salomonem, qui post eum regnaturus erat, admonuit, vt pro sua sapientia delictum illud non relinqueret impu-

3. Reg. 2.

impunitum. Quod ergo dixerat David, quando à Semei maledicebatur, *Dominus præcepit ei, vt malediceret David*; non sic accipiendum est, quasi maledictio Semei fuisset laudabilis, utpote à Deo imperata; sed quòd maledictio illa, quamuis falsa & iniqua, à Deo permissa fuisset ad patientiam & humilitatem serui sui Davidis exercendam. Ac ne quis fortè miretur, quomodo potuerit maledictio illa Semei esse à Deo mandata, & tamen iniqua, legat sanctum Augustinum in libro de Gratia & libero arbitrio, hunc nodum apertissimè dissoluentem.

2. Reg. 16.

S. August.
l. de Gratia & libero arbitrio.
cap. 20.

Habemus igitur Dauidem sanctum, magnis virtutibus præditum, & à peccatis duobus, in quæ, diuina permissione, ob carnis fragilitatem lapsus fuerat, per veram pœnitentiam, diuina gratia sic liberatû, vt Deus ipse testimonio suo sæpè ac sæpius repetito, in Sanctorum numerum singulari priuilegio retulisse videatur. Sic enim loquitur Deus in libro Regum tertio de Salomone, cùm idem esset senex : *Deprauatum est cor eius per mulieres, vt sequeretur deos alienos: nec erat cor eius perfectum cum Domino Deo suo, sicut cor Dauid patris eius.* item in eodem libro ad Ieroboam, *Non fuisti, inquit, sicut seruus meus David, qui custodiuit mandata mea, & secutus est me in toto corde suo.* item

3. Reg. 11.

3. Reg. 14.

1. Reg. 13. in libro eodem, de Abia Rege, *Nec erat, inquit, cor eius perfectum cum Domino Deo suo, sicut cor David patris eius.* item in libro
4. Reg. 14. quarto Regum, de Amasia Rege, *Fecit, inquit, rectum coram Domino, verumtamen non ut David pater eius: adhuc enim populus immolabat, & adolebat incensum in excelsis.*
4. Reg. 16. item in eodem libro, de Achaz Rege, *Non fecit, inquit, quod erat placitum in conspectu Domini Dei sui, sicut David pater eius.* item
4. Reg. 18. in eodem libro, de Ezechia, *Fecit, inquit, quod erat bonum coram Domino, iuxta omnia quæ fecerat David pater eius.* item in eodem
4. Reg. 22. libro, de Iosia, *Fecit, inquit, quod placitum erat coram Domino, & ambulavit per omnes vias David patris sui; non declinavit ad dexteram, siue ad sinistram.* Itaque videmus, Davidem sic laudari à Spiritu sancto in Scripturis sanctis, ac si fuisset idea optimi Regis, ut illi essent boni, qui essent illi similes: illi mali, qui essent ei dissimiles. Regnavit
3. Reg. 2. David annis quadraginta, vixit annis septuaginta.

VITA ET VIRTUTES

S. EZECHIAE REGIS.

EX Regibus Hebræorum tres tantum inuenio à Iesu Sirach in libro sacro, qui Ecclesiasticus appellatur, absolute laudari, & quasi in Sanctorum numerum referri, Dauidem, Ezechiam, & Iosiam. Et Eccli. 49. sine dubio isti fuerunt omnium optimi, ita ut sancti Reges optimo iure dici possint. Quare operæpretium existimaui, Ezechia & Iosia res gestas & virtutes breuiter explicare. Ezechias Rex filius fuit Regis Achaz, & pater Manassæ, id est, filius optimus patris pessimi, & pater optimus filij pessimi. 4. Reg. 18.
4. Reg. 21.

Fuisse autem Ezechiam virum optimum, testatur primum Spiritus sanctus per Ecclesiasticum ita loquentem : *Præter Dauid, & Ezechiam, & Iosiam, omnes peccatum commiserunt: nam reliquerunt legem Altissimi Reges Iuda, & contempserunt timorem Dei.* Non significant autem ista verba, nullum omnino peccatum commisisse hos tres Reges, sed non commisisse peccatum in materia Religionis & fidei: reliqui enim omnes aut idoliseruierunt, aut idololatriam populo per-

P 4

mise-

miserunt. Isti tres in veri Dei cultu & idolatriæ execratione diligentissimi & ardentissimi fuerunt : prætereà, tres isti, si qua in re deliquerunt ex humana fragilitate, poenitentiam sine dubio seriam egerunt, & à Deo veniam obtinuerunt. De Regibus ceteris ista non certò constant.

Secundum testimonium præbet Ezechiaë Spiritus sanctus in libro quarto Regum capite 18. his verbis: *Fecit Ezechias bonum coram Domino, iuxta omnia quæ fecerat David pater eius. In Domino Deo Israel speravit, adhaesit Domino, & non recessit à vestigijs eius, fecitq; mandata eius, quæ praeceperat Dominus Moysi. Vnde & erat Dominus cum eo.* Præclara sanè laudatio in eo libro scripta, in quo falsitas inueniri non potest.

4. Reg. 20.
Isa. 38.

Tertium testimonium sanctitatis Ezechiaë, idem Spiritus sanctus reddidit per ipsummet Ezechiam, qui cum audiuisset ab Isaia Propheta, se ex morbo, in quem inciderat, moriturum; orauit ad Dominum, dicens: *Obsecro Domine, memento quæso quomodo ambulauerim coram te in veritate, & in corde perfecto, & quod placitum est coram te, fecerim. Fleuit itaque Ezechias fletu magno.* Hanc laudationem fuisse veram, testatur Isaia Propheta, qui scribit, eam orationem ut veram & Deo gratam, continuò fuisse exau-

exauditam à Domino. Sic enim loquitur
 Isaias : *Et antequàm egrederetur Isaias mediam* Ibid.
partem atrij, factus est sermo Domini ad eum,
dicens: Reuertere, & dic Ezechia Duci populi
mei: Hæc dicit Dominus Deus David patris
tui: Audiui orationem tuam, & vidi lacrymas
tuas, & ecce sanauit te: die tertio ascendes tem-
plum Domini, & addam diebus tuis quindecim
annos. Et quia cupiebat Ezechias aliquod
 signum huius tam lætæ promissionis , addi-
 dit Isaias: *Hoc tibi erit signum à Domino, quia*
faciet Dominus verbum hoc quod locutus est:
Ecce ego reuerti faciam umbram linearum,
per quas descenderat in horologio Achaz in So-
le, retrorsum decem lineis. Et reuersus est Sol
decem lineis per gradus, quos descenderat. Mi-
 rabile prorsus signum , non absimile illi
 quod fecit Iosue, cum Solem stare fecit. Ita-
 que, vt crederet Ezechias se vere sanandum
 à morbo illo letifero , & superuicturū mul-
 tos annos ; fecit Deus vt crescerent horæ il-
 lius diei, & pro duodecim horis diurnis fie-
 rent viginti duæ. Hæc sunt argumenta ma-
 nifestissima, quòd Ezechias non superbè &
 falsò dixerit , se ambulasse coram Deo in
 veritate & in corde perfectò ; sed humiliter
 & veraciter , non iactans propriam virtu-
 tem, sed Dei dona commemorans.

Quartum testimonium sanctitatis eius-
 dem,

dem, dare possunt opera eius : siquidem incredibilem zelo purgavit Ierusalem ab omni illa fœditate idololatriæ, quàm in eam inuexerant Reges qui eum præcesserant, & præsertim parens eius Achaz, vt habetur in 4. Reg. 16. libris Regum. Neque solùm purgavit ciuitatem ab omni cultu falsorum deorum; sed incredibilem labore & sumptu restituit altare Domini, & sacrificia secundùm legem Domini, & omnes sacros ritus & cærimonias; ac denique renouauit totam faciem veræ Religionis, non parcens labori nec sumptibus: quæ omnia legi possunt in libro posteriore Paralipomenon. Neque contentus fuit propria Religione & pietate sua, sed excitauit primùm Sacerdotes & Leuitas ad seruiendum Domino cum omni alacritate & puritate: deinde scripsit etiam epistolas ad omnes filios Israel dispersos in variis ciuitatibus, cohortans omnes ad resipiscen-
 2. Paral. 29
 & 30. tiam, & ad seruiendum soli Deo viuo & vero; & cohortationibus suis profecit plurimum. Itaque non tantùm Regis p̄munus impleuit, sed etiam Sacerdotis & concionatoris, prout ea tempora postulabant.

Neque minùs fuit Ezechias fortis in rebus aduersis, quàm diligens & accuratus in prosperis. Erat verò fortitudinis huius causa, quòd multùm omnino sperabat in Domino,

no, non hæsitabat in fide, non diffidebat de auxilio Domini; sed cum parente suo Dauid dicere poterat: *Dominus protector vite meæ, à quo trepidabo? si consistent aduersum me castra, non timebit cor meum.* Cum enim Sennacherib Rex Assyriorum cum ingentibus copiis varias prouincias deuastasset, & iam Ierosolymæ immineret, præ multis victoriis tumidus, misit nuntios & literas ad Ezechiam, in quibus dicebat: *Non te seducat Deus tuus, in quo habes fiduciam. Numquid liberauerunt dii gentium singulos, quos vastauerunt patres mei? Ezechias ascendit in domum Domini, & expandit literas coram Domino, & orauit in conspectu eius, dicens: Domine Deus Israel, qui sedes super Cherubim, tu es Deus solus Regum omnium terræ, tu fecisti celum & terram. Inclina aurem tuam, & audi; aperi Domine oculos tuos, & vide; audi omnia verba Sennacherib, qui misit ut exprobraret nobis Deum uiuentem. Verè Domine dissipauerunt Reges Assyriorum gentes, & terras omnium, & miserunt deos eorum in ignem: non enim erant dii, sed opera manuum hominum ex ligno & lapide, & perdidērunt eos. Nunc igitur Domine Deus noster saluos nos fac de manu eius, ut sciant omnia Regna terræ, quia tu es Dominus Deus solus.* Hanc orationem plenam fide & fiducia, Dominus audi-

Psal. 16.

4. Reg. 19.

audiuit ; & misit Ifaiam ad Ezechiam , qui illi diceret : *Hæc dicit Dominus Deus. Israel: Quæ deprecatus es me super Sennacherib Regem Assyriorum, audiui.* Nec distulit Dominus , sed illa ipsa nocte misit Angelum suum , qui percussit in castris Assyriorum centum octoginta quinque millia ; & ipse Rex visa strage tanti exercitus , recessit inglorius : & cum rediisset in Regnum suum , & adoraret idolum suum , à filiis propriis cæsus , miserè vitam finiuit. Ex his apparuit , Deum Ezechia esse verè Deum solum , & ipsum Ezechiam verum seruum & amicum Dei.

Neque verò Ezechias omisit etiam partes suas in præparatione belli , quamvis fiducia eius potissimum esset in Deo : nam ut scribitur in libro posteriore Paralipomenon , antequam Sennacherib perueniret ad
 2. Paral. 32 portas Ierusalem , Ezechias *inito cum Principibus consilio , virisq; fortissimis , ut obturarent capita fontium , qui erant extra urbem , & hoc omnium decernente sententia , congregauit plurimam multitudinem , & obturauerunt cunctos fontes , & riuum qui fluebat in medio terræ , dicentes : Ne veniant Reges Assyriorum , & inueniant aquarum abundantiam. Aedificauit quoque , agens industriè , omnem murum qui fuerat dissipatus , & extruxit turres desuper , & forinsecus alterum murum : instaura-*
uit-

uitq; Mello in ciuitate Dauid, & fecit vniuersi generis armaturam, & clypeos: constituitq; Principes bellatorum in exercitu: & conuocauit vniuersos in platea portæ ciuitatis, ac locutus est ad eos eorum, dicens: Viriliter agite, & confortamini: nolite timere, nec paueatis Regem Assyriorum, & vniuersam multitudinem quæ est cum eo: multò enim plures nobiscū sunt, quàm cum illo. cum illo enim est brachium carneum, nobiscum Dominus Deus noster, qui auxiliator est noster, pugnatq; pro nobis. hæc ille. qui cum ait: Multò plures nobiscum sunt, quàm cum illo; significat, Deum esse Dominum Sabaoth, id est exercituum; ac per hoc semper habere secum multa millia Angelorum: significat etiam, tam ipsum Deum quàm eius ministros plus posse etiam solos, quàm innumerabiles homines armatos: quod vel ex eo potest intelligi, quod vnus Angelus statim occidit centum octoginta quinque millia Assyriorum. Habemus igitur, Regem Ezechiam virum fuisse omni ex parte perfectum, prudentem, eloquentem, pium, religiosum, fortem, amantem populi, & super omnia cultorem Dei. Vixit annos quinquagintaquatuor: regnavit annis vi- 4. Reg. 18.
gintinouem.

VITA

VITA ET VIRTUTES SANCTI IOSIÆ REGIS.

SANCTVS Iosias Rex simillimus fuit Regi Ezechia; nam & ipse patrem habuit valdè malum, & filium reliquit etiam malum. Fuisse verò Iosiam Regem optimum & sanctissimum, iisdem testimoniis docere possumus, quibus probauimus Ezechiam sanctitate floruisse.

Primùm igitur, sanctitatem Iosia Regis prædicat Spiritus sanctus in libro quarto 4.Reg. 22. Regum, vbi sic legimus: : *Fecit Iosias quod placitum erat coram Domino: & ambulauit per omnes vias Dauid patris sui: non declinauit ad dexteram, siue ad sinistram.* Magna laus, similem fuisse Dauidi viro laudatissimo. Deinde testatur sanctitatem eiusdem Iosia Ecclesiasticus, non solum quia iungit Iosiam cum Ezechia & Dauide; sed etiam quia speciali præconio illum ornauit, dicens: *Memoria Iosia in compositionem odoris facta opus pigmentarij. In omni ore quasi mel indulcabitur eius memoria, & vt musica in conuiuio vini.* Quibus verbis declaratur bonus odor, id est, optima fama, quam post se reli-

reliquit Iosias: & quàm dulce fuerit posteris vel cantare, vel audire res eius præclare gestas. Præterea, testis fide dignissimus pietatis Iosia fuit Ieremias Propheta, qui Lamentationes scripsit de morte Iosia. Sic enim legitur in libro posteriore Paralipomenon: *Vniuersa Iuda & Ierusalem luxerunt* ^{2. Paral. 35} Iosiam; *Ieremias maximè, cuius omnes cantores atque cantatrices usque in præsentem diem lamentationes super Iosiam replicant, & quasi lex obtinuit in Israel.*

Denique bona opera Iosia testimonium perhibent amplissimum de fide & vera pietate ipsius: nam vt legitur in libro quarto ^{4. Reg. 23.} Regum, & in libro posteriore Paralipomenon, ^{2. Paral. 34} Iosias imitatus Ezechiam, purgauit ciuitatem & Regnum ab omni idololatria, euertit altaria, combussit & abstulit omnia idola, & vasa atque instrumenta pro cultu idolorum excogitata, abstulit pythones & ariolos, & reduxit omnia quæ ad veram Religionem pertinebant incredibili labore & studio, sic vt Scriptura testetur, similem illi non fuisse ante eum Regem, ^{4. Reg. 23.} *qui reuertetur ad Dominum in omni corde suo, & in tota anima sua, & in vniuersa virtute sua, iuxta omnem legem Moysi:* neque post eum surrexisse similem illi. Denique, quia peccata priorum Regum furorem Domini ita pro-
uoca-

- uocauerant, vt statuerit omnino tradere omnem terram illam in potestatem Regum Babylonix, & gentem illam Iudaicam mittere in captiuitatem, iussit dici seruo suo Iosia verba hæc: *Colligam te ad patres tuos, & colligêris ad sepulchrum tuum in pace, vt non videant oculi tui omnia mala que inducturus sum super locum istum.* Itaque anno trigessimoprmo Regni sui, ætatis verò trigessimonono, occisus in bello de hac vita migravit.

VITA ET VIRTUTES S. IOSAPHAT REGIS.

POST tres Reges, Dauidem, Ezechiam, & Iosiam, qui soli ex Regibus Hebræorum absolutè laudantur vt viri sancti ab Ecclesiastico in capite quadragesimonono, sex sunt alij qui laudantur in libris Regum & Paralipomenon, quòd fecerint rectum in conspectu Domini, Asa, Iosaphat, Ioas, Amazias, Azarias, & Ioatham. Sed iidem etiam reprehenduntur, quòd excelsa non abstulerint; in quibus sacrificabant idolis filij Israel: & præterea solus Iosaphat absolutè laudatur, vt verè pius, & amicus Dei; in reliquis multa alia reprehendun-

duntur. Quare solius Iosaphat, quinque aliis prætermisiss, vitam & virtutes, vt verè sancti Regis, adiciam. Iosaphat igitur, vt scribitur in libro tertio Regum extremo, triginta quinque annorum erat cùm regnare cœpisset, & viginti quinque annis regnavit in Ierusalem. Virtutes eius præcipuæ narrantur in secundo libro Paralipomenon capite septimodecimo, & sequentibus tribus. 2. Paral. 17

Prima virtus eius fuit, Fides in Deum, & odium in idola: nam, vt Scriptura loquitur, *ambulavit in viis David patris sui primis, & non speravit in Baalim, sed in Deo patris sui, & perrexit in præceptis illius, & non iuxta peccata Israel*. Deinde altera virtus eius in eo singulariter emicuit, quòd curavit vt multi viri docti mitterentur in omnes partes Regni, qui erudirent populos circa legem & præcepta Dei, qui circuibant cunctas vrbes Iuda. Quæ res ad eò placuit Deo, vt inde secutus sit pavor super omnia Regna terrarum, nec audebant bellare contra Iosaphat: quin etiam Philisthæi mittebant illi munera & vectigal argenti: Arabes quoque adducebant pecora arietum & hircorum. Sed quod multo gratius fuit Deo, illud est, quòd abiit idem Rex in Bersabee, & vsque ad montem Ephraim, & reuocavit eos ad Dominum Deum patrum ipsorum. Itaque 2. Paral. 19

Q

con-

concionatoris officio functus est, cum tanta efficacia & fructu, vt integros populos ab infidelitate ad cultum veri Dei conuerterit.

Tertia virtus, & quidem maximè propria Regum, est iustitia, quam administrari iubebat cum summa integritate, & cum timore Dei, apud quem non est iniquitas, & qui omnia cernit. Illud quoque dignissimum memoria est, quòd nolebat Iudices Regni miscere se in iis quæ ad Sacerdotes pertinent. *Amarias*, inquit, *Sacerdos & Pontifex vester*, *in his quæ ad Deum pertinent, præsidebit: porrò Zabadias filius Ismahel, qui est Dux in domo Iuda, super ea opera erit, quæ ad Regis officium pertinent.*

Quarta virtus est, fiducia maxima in Deum, præsertim tempore belli. Nam cùm conuenissent Moabitæ & Ammonitæ cum maximo exercitu, adiunctis sibi etiam Syris, & res Iosaphat in maximo periculo essent, Iosaphat continuo totum se contulit ad rogandum Deum, & prædicauit ieiunium vniuerso populo suo, & orans Deum, dicebat: *In nobis quidem non est tanta fortitudo, vt possimus huic multitudini resistere quæ irruit super nos: sed cùm ignoremus quid agere debeamus, hoc solùm habemus residui, vt oculos nostros dirigamus ad te.* Et ecce post
ora-

orationem Regis Iosaphat, continuò surrexit Propheta, nomine Iahaziel, & factò super eum spiritu Domini, ait: *Hec dicit Dominus vobis: Nolite timere, nec paueatis hanc multitudinem: non est enim vestra pugna, sed Dei. Cras descendetis contra eos, &c. non eritis vos qui dimicabitis, sed tantummodò confidenter state, & videbitis auxilium Domini super vos, ô Iuda, & Ierusalem: nolite timere, nec paueatis: cras egrediemini contra eos, & Dominus erit vobiscum.* Tunc Iosaphat auditis verbis Prophetæ, locutus est ad populum, dicens: *Audite me viri Iuda, & omnes habitatores Ierusalem, credite in Domino Deo vestro, & securi eritis: credite Prophetis eius, & cuncta euenient prospera. Deditque consilium populo, & statuit cantores Domini, ut laudarent eum in turmis suis, & antecederent exercitum, ac voce consona dicerent: Confitemini Domino, quoniam in eternum misericordia eius. Cumq; cœpissent laudes canere, vertit Dominus insidias eorum in semetipsos, filiorum scilicet Ammon, & Moab, & montis Seir, qui egressi fuerant ut pugnarent contra Iudam, & percussi sunt. Namque filij Ammon & Moab consurrexerunt aduersum habitatores montis Seir, ut interficerent & delerent eos: cumque hoc opere perpetrassent, etiam in semetipsos versi, mutuis concidere vulneribus. Porro*

Q 2- Iuda

Iuda cū venisset ad speculam, quæ respicit solitudinem, vidit procul omnem latè regionem plenam cadaueribus; nec superesse quemquam, qui necem potuisset euadere. Venit ergo Iosaphat, & omnis populus cum eo, ad detrahenda spolia.

Hinc apparet, quàm facile sit Deo fideles suos protegere & locupletare. Atque hæc est causa, cur Deo valdè displiceat, cū ij qui experti sunt beneficia Dei, fiduciam suam, vel partem fiduciæ collocant in hominibus, ac præsertim inimicis ipsius Dei: præsertim si propterea amicitiam cum illis contrahant, vel fœdus percutiant, id quod ipsi Regi Iosaphat Propheta Iehu dixit nomine Dei: *Impio, inquit, præbes auxilium, & his qui oderunt Dominum amicitia iunges, & idcirco iram quidem Domini merebaris: sed bona opera inuenta sunt in te, eò quòd abstuleris lucos de terra Iuda, & preparaueris cor tuum, ut requireres Dominum Deum patrum tuorum.* Et alibi alius Propheta dixit eidem

2. Paral. 20 Iosaphat: *Quia habuisti fœdus cū Ochozia Rege impio, percussit Dominus opera tua, contritæq; sunt naues, nec potuerunt ire in Tharsis.*

Sed grauior fuit reprehensio diuina contra Regem Afa, patrem Regis Iosaphat. Sic eni in locutus est Propheta Hanani ad Afa:

2. Paral. 16. *Quia habuisti fiduciam in Rege Syria, & non in*

in Domino Deo tuo ; idcirco euasit Syria Regis exercitus de manu tua . Nōne Aethiopes & Libyes multò plures erant quadrigis , & equitibus , & multitudine nimia : quos , cū Domino credidisses , tradidit in manu tua ? oculi enim Domini contemplantur vniuersam terram , & præbent fortitudinem his qui corde perfecto credunt in eum . Stultè igitur egisti : & propter hoc ex præsentī tempore aduersum te bella consurgent . hæc Propheta ad Regem Asa ; alioqui satis bonum : sed quia reprehensionem non æquo animo accepit , sed indignatus valdè Prophetam in carcerem trussit , & interfecit de populo in tempore illo plurimos , non tardauit flagellum Domini : nam ægrotauit dolore pedum vehementissimo ; & nec in infirmitate sua quaesuit Dominum , sed magis in Medicorum arte confusus est .

Hoc sanè exemplo admoneri possunt Principes Christiani , vt non faciles sint ad amicitiam & fœdera cum paganis vel hæreticis , etiamsi ad tempus vtilia videantur . Hinc enim & Iudas Machabæus , & fratres eius Ionathas & Simon , viri fortissimi , dum in solo Deo fiduciam posuerunt , victorias pænè incredibiles de hostibus omnibus reportauerunt : sed vbi cum Romanis amicitiam contraxerunt , & in auxilio illorum

Q 3

spem

Vide Mat-
thæum Pa-
ris in Hen-
rico tertio.

spem ponere cœperunt; breui omnes tres necati sunt. Et Christianis temporibus Fridericus Secundus Imperator, cùm auxilia Saracenorum, Christi hostium, magnificare, & in illis confidere cœpit; breui, Deo illum puniente, & Imperium & Regnum Neapolitanum, & filios, & vitam ipsam amisit. Sed noster Iosaphat, quamuis in hac re lapsus sit vt homo, tamen multis bonis operibus plenus, & multis virtutibus ornatus, id à Domino obtinuit, vt solum iactura temporali, eaque non magna, puniretur.

VITA ET VIRTUTES IUDÆ MACHABÆI.

POST Reges Hebræorum, non alios inuenimus in Testamēto veteri Principes pietatis nomine insignes, quàm Zorobabelem cum Nehemia, & Iudam Machabæum cum fratribus Ionatha & Simone. Sed de Zorobabele, quem mirificè laudat Ecclesiasticus cum Nehemia, nihil habemus præter nomen in libris duobus Esdræ, & in Prophetis Aggæo & Zacharia: de Nehemia nihil ferè habemus nisi ingens desiderium reædificandæ Ierosolymæ in toto

Eccli. 49.

toto libro secundo Esdræ. His igitur prætermis-
 sis, ad Iudam Machabæum venia-
 mus, quem non solum Scriptura in duobus
 libris Machabæorū, sed etiam sancti Patres,
 Ambrosius in libris de Officiis, Augustinus Lib. 1. c. 41.
 in libris de Ciuitate Dei, & Ioannes Chry- Lib. 18.
 sostomus in Explicatione Psalmorum, mi- c. 45.
 rificè laudant. Iudas igitur Machabæus In Psal. 43
 Princeps Iudæorum incidit in ea miserrima
 tempora, in quibus Antiochus Epiphanes
 Rex Syriæ non solum bonis temporalibus
 Iudæos spoliabat, sed etiam diuinam Reli-
 gionem illis à maioribus traditam extin-
 guere, & ad idolorum cultum eos omnes
 traducere conabatur. Cuius rei testimo-
 niū reddere possunt egregia martyria Elea-
 zari, & septem puerorum cum matre ipso-
 rum, quæ habentur in posteriore libro Ma-
 chabæorum; de quorum laude sanctus Gre-
 gorius Nazianzenus Orationem pulcherri-
 mam habuit ad populum.

Porro Iudas Machabæus, de cuius rebus
 gestis præcipuè scribitur in duobus libris,
 qui dicuntur Libri Machabæorum, quia de
 hoc eminentissimo viro potissimū tractant;
 filius fuit Mathathiæ Sacerdotis optimi, qui
 primus zelo Dei ardere cœpit, cum vidisset
 in ciuitate sua compelli Iudæos ad veram
 Religionem deferendam. Fuit autem Iudas 1. Mach. 2.

Machabæus post patrem Sacerdos & Princeps populi sui, pius ac religiosus valdè in Deum, sicut etiam misericors & benignus in fratres, præcipuè pauperes. De pietate in

1. Mach. 15 Deum testantur illa verba Scripturæ: *Erat enim pro uxoribus & filiis, itemq; pro fratribus & cognatis, minor sollicitudo: maximus verò & primus pro sanctitate timor erat templi.* Et cum essent pugnaturo aduersus hostes, magis in oratione ad Deum, quàm in viribus suis & armis confidebant. sic enim legi-

1. Mach. 3. *mus: Et ieiunauerunt illa die, & induerunt se ciliciis, & cinerem imposuerunt capiti suo. & infra: Sancta tua conculcata sunt, & contaminata sunt, & Sacerdotes tui facti sunt in luctum, & in humilitatem. Et ecce nationes conuenerunt aduersum nos ut nos disperdant: quomodo poterimus subsistere ante faciem eorum,*

2. Mach. 15 *nisi tu Deus adiuues nos?* & alio loco: *Considerans Machabæus aduentum multitudinis, & apparatus varium armorum, & ferocitatem bestiarum; extendens manus in celum, prodigia facientem Dominum inuocauit, qui non secundum armorum potentiam, sed prout ipsi placet, dat dignis victoriam. Dixit autem inuocans hoc modo: Tu Domine, qui misisti Angelum tuum sub Ezechia Rege Iudæ, & interfecisti de castris Sennacherib centum octoginta quinque millia: & nunc dominator calorum mitte Angelum*

gelum tuum bonum ante nos, in timore & tremore magnitudinis brachij tui, ut metuant qui cum blasphemia veniunt aduersus sanctum populum tuum. & hic quidem ita perorauit. Nicanor autem, & qui cum ipso erant, cum tubis & canticis admouebant. Iudas verò, & qui cum eo erant, inuocato Deo per orationes, congressi sunt: manu quidem pugnantes, sed Dominum cordibus orantes, prostrauerunt non minus triginta quinque millia, presentia Dei magnifice delectati. Et rursus in alio bello dixit Iudas viris qui secum erant: *Ne timueritis multitudinem eorum, & impetum eorum ne formidetur. Mementote qualiter salui facti sunt patres nostri in mari Rubro, cum sequeretur eos Pharaon cum exercitu multo: & nunc clamemus in calum, & miserebitur nostri Dominus, & memor erit testamenti patrum nostrorum, & conteret exercitum istum ante faciem nostram hodie, & scient omnes gentes, quia est qui redimat & liberet Israel.* & infra: *Et congressi sunt, & contrita sunt gentes.* Et Ibid. anno sequenti iterum venit Lysias, & adduxit sexaginta millia peditum, & quinque millia equitum; & eos quoque Iudas Machabæus cum parua manu, oratione ad Deum magis quàm armis, debellauit. Nec minus opere quàm verbis Machabæus pietatem suam in Deum demonstrauit: nam

Q

victo-

Ibid.

Victoria potitus, non cogitavit de domo sua priuata restituenda, sed dixit: *Ecce contriti sunt inimici nostri; ascendamus nunc mundare sancta, & renouare.* Et quod dixit, fecit; summa enim diligentia & celeritate purgavit templum ab omni contaminatione qua polluerant illud idololatræ, & restituit omnia, quæ secundum legem Domini ad cultum Dei viui & veri necessaria erant. Atque hæc pauca de pietate erga Deum.

2. Mach. 8.

Pietas siue charitas fraterna erga proximos ex eo cognosci potest, quod cum spolia de hostibus Iudas Machabæus reportabat, non ea cum solis militibus diuidebat, sed memor erat pauperum, senum, ægrotorum, viduarum, & aliarum miserabilium personarum. sic enim legimus: *Debilibus, & orphanis, & viduis diuiserunt spolia; & residua ipsi cum suis habuerunt.* & infra: *Et plures prædas diuiserunt, equam portionem debilibus, pupillis, & viduis, sed & senioribus facientes.* Nec solum pii & misericordes erant Machabæi in pauperes viuentes, sed etiam in animas defunctorum, præsertim eorum qui in bello ceciderant. sic enim loquitur

2. Mach. 12

Scriptura: *At verò fortissimus Iudas hortabatur populum conseruare se sine peccato, sub oculis videntes quæ facta sunt pro peccatis eorum qui prostrati sunt. Et facta collatione*
duo-

duodecim millia drachmas argenti misit Ierosolymam offerri pro peccatis mortuorum sacrificium. De qua re sic loquitur sanctus Augustinus in libro de Cura pro mortuis: In Machabæorum libris legimus oblatum pro mortuis sacrificium: sed & si nusquam in Scripturis veteribus omnino legeretur, non parua est vniuersæ Ecclesiæ, quæ in hac consuetudine claret, auctoritas: ubi in precibus Sacerdotis, quæ Domino Deo ad eius altare funduntur, locū suum habet etiam commendatio mortuorum. Itaque Iudas Machabæus non solum viuentibus, sed etiam mortuis misericordiæ operibus indigentibus plenissimè satisfecit.

Quòd autem gratissima fuerint Deo prælia Iudæ Machabæi, Scriptura duobus in locis manifestè declarat. Vnus locus est in secundo libro Machabæorum, ubi hæc verba leguntur: *Sed cùm vehemens pugna esset, apparuerunt aduersarijs de celo viri quinque in equis, frenis aureis decori, ducatum Iudæis præstantes: ex quibus duo Machabæum medium habentes, armis suis circumseptum incolumem conseruabant: in aduersarios autem tela & fulmina iaciebant. Ex quo & cecitate confusi, & repleti perturbatione cadebant.* Alter locus est in eodem libro, paulò infrà, ubi eiusmodi visio describitur: *Erat autem huiusmodi visus: Oniam, qui fuerat summus Sacerdos, vi-*

Cap. I.

2. Mach. 10

2. Mach. 15

rum

rum bonum & benignum, verecundum visu, modestum moribus, & eloquio decorum, & qui à puero in virtutibus exercitatus sit, manus protendentem orare pro omni populo Iudæorum. Post hoc apparuisse & alium virum, atate & gloria mirabilem, & magni decoris habitudine circa illum. Respondentem verò Oniam dixisse: Hic est fratrum amator, & populi Israel; hic est qui multum orat pro populo, & uniuersa sancta ciuitate, Ieremias Propheta Dei. Extendisse autem Ieremiam dextram, & dedisse Iudæ gladium aureum, dicentem: Accipe sanctum gladium munus à Deo, in quo deicies aduersarios populi mei Israel.

Istæ certè visiones admirabiles manifestè demonstrant, Iudam Machabæum gratissimum fuisse Deo, & non sua virtute, sed Dei omnipotentis peculiari auxilio victorias tam multas & tam præclaras de suis hostibus reportasse. Pugnavit enim cum parua manu militum, primò cum quatuor Ducibus Antiochi Epiphanis Regis Syriæ, & cum quatuor eorum magnis exercitibus; & de omnibus victoriam reportavit. Primus Dux Antiochi fuit Apollonius, de quo sic loquitur Scriptura diuina: *Et congregavit Apollonius gentes, & à Samaria virtutem multam & magnam ad bellandum contra Israel. Et cognovit Iudas, & exijt obuiam illi; & percussit, & occi-*

1. Mach. 3.

occidit illum: & ceciderunt vulnerati multi, & reliqui fugerunt: & accepit spolia eorum, & gladium Apollonij abstulit Iudas, & erat pugnans in eo omnibus diebus. Alter Dux Antiochi Seron fuit, de quo sic legimus in eodem loco: Et audiuit Seron Princeps exercitus Syria, quòd congregauit Iudas congregationem fidelium & Ecclesiam secum, & ait: Faciam mihi nomen, & glorificabor in Regno, & debellabo Iudam, & eos qui cum ipso sunt, qui spernebant verbum Regis. Et preparauit se, & ascenderunt cum eo castra impiorum, fortes auxiliarij, vt facerent vindictam in filios Israel. Et appropinquauerunt vsque ad Bethoron: & exiuit Iudas obuiam illi cum paucis. Vt autem viderunt exercitum venientem sibi obuiam, dixerunt Iude: Quomodo poterimus pauci pugnare contra multitudinem tantam & tam fortem, & nos fatigati sumus ieiunijs hodie. Et ait Iudas: Facile est concludi multos in manus paucorum: & non est differentia in conspectu Dei cali liberare in multis, & in paucis; quoniam non in multitudine exercitus victoria belli, sed de calo fortitudo est, &c. Vt cessauit autem loqui, insiluit in eos subito, & contritus est Seron, & exercitus eius in conspectu ipsius. Tertius Dux fuit Nicanor cum Ptolomeo & Gorgia, qui cum quadraginta millibus peditum, & septem millibus equitum, vene-

Ibid.

1. Mach. 4.
& 8.

- venerant ex mandato Regis Antiochi, vt delerent omnem gentem Iudæorum. Sed
1. Mach. 4. contra accidit; nam Iudas ait suis: *Ne timueritis multitudinem eorum, & impetum eorum ne formidetis. Et exierunt de castris in præliū, & tuba cecinerunt hi qui erant cum Iuda. Et congressi sunt, & contrita sunt gentes, & fugerunt in campum; nouissimi autem omnes ceciderunt in gladio. Et Iudas reuersus est ad spolia castrorum, & acceperunt aurum multum, & argentum, & hyalinthum, & purpuram marinam, & opes magnas; & conuersi hymnum canebant, & benedicebant Deum in calum, quoniam bonus est, quoniam in seculum misericordia eius.*
- Ibid. Quartus Dux fuit Lysias, qui anno sequente venit cum sexaginta millibus pedum electorū, & quinque millibus equitum. Et occurrit illis Iudas cum decem millibus militum, & commiserunt prælium, & ceciderunt de exercitu Lysie quinque millia virorum; & reliqui fugerunt, & Lysias inglorius abiit Antiochiam. Deinde pugnavit Iudas cum finitimis gentibus, ac
1. Mach. 5. præcipuè cum quatuor: primū cum Idumæis, quos percussit plaga magna. Deinde cum Ammonitis, quorum Dux erat Timotheus, & habebat manum fortem, & populum copiosum: & commisit Iudas cum eis prælia multa, & contriti sunt in conspectu
- Ibid. eius,

eius. Tertiò cum Galaaditis multa prælia ^{Ibid.}
 Iudas commisit, vbique victor euadens.
 Quartò cum Galilæis Simon frater Iudæ, ^{Ibid.}
 & ex ipsius Iudæ mandato multa quoque
 prælia felicissimè fecit.

Post hæc, Antiocho Epiphane defuncto, ^{1. Mach. 6.}
 Antiochus Eupator eius successor venit in ^{2. Mach. 13}
 Iudæam cum exercitu copiosissimo centum
 & decem millium peditum, & equitum
 quinque millium, & curruum falcatorum
 trecentorum. Vicit autem tam ingentem
 exercitum Iudas, primùm oratione & ieiunio
 triduo armatus, deinde gladio cum
 suis paucis aduersus multitudinem hostium
 fortiter pugnans: sic enim & plurimos occi-
 dit, & reliquos in fugam egit, & tandem ad
 pacem & amicitiam Regem compulit.

Denique, cum Demetrio Antiochi Eupa-
 toris successore postrema duo bella Iudas
 fecit. Sed tamen non ipse per se Rex ad bel-
 lum venit, sed misit Duces suos, Alcimū &
 Bacchidem, qui tamen nihil profecerunt.
 Deinde misit Nicanorem cum exercitu ^{1. Mach. 7.}
 magno: sed Iudas cum solis tribus millibus
 militum, exercitum illum contriuit; & pri-
 mus omnium periit Nicanor, qui superbè
 nimis & arroganter locutus fuerat, dicens:
*Nisi traditus fuerit Iudas, & exercitus eius in
 manus meas; continuò cum regressus fuero in
 pace,*

pace, succendam domum istam, templum videlicet Dei. Postremò addidit Demetrius, audita morte Nicanoris, mittere in Iudæam Bacchidem & Alcimum cum ingenti exercitu; in quo ultimo prælio, cum per totam diem pugnatum esset ab octingentis militibus Iudæ aduersus viginti millia peditum, & duo millia equitum, is fuit exitus prælij, vt Dux Regis Demetrii amiserit exercitum copiosum, & exercitus Domini amiserit Ducem fortissimum Iudam. Hinc Scriptura sancta encomiū illud de Iuda contexuit:

1. Mach. 3. Et dilatauit Iudas gloriam populo suo, & induit se lorica sicut gigas, & succinxit se arma bellica sua in præliis, & protegebat castra gladio suo. Similis factus est leoni in operibus suis, & sicut catulus leonis rugiens in venatione. Et persecutus est iniquos perscrutans eos: & qui conturbabant populum suum, eos succendit flammis: & repulsi sunt inimici eius præ timore eius, & omnes operarij iniquitatis conturbati sunt, & directæ est salus in manu eius. Et exacerbabat Reges multos, & lætificabat Iacob in operibus suis, & in seculum memoria eius in benedictione. Et perambulauit ciuitates Iuda, & perdidit impios ex eis, & auertit iram ab Israel. & nominatus est vsque ad nouissimum terræ.

Sed vnum est, in quo videtur Iudas aliquid

quid humani passus, Deo hoc permittente,
 ad instructionem Principum ceterorum:
 siquidem audita gloria Romanorum, misit 1. Mach. 8.
 ad eos Legatos, ac petiit amicitiam eorum,
 vt amicitia illa fretus, deinceps liber esset
 ab infestationibus Regum Græcorum. At-
 que exemplum Iudæ secuti sunt postea fra-
 tres eius Ionathas & Simon, qui post illum,
 Principatum Iudæorum obtinuerunt; vter-
 que enim amicitiam Romanorum honori-
 fica legatione missa petiit, & obtinuit. Sed vt
 ostenderet Dominus, non debuisse Iudam,
 qui tot & tam manifestis signis auxilium
 Dei præsentissimum semper agnouerat, ali-
 quid de spe illa sua in Deum concepta re-
 mittere, neque vllam eius partem in Roma-
 nos idololatrias deriuare, permisit vt primo
 quoque tempore post amicitiam cum Ro-
 manis contractam, in prælio Iudas ipse oc-
 cideretur: iam enim non aderant duo illi 1. Mach. 9.
2. Mach. 10
 cælestes milites, qui mediū tenentes Iudam
 ab omni ictu lanceæ vel gladij protegebant.
 & quod Iudæ contigit, idem & fratribus
 accidit: vterque enim post initam societa-
 tem cum Romanis interfectus fuit.

Neque hæc dico, quòd existimem Iudam
 Machabæum ob amicitiam cum Romanis
 initam, à gratia Dei Omnipotentis excidis-
 se: absit enim à me iudicium tam temera-

R rium.

258 *Vita Iudæ Machabæi.* LIBER II.

rium. Nam si Rex Iosaphat, qui cum Achabo Rege impio & idololatra affinitatem contraxerat, & fœdus in bello inierat, audiuit à nuntio Dei : *Impio præbes auxilium, & his qui oderunt Deum amicitia iungeris, & idcirco iram quidem Domini merebaris, sed bona opera inuenta sunt in te, eò quod abstuleris lucos de terra Iudæ, & præparaueris cor tuum ut requireres Dominum Deum patrum tuorum.* Quanto magis de Iudæ Machabæo credendum est, cum ob amicitiam cum Romanis initam non excidisse à gratia Dei; cum & Romani minùs impij fuerint quàm Achab; & Machabæus opera bona plurima, & fortasse gratiora Deo fecerit, quàm Iosaphat.



LIBER III.

Hic postremus liber continet Vitas sanctorum Principum Testamenti noui.

VITA ET VIRTUTES THEODOSII IMP.



PRIMVS Christianus Imperator, Constantinus Magnus & planè egregius fuit. Sed quoniam Vitam eius scripsit Eusebius Cæsariensis hæreticus

Arianus, & ab illo hauserunt, quidquid scriptis de rebus eius gestis mandarunt, Socrates, Sozomenus, & alij posteriores; ideo vitam illam prætermittendam mihi esse existimaui; præsertim cum historias Eusebij Gelasius Papa inter scripta apocrypha retulerit.

Gratian.
dist. 15.

Post Constantinum, celeberrimus & religiosissimus Theodosius fuit, quem sanctus Ambrosius non dubitat inter eos connumerare, qui statim ab obitu in cælum ascen-

R 2

dunt.

dunt. Sic enim loquitur in Oratione funebri de eius laudibus habita ad populū: *Conuertere, inquit, anima mea in requiem tuam, in quam festinauit ingredi Theodosius.* & paulò infra: *Absolutus igitur dubio certamine, fruitur nunc augustæ memoriæ Theodosius luce perpetua.* & infra: *Manet ergo in lumine Theodosius, & Sanctorum cætibz gloriatur.* Et quoniam potuisset illi obiici peccatū cædis Theffalonicensis, respondet in eodem loco idem sanctus Ambrosius, dicens: *Dilexi virum, qui magis arguentem quàm adulantem probaret. Strauit omne quo utebatur in signe regum, deflexit in Ecclesia publicè peccatum suum, quod ei aliorum fraude obrepserat. Gemitu & lacrymis orauit veniam. Quod priuati erubescunt, non erubuit Imperator publicè agere pœnitentiam. Neque ullus postea dies fuit, quo non illum doleret errorem.* Sancto Ambrosio sanctum adiungamus Augustinum. Hic in libro quinto de Ciuitate Dei miris laudibus effert fidem & pietatem Imperatoris Theodosij, quem dicit in bello magis orando quàm feriendo pugnasse: & hoc tam manifestum fuisse omnibus, vt etiã Claudianus Poëta Gentilis de eo cecinerit:

Cap. 16.

*O nimium dilecte Deo, tibi militat æther,
Et coniurati veniunt ad classica venti!
& enumeratis bonis operibus eius, concludit:*

dit: *Hæc ille secum, & si quæ similia, quæ enumerare longum esset, bona opera tulit, ex isto temporali vapore cuiuslibet culminis & sublimitatis humana, quorum operum merces est æterna felicitas, cuius dator est Deus, solis veraciter piis.*

Addam & tertium testem pietatis Theodosij sanctum Paulinum Nolę Episcopum. Hic in epistola nona ad Seuerum, loquens de laudatione sua in Theodosiũ, *Non tam, inquit, Imperatorem, quàm Christi seruum, non dominandi superbia, sed famulandi humilitate potentem, nec Regno, sed fide Principem predicavi.* Denique Ruffinus, qui eodem tempore vixit, in libro vndecimo Historiæ Ecclesiasticæ sic loquitur: *Igitur Theodo-* Cap. 35.
fius preparatur ad bellum, non tam armorum telorumq, quàm ieiuniorum orationumq, subsidiis: nec tam excubiarum vigiliis, quàm obsecrationum pernoctatione munitus. Circuibat cum Sacerdotibus & populo omnia orationum loca, ante Martyrum & Apostolorum thecas iacebat cilicio prostratus, & auxilia sibi fida Sanctorum intercessione poscebat. & paulò infra: Tunc Theodosius, ut cōuersas suas acies vidit, prostratus in conspectu Dei, Tu, inquit, omnipotens Deus nosti, quia in nomine Christi Filij tui ultionis iuste pralio ista suscepi: si secus, vindica in me: si verò cum causa probabili,

& in te confisus huc veni, porrige dexteram tuam, ne fortè dicant gentes, Vbi est Deus eorum? & paulò post: Etenim compertum est, quia post illam Imperatoris precem quam Deo fuderat, ventus ita vehemens exortus est, ut tela hostium in eos qui iecerant retorqueret: cumq; magna vi persistente vento, omne iaculum missum ab hostibus frustraretur. fracto aduersariorum animo, seu potius diuinitus repulso, Eugenius Tyrannus ante Theodosij pedes victus post terga manibus adducitur, ibiq; finis vitæ eius & certaminis fuit. Ex his quatuor testibus omni fide dignissimis facile potest intelligi, Theodosium nostrum non solum pium fuisse Principem, sed etiã cum Moyse & Iosue, cum Dauide & Ezechia posse conferri, ad quorum preces Deus cum eorum hostibus manifestè pugnabat.

Sed ut ordine res eius gestæ intelligantur, adferemus in medium ea omnia, quæ Theodoretus in Historia sua literis mandauit: quamuis enim res easdem Socrates & Sozomenus scripserint, tamen Theodoretus maiori fide dignus est; cum Socrates & Sozomenus labe hæreseos Nouatianæ infecti fuerint, & de Sozomeno scribat sanctus Gregorius in epistola ad Eulogium Episcopum Alexandrinum, Sozomenum in Historia sua multa mentiri: quod etiam de Socrate

Socrate dici potest, ut nos ostendimus in libro de Clericis, capite vigesimo. Sic igitur Theodoretus scribit: Per idem tempus Lib. 5. c. 5. Theodosius, vir cum ob maiorum splendorem, tum ob suam ipsius fortitudinem percelebris, & propterea in invidiam non ab illis modò qui pares erant dignitate, verum etiam à tribulibus suis vocatus, in Hispania ubi & natus erat & educatus, ætatem degit. Itaque Imperator incertus animi quid ageret, (quippe barbaros adeò insolentes effecerat victoria, ut difficiles admodum expugnatum essent, tum viderentur:) tandem sibi persuasit, si Theodosium Ducem belli gerendi constitueret, Imperium malis, in quibus versabatur, penitus liberatum iri. Quare confestim Theodosium euocat ex Hispania, Ducem creat, & cum exercitu, quem in vnum collegerat, mittit. Qui fide communitus, alacri animo & erecto iter suscipit: & ingressus in Thraciam, barbarosque ex aduerso venientes conspicatus, aciem veluti prælium facturus instruit: facta autem leui pugna, cum barbari Romanorum impetum sustinere non possent, aciem deserunt, atque terga dantes, fugæ se mandant; quos Romani quantum poterant persequuntur, magnaque barbarorum fit cædes: nam non à Romanis solum,

R 4 sed

Lib. 5. c. 6.

sed ab se mutuò interfecti ceciderunt. Quare cum quamplurimi essent ad hunc modum trucidari, & pauci qui latere potuerant Istrum traiecissent; Dux ille longè præstantissimus Theodosius, copiis suis in vrbes vicinas distributis; ad Imperatorem Gratianum celerrimè, quò suæ victoriæ ipse nuntius esset, proficiscitur. Atque cum Imperator, quæ narrabat, ne credibilia quidem putaret, & factum supra modum miraretur: illi, quos stimuli pungebant inuidiæ, aiunt, eum fugæ se dedisse, & exercitum amisisse. Theodosius igitur postulat ab illis qui contradicerent, vt nuntios mittant, perque eos multitudinem barbarorum interfectorum diligenter cognoscant: facile enim esse, ex spoliis numerum perdiscere. Cui orationi assensus Imperator, misit nuntios qui res gestas explorarent, eique postea referrent. Duci autem optimo Theodosio interim apud Gratianum commoranti, diuina quædam visio ab ipso omnium Rectore Deo obiecta est. Videbatur enim videre diuinum Meletium Ecclesiæ Antiochenæ Præsulem, chlamydem sibi Imperatoriam iniicere, & coronam illi honori conuenientem capiti imponere. Quæ cum noctu secundum quietem vidisset, prima luce cuidam ex familiaribus indicauit. Ille somnium

nium manifestum esse dixit. Ac perpauci dies iam intercesserāt, cū redeunt nuntij, qui ad res à Theodosio gestas cognoscendas profecti fuissent; retuleruntque permulta barbarorum millia trucidata esse. Itaque Imperator iam pro certo persuasum habēs, se non sine summo Imperij comodo eum delegisse, Imperatorem quoque designavit, & illis Imperij partibus, quas Valens rexe- rat, ei commissis, ipse in Italiam contendit, Theodosiumque in Imperij partes ei assi- gnatas dimisit. Qui vt primū Imperium obtinuit, Ecclesiis præ ceteris rebus dili- genter prospicere cœpit, & vt Episcopi suæ ditionis Constantinopolim ire maturent, admonet: nam sola ea Imperij pars Ariana labe passim commaculata fuit; pars autem versus Occidentem ab ea libera permanfit: siquidem Constantinus filius Constantini Magni natu maximus, & Constans mini- mus natu, paternam fidem integram con- servabant: quin etiam Valentinianus Im- perator Occidentis veram pietatem sine- ram & incorruptam custodiebat. Imperij verò pars quæ spectat ad Orientem, ex mul- torum nequitia Arianam labem contraxit, ob nimiam Constantij Imperatoris facilita- tem, & improbam Valentis item Impera- toris nequitiam.

R 5

Per

Per idem tempus Iustina Valentiniani senioris coniux, & Valentiniani iunioris mater, Arianæ doctrinæ semina, quæ viuente marito occultare studuit, cum filij sui mollem & flexibilem animum cerneret, proferre cœpit audaciùs. Adolescens autem matris monita vsui sibi fore arbitratus, primum cum Ambrosio communicat, ratus si hunc ad suam perduceret sententiam, se alios faciliè superaturum. At Ambrosius reuocat illi in memoriam paternam pietatem, & simul exponit doctrinarum differentiam, & quo modo hæ, id est Catholicæ, cum doctrina Domini & Apostolorum prædicatione conueniunt; illæ verò, id est hæreticæ, ab vtraque dissentiant, & legibus Ecclesiæ, Spiritus sancti instinctu sancitis, perspicuè repugnent. Adolescens verò, utpote adolescens, & à matre errore cæcata incitatus, tantum aberat ut Ambrosij orationi assentiretur, ut etiam iracundia inflammatus, Ecclesiæ parietes turmis pedum tum graui tum leui armatura tectorum, circumsideret. Vbi autè fortissimum illum bellatorem his rebus minimè perterrefactum videt, (eas enim pro laruis, quæ ad terrendos pueros obiici solent, habebat Ambrosius) tandem bile commotus, palàm dat ei mandatum, ut è sacri templi vestibulis

lis egrediatur. Tum Ambrosius, Non sum istud, inquit, facturum, neque ouile ouium proditurus lupis, neque blasphemix auctoribus sacrosanctum Dei templum traditurus; sed si libet me interficere, hinc intus vel cuspide hastæ, vel gladio confodito; sum enim cupidè ac libenter hanc cædem excepturus. Longo autem tempore post, ubi Cap. 14. Maximus de facinore contra præclarissimum veritatis præconem Ambrosium per Valentinianum admissio certior factus est; scribit ad Valentinianum literas, hortaturque uti tum à bello contra pietatem faciendò desistat, tum ne paternam pietatem prodere moliat; postremò minatur, bellum, si non obtemperet, se contra eum suscepturum. atque quod literis significauerat, factis præstitit: nam collecto exercitu Mediolanum, ubi ætatem agebat Valentinianus, maturè contendit: cuius aduentu cognito, Valentinianus fugit in Illyricum, iam edoctus experientiâ quid commodi maternum attulisset consilium. Theodosius autem omni laude cumulatus Imperator, cum certior factus esset tam de rebus ab adolescente Valentiniano Imperatore gestis, quàm de Tyranni Maximi literis; scribit ad Valentinianum, non debere eum mirari, quòd sibi Imperatori terror incussus fuerat, & robur

Tyrann-

Tyranno adiunctum : nam Imperatorem armis pietatem impugnasse ; Tyrannum eandem defendisse . Atque illum hac prodita, inerinem in fugam coniectum, hunc ea veluti armis munitum , eum illa nudatum deuicisse , pietati enim eius legislatorem fauere . Ista quidem , cum longè à Valentiniano abesset, scripsit Theodosius . Atque simul vt accepit de fuga Valentiniani, venit ei subsidio , illumque iam è proprio Imperio eiectum, & ad suam ditionem accedentem conspicatus, primò animo eius adhibet curationem, impietatis morbum altius insitum euellit, & ad pietatem paternam reducit : deinde iubet bono animo esse : contra Tyrannum bellum gerit, sine sanguinis effusione adolescenti restituit Imperium , & Tyrannum interficit: nam rem iniustam se facturum putauit, & fœdera cum Gratiano pacta violaturum , si non pœnas de interfectoribus suis repeteret.

Cap. 16.

Post Theodosij illinc reditum, Amphilo-
 chius ille admirabilis accessit Imperato-
 rem , oraturus vt, ex vrbibus Arianorum
 conuentus eiiciat . At Imperator, postula-
 tionem illam nimis seueram & inhumana-
 nam arbitratus , reiecit. Sapientissimus igitur
 Amphilo chius, re ad tēpus tacita, aliam
 rationem ad id quod volebat obtinendum,
 eamque

eamque planè memorabilem excogitavit: nam cum alio tempore fortè intra palatium esset, videretque astanti Imperatori filium suum Arcadium, qui nuper Imperator creatus fuerat; ipsum Imperatorem Theodosium, vt mos est, salutavit ille quidem, sed filium sine honore dimisit. Imperator autem ratus Amphilochem oblitum officij, iubet ad filium accedere, eumque salutare. At Amphilocheus respondit, satis esse quòd ei honorem habuerat. Itaque Theodosius rem acerbè & grauiter ferens, probrum filio obiectum, iniuriæ loco sibi ipsi illatæ numeravit. Tum sapientissimus Amphilocheus declarans Imperatori quod animo instituebat, contenta voce, Vides, inquit, ô Imperator, quàm ægrè ignominiam filij tui patiaris, imò verò illis qui eum insultant, vehementer succenses. Credas igitur mihi velim, huius vniuersitatis rectorem Deum eos qui contra Filium suum vnigenitum loquuntur blasphemias, itidem detestari, & tamquam ingratos erga Seruatorem & Patronum suum odio prosequi. Cuius institutum cum hoc pacto cognouisset Imperator, facta eius dictaque simul admiratus, legem protinus conscripsit, quæ vetabat conuentus ab hæreticis agi. Verùm omnes communis humani generis aduersarij tendiculas

diculas vitare, non adeò facile est : quapropter admirabilis ipse Imperator, humanæ naturæ particeps, à perturbationibus minime vacuus fuit ; quippe immoderata animi concitatione cum iusta iracundia coniuncta, facinus crudele commisit. Quod quidem ad legétium vtilitatem hoc loco commemorabo : nam eiusmodi profectò est, ut Imperator iste admirabilis ob id tum in crimen meritò vocari, tum contrà summa laude ac prædicatione efferri debeat.

Cap. 17.

Thessalonica vrbs est, amplissima illa quidem & multis hominibus frequentata: quæ tametsi subiecta est ditioni Macedonum, præ cunctis tamen vrbibus Thessaliæ, Achaïæ, & aliarum gentium plurimarum, quas Præfectus Illyriæ moderatur, primas obtinet. In hac ciuitate cùm fortè seditio concitata esset, magistratus aliquot obruti lapidibus fuere, & grauibus contumeliis vexati. Quibus rebus nuntiatis, Imperator bile accensus, flammæ neutiquam repressit iracundiæ; sed illius arbitrio permisit pronuntiandæ sententiæ de supplicio Thessalonicensibus irrogandæ potestatem. Iracundia igitur hanc auctoritatem nacta, gladios contra omnes distrinxit, & insontes pariter cum fontibus trucidauit: nam septem hominum millia, uti ferunt, interfecit.

Et fuerunt. in qua occisione non iudicium antecesserat, neque auctores tam horrendi facinoris iusta & legitima sententia condemnati; sed omnes simul, veluti spicæ in messe defectæ, concisi fuerunt. Hac miseranda & lugubri calamitate cognita, Ambrosius Imperatori Mediolanum aduentanti, & in sacrum templum ingredi cupienti, extra sacra vestibula obuiam procedit, vetatque in templum intrare, & his ferè verbis eum affatur: Est verisimile, ô Imperator, te ignorare cædis abs te patratae magnitudinem, neque post sedatam iracundiâ admissum facinus peruidere: nam Imperatorius fortasse Principatus peccatum agnoscere non finit, sed potestas offundit rationi caliginem. Verùm quæ sit natura nostra, & quàm fragilis ac fluxa, considerandum est, & in auitum puluerem ex quo orti sumus, & in quem recasuri, acies mentis intendenda; neque ipse splendore purpuræ deceptus, corporis illa operi imbecillitatem ignorare debes. Quin etiam illis imperas, qui & eiusdem sunt naturæ participes, atque adeò conserui: vnus enim Dominus omnium & Rex, huius vniuersitatis fabricator, Deus. Quibus igitur oculis intueberis templum illius, qui est omnium Dominus? quibus pedibus sanctum illud
solum

solum calcabis ? quî, quæso, manus iniusta
cæde & sanguine resperfas extendere aude-
bis, & iisdem sacrosanctum Corpus Domi-
ni accipere ? aut quomodo venerandum
eius Sanguinem ori admouebis, qui furore
iræ iubente tantum sanguinem tam iniquè
effudisti ? Recede igitur, & ne conare nouo
scelere scelus antè editum augere : sed ca-
pessè vinculum, quo vt ligeris, Dominus
omnium cælitus sententiam dat. quod qui-
dem vinculum vim habet & morbum ani-
mi depellendi, & te ad sanitatem restituen-
di . Huic orationi obsecutus Imperator,
(nam diuinis educatus eloquiis accuratè
norat, tum quæ essent officia Sacerdotis,
tum quæ Regum propria) cum gemitu &
lacrymis ad palatium reuertitur. Atque lon-
go temporis (spatio dilapso (octo enim men-
ses iam præterierant) Seruatoris natalitia
fuere celebrata . Imperator autem confidet
in palatio lamentis se dedens, & magnam
vim profundens lacrymarum . Quod cum
animaduertisset Ruffinus, qui tum Magi-
ster aulæ fuit, magna que apud Imperato-
rem auctoritate, vtpote familiaritate ei
coniunctior, ad illum accedit, rogat causam
fletus. Tum Imperator lugens acerbius, &
maiores in modum flens, Tu, inquit, Ruf-
fine ludis; nam quantis in malis verfer; non
sentis.

sentis. Ego verò gemo, & meam ipsius de-
 ploro calamitatem, dum mente comple-
 ctor, quàm facilis aditus ad sacrum tem-
 plum seruis & mendicis pateat, liberque
 illis ad Dominum suum deprecandum de-
 tur introitus; mihi autem non modò ad il-
 lum locum, verùm etiam ad cælum ipsum
 accessus præclusus sit: nam venit mihi in
 mentem sententiæ à Domino prolatæ, quæ
 palàm dicit: *Quemcumque ligaueritis super*
terram, erit ligatus & in calis. Cui Ruffinus,
 Curram, inquit, si placet, ad Episcopum, ei
 supplicabo, persuadeboque vt tua soluat
 vincula. At non est, inquit Imperator, tibi
 morem gesturus: noui enim adeò iustam
 Ambrosij sententiam, vt non metu potesta-
 tis Imperatoriæ sit legem Dei violaturus.
 Verùm cum instaret Ruffinus, polliceretur-
 que se Ambrosio persuasurum, Imperator
 iubet properè abire, ipseque falsa spe indu-
 ctus, & Ruffini confusus promissis, paulò
 post sequitur. Vt primùm autem Ruffinum
 diuus vidit Ambrosius, Videris mihi, inquit,
 Ruffine, canum impudentiam imitari: nam
 tametsi tuo suasu tam crudelis facta est cæ-
 des, tu tamen ita perfricuisti os, vt nec pu-
 deat nec pigeat tanta rabie contra imagi-
 nem Dei insaniuisse. Vbi verò Ruffinus ob-
 nixè eum orauerat, dixeratque Imperato-
 S rem

rem breuî adfuturum; sanctus Ambrosius diuino zelo accensus, Ego, inquit, Ruffine, prædico, me illum ab introitu sacri vestibuli prohibiturum: quòd si Imperium mutarit in tyrannidem, eadem lubens equidem accipiam. Quibus auditis, Ruffinus Imperatori per nuntium significat, hortaturque vt maneat in palatio. Quæ cum Imperator in medio foro accepisset, Eo, inquit, illuc nihilominus, quò iustas debitasque contumelias subeam. Vbi verò ad sacros templi parietes aduenit, nō ingreditur in templum ille quidem, sed ad Episcopum, qui in ædícula saluatoria sedebat, accedens, obsecrat vt vincula illi soluat. At Ambrosius eius aduentum dixit esse tyrannicum, eumque ipsum contra Deum insanire, & illius leges proterere. Tum Imperator, Non obstinato animo, inquit, leges sancitâs impugno, neque sacra vestibula per nefas introire cupio; sed oro, vti mihi soluas vincula, & proponas tibi ante oculos clementiam illius, qui est Dominus omnium; & ne mihi occludas ianuam, quam ille omnibus, quos peccatorum suorum pœniteat, patefecit. Cui Ambrosius, Quam tu, inquit, pœnitentiam post tam graue scelus admissum ostendis? quæ medicamenta ad vulnera tam difficilia curatu sananda adhibuisti?

Tuum

Tuum est, inquit Imperator, medicamenta ostendere, eaque temperare, & vulnera quæ ægrius curantur obligare: meum autem, quæ sunt adhibita accipere. Tum diuus Ambrosius, Quoniam, inquit, iracundiæ permisisti iudicium, & non rectæ rationi, sed animo irato obsecutus, sententiam pronuntiasti: conscribe legem, qua deinceps sententiæ per iracundiam pronuntiatae, irritæ sint & nullius momenti: cognitionesque causarum de eadē & publicatione bonorum ad triginta dies scriptis proditæ maneant, vti recta ratione de illis iudicium des, atque diebus illis confectis, qui decreta illa scripserint, mandata tua tibi ostendant. Actum quidem compressa iracundia, ratione sola causam expendens, inquires in decreta, & ita perspicies, iniqua sint, an æqua. quod si iniquaprehenderis, certum est, ea decreta scriptis mandata te dilaceraturum; si æqua, confirmaturum; sicque manifestè intellecturum, numero dierum interiectorum nihil de auctoritate decretorum rectè sancitorum omnino detractum esse. Istud consilium Imperator, quoniam prudentissimum esse censebat, libenter amplexatus; iubet extemplò legem conscribi, suaque subscriptione confirmat. Qua re confecta, diuus Ambrosius eius vincula soluit. Itaque

Imperator fidelissimus in sanctum templū ingressus; non stans Dominum precatus est; neque genibus flexis; sed pronus humi abiectus versum illum Davidis recitavit: *Adhesit pavimento anima mea, vivifica me secundum verbum tuum*. atque capillos manu lacerans, frontem ferire, lacrymarum guttis solum rigare, veniamque supplex petere cœpit. Vbi autem tempus postulavit ut dona sacræ mensæ offerret; surgit, atque non minorem lacrymarum vim quam antea effundens, in sanctuarium ingressus est. Cū verò, uti solebat, obtulisset, intus prope cancellos mansit. At rursus magnus ille Ambrosius non conticuit quidem, sed locorum differentiam cum docuit. Ac primum sciscitatur, ecqua re egeret: & cū respondisset Imperator, se expectare diuinorum mysteriorum perceptionem; significat illi per primarium Diaconum, qui ei ministrabat, ad loca interiora solis Sacerdotibus aditum patere; eademque aliis omnibus inaccessa esse. Iubet igitur ut exeat, & cum reliquis laicis consistat: nam purpura, inquit, Imperatores facit, non Sacerdotes. Quam admonitionem itidem excepit lubens Imperator fidelissimus, responditque se non animi cōfidentia inductum mansisse intra cancellos, sed hanc consuetudinem

Con-

Constantinopoli didicisse; quare habeo etiam, inquit, pro hac medicina gratiam.

Tantis & tam eximiis virtutibus enituitur Episcopus, tum Imperator. Vtrumque enim admiror; alterum propter ingenuam loquendi libertatem, alterum propter facilem obedientiam: & illum propter diuini zeli ardorem, alterum propter sinceram fidem. Imperator autem pietatis præcepta, quæ ab illustri illo Episcopo didicerat, etiam cum reuertisset Constantinopolim obseruauit: nam cum diuino quodam festo ad templum veniret, statim vt dona sacræ mensæ obtulerat, exiuit. Atque cum Nectarius, qui id temporis illius Ecclesiæ Antistes fuit, rogaret, cur non maneret intus, gemens inquit: Ægrè tandem didici, quid inter Imperatorem intersit & Episcopum; ægrè tandem reperi veritatis magistrum; nisi solum Ambrosium noui Episcopum, dignum eo nomine. Tantum commodi reprehensio à viro virtute præstanti adhibita, secum apportare solet.

Alia porro causa suppetebat huic Imperatori, ex qua similiter vtilitatis percepit non parum: nam coniux eius Placilla nunquam destitit diuinas leges ei in memoriam redigere; seque primum eisdem accuratè ipsa erudierat: siquidem e non Imperato-

rio principatu se insolenter extulit, sed diuinum quo flagrabat desiderium augere studuit; quippe beneficij magnitudo amorem erga Dominum multò reddidit ardentiorē. Itaque ad eos subleuandos, qui mutila corpora, membraque omnia labefacta haberent, nihil non diligentiae & curae adhibuit; atque ad eam rem non seruorum opera vsa est, sed illa ipsa hoc fungi ministerio, adire eorum hospitia, & singulis necessaria suppeditare voluit. Simili quoque ratione Ecclesiarum hospitia visere, ægrotis in lecto decumbentibus curationem adhibere, tractare ollas, iusculum gustare, patinam illis deferre, frangere panem, offas porrigere, eluere pocula, omnia denique alia munera obire, quæ serui & ancillæ exequi solent. Atque illis, qui eam ab hoc genere ministerij auocare studebant, respondit; Aurum distribuere decere Imperatorem, se autem pro ipso Imperio ei qui id ipsum dederat, illam operam offerre debere. Quin etiā crebrò solebat marito dicere: Semper te, mi vir, oportet cogitare, qui olim fueris, & qui iam sis. Ista assidue animo complectens, non te ingratum ostendes erga patronum; sed Imperium quod suscepisti, iuste & legitimè gubernabis; atque eo ritè administrando, cum qui ipsum donauerit, augu-

augustè sancteque coles. Eiusmodi sermonibus semper habitis, semina virtutum animo eius mandata præclarissimè commodissimeque rigavit. Ista quidem ante virum Cap. 19. migravit è vita: post cuius mortem non ita diu facinus quoddam fortè fortuna commissum accepimus, quod incredibilem amorem Imperatoris quo eam complexus est, perspicuè patefecit.

Imperator crebritate bellorum coactus, nouum quoddam & peregrinum tributum genus ciuitatibus imposuit: quod quidem Antiochia non tulit; sed plebs, cùm videret eos à quibus exigebatur tributum, propter inficiationem suspendi, tum alia patrat maleficia, quæ multitudo imperita occasionem seditionis nacta patrare solet, tum statuat æneam Placillæ Imperatricis deturbat, & per magnam vrbis partem trahit.

Quibus auditis, Imperator, vt par erat, grauiter commotus, omnia priuilegia vrbi illi adimit, & principatum Laodiceæ vicinæ ciuitati tradit; quippe istud Antiochenos grauissimè luros existimauit. postremò se urbem incensurum, penitusque vastaturum minatur, atque adeò in pagum redacturum. Porro Magistratus quosdam in illo audaci facinore deprehensos prius interfecerunt, quàm de ipsa tragica clade Imperator cer-

tior factus esset. Imperator autem quamvis omnia quæ fuerat minatus, imperavit fieri; tamen lex, quæ hortatu magni illius Ambrosij lata erat, obstabat quò minus fierent. Vbi verò nuntij, qui vrbi Imperatoris minas exponerent, eò adueniunt, nempe Elobocus Dux exercitus, & Cæsarius Præfectus palatij; omnes minis illis perterriti in magno metu erant. At virtutis athletæ, qui ad montis radices habitabant, quique multi erant, & viri optimi, hos duos monere & hortari cœperunt. Ex quorum numero fuit sanctissimus Macedonius. Iste in montium verticibus vitam agens, noctes diesque omnium Seruatori sinceras preces offerebat: qui neque Imperatoris violentiam pertimescere, neque de potestate eorum qui missi erant, laborare visus est: sed in vrbe media, prehensio alterius pallio, ambos ex equis descendere iubet. Illi verò cum viderent senem statura exigua pannis sordidis amictum, primò indignari quidem, sed ut primum à quibusdam eorum qui antecederant, viri illius virtutem didicerunt, desiliunt ex equis, illius genua amplecti, veniam denique petere cœperunt. Macedonius diuina imbutus sapientia, tali oratione eos compellat: Dicite, viri charissimi, Imperatori hæc verba, non solum Imperatorem esse,

esse, sed etiam hominem : itaque ne oculos tantummodò ad Imperium adiiciat, sed suam etiam naturam mente contempletur. Nam cùm homo sit, illis imperat qui sunt eiusdem naturæ participes ; humanam autem naturam ad imaginem & similitudinem Dei fabricatam esse. Quare ne tam crudeliter & inhumanè imaginè Dei è medio tolli iubeat : nam bilem mouet opifici, cùm eius imaginem contumeliosè tractet. Consideret enim quàm iniquo animo tulerit ipse æneam imaginem coniugis contumelia affectam esse; se tamen in imaginem Dei contumeliosum esse non dubitare. Ac quantum intersit inter imaginem inanimam & animatam, viuam & ratione præditam, omnibus qui sunt ratione præditi perspicuum est. Illud prætereà secum cogitet, nobis perfacile esse pro vna ærea imagine multas fabricare : sed eum omnino non posse facere vel pilum vnum illorum qui interfecti sunt. Hac audita oratione, viri illi admirabiles eam ad Imperatorem retulerunt : qua cùm eius iracundia restincta esset, pro minis quas iactauerat, scripsit literas quibus se purgabat, iræque causas in illis exposuit. Non oportebat, inquit, si quid à me peccatum esset, coniugem summis laudibus meritò decorandam, post mor-

S tem

tem tantam contumeliam subire; sed si qui mihi succensuissent, in me furentis animi impetus conuertere debuissent. Adiunxit etiam, se acerbè tulisse, & valdè animo discruciatum esse, cùm intellexisset quosdam à Magistratibus trucidatos fuisse. Ista quidem à me sunt propterea commemorata, tum quòd iniquum putabam, vt libertas loquendi à Macedonio monacho longè præstantissimo vsurpata, obliuione deleretur, tum perutilem illam legem magni Ambrosij suasu conscriptam omnium oculis subiicere cupiebam.

Cap. 10.

His confectis rebus, Imperator fidelissimus omne suum studium ad errorem gentilium euertendum transtulit, legesque promulgauit, quibus imperatum erat, vt simulachrorum fana diruerentur. Nam Constantinus Magnus omnibus præconiis meritò offerendus, videns adhuc orbem terrarum cæco errore furentem, tametsi vetuit omnino dæmonibus hostias immolari; non tamen eorū delubra demolitus est, sed mandatum solùm dedit, ne quisquam ad ea accederet; quin etiam istius filij sunt paterna diligenter persecuti vestigia. Iulianus autem impietatem renouare, & flammam veteris fraudis iam pridem extinctam de integro accendere laborauit. At cùm Iouianus Imperio

perio potitus esset, simulachrorum cultum omnino vetuit. Valentinianus quoque ille magnus eisdem legibus Europam præclare gubernavit. Ceterum Valens, sicut aliis omnibus permisit potestatem, eam quam velent religionem amplectendi, & eos colendi deos, quos ipsi pro diis haberent; ita aduersus solos doctrinæ Apostolicæ propugnatores bellum continenter gessit. Itaque toto tempore quo ille regnabat, ignem in aris accendere, libamenta & hostias simulachris immolare, gentiles non destiterunt. Quæ omnia cum fidelissimus Imperator Theodosius pro certo comperisset, extirpauit radicitus, & sempiterna obliuione obruenda curauit. Atque ex Episcoporum numero Marcellus Apamearum Antistes, vir in rebus omnibus longè præstantissimus, lege Imperatoris, tamquam machina bellica, omnia delubra vrbs cuius Episcopus erat, prorsus expugnauit. Theophilus quoque Alexandrinus Episcopus, urbem suam errore in simulachris colendis liberauit.

Cap. 21.

Cap. 22.

Cap. 24.

Iam verò Imperator, cognita morte Valentiniani iunioris, & Eugenij tyrannide, in Europam exercitum traducit. Eodem tempore Ioannes quidam monasticum vitæ genus excolens, vixit in Ægypto, qui gratia Spiritus sancti imbutus, sciscitantibus multas

tas

tas res futuras prædixit. Ad istum misit Imperator nuntium, quælitum, an bello cum tyrannis decertaret; auebat enim de eo fieri certior. Qui, vti prædixerat, cum in primo bello victoriam sine sanguine habiturum: sic in posterum, post multam hominum cædem, superiores laturus significauit. Quaspe indutus Imperator, complures ex hostibus acie instructa telis confixit, multosque ex barbaris, qui ei auxilio venerant, amisit. Ibi cum Duces dicerent, nimis paucos ad prælium de integro ineundum superesse, hortarenturque vt bellum aliquamdiu intermitteret, quò incunte Vere exercitu collecto, hostes multitudine vinceret: Imperator fidelissimus eorum consilium repudiavit. Nam non committendum, inquit, est, vt salutaris Crux tantæ arguatur imbecillitatis, Herculisque statux tantum virtutis nostro testimonio tribuatur: quippe vt Crux nostrum exercitum, ita illa hostium antecedit. Qua oratione cum tanta in Deo fiducia habita, cum copiarum relictarum & paucarum admodum essent, & animis fractis; sacra æde in vertice montis, vbi castra fecerunt, reperia, totam noctem huius vniuersitatis gubernatorem precibus sollicitauit: sub tempus autem noctis quo galli cantare solent, somnus eum oppressit. Qui humi stratus, videre sibi

sibi visus est duos viros candido indutos amictu, equis albis vehi, qui ipsum bono animo esse, timorem abiicere, prima luce arma capere, & exercitum in aciem educere iubent; nam se auxiliares & velut antesignanos ad eum missos esse, & alterum esse Ioannem Euangelistâ, alterum Philippum Apostolum esse. Hac oblata visione, Imperator preces fundere non desistit: sed attentiore cogitatione eas Deo adhibet. Eadem quoque visio militi secundum quietem apparuit, qui Præfecto suo eam narrauit: ille cum deducit ad Tribunum militum, Tribunus autem ad Ducem; Dux noui aliquid inde portendi ratus, Imperatori significat. Tum Imperator, Non mei causa, inquit, hæc visio oblata est (ipse namque illis qui victoriam promiserant, fidem habui) sed ne quisquam existimaret, me, vtpote prælij faciendi cupidum, eam confinxisse. Huic igitur militi Deus, Imperij mei propugnator, hanc obtulit visionem, vt mihi eandem narranti certum testimonium daret: nam mihi primùm communis omniũ Dominus illam ostenderat. Quare omni metu prorsus amoto, antesignanos nostros & Principes belli gerendi sequamur: nemo bellantium multitudine metiatur victoriam; sed eorum potentiam, qui se Duces nobis præbent,

rat: postremò iustam æquamque de supplicio illi irrogando sententiam pronuntiat. Talem se Theodosius cùm in pace tum in bello præstitit: quippe semper diuinum implorauit auxilium. Hac parte victoria in morbum delapsus, filiis Imperium distribuit, ac maiori natu eam partem quam ipse rexerat, minori autem Europæ tradidit gubernacula. Vtrumque veram pietatem colere hortatur: ea enim pacem conseruari, bellum extinguere, hostes in fugam verti, trophæa erigi, & victoriam denique constare. Hac hortatione filiis adhibita, obiit mortem, cuius gloria sempiternæ memoriæ commendata est.

Collatio Theodosij cum Dauide.

RECTISSIME Theodosius Imperator cum Dauide Rege conferri posse videtur. Vterque bellator felicissimus fuit, vterque pietati in Deum addictissimus, vterque mitis & humilis valdè, vterque peccatum grande commisit, vterque ita seriò peccatum suum lacrymis lauit, ut cor vtriusque super niuem dealbatum fuisse videatur. Multa prælia fecit Dauid, & semper victor euasit; quia non in gladio & arcu suo con-

confidebat, sed in Deo viuo & vero, qui est Dominus exercituum. Sic noster Theodosius multa prælia fecit; sed tria potissimum. Primū aduersus barbaros, qui cum Istrum flumen transiissent cum ingentibus copiis, vt non solum Thraciæ, sed toti Orienti terrorem maximum incusserint; occurrit illis Theodosius, nondum Imperator, sed à Gratiano Imperatore Dux militū electus: & primo prælio tanta celeritate illos fudit, vt cum Cæsare dicere posset: *Veni, vidi, vici.* eaque causa fuit, vt Gratianus eum confortem Imperij declarauerit. Alterum fuit committendum potius quàm commissum prælium cum Maximo Tyranno, qui Gratianum Imperatorem occiderat, & Imperium eius inuaserat: sed hoc, vt Abbas Ioannes vir sanctissimus illi prædixerat, sine sanguine militum suorum confecit, occiso repente Tyranno, & Occidentali Imperio recuperato. Tertium prælium cum Eugenio altero Tyranno commisit, sed pugnante Deo de cælo pauci multos vicerunt, vt paulò antè dictum est. Itaque tam Theodosius quàm Dauid, diuina protegente dextera, in omni prælio victor euasit.

De pietate & fide Dauidis testimonium habemus ab Ecclesiastico, qui loquens de Regibus Testamenti veteris, scribit, omnes

Eccli. 49.

T

Reges

Reges illos peccauisse , præter Dauidem, Ezechiam , & Iosiam ; reliqui enim omnes vel idololatræ fuerunt , vel idololatriam permiserunt. Idem nos de Theodosio dicere possumus, si comparetur ad Imperatores qui ante illum fuerunt , vno excepto Philippo, qui tamen idololatriam non sustulit, nec prohibuit. Deinde Constantinus Magnus & eius filij , vt etiam Iouianus & Valentinianus cum filiis idololatriam prohibuerunt , sed non euerterunt ; quin potius Valens Imperator eam liberam esse voluit, & Iulianus Apostata eamdem exercuit & fouit. Primus, qui cultum inanum deorum seuerè prohibuit , & fana ac templa deorum euerit, & idololatriam funditus extirpauit, Theodosius fuit, vt Theodoretus testatur. Ad hæc, Rex Dauid mitis & humilis fuit , & arguentes se patienter audiebat , vt intelligi potest ex increpatione Nathan Prophetæ: noster quoque Theodosius non solum mitis & humilis , sed Sacerdotibus Domini obedientissimus fuit. Iussit illum aliquando sanctus Ambrosius exire de sanctuario , & cum reliqua plebe consistere : paruit continuò , & gratias egit , quòd ab Ambrosio didicisset differentiam inter Sacerdotes & laicos , quam differentiam apud Constantinopolim discere non potuerat.

tuerat. Et tamen hic non erat vnus ex Regibus, sed Imperator Orientis & Occidentis vniuersi. Multa præterea causa breuitatis.

Venio ad comparationem peccati & pœnitentiæ. Dauid peccauit adulterans alienam vxorem, & maritum eius occidi procurans: qua occasione non ille solum, sed permulti alij perierunt, vt intelligi potest ex libro secundo Regum. Theodosius iratus, quod apud Thessalonicam seditione facta Magistratus publici lapidibus obruti fuissent, iussit à militibus suis occidi obuios quosque de populo; & cædes ascendit ad numerum septem millium hominum. Admonitus postea Dauid à Nathan Propheeta, pœnitentiam egit: admonitus Theodosius ab Ambrosio Episcopo, simili modo pœnitentiam egit. Comparemus nunc peccatum cum peccato, & pœnitentiam cum pœnitentia. Peccatum Regis Dauid ex concupiscentia carnis, peccatum Imperatoris Theodosij ex iracundia originem duxit. Sed peccatum Dauid fuit geminatum, adulterium videlicet cum aliena coniuge, & occisio multorum innocentium sine vlla causa iusta: peccatum Theodosij fuit vnum, & ex iusta causa, vltionis videlicet iniuriæ in publicos Magistratus. Itaque peccatum

Theodosij in eo solùm positum fuit , quòd iracundia vehemens effecit, vt ultionis iustę metas excederet. Addit autem sanctus Ambrosius in Oratione de obitu Theodosij, fleuisse illum peccatum , quòd ei aliorum fraude obrepserat: quæ certè circumstantia culpam illius non parum extenuat. Huc accedit , quòd Deus ipse videtur peccatum Dauidis grauius iudicasse quàm peccatum Theodosij: Dauidi enim per Nathan significari iussit, filium ex adulterio natum paulò post moriturum , & gladium ex eius domo non recessurum, & vxores eius publicè violandas; quæ vaticinia breui adimpleta sunt omnia : Theodosio nostro post peractam pœnitentiam , omnia prosperè eueniunt. Pœnitentia Dauidis sine dubitatione vlla, seria, & grauis, & diuturna fuit, sed tamen priuata, inter domesticos parietes, in gemitu & lacrymis: at pœnitentia Theodosij non solùm seria , & grauis , & diuturna, sed etiam publica fuit. Primùm per menses octo, sancti Ambrosij iussu ab ingressu templi, communicatione Sacramentorum abstinuit ; quod totum tempus in lacrymis & dolore consumpsit. Deinde publicè in templo coram populo humi stratus , pauimentum lacrymis lauit, frontem percussit, capillos sibi euulsit: ita Deo, Sacerdotibus, & toti Eccle-

Ecclesiæ satisfecit. Et, quod argumentum est verissimæ & maximæ pœnitentiæ, toto vitæ tempore peccatum illud postea defleuit. Sic enim loquitur sanctus Ambrosius in Oratione paulò antè commemorata: *Neque ullus postea dies fuit, quo non illum doleret errorem. quod utique à sancto Davide didicisse videtur, qui ait in Psalmo, quem propriè scripsit ob peccatum homicidij cum adulterio coniunctū, Peccatum meum contra me est semper.* Sic igitur David pariter cum Theodosio, & Theodosius cum Davide speculum fidei, iustitiæ, humilitatis, Religionis, & pœnitentiæ omnibus Regibus, aliisque Principibus; ut cùm Regnum temporale dimiserint, Regnum adipiscantur æternum.

Obit Theodosius anno Domini 395. cùm vixisset annos quinquaginta, & imperasset cum Gratiano & Valentiniano iuniore annos quatuordecim, & solus in toto orbe Romano annos duos, relictis Imperij heredibus filiis suis, Arcadio & Honorio.

stiens, sic clara voce locutus est: Ne te in errorem inducat vestis splendor, neque illustris ornatus istarum rerū quæ sub aspectum cadunt, decipiat; quibus ipse in fraudem impulsus, imprudens me ipsum grauissimis suppliciis obnoxium reddidi. Itaque tu in Rep. summa cum mansuetudine & animi lenitate regenda, mea vitia præstato. Atque digito Magistratus demonstrās, Non oportet, inquit, horum consiliis morem gerere: nam hi me in istas quas cernis miserias deduxerunt. Aliaque eius generis protulit verba, quæ omnes cū in maximam traduxere admirationem, tum ad immensam vim lacrymarum profundendam impulere.

Erat iste Tiberius corpore maximè procerō & robusto, & pulchritudinis excellentia omnium opinione maiore, adeò vt non Regibus solū & Imperatoribus, sed omnibus etiam hominibus facilè præstaret. Ac primū, quod ad corporis formam attinet, ea Principatu planè digna fuit: quod autem spectat ad animum, illum mansuetudo & benignitas exornauit. Primo ipso aspectu omnes videbatur ad se diligendū inuitare. Diuitias eas putauit, quæ cuique satis essent ad largiendum, non solū ad necessitatem, verū etiam ad affluentiam. Nam non istud modò considerabat, quòd qui opis indi-

indigeant, illis beneficia accipienda sint, sed quòd Imperatorem Romanum deceat liberaliter dare. Aurum verò adulterinum existimavit, quod cum subiectorum lacrymis collectum est. Qua re inductus, tributum vnus integri anni vectigalibus condonat. Quin etiam prædia, quæ Ardamanes tributis impositis ferè labefactauerat, quasi in libertatē vindicauit, & non modò damnum pro eius magnitudine, sed etiam cum fœnore sarciiuit. Atque iniquas largitiones, pro quibus alij Imperatores suos subiectos Magistratibus pro libidine abutendos exponere, & quodammodò diuendere consueuerant, remisit, cavitq; per leges, ne quid eiusmodi in posterum committeretur.

Idem Tiberius cùm pecuniam malam Cap. 14. & iniquè partam ita collocasset, sicut ratio & æquitas postulabat, res ad bellum faciendum necessarias parare, ingentem cogere exercitum virorum facilè præstantissimorum tam ex gentibus Transalpinis circiter Rhenum incolentibus, quàm ex Cisalpinis, quin etiam ex Massagetis, aliisque ex genere Scytharum, ex Pœonia prætereà, Mysia, Illyria, & Isauria collectorum, adeò vt propè centum quinquaginta turmas equitum lectissimorum instructas haberet: quorum subsidia Chosroëm, qui statim post Daras

T 5

expu-

bent, quisque consideret. Hac oratione militum animis valde confirmatis, omnes de monte deducit. Tyrannus autem cum videret milites procul à se ad prælium ineundum paratos, ornat exercitum, & aciem instruit. Ipse verò colle quodam occupato, ait militibus suis, Imperatorem iam quasi mori cupientem, & desiderio ex hac vita abeundi flagrantem prælio decertare. Dat igitur mandatum Ducibus, ut viuum eum ad se & vinculis constrictum adducerent. Postquam autem phalanges ordine locatæ erant, satis animaduerti potuit, tum quàm ingentes hostium copiæ essent, tum quàm paucæ cum Imperatore iungerentur in acie. Cum autem tela vtriusque coniici cœpta sunt, tunc antesignani Imperatoris verè promissa præstiterunt: nam ventus violentus è regione hostibus irruens, illorum sagittas, iacula, spiculaque in ipsos retorquet, adeò ut nulum teli genus eis adiumento fuerit; neque miles grauis armaturæ, neque sagittarius, neque iaculator Imperatoris exercitum lædere potuerit. Quin etiam tanta pulueris copia in eorum facies impetu ferebatur, ut palpebras occludere, & pupillas oculorum pulueris vi grauitèr oppugnatas tegere & tueri eos coegerit: Imperatoris autem exercitus nullo damno incommodè ex illotur-

turbine accepto, fidentibus animis hostes trucidant. Qui quidem his rebus perspectis, & diuino auxilio, quod Imperatoris copiis allatum erat, cognito, abiectis armis veniam ab Imperatore supplices petunt. Ille autem flexit animum, & illorum misericordiam capit. Iubet deniq; Tyrannum celeriter ad se adduci. Illi igitur properè collem ascendunt, in quo Tyrannus ignarus rerum iam gestarum confidebat. Qui cùm eos anhelantes videret, ipsaꝫ anhelitus crebritate adueniendi indicantes celeritatem, victoriæ nuntios esse suspicatus est. Rogat, num Theodosium, vt illis erat imperatum, victum adducerent. Cui illi, Non eum, inquit, adducimus ad te: sed te hinc ad eum abducimus. Hoc namque in mandatis dedit summus huius vniuersitatis moderator Deus. Quæ cùm dixissent, ei è folio erepto vincula iniiciunt, abducunt victum; & qui paulò antè insolenter gloriatus fuerat, captiuum ad Theodosium deducunt. Imperator autem primùm iniuriarum in Valentinianum, & impiè occupatæ tyrannidis, eum in memoriam reuocat: deinde bel-
lorum contra Imperium legitimum susceptorum causas cum irrisione reprehendit: reprehendit statuam Herculis, qua fretus tam audax temerariumque facinus admiserat:

rāt: postremò iustam æquamque de supplicio illi irrogando sententiam pronuntiat. Talem se Theodosius cū in pace tum in bello præstitit: quippe semper diuinum implorauit auxilium. Hac parta victoria in morbum delapsus, filiis Imperium distribuit, ac maiori natu eam partem quam ipse rexerat, minori autem Europæ tradidit gubernacula. Vtrumque veram pietatem colere hortatur: ea enim pacem conseruari, bellum extingui, hostes in fugam verti, trophæa erigi, & victoriam denique constare. Hac hortatione filiis adhibita, obiit mortem, cuius gloria sempiternæ memoriæ commendata est.

Collatio Theodosij cum Davide.

RECTISSIME Theodosius Imperator cum Davide Rege conferri posse videtur. Vterque bellator felicissimus fuit, vterque pietati in Deum addictissimus, vterque mitis & humilis valdè, vterque peccatum grande commisit, vterque ita seriò peccatum suū lacrymis lauit, vt cor vtriusque super niuem dealbatum fuisse videatur. Multa prælia fecit Dauid, & semper victor euasit; quia non in gladio & arcu suo
con-

confidebat, sed in Deo viuo & vero, qui est Dominus exercituum. Sic noster Theodosius multa praelia fecit; sed tria potissimum. Primū aduersus barbaros, qui cum Istrum flumen transiissent cum ingentibus copiis, vt non solum Thraciæ, sed toti Orienti terrorem maximum incusserint; occurrit illis Theodosius, nondum Imperator, sed à Gratiano Imperatore Dux militū electus: & primo praelio tanta celeritate illos fudit, vt cum Cæsare dicere posset: *Veni, vidi, vici.* eaque causa fuit, vt Gratianus eum consortem Imperij declarauerit. Alterum fuit committendum potius quàm commissum praelium cum Maximo Tyranno, qui Gratianum Imperatorem occiderat, & Imperium eius inuaserat: sed hoc, vt Abbas Ioannes vir sanctissimus illi prædixerat, sine sanguine militum suorum confecit, occiso repente Tyranno, & Occidentali Imperio recuperato. Tertium praelium cum Eugenio altero Tyranno commisit, sed pugnante Deo de cælo pauci multos vicerunt, vt paulò antè dictum est. Itaque tam Theodosius quàm Dauid, diuina protegente dextera, in omni praelio victor euasit.

De pietate & fide Dauidis testimonium habemus ab Ecclesiastico, qui loquens de Regibus Testamenti veteris, scribit, omnes

Eccli. 49.

T

Reges

Reges illos peccauisse , præter Dauidem, Ezechiam , & Iosiam ; reliqui enim omnes vel idololatræ fuerunt , vel idololatriam permiserunt. Idem nos de Theodosio dicere possumus, si comparetur ad Imperatores qui ante illum fuerunt , vno excepto Philippo, qui tamen idololatriam non sustulit, nec prohibuit. Deinde Constantinus Magnus & eius filij , vt etiam Iouianus & Valentinianus cum filiis idololatriam prohibuerunt , sed non euerterunt ; quin potius Valens Imperator eam liberam esse voluit, & Iulianus Apostata eandem exercuit & fouit. Primus, qui cultum inanum deorum seuerè prohibuit , & fana ac templa deorum euertit, & idololatriam funditus extirpauit, Theodosius fuit, vt Theodoretus testatur. Ad hæc, Rex Dauid mitis & humilis fuit , & arguentes se patienter audiebat , vt intelligi potest ex increpatione Nathan Prophetæ: noster quoque Theodosius non solum mitis & humilis , sed Sacerdotibus Domini obedientissimus fuit. Iussit illum aliquando sanctus Ambrosius exire de sanctuario , & cum reliqua plebe consistere: paruit continuò , & gratias egit , quòd ab Ambrosio didicisset differentiam inter Sacerdotes & laicos , quam differentiam apud Constantinopolim discere non potuerat,

tuerat. Et tamen hic non erat vnus ex Regibus, sed Imperator Orientis & Occidentis vniuersi. Multa præterea causa breuitatis.

Venio ad comparisonem peccati & pœnitentiæ. Dauid peccauit adulterans alienam vxorem, & maritum eius occidi procurans: qua occasione non ille solum, sed permulti alij perierunt, vt intelligi potest ex libro secundo Regum. Theodosius iratus, quòd apud Thessalonicam seditione facta Magistratus publici lapidibus obruti fuissent, iussit à militibus suis occidi obuios quosque de populo; & cædes ascendit ad numerum septem millium hominum. Admonitus postea Dauid à Nathan Propheeta, pœnitentiam egit: admonitus Theodosius ab Ambrosio Episcopo, simili modo pœnitentiam egit. Comparemus nunc peccatum cum peccato, & pœnitentiam cum pœnitentia. Peccatum Regis Dauid ex concupiscentia carnis, peccatum Imperatoris Theodosij ex iracundia originem duxit. Sed peccatum Dauid fuit geminatum, adulterium videlicet cum aliena coniuge, & occisio multorum innocentium sine vlla causa iusta: peccatum Theodosij fuit vnum, & ex iusta causa, vltionis videlicet iniuriæ in publicos Magistratus. Iraque peccatum

Theodosij in eo solùm positum fuit, quòd iracundia vehemens effecit, vt ultionis iustę metas excederet. Addit autem sanctus Ambrosius in Oratione de obitu Theodosij, fleuisse illum peccatum, quod ei aliorum fraude obrepserat: quæ certè circumstantia culpam illius non parum extenuat. Huc accedit, quòd Deus ipse videtur peccatum Dauidis grauius iudicasse quàm peccatum Theodosij: Dauidi enim per Nathan significari iussit, filium ex adulterio natum paulò post moriturum, & gladium ex eius domo non recessurum, & vxores eius publicè violandas; quæ vaticinia breui adimpleta sunt omnia: Theodosio nostro post peractam pœnitentiam, omnia prosperè eueniunt. Pœnitentia Dauidis sine dubitatione vlla, seria, & grauis, & diuturna fuit; sed tamen priuata, inter domesticos parietes, in gemitu & lacrymis: at pœnitentia Theodosij non solùm seria, & grauis, & diuturna, sed etiam publica fuit. Primùm per menses octo, sancti Ambrosij iussu ab ingressu templi, communicatione Sacramentorum abstinuit; quod totum tempus in lacrymis & dolore consumpsit. Deinde publicè in templo coram populo humi stratus, pauiementum lacrymis lauit, frontem percussit, capillos sibi euulsit: ita Deo, Sacerdotibus, & toti Eccle-

Ecclesiæ satisfecit. Et, quod argumentum est verissimæ & maximæ pœnitentiæ, toto vitæ tempore peccatum illud postea defleuit. Sic enim loquitur sanctus Ambrosius in Oratione paulò antè commemorata: *Neque ullus postea dies fuit, quo non illum doleret errorem. quod utique à sancto Dauide didicisse videtur, qui ait in Psalmo, quem propriè scripsit ob peccatum homicidij cum adulterio coniunctū, Peccatum meum contra me est semper.* Sic igitur Dauid pariter cum Theodosio, & Theodosius cum Dauide speculum fidei, iustitiæ, humilitatis, Religionis, & pœnitentiæ omnibus Regibus, aliisque Principibus; ut cùm Regnum temporale dimiserint, Regnum adipiscantur æternum.

Obiit Theodosius anno Domini 395. cùm vixisset annos quinquaginta, & imperasset cum Gratiano & Valentiniano iuniore annos quatuordecim, & solus in toto orbe Romano annos duos, relictis Imperij heredibus filiis suis, Arcadio & Honorio.

VITA ET VIRTUTES

TIBERII

Imperatoris optimi & religiosissimi.

TIBERIVS Imperator cum Iustino regnavit ut Cæsar, annis tribus; solus autem ut Augustus, annis quatuor. Fuit autem omnibus Dei donis mirificè exornatus, sed potissimum quatuor. Primum enim populos sibi subiectos gubernavit ut pater, non ut dominus; ex quo factum est, ut ab omnibus subditis mirificè diligeretur. Deinde, in bello quod gessit cum Persis, exercitum tam copiosum collegit, & virorum fortissimorum plenum, ut nullus unquam Imperator eiusmodi castra habuisse legatur; proinde mirum non fuit, si Persas omnino domuerit. Ad hæc, erga pauperes Christi, ob eiusdè Christi amorem, vique adeò liberalis & munificus fuit, ut metas omnes liberalitatis excessisse videatur; cum eius prædecessor Iustinus, & eius successor Mauritius, avarissimi fuisse legantur. Ex quo factum est, ut Iustinus in pœnam peccati in delirium inciderit, & coadiutore in Imperio opus habuerit, & Mauritius exorsus militibus factus, cum vxore & liberis occisus

cifus fuerit. Denique, in fide Catholica asserenda & defendenda ardentissimus fuit, sic vt amicissimo Antistiti, & de se optimè merito, Eutychio Episcopo Constantinopolitano non pepercerit, cùm eum à sancto Gregorio Romano, tunc Diacono, post Pontifice, de hæresi conuictum fuisse animaduertit. Hæc & alia eiusdem generis ex quatuor Scriptoribus, duobus Græcis, Euagrio & Nicephoro; & duobus Latinis, Gregorio Turonico & Gregorio Romano cognosci possunt: qui omnes, Nicephoro excepto, ipsius Tiberij Augusti tempore flourerunt. Sed iam Euagrium audiamus Tiberij laudes enarrare incipientem.

Interea temporis Iustinus de consilio Sophiae Tiberium Cæsarem declarat; taliaque verba in eo declarando locutus est, qualia à nulla historia vel vetere vel recentiore sunt omnino commemorata, Deo videlicet propitio ei tempus largiente, tum ad sua ipsius peccata confitenda, tum ad explicanda ea quæ ex vsu Reip. forent. Nam cùm Ioannes Episcopus vnà cum suis, cumque Principes ac Magistratus, cùm denique milites Prætoriani in atrio sub dio, vbi eiusmodi negotia de more inueterato agi solent, in vnum cogerentur; Iustinus Tiberium tunica induens Imperatoria, & lana circumue-

stiens, sic clara voce locutus est: Ne te in errorem inducat vestis splendor, neque illustri ornatus istarum rerū quæ sub aspectum cadunt, decipiat; quibus ipse in fraudem impulsus, imprudens me ipsum grauissimis suppliciis obnoxium reddidi. Itaque tu in Rep. summa cum mansuetudine & animi lenitate regenda, mea vitia præstato. Atque digito Magistratus demonstrās, Non oportet, inquit, horum consiliis morem gerere: nam hi me in istas quas cernis miseras deduxerunt. Aliaque eius generis protulit verba, quæ omnes cū in maximam traduxerent admirationem, tum ad immensam vim lacrymarum profundendam impulere.

Erat iste Tiberius corpore maximè procerō & robusto, & pulchritudinis excellentia omnium opinione maiore, adeò ut non Regibus solū & Imperatoribus, sed omnibus etiam hominibus facilè præstaret. Ac primū, quod ad corporis formam attinet, ea Principatu planè digna fuit: quod autem spectat ad animum, illum mansuetudo & benignitas exornauit. Primo ipso aspectu omnes videbatur ad se diligendū inuitare. Diuitias eas putauit, quæ cuique satis essent ad largiendum, non solū ad necessitatem, verū etiam ad affluentiam. Nam non istud modò considerabat, quod qui opis indi-

indigeant, illis beneficia accipienda sint; sed quòd Imperatorem Romanum deceat liberaliter dare. Aurum verò adulterinum existimavit, quod cum subiectorum lacrymis collectum est. Qua re inductus, tributum vnus integri anni vectigalibus condonat. Quin etiam prædia, quæ Ardamanes tributis impositis ferè labefactauerat, quasi in libertatè vindicauit, & non modò damnum pro eius magnitudine, sed etiam cum fœnore sarciiuit. Atque iniquas largitiones, pro quibus alij Imperatores suos subiectos Magistratibus pro libidine abutendos exponere, & quodammodò diuendere consueuerant, remisit, cauitq; per leges, ne quid eiusmodi in posterum committeretur.

Idem Tiberius cùm pecuniam malam & iniquè partam ita collocasset, sicut ratio & æquitas postulabat, res ad bellum faciendum necessarias parare, ingentem cogere exercitum virorum facile præstantissimorum tam ex gentibus Transalpinis circiter Rhenum incolentibus, quàm ex Cisalpinis, quin etiam ex Massagetis, aliisque ex genere Scytharum, ex Pæconia prætereà, Mysia, Illyria, & Isauria collectorum, adeò vt propè centum quinquaginta turmas equitum lectissimorum instructas haberet: quorum subsidia Chosroëm, qui statim post Daras

Cap. 14.
T 5 expu-

expugnatas, tempore æstiuo in Armeniam inuaserat, indeque iter versus Cæsaream urbem Cappadociæ primariam susceperat, penitus profligauit. Iste Chosroës tam insolenter se gessit aduersus Imperium Romanorum, vti cum Imperator legatos ad eum misisset, illis ne se quidem adeundi potestatem facere dignaretur, sed iuberet eos Cæsaream vsque sequi. Ibi namq; se consilium de eorum legatione initurum dixit. Postquam verò exercitum Romanum ex aduerso sibi occurrentem, & à Iustiniano fratre Iustini, qui tam miserabiliter interfectus fuit, gubernatum, & armis firmè munitum, & turbas classicum canentes, & signa ad pugnam sublata, & milites acutè vociferantes, & in acie pulchro ordine locatos, iram & furorem anhelantes, & tantum ac tam egregium equitatum, quantum nemo aliquando ex Imperatorum numero vel ipsa cogitatione conceperit, animaduertit; vehementer obstupescens, præ re tam insperata inexpectataque ex intimo pectore ingemuit, & prælium exordiri noluit. Eum igitur pugnam differentem, cunctantem, terentem tempus, & callidè ludificantem, Curs Scythæ, qui dextero cornu exercitus Romani præfuit, adortus est: & cum Persæ impetum eius ferre non possent, sed aciem
penitus

penitus defererent; Curs magnam cædem hostium fecit. Postremum agmen à tergo inuadit, vbi apparatus tum Chosrois tum totius exercitus locatus fuit. Capit thesaurum Regis vniuersum, & omnem prætereà apparatus bellicum, idque Chosroë inspectante, toleranteque, atque hoc potius perpetiendum arbitrante, quàm Curs impetu facto in ipsum irrueret. Curs igitur cum suis magna pecuniæ vi & multis spoliis positus est: iumenta cum sarcinis, inter quas ignis fuit, quem pro Deo coluit Chosroës, abducit: atque Persarum exercitu repulso, lætum præana canentes, sub crepusculum redit ad suos, qui iam stationes, in quibus ordine locabantur, reliquerant. Et adhuc neque Chosroës, neque illi præliari cœperant; sed quædam duntaxat velitares pugnae factæ sunt; sicubi singuli ex utroque exercitu, vti fieri solent, cum singulis congregarentur. Chosroës autem ingenti rogo noctu accenso, prælium nocturnum instituit. Ac cum Romani duos haberent exercitus, illum qui versus Septentrionem erat, intempesta nocte adoritur. Quo repente & de improviso pedem referente, Melitinā urbem sitam in proximo, præsidiis nudatam, atque prorsus desertā à ciuibus, inuadit; qua igne absumpta, parat se ad fluuium Euphratem tra-

traiciendum. Vbi verò copiarum Romanorum in vnum coactæ cum sequi cœperunt, ipse metuens de salute sua, consensu elephante fluuium transmittit: magna autem pars exercitus sui tranando flumine undis obruta est. Quam submersam cum accepisset, maturè decessit. Itaque Chosroës hoc postremum supplicium pro insana temeritate contra Romanos admissa luens, vnâ cum suis qui supererant, in Orientem reuertit. Ibi autem pactas habuit inducias, ne quis eum inuaderet. Iustinianus verò incursione cum toto exercitu in fines ditionis Persarum facta, tota hieme ibi commoratus est, nemine quidquam omnino ei exhibente molestiarum. Circiter verò Solstitium Æstium redit, nulla parte exercitus amissa: atque in finibus, quibus Romanorum & Persarum Imperium terminatur, cum magna vitæ prosperitate & rerum gestarum gloria totum æstatis tempus contriuit. Chosroës autem ingenti doloris cumulo oppressus, animo fracto & ancipiti cura debilitato languens, crebris denique & variis ægritudinis fluctibus demersus, miserandum in modum interiit: ac legem quam scripsit, ne Rex Persarum in posterum contra Romanos arma ferret, velut sempiternum suæ fugæ monumentum post se reliquit. Quo extincto,

Cap. 15.

tincto, Hormisdeseius filius regnū capeffit: de quo in præsentia omitto dicere, quandoquidem res deinceps exponendæ me ad se vocant, & sermonis nostri cursum eò transferri expectant.

Audiuimus Euagrium; audiamus nunc Lib. 5. c. 19.
 Gregorium Turonicum. Cū autem Iustinus Imperator amisso sensu amens effectus esset, & per solam Sophiam Augustam eius Imperium regeretur, populi, vt in superiore iam libro diximus, Tiberium Cæsarem elegerunt, vtilem, strenuum, atque sapientem, eleemosynarium, inopumq; omnium defensorem. Qui cū multa de thesauris quos Iustinus adgregauit, pauperibus erogaret, & Augusta illa eum frequentius increparet, quòd Rempublicā redegisset in paupertatem; diceretque: Quod ego multis annis congregaui, tu infra paucum tempus prodigè dispergis; aiebat ille: Non decrit fisco nostro; tantū pauperes eleemosynam accipiant, aut captiui redimantur. hic est enim magnus thesaurus, dicente Domino: *Thesaurizate vobis thesauros in celo, vbi neque arugo, neque tinea corrumpit, & vbi fures non effodiunt, nec furantur.* Ergo, de quo Deus dedit, congregemus per pauperes in celo, vt Dominus nobis augere dignetur in sæculo. Et quia, vt diximus, magnus &
verus

verus Christianus erat, dum hilari distributione pauperibus opem præstat, magis ac magis ei Dominus subministrat: nam deambulans per palatium, vidit in pavimento domus tabulam marmoream, in qua Crux Dominica erat sculpta, & ait: Cruce tua, Domine, frontē munimus & pectora, & ecce Crucem sub pedibus cōculcamus. Et dicto citiùs iussit eam auferri: defossaq; tabula atque erecta, inueniunt subter & aliam hoc signum habentem: nuntiantesq; iussit & illam auferre. Qua amota reperiunt & tertiam: iussuq; eius & hæc aufertur. Qua ablata inueniunt magnum thesaurum habentem supra mille auri centenaria. sublatumq; aurum pauperibus adhuc abundantius, vt consueuerat, subministrat; nec ei Dominus aliquid deficere permittebat pro bona voluntate sua.

Quid ei in posterum Dominus transmissit, non omitam. Narses ille Dux Italiæ, cū in quadam ciuitate domum magnam haberet, in Italiam cum multis thesauris egressus, ad suprā memoratā urbem aduenit, ibiq; in domo sua occultē cisternam magnam fodit, in qua multa millia centenariorum auri argentiq; reposuit; ibiq; interfectis consciis, vni tantummodò seni per iuramentum condita commendauit: defun-

defunctoq̃ue Narsete, hæc sub terra latebant. Cumq̃; supradictus senex huius elemosynas assidue cerneret, pergīt ad eum, dicens: Si, inquit, mihi aliquid prodest, magnam rem tibi Cæsar edicam. Cui ille, Dic, ait, quod volueris; proderit enim tibi, si quiddam nobis profuturum esse narraueris. Thesaurum, inquit, Narsetis reconditum habeo, quod in extremo vitæ positus celare non possum. Tunc Cæsar Tiberius gauisus, mittit vsque ad locum pueros suos. Præcedēte verò sene, hi sequuntur attoniti: peruenientesq̃ue ad cisternam, deoperamq̃ue ingrediuntur, in qua tantum aurum argentumq̃ue reperiunt, vt per multos dies vix euacuaretur à deportantibus. Ex hoc ille ampliùs hilari erogatione dispensauit egenis.

Dum hæc gererentur, Iustinus impleto Lib. 5. c. 30
Imperij octauodecimo anno, amentiam quam incurrerat, cum vitæ finiuit. Quo sepulto, Tiberius Cæsar arripuit iam olim aggressum Imperium. Sed cū eum secundū consuetudinem loci ad spectaculum Circi præstolaretur populus processurum, parare ei cogitans pro parte Iustiniani insidias, qui tunc nepos Iustini habebatur; ille per loca sancta processit. Completaq̃ue oratione, vocato ad se vrbis Papa cum Consulibus

*Nota diuini-
nam prouidi-
entiam
erga pium
Imp.*

fulibus atque Præfectis, palatium est ingres-
sus. Dehinc indutus purpura, diademate
coronatus, throno Imperiali impositus,
cum immensis laudibus Imperium confir-
mauit. Factionarij quoque opperientes ad
Circum, cum cognouissent quæ acta fue-
rant, pudore confusi, sine effectu regressi
sunt, nihil homini, qui in Deo spem posue-
rat, aduersari valentes. Transactis igitur
paucis diebus, adueniens Iustinianus, pedi-
bus se proiecit Imperatoris, quindecim ei
centenaria auri deferens ob meritum gra-
tiæ. Quem ille secundum patientiæ suæ ri-
tum colligens, in palatium iussit adfistere.
Sophia verò Augusta, immemor promissio-
nis quam quondam in Tiberium habue-
rat, insidias ei tentauit intendere. Proce-
dente autem eo ad villam, ut iuxta ritum
Imperialem triginta diebus ad vindemiam
iucundaretur; vocato clam Iustiniano, So-
phia voluit eum erigere in Imperium. Quo
comperto, Tiberius cursu veloci ad Con-
stantinopolitanam ciuitatem regreditur,
apprehensamque Augustam ab omnibus
thesauris spoliauit, solum ei victus quoti-
diani alimentum relinquens: segregatisque
pueris eius ab ea, alios posuit de fidelibus
suis, mandans prorsus ut nullus de anterio-
ribus ad eam haberet accessum. Iustinia-
num

num verò obiurgatum tanto in posterum amore dilexit, ut filio eius filiam suam promitteret, rursusque filio suo filiam eius peteret: sed non est res sortita effectum. Exercitus eius Persas debellavit, victorque regressus, tantam molem prædæ detulit, ut crederetur cupiditati humanæ posse sufficere. Viginti elephanti capti ad Imperatorem deducti sunt.

Audiamus nunc sanctum Gregorium disputantem cum Eutychio Patriarcha de resurrectione carnis, ut intelligamus Tiberium Imperatorem non pepercisse Eutychio erranti, quamvis ipsum Eutychium maximi faceret, eo potissimum nomine, quod sibi Imperium prædixisset, ut Eustathius in eius Vita testatur. Sic igitur loquitur sanctus Gregorius in lib. Moralium quatuordecimo: *Et rursus circumdabor pelle mea.* Cap. 29.

Dum aperte pellis dicitur, omnis dubitatio vere resurrectionis aufertur: neque sicut Eutychius Constantinopolitana urbis Episcopus scripsit, corpus nostrum in illa resurrectionis gloria erit impalpabile, ventis, aëreque subtilius. In illa enim resurrectionis gloria erit corpus nostrum subtile per effectum spiritualis potentia, sed palpabile per veritatem naturæ. Vnde etiam Redemptor noster dubitantibus de sua resurrectione discipulis ostendit manus, & latius, pal-

V

panda

Luc. 24.

*panda ossa carnemque prae-
 & videte, quia spiritus carnem & ossa non ha-
 bet, sicut me videtis habere. Qui cum eidem
 Eutychio in Constantinopolitana urbe positus
 hoc Evangelicae veritatis testimonium protu-
 lisset, ait: Idcirco Dominus hoc fecit, ut dubi-
 tationem resurrectionis suae de discipulorum
 cordibus amoveret. Cui ego, Mira, inquam, est
 res valde quam astruis, ut inde nobis dubietas
 surgat, unde discipulorum corda à dubietate
 sanata sunt. Quid enim deterius dici potest,
 quam ut hoc nobis de eius vera carne dubium
 fiat, per quod discipuli eius ad fidem ab omni
 sunt dubietate separati. Si enim non hoc ha-
 buisse astruitur quod ostendit, unde fides disci-
 pulis eius confirmata est, inde nostra destruitur.
 & paulò infra: Cum pie memoriae Tiberius
 Imperator secretò me & Eutychium suscipiens,
 quid inter nos discordia versaretur agnouit,
 & utriusque partis allegationes pensans, eum-
 dem librum, quem de resurrectione scripserat,
 suis quoque allegationibus destruens, delibera-
 vit ut flammis cremari debuisset. hæc sanctus
 Gregorius. Ex qua historia perspicuè cerni-
 tur, quantus fuerit in eo Principe Catholi-
 cae fidei zelus. Erat enim Eutychius non so-
 lum Imperatori gratissimus & amicissimus,
 sed etiam Episcopus Regiae ciuitatis, & vir
 doctus, qui libros iam scripserat, & quod
 maius*

maius est, opinione sanctitatis, & signis atque miraculis editis clarissimus. Contrà, Gregorius homo externus, ordine Diaconus, ætate iunior, nulla scriptione celebris, nullo miraculo edito illustris, nullo beneficio Imperatori adstrictus: & tamé vbi cognovit Imperator opinionem Eutychij hæreseos labe esse suspectam; non solum eam reiiciendam censuit, sed etiam librum ipsum continuò flammis voracibus cremandum existimavit. Itaque pius Imperator, vbi periculum fidei Catholicæ vidit, oblitus est amicitiae & beneficiorum Eutychij, necnon dignitatis pontificalis, ætatis senilis, opinionis doctrinæ, vitæ sanctitatis, & famæ cælestium miraculorum, & cum Apostolo clamandum censuit: Etiam si Angelus de *Galat. i.* cælo euangelizet, præter id quod hætenus euangelizatum est nobis, anathema sit.

Audiamus rursus Gregorium Turoni- *Lib. 6. c. 30.* cum de felici exitu ex præsentī vita Imperatoris Tiberij. Hoc anno Tiberius Imperator migravit à sæculo, magnum luctum relinquens populis de obitu suo: erat enim summæ bonitatis, in eleemosynis promptus, in iudiciis iustus, in iudicando cautissimus, nullum despiciens, sed omnes in bona voluntate complectens, omnes diligens, ipse quoque diligebatur ab omnibus. Hic cum

ægrotare cœpisset, & se iam viuere desperaret, vocauit Sophiam Augustam, dicens: Ecce iam impletū sentio tempus vitæ meæ, nunc cum consilio tuo eligam qui Reip. præesse debeat. At illa Mauritium quemdam elegit, dicens: Valdè strenuus & sagax est vir iste; nam & sæpiùs contra inimicos Reip. dimicans, victorias obtinuit. Hæc enim dicebat, vt isto transeunte, huius coniugio necteretur. Sed Tiberius postquam consensum cognouit Augustæ de huius electione, iussit exornari filiam suam ornamentis Imperialibus, & vocato Mauritio ait: Ecce cum consensu Sophiæ Augustæ ad Imperium eligeris; in quo vt firmior sis, filiam meam tradam tibi. Et accedente puella, tradidit eam pater Mauritio, dicens: Sit tibi Imperium meum cum hac puella concessum. Vtere ea felix, memor semper, vt æquitate & iustitia delecteris. At ille accepta puella duxit eam ad domum suam; & transacta solemnitate nuptiarum, Tiberius obiit. Igitur celebrato iustitio, Mauritius indutus diademate & purpura, ad Circum processit: acclamatifq; sibi laudibus, largitis populo muneribus, in Imperio cōfirmatur.

Audiamus denique Nicephorum de morte Tiberij hæc narrantem: Imperator in lecto suo repositus, in somnis viri speciem

ciem ea forma, quæ neq; verbo neque scripto exprimi queat, & veste tam candida, ut cubiculum eius illustraret, vidit. Vir is manu protēsa talia verba ad eum præfatus: Hæc tibi, Tiberi, ter sanctū Numen renuntiat: Tyranni impij Imperij tui tēporibus non extabunt. Postquā autem euigilauit, & somnium illud amicis exposuit; legibus deinde naturæ, quamvis Imperator esset, obsecutus, terrenam tunicam deposuit, anima eam veluti umbraculum quoddam relincente, ad sedes superas euolante. Imperio Tiberius cum Iustino tribus annis, solus autem quatuor annis præfuit. hæc Nicephorus. Porro visio illa mirabilis ad Imperiū temporale Tiberij referri non potuit, cum iam cōpletum esset; neque ad Imperiū successoris, cum constet, Mauritiū à Phoca tyrāno crudeliter interfectū fuisse: proinde necesse est, promissionem illam ad cælestis Imperij securitatem esse referendum, ad cuius consortium Tiberius vocabatur; vnus enim ex illis fuit, quibus in iudicio dicitur, *Venite Benedīcti* Matth. 25. *Patris mei, possidete paratum vobis regnum à constitutione mundi. Esurini enim & dedistis mihi manducare, &c.*

Obiit Tiberius Imperator anno Domini 586. cum imperasset annos septem, tribus cum Iustino, quatuor solus.

V 3

VITA

VITA S. VENCESLAI REGIS BOHEMIÆ,

Ex D. Ioannis Dubrauij Olomucensis Episcopi Historia Bohemica libro quarto & quinto conscripta. Consentiant manuscripti codices, & antiquissima Martyrologia.

CAP. I.

SANCTVS Venceslaus Bohemiæ Rex, patre Christianissimo simul ac religiosissimo Vratislao, matre verò Drahomira Lucensi, à Christiana Religione alienissima, progenitus fuit: siquidem longè seueriorem immanioresque in Christianos, quàm Iezabel in Prophetas, ea se exhibuit. Qua de causa Ludmilla Vratislai Ducis mater, per speciem visitandi salutandique Drahomiram nurum suam Pragam adiit; reverà ut alterum filiorum (duos enim habebat, Venceslaum & Boleslaum) sibi dari nutriendum impetraret. Cui cum oblata esset tam à patre quàm à matre legendi, utrū accipere vellet, potestas, Venceslaum, in quo melior indoles meliorque spes elucebat, sibi adoptavit, aluitque deinceps pro suo:

fuò: præceptorem ei adiungens Paulum, virum opinione sanctitatis celebrem. Hic domi aliquamdiu puerum docuit, post auctor fuit, ut Budecum ad Nycenum presbyterum Iudi illic magistrum mitteretur, in-
quiens, maiores ibi eum in literis & disciplinis Christianis profectus facturum, inter multos condiscipulos Christianos. Nam hæc præcipua cura erat aviæ, ut nepos Christianam religionem ante omnia disceret coleretque.

Interim marito funerato, filiisque adhuc CAP. II.
ætate imbecillioribus, Drahomira regionem inuadit, ac statim odium in Christianos malè diu dissimulatum detegit, edicto proposito, ut templa Christiani occluderent, cultu cærimoniisque abstinerent: Sacerdotes populum ne docerent, nec Iudi magistri discipulos. Secus facientibus carcer, exilium, mors denuntiata. Pragæ Magistratus immutati, & pro Christianis idolatræ crudelissimi substituti, quorum instinctu clam palamque ac semper impune fidei cultores indignè tractabantur, occidebanturque. At si quis ex Christianis vel se defendendo, vnum illorum aliquem interfecisset, pro vno in decem capita animaduertebatur. Tum verò, secundum tam impia tamque immania matris facinora, Ven-

cesslaus, qui hactenus ne in Principatum succederet, ætatis studiorumque excusatione utebatur, auix maxime hortatu, pollicentis se quoque curarum nepotis fore participem, magno omnium assensu, regimen in Bohemos suscepit.

CAP. III.

Ad tollendam igitur fraternam discordiam, quam plerumque inter fratres bona indiuidua suscitare solent, in ipso statim Principatus introitu decernitur, ut Boleslao fratri iuniori pars aliqua hereditatis assignetur, finesque vtriusque ditionis constituantur. Boleslauia ei assignata est cum territorio suo ultra Albim, ita ut Albis fluuius citra ultraque terras finiret. Mater iuniorem filium moribus suis congruentem secuta est: Venceslaus Principis thronum solus Praga obtinuit. Alius fortasse mutato honore, id quod subinde usu venire videmus, mores quoque aucta dignitate & potentia immutaret: at Venceslaus ab omni ambitione inuictus, demissiùs pænè Princeps quàm priuatus agebat, aliquantoque diligentius obseruabat, ne quid de instituto prioris vitæ apud auiam transactæ intermitteret: nam & noctibus intensius quàm priùs ad psallendos Psalmos laudesque Deo dicendas utebatur, & dies per plura pietatis officia transigebat, crebriùs in funus prodeundo, lan-

languentes inuifendo , laceros nudosque conueftiendo , pauperes alimentis fuf-tendendo. Inftituerat prætereà ſibi inedia ac vigiliæ quoddam quaſi cum auia certamen, experiri fatagens , ipſe an illa sæpius ieiunaret peruigilaretque.

Interim Drahomira dirumpi præ inuidia, CAP. IV.
ſecumq; nefaria aduerſus ſocrum meditari, quòd illa maiore gratia apud Venceſlaum, quàm ipſa mater polleret, Religionemque Chriſtianam nimis prolixè proueheret. Nec longius nefaria meditata perficere diſtulit, quàm inuenit cædis perficiendæ audaces ſicarios. Inſtante exitij die , quem Ludmilla futurum diuinitus præuiderat , vocat ad ſe clientulos omnes , mercedemque cuique ſuam diſſoluit. Et prætereà quidquid in penu, in cella, in horreis, loculis redundaret, id ſua manu in ſinus uſuſque pauperum transfudit. Poſt hæc remotis arbitris, ac ſolo adhibito Paulo Sacerdote, ante aram prouoluitur, factaque exomologefi, de manu eiufdem Sacerdotis ſacroſanctum vitæ accipit viaticum, mox inde fini ſuo propitiū Deum exorat; cùm ecce tibi eadem hora ſubmiſſi à nuru Thomas & Gumo, non tam genere quàm ſcelere nobiles, in ſacrariū irrumpunt ac velo, quo ſancta vidua caput velatum habuit , elis faucibus proſtratam ſuffocant.

V 5

Non

CAP. V.

Non defuere qui Venceslaum ex cæde
 auix vehementer perturbatum, ad vlcis-
 cendum inflammarent : alij , si ipse vlisci vel-
 let, sibi hanc dari prouinciam deposcebant.
 Utrosque ille quàm potuit grauissimis ver-
 bis corripuit ; quòd aliena à pietate erga
 qualemcumque matrem , aliena deinde à
 modestia & tolerantia Christiana suadere
 auderent, ignari, aut parum memores, quòd
 Deut. 33. ore suo dicat Dominus : *Mea ultio est, &
 ego retribuam illis in tempore.* Quemadmo-
 dum euenit , anno nondum reuoluto , vt
 ambo sceleris ministri non solùm miserè,
 sed etiam notabiliter extinguerètur, notam
 videlicet vterque suam ad posteros trans-
 mittentes. Nam cùm alter eorum barba
 rutila insignis, alter malè pedatus esset, non
 aliter nati natorum, & qui hodie nascuntur
 ab illis , vel rufescunt , vel à pedibus labo-
 rant : nam vtraque familia apud Bohemos
 etiam nunc extat. Ceterùm , impiæ matri
 ideò impunitas diuturnior concessa videba-
 tur , vt filij pietas , quò diutiùs illum mater
 infectaretur, hoc clarior euaderet. Tamen si
 alios quoque , præter ipsam matrem, mole-
 stos sibi infestosque habuit , quasi parum
 idoneus ad exequenda Principis munia ,
 quæ exequi non per sacra & carimonias,
 sed magis per arma & acies oporteret.

Ante

Ante alios autem Radislaus Gurimensis Princeps, Mistibogij filius, hac vana spe inflammabatur, quasi solo armorum terrore Venceslaus expugnari posset; agros eius incurfare, armatoſque illi viros ostendere incipit, nec ullos legatos de pace agentes audire vult: immò quò magis Venceslaus pacif studuit, eò maiorem etiam suspicionem pauporis aduerfario faciebat; adeò vt superbissimè tandem Venceslao responderet, Se, nisi tradito sibi totius Bohemix Principatu, ab armis non discessurum. Coactus igitur à suis Venceslaus, militem atque aciem contra Radislaum instruit: vidensque omnino iam sibi dimicandum esse, classicum cani vetat, priusquam ipse Radislaum alloquatur. Data alloquendi potestate, Si aliter, inquit, nisi praelio res pacificari nequit, cur non potius sine magna aliorum clade, sine multo infantium sanguine, ipsi inter nos singulari certamine decernimus? victoriæ permissuri, vter vtri iustius imperare debeat. Perinde quasi iam manibus victoriam Radislaus teneret, conditione proposita lætari, instareque, & ad pugnam ineundam festinare. Loriculam super cilicinam vestem indutus, paruoque ensiculo succinctus erat Venceslaus, cum in arenam prodiret. At Radislaus cataphractus, hastatusque cum
longa

longa insuper machæra contrà sese inferebat, erecta vtrimque acie velut ad nouæ rei spectaculum. Nouum enim esse videbatur, vt ipse Venceslaus pro imbelli habitus, componere se cum bellatore auderet. Vbi sub ictum ventum est, alter signo Crucis frontem pingit, alter hastam vibrare festinat, idemque subitò Angelos videt, atque hanc vocem velut ab homine promptam, ponè se exaudit: *Nè feri*. Ac nemine conspecto qui illam prompserit, vim Numinis fauore propitio Venceslaum prosequentis veritus, humi procumbit, veniam audaciæ exposcit, seque potestati victoris permittit. Alleuat prostratum Venceslaus, dataque venia, & dignitate ei restituta, monet vt contumaciam in obsequium debitum vertat, ne post grauius ab irato Numine plectatur.

CAP. VII.

Hæc in Germaniam celeriter nuntiata, aulam Cæsaris apud alios admiratione, apud quosdam irrisione affecerunt. Ortho tunc regnabat, qui Germanorum primus coronam Cæsaream legitimè sibi traditam in Germaniam intulit; vir illo honore, ob celebrem pietatem & raram in bellis felicitatē non indignus, nec alienus à Venceslao propter eximias ipsius virtutes; & qui vnà cum aliis Germaniæ Principibus maiestatem Cæsaream officiosè comiterque conserua-

feruabat. Is Ottho deliberandi causa diem ad conueniendū Principibus VVormatiam edixerat: quod vbi Venceslaus quoque vocatus sine vlla dilatione venisset, dicitur postridie dum solemne Sacrificium cunctantiū Sacerdos facit, ipse similiter cunctantiū curiam introiisse, eamq; moram, quasi ex ambitione nata fuisset, Principes adeo ægrè tulisse, vt conspirarēt, ne quis ipsorum venienti assurgere, neu supra se locum confidendi dare vellet. Persuasum denique Cæsari fuisse, vt sine vllō honore Bohemum velut arrogantem transmitteret. At Cæsar ex conspectu duorum Angelorum qui Venceslaum in curiam deducebant, subitoque ibidem disparuerant, obstupefactus, throno exilit, aduersum vadit, ipsumque Venceslaum tantum non adorat, ac manu mox sua ad subsellia perductum, assidere sibi proximum iuber. Ceteris vehementer factum admirantibus, Cæsar facti causam aperit, vicissimque miratur quod nemo præter se quispiam Angelos, tam clarum manifestumque sui spectaculum exhibentes, oculis suis adspexerit. Hic Moguntinus pontifex, se quidem nihil planè vidisse inquit, ceterum horrore quodam se perfunctum fuisse confitetur: ac tunc demum famę quoque nuper inuulgatę, quemadmodum
vide-

videlicet interuentu Numinis ab hostis impetu seruatus fuerit Venceslaus, fidem se habere, quando in præsens paria numina eundem à calumnia vindicauerint: quare inde simul vniuersi errati veniam deprecantur.

CAP. VIII.

Cæsar prætereà hunc tam liberalem hospiti habuit honorem, vt potestatem ei petendi concederet, quidquid petendum sibi à Cæsare putaret: existimabat autem Cæsar, gloriosa & ambitiosa petiturum. At is brachium diui Viti ex Gallia, sub Ludouico Pio Corbeiam in Saxoniam translato, magnaque religione in Bohemia culti: dein Sigismundi quoque Burgundiæ Regis, proptereà quòd Vandalicę nationis fuerit, Reliquias sibi dari postulauit. Ad quæ postulata Cæsar subridens, Feres tu, inquit, primo quoque à reditu nostro in Saxoniam tempore, quas habere cupis Reliquias, interim dona Cæsare digna à nobis accipe: Regium in primis decus, quo te ex dignitate tua meritò decoramus, deinde tributo absolui-
mus, quod Carolus quondam soluendum Cæsaribus instituerat. Iussit postremò & insignia sua Venceslaum ferre, fuscam aquilam in clypeo candido. Facile hoc, & illud alterù de tributo amplexus est Venceslaus; sed idem caput suù diademate cingi, seque Regem

Regem inungi, aut Regem à suis appellari nullo pacto sustinuit: quamquam à Cæsare, atque ab aliis Regibus & Principibus Rex in epistolis salutaretur.

Allatis ex Saxonia sanctorum corporum CAP. IX.
Pragam Reliquiis, Venceslaus omnia ædificia missa faciens, applicare architectum manus ad ædem diuo Vito designandam construendamque imperat: subiiciens, dignissimum esse vt profanis ædificiis sacra anteuertant. Ceterum, antequam illa inchoata erat, iam in templo diui Georgij à patre suo extructo, Venceslaus locum sepulcro, in quod auia Ludmilla transferretur, delegerat, simulque absoluerat, ita vt nihil iam reliqui superesset, nisi vt translatio funeris ex arce Thein in arcem Pragensem à Sacerdotibus perageretur. Auertere vnus aliquis ab instituto Venceslaum cupiebat, inquit iam pridem corpus auix computruisse; quandoquidē plus triennium esset, cum illud terra obrutum iaceret; proin nimis seram fore eius corporis translationem. Excipit Venceslaus: Et si quidem iam in puluerem sit redactum, vel ipsum puluisculum perferri ad me cupio: sed contrà fortasse eueniet, ac tu, mi pater, autumas: fac modò vt desiderio meo vnà cum ceteris morem geras. Paret ille, seque suis collegis
addit

addit comitem, vsque ad locum vbi sepulta erat Ludmilla: sepulchro recluso, nares statim omnium odor perfudit suauissimus, adhucque suauior arcula reclusa, in qua corpus tabe incorruptum integrumque iacebat, nisi quòd parum quiddam ei de naso decerpserat arculæ tabella confracta, quam incuriosè quidam tractauerat. Igitur læti re præsentī Sacerdotes, feretrum subeunt, corpusque miraculis clarum quòd iubet Venceslaus deportant, conduntque. Sed enim Architecti quoque in templo diui Viti proximo operas vrgent, vt opus celerius excre-scat, festinante Venceslao ad noui templi dedicationem, sanctarumque Reliquiarum consecrationem.

CAP. X.

At tunc primùm creandi Pontificis mentio orta: siquidē nullus ad eam vsque diem Pontifex in Bohemia creatus erat, sed à principio Morauia Antistes, postea ex Ba-uaria Ratisponensis, officio Pontificali apud Bohemos fungebatur. Idem Ratisponensis in Morauia quoque aliquamdiu faciebat, quamdiu videlicet vacua sedes ibidem suo Præsule fuerat, nempe annis quinque & triginta. Quamquam igitur Venceslaus Ratisponam pro Pontifice (diuus VVolfgang tunc Pontifex ibi erat) qui templum diuo Vito destinatum in arce Pragensi dedicaret,

dicaret, suos quosdam miserit, non ideò tamen curam remisit quærendi viam, qua facillimè ad inducendum Pragæ Præsulem, ut instituerat, peruenire posset : sed has eius pias curas, sicut plerasque alias ad Religionem pertinentes, mater nimis impia interturbare non destitit. Pari modo, ut mater, Boleslaus moratus armatusque ad turbandam & oppugnandam fratris pietatem fuit. Nam si aliàs vinquam educatio ostendit, quantum momenti afferat ad ingenerandos hominibus mores, tum certè in illis duobus alumni ex eisdem parentibus prognatis mirificè demonstravit: nam Venceslaus, qui à Ludmilla muliere religiosa educatus à puero fuerat, omnibus pietatis & cuiusvis præterea virtutis numeris vir absolutissimus euasit, sicut è diuerso Boleslaus tum impius, tum sæuus, tum indomitus & violentus: quia Drahomira, quæ Boleslaum aluit, comparibus vitiis infectissima erat, paratissimaque per quamlibet occasionem incrementa bonæ Religionis impedire, ac potissimum in Sacerdotes desæuire; quasi penes illos culpa resideret, quòd disciplinæ (ut ipsa dicebat) ignauissimæ deditus Venceslaus, maiorem diei noctisque partem circum sacella & aras, aliasque cærimonias, quàm in negotiis seriis & ad Principem

X

perti-

pertinentibus contereret, quodque illorum ipsorum Sacerdotum instinctu, neque reuerentiam erga matrem, neque charitatem erga fratrem continuaret.

Itaque custodes plagosi per vias appositi erant, qui ictu plagarum Sacerdotes prohiberent, quò minùs Venceslaum per quotidiana officia adire possent. Qua de re factus certior VVolfgangus, venire in Bohemiam ad dedicandum templum superfedit, hac excusatione vsus, tamquam breuì futurum esset vt Antistes Pragæ inauguraretur. Ceterùm nec Venceslaus fauorem erga Sacerdotes cultumque, nec vicissim illi officium solitum, qualicumque iniuria accepta, interrumpi sibi permiserunt, furente indies magis ac magis Drahomira, cùm quotidie fermè audiret, tanti esse Venceslaum in Sacerdotes obsequij, vt ipse suis manibus vinum inter Sacra, libaque & thura illis subministraret, vt idemtidè illos domi quemque suæ inuiseret, necessariisq; rebus ante tempus succurreret, vtque à seruitute profana multos redimeret, & ad seruitia Dei illos conuerteret: vt denique noctu plerumque, vel in ipsa hieme nudis incederet pedibus ad templa, in quibus peruigilia celebrabant Sacerdotes. Ferunt Podiuinum, qui intimus Venceslao & assiduus comes fuerat,

rat, malè aliquando à frigore & niuibus acceptum fuisse, quamquam ipse calceatus Ducem suum discalceatum subsequeretur, rursus tamen subitò incaluisse, cùm primum videlicet pedes suos, quemadmodum iussus erat, vestigiis Ducis impresserat.

Paulisper inter hæc suam rabiem Draho-mira remisisse videbatur, postquam certior facta erat, Venceslaum tædio vitæ aulicæ & curarum publicarum, circumspicere locum sepulchrum, in quem cum sodalibus diui Benedicti cucullatis ipse quoque sodalis futurus diuerteret : nam & Romam ad Pontificem suos iam misisse inaudierat, qui peterent, ut illius auctoritate liceret in Bohemia eiusmodi Sodalitium institui. Sed dum Romanus Pontifex legatos diutiùs propter domesticas seditiones retinet, dumq; interim Venceslaus de consuetudine sua, deq; sacris & cærimoniis nihil quidquam inter-mittit, non sustinens vltiorem dilationem impatientissima mulier, conceptum iam pridem de tollendo Venceslao parricidium properat. Natalis tunc dies infantuli recens ex Boleslao editi se obtulerat. Ad hunc simul concelebrandum mater iuxta atque Boleslaus frater verbis suauissimis Venceslaum inuitant, gaudio ipsorum communi oblatum esse tempus dicentes, quò tota

domus principalis meritò gaudere debeat, nato ex Boleslao Principe, qui spem successionis in Principatu Bohemiæ continuaret. Siquidem Venceslaus præter aliam rebus in aliis abstinētiā, & continentia constantiaque seruatae quoque in omne æuum suum virginitatis suæ clarus fuit: & Boleslaus tunc primum pater esse incepit, producto ad spem successionis filiolo.

CAP. XIII.

Hoc igitur modo inuitatus Venceslaus, tametsi multo satistempore à quouis matris fratrisque contubernio se remouisset, attamen ut antiquum seruaret morem suum, nemini cuiquam, non solum natura coniunctissimis, officium suum denegandi, ad natalitia se Boleslauiam venturum ad diem recepit. Interimque in cubiculum secedēs, quos fidelissimos habuit, secum ad fenestram seducit, iubetque eos in atrium Pauli presbyteri frequētia Sacerdotum refertum despicere: ac mox altè suspiria ducens, Quā cuperem, inquit, vanus videri augur! utinamque fiat, ut irritum venti secum auferant meum augurium! videre tamen mihi iam videor, eum locum, qui mea cura tanto Sacerdotum cœtu, quantum cernitis celebratur, paulò post discessu hinc meo repente desertum iri; eadem videlicet Sacerdotum futuram per ista diuinans, quæ illis ab inter-

interitu suo immineret. Ceterùm, qui tunc præsentés adèrant, non intelligebant quorsum dicta hæc tenderent. Podiūnus tamen scopum cōiectura attingebat, cū Ducem suum reuocare à proposito Boleslauiam eundi tentaret, sed incassum; olim namque pro Religione & pietate Venceslaus nullum periculum, nullum casum, nullum vitæ discrimen sibi vitandum putauit: ideoque die lustrali appetente, nihil ampliùs moratus, quàm dum se apud Sacerdotem expiat, dum aræ adstat, dum sacrosanctum delibat libum, extremum salutis viaticum, inde continuò Boleslauiam petit. Sed neque Boleslaus procrastinat fratri ire obuiam, eum complecti, gratulari aduentui composita adulatione. Conuiuio dein mater adhibita, quantò magis ad omne facinus exercitata erat, tantò bladiùs hospitem filium habuit, traxitque in seram noctem conuiuium.

At Venceslaus, quamquam intelligeret CAP. XIV.
quò tenderent blanditiæ, & quam ob rem produceretur conuiuium, non tamen omisit, quin de media nocte surgens iret in templum, vt orationes solitas Deo optimo commemoraret. In ea re occupatum inuadit Boleslaus frater, à matre ad scelus vigilantiore excitatus, ac primò ab ictu suo frustratur, ense sibi ob insperatum stuporem

X ; elapso;

Psal. 51.

elapso; mox redeunte animo & furore, quē sceleris participes clientuli extinguī nō patiebantur, ictum repetit, ac facīle inermem fratrem, patienterque plagam excipientem, interficit: dissimulataque nece, manē statim filium lustrat, nomenque ei inter lustrandum, Strachyquas, à terrore conuiuij mutato vocabulo, quōd ipse terribile parricidīo effecerat, indit. Adcō gloriari in malitia etiam sua gestiebat, qui potens erat in iniquitate, nescius adesse Deum bonis omni tempore, tum in vita, tum in morte; quemadmodum illustrissimo tunc patuit exemplo. Eadem quippe nocte Rex Daniæ (vide quanto intervallo à Bohemia semotus) per quietem se admonitum oraculo testatus est, vt Venceslai in Bohemia à fratre obtruncati memoriam sibi colendam susciperet: id quomodo ab ipso factum, cærimoniæ, Sacerdotes, templum in Dania diuo Venceslao dedicatum declarant. Vt interim alia pænē infinita miracula datâ operâ transeamus, partim quia nota & illustria, partim quia decantata à nostratibus, diebus pænē omnibus habentur.

CAP. XV.

Boleslaus, parto audacia & scelere Principatu, audacter etiam illum & non sine scelere ab initio gessit, idque non obscure: siquidem clara voce omnibus qui aliqua
cum

cum diuo Venceslao familiaritate cōiuncti erant, ac præcipuè Sacerdotibus, quicumque sua sponte Bohemia non decederent, carcerem, exilium, cædem denuntiauit. Adiecit mater, ne cæsi terræ mandarentur; sed abiecti vt in campis iacerent, esca dilanianda canibus alitibusque. Intra breue igitur tempus vaticinium diui Venceslai completum fuit, vaticinantis, fore vt à discessu suo atrium Pauli presbyteri Sacerdotibus vacuum redderetur. Correptus inter præcipuos ad supplicium Podiuius quoque, totum biennium in furca sub dio pendens, nulla tæbe violari, nedum corrumpi conficique potuit, donec post haustam terræ hiatu Drahomiram sepeliretur. Nam quò manifestior grauiorque pœna appareret, quæ meritò de crudelissima atque impiissima muliere exigenda fuerat, eò loci, quo adhuc insepulta iacebant ossa occisorum Sacerdotum, terra sua sponte dehiscens viam Drahomiram vnà cum curru & qui simul vehabantur absorbuit, auriga solo incolumi, qui ad aram iuxtà sitam (nunc haud extat) equo defiliens accurrit, cum fortè tintinnabulum tinnire audisset, vt Corpus Domini adoraret, execrante illum Drahomira omnibus maledictis. Quare locum eum etiamnum vt execratum funestumque decli-

nant viatores, qui arcem Pragensem ab Occidentali plaga petunt : quamquam terra eodem loci in statum pristinum cohæserit. Puniti & illi diuinitus, qui Boleslaum affectati, gladios etiam suos aduersus diuum Venceslaum strinxerunt : pars enim eorum mente alienata in rabiemque versa, præcipientes ex alto deorsum se dabant : quidam in eos gladios, quos nudauerant, incumbere. Ad hæc, templi paries, quem prope occisus fuit diuus Venceslaus, velut cædis ipse quoque conscius, aut potius vt testis foret sceleris sempiterni, nulla vllius opera abstergi eluique potuit à cruore, quo respersus ex corpore diui Venceslai fuerat.

CAP. XVI.

Hæc tandem tot prodigia, tamquam varia supplicia, Boleslaum exterruerunt, vt mitius deinceps cum Christianis agere, sæuitiamque suam aduersus illos remittere inciperet. Accessit prætereà nouus ex Cæsare Otthone terror, minitante fratricidij ultionem, cum primum Hunnicum bellum confecisset. Quippe Hunni ex Pannonia vsque in Sueuiam progressi, urbem Augustam obsidione premebant, tanta suorum multitudine, vt dubitauerit Ottho, prodire ne in aciem contra tantas copias, an castris se tenere securius fuerit: sed dubitantem Vldricus Augustæ Præsul, in Diuorum

rum numerum postea relatus, indicto vnus diei ieiunio, ad ineundam pugnam impulit, certam ei victoriam (si pugnauerit) promittens. Nec fefellit: tantam enim inter Hunnos stragem Ottho edidit, vt Lycus Augustanus fluuius mutatis in cruorem aquis alueum suum fœdauerit. Capti in eadem pugna duo Hunnorum Duces supplicia crucibus luerunt. Ex Cæsarianis maximè insignis, Conradus, Otthonis gener cecidit. Atque hoc interim spatio, quod per moras huiusce prælij interiectum fuit, Boleslaus vicum quem inhabitabat, fossis, vallis, mœnibus cingendum muniendumque suscipit, & quò celerius susceptum opus perficiat, vicinæ nobilitati iniungit, vt certum quisque paterfamilias colonorum suorum numerum operi continuando attribuat. Cœpit abnuere operam eiusmodi senex quidam nobilis, inquiens: Exemplum se à maioribus non accepisse, vt ædificandis muris operam aliquam locaret, sed vt potius pro salute Principis, in campo & in ipsa acie, siue eques, seu pedes dimicaret. Hic sæuus Boleslaus (sic iam is passim cognominabatur) solita sæuitia incensus, At ego, inquit, nunc statim exemplum in te statuam, quò ceteri admoniti discant parere Principibus, non autem imperia illorum contemnere:

strictoque gladio miserandum senem confodit, ac denuò vicinis iniungit, vt iussa obedienter faciant.

CAP. XVII Operi absoluto, cinctoque oppido, nomen Boleslauia manet. Huic oppido cum Ottho appropinquaret, missis obuiam Legatis, Boleslaus pacem magnis precibus cum ipsis oppidanis cœpit petere. Valdè præcisè Ottho eis respondit, aliter pacem coire non posse, nisi dedito sibi fraticida Boleslao. Porro Boleslaus omnibus rebus ad sustinendam obsidionem necessariis, frumento, pecore, telis, armis, viris instructus in oppido erat. Non ita Cæsar foris commeatu abundabat, vacuïs vbique ex vicino horreis, & pecoribus longiùs in siluas abactis. Vnde paulò post factum, vt Cæsar ob rerum penuriam mutata duriore sententia, animum ad molliora deflecteret. Cum igitur denuò Boleslaus, quamquam satis, vt dixi, instructus, cōscientia tamen scelerum timidus, gratiam Cæsaribus ambiret, pacemque oraret, eam his tandem legibus impetravit. Prima erat, Vt commissa piacula omnibus modis expiaret. Altera, Vt exules Christianos reuocaret ab exilio. Tertia, Vt tributum nuper remissum denuò exoluumdum reciperet. Vltima, Vt eadem conditione atque ceteri Germaniæ Principes,

cipes , in nomen Cæsaris iuraret.

Obsidione soluta , Boleslaus suis præce - CA. XVIII
pit, vt è conspectu suo sepulchrum & corpus sancti Venceslai remoueant , idque noctu per multas tenebras Pragam transferât, occulteque sine arbitris condant in æde diui Viti, ab eodem Venceslao ædificata. Grauitè nimirum ferebat , signa & prodigia idemtidem ad corpus sanctum nunc in cæcos, nunc in claudos, nunc in surdos ediputabatque fore , vt illo ad diui Viti ædem sepulto, Vito etiam potius quàm Venceslao miracula edita attribuerentur . Sed vide, vt in se innocentia & sanctitas, vt denique ipsa veritas contra astum & improbam calliditatem perfacile defendant. Plaustro corpus impositum fuit, iussusque auriga quantum posset accelerare , vt ante lucem è Boleslauia Pragam perueniret . At aurigam magis equi , quàm ipse equos regebant . Itaque cum primò ad amnem, cui Rochetnicze vocabulum, aquis tunc redundantem , deinde ad Vultaiam adhuc redundatiorem ventum esset , non ponte, vt ille volebat, sed pleno alueo vtrumque amnem equi transeunt, pedibus tantum non siccis , mox ultra Vultaiam ad carcerem arcis Pragensi subiectum immobiliter subsistunt , nec inde vlla vi se amoueri patiuntur nisi die clarissimo,

fimo, cùm iam multorum aliorum spectatorum oculis res esset testatissima, corpus diui Venceslai vectores vehere, id quod obstinatè priùs illi negabant, quàm victi ad vnum omnes è carcere illo dimissi fuissent. Corpus, præterquam quòd à corruptione post triennium incolume repertum est, insuper etiam ab omnibus vulneribus erat percuratum, vna tantùm auricula capiti defuerat; eam Premislauia Venceslai soror ad limen templi, in quo occisus frater erat, inuentam, arcula clausam habuit. Ceterùm re, vt gesta fuit, cognita, ne quid de corpore sancto desideraretur, eandem statim Pragam misit, statimque illa capiti suo adhæsit.

Occisus fuit S. Venceslaus anno Domini 938. Vide Æneam Silium in Historia Bohemica cap. 14. & Cardinalem Baronium Tomo 10. Annalium, & in Notis Martyrologij ad diem 28. Septembris.

VITA

VITA ET VIRTUTES

S. HENRICI IMP.

Vitam eius scripsit Adelbodus Episcopus Ultraiectensis, teste Sigeberto in lib. de Viris illustribus cap. 139.

Quam nos hic posuimus, descripsit Henricus Camisius in sexto Tomo Antiquæ lectionis: an sit eadem cum illa quam scripsit Adelbodus, ignoramus: sed cuiuscumque sit, grauis valdè, & fide dignissima est.

A NNO ab Incarnatione Domini millesimo primo, ab Vrbe autē condita millesimo septingentesimo quinquagesimo secundo, Otthone tertio defuncto Romæ, vacante Regni solio, cū de Principe ageretur subrogando, omnium vota nutū diuino ad eum inclinantur, qui tunc in Regno potissimus habebatur. Fuit namque eodem tempore quidam Dux Bauiariorum nomine Henricus, Henrici eiusdem gentis Ducis filius, (cuius temporibus sanctus VVolfgangus Ratisponensium præfuit

fuit Episcopus) tam bonitate, quàm nobilitate Regia conspicuus, & vniuersa morum honestate præclarus. Hic initium sapientiæ timorem Domini pleniter est secutus; quia erat omni litterarum studio principaliter imbutus, & totus sana fide & actione Catholicus. Hic ergo ab omnibus pari voto & communi consensu omnium adsciscitur, diuina utrique disponente clementia, ut per temporalis Regni fastigia ad culmen regni cælestis pertingeret. Terrena enim bona omnia', sicut vsu malo à salute alios præpediunt, sic alios vsu bono ad salutem perducunt.

Cumque prædictus Rex Henricus necdum Cæsaris vel Imperatoris obtineret dignitatem, apparuit ei Ratisponæ beatus VVolfgāgus Episcopus tali visione: Visum namque est, quòd manens in Ecclesia sancti Emmerammi Episcopi & martyris, accederet orādi gratia ad beati VVolfgangi sepulchrum, in eadem basilica situm; cumque ibidem Dominum & sanctum VVolfgangum intimis precibus conaretur exorare, subito videbatur ei ipse sanctus VVolfgāgus astare, eumque huiusmodi verbis appellare: Intuere diligenter litteras in muro, quæ sunt secus tumulum meum scriptæ. Erat autem, sicut videbatur, scriptum solummodo,

dò, POST SEX. Euigilans verò Rex, diuturna tractatione secum reuoluit paucissima huius visionis scripta. In primis ergo arbitratus, quòd post sex dies esset moriturus, multa dispensat pauperibus; cumque dierum sex numerus præterisset, & nihil in se Rex molestiæ corporalis sensisset, putauit prædictam visionem ad sex menses pertinere, & eadem cœpit timere. Transactis verò sex mensibus, cum nihil infirmitatis in se pateretur, arbitratus est hunc numerum ad sex annos pertinere; ideoque quæ & suprà cœpit timere. Cumque sex annorum numerus integer præterisset, & septimi anni dies reuolutus venisset, ipso die per Apostolicam benedictionem suscepit Cæsaris dignitatem. Tunc tandem sentiens qualis esset sua visio, gratias egit Deo, sanctoque VVolfgango, qui sibi talem dignatus est reuelare sublimitatem.

Vinctus ergo in Regem beatissimus Dei famulus Henricus, temporalis Regni non contentus angustiis, pro adipiscenda immortalitatis corona, summo Regi, cui seruire regnare est, militare disposuit. Summam etenim diligentiam in amplificando cultu Religionis adhibuit. Ecclesias Dei ditare possessionibus, & immensis ornatibus augere cœpit, Sedes quoque Episcopales,
Hil-

Hildinsheim videlicet, vbi à puero fuit enutritus, & litteras edoctus, Magdeburge & Argentinam, & Merseburg, quæ barbarica immanitate adiacentium Sclauorum vastatæ fuerant, restaurauit; & tam ipsis, quàm aliis Episcopatibus per vniuersum Regnum, in possessionibus & ornatibus innumera dona distribuit. Hildinsheimensi verò Ecclesiæ sanctum Gothardum diuina edoctus reuelatione præfecit Episcopum. Quid autem Merseburgensi Ecclesiæ præ aliis contulerit, futurorum ex parte volumus notificare. Hæc etenim Ecclesia tempore magni Otthonis, illius, inquam, qui iuxta Lycum fluuium sub sancto Vdalrico Pontifice glorioso Vngaros prostrauit, & Reges eorum, Leuicam & Assur, Ratisponæ Principibus hoc fieri adiudicantibus, in partibus suspendit; assiduis incursionibus & hostili vastatione Sclauorum redacta est ad nihilum. Et quia violentiis vicinarum nationum non poterat resistere, in possessionibus, in religione, & in omnibus quæ ad Pontificalem dignitatem pertinebant, penitus cœpit deficere.

Accidit autem eodem tempore, vt Magdeburgensis Ecclesiæ Archiepiscopus vniuersæ carnis viam ingrederetur, & Merseburgensis Præsul propter sapientiam sibi à Deo

Deo præstitam, & propter virtutes plurimas quibus ornatus erat, ob quas & Otthoni Magno gratissimus erat, in cathedram Magdeburgensem à prædicto Rege constitueretur. Factum est autem, vt Merseburgensis Episcopatus prorsus destrueretur, & quæ potiora erant illius Ecclesiæ, in prædiis, in ministerialibus, in ornamentis, in ditionem Magdeburgensis Ecclesiæ transferrentur, & de quibusdam reliquiis possessionum, quæ Merseburgensi Ecclesiæ remanserant, Abbatia inibi constitueretur. Quod factum vsque ad tempus piissimi Confessoris Christi Henrici sine mutatione permansit. Qui conuocatis Principibus Regni sui apud Chufelingenburg curiam celebrauit, atque vniuersis in id ipsum consentientibus, Poloniam, & Bohemiam, ceterasque Sclauorum adiacētes regiones, quæ fines Regni sui vastauerant, debellare disposuit. Congregato itaque exercitu contra prædictas nationes, aciem direxit, & transiens per locum qui VValbech dicitur, gladium sancti Hadriani Martyris, qui pro reliquiis multo tempore ibidem seruabatur, accepit, quo accinctus, ex toto corde suo clamauit ad Dominum, dicens: *Iudica Domine nocentes me, expugna impugnantes me; apprehende arma & scutum, & exurge in adiutorium mihi.*

Psal. 34.

Y

Inde

Inde progrediens castrametatus est in campo, in quo Merseburgensis Ecclesia sita est; & videns locum desolatum, ingemuit, & ait: Beate Laurenti Martyr Christi, si tuo interuentu has barbaras nationes, ad quas pergo, Romano Imperio & Religioni Christianæ subiugauero, locum istum desolatum, tuo nomini consecratum, diuina fauente gratia, in pristinae dignitatis statum reformabo. Vt ergo Princeps Poloniæ & Bohemiæ, & ceterorum Sclauorum primates, Romanum Imperatorē cum exercitu suo, vt eos debellaret, aduenire cognouerunt; collecta innumerabili barbarorum multitudine, in bellum obuiam processerunt: quod Regi piissimo per speculatores suos citissimè innotuit; & sicut in omnibus angustiiis suis solebat, ad orationis arma confugit: & inuocato super se nomine Domini, beatis Martyribus Laurentio, Georgio, & sancto Hadriano semetipsum suumq; exercitum protegendum cum summa deuotione commisit. Cumq; omnes Communionem Corporis & Sanguinis Dominici percipissent, ad locum certaminis peruenerunt. Vbi cum Rex beatissimus verbis exhortatoriis, quatenus viriliter agerent, animos singulorum confortasset; videns aduersariorum innumerabilem multitudinem,

nem, clamavit ad Dominum, dicens: *Domine Deus, qui conteris bella ab initio, eleua brachium tuum super gentes, quæ cogitant seruis tuis mala: Disperge illos in virtute tua, & depone eos protector meus Domine: Deus meus pone illos ut rotam, & sicut stipulam ante faciem venti.* Iudith 9.
Psal. 58.
Psal. 82.

Hæc eo orante, aperti sunt oculi eius, & vidit gloriosos Martyres, sanctum Laurentium, beatum Georgium, & sanctum Hadrianum, cum Angelo percutiente, exercitum suum præcedentes, & hostium cuneos ad fugam propellentes. Et sicut exercitus Sennacherib ab Angelo percutiente contritus est & disperiit; sic omnis ista barbarorum immanis multitudo per virtutem Dei contrita, proiectis armis sine effusione sanguinis Christianorû fugæ præsidium quæsiuit. Quod videns Rex sanctissimus, eleuatis oculis ac manibus in cælum, gratias egit Domino, dicens: Benedico te, Rex cæli & terræ, qui superbis resistis, & humilibus das gratiam, qui custodisti diligentes te, & glorificatus es in gentibus propter datam nobis de cælo victoriam. Victis itaque barbaris, & quæ ad futuram pacem prodesse poterant pactione firmissima stabilitis; Rex beatissimus cum suis reuersus est ad propria, vniuersis glorificantibus Deum & laudantibus,

Y 2

bus, qui præstat auxilium omnibus in se sperantibus. Cumque Imperator Christianissimus Poloniam, Bohemiam, & Moraviam tributarias fecisset, ob reuerentiam sancti Laurentij Martyris, conculcationem & destructionem Merseburgensis Ecclesiæ, cœpit pro misericordiæ & pietatis intuitu respicere, & ad nihilum redactam, in ædificiis, in ministerialibus, in sæcularibus possessionibus, in ornamentis Ecclesiasticis in pristinum gradum Pontificalis dignitatis, sicut Deo & sancto Laurentio vouerat, studuit restaurare. Nec prius ab operibus misericordiæ destitit, quoadusque præfatam Ecclesiam ad antiquæ statum dignitatis, & honorem pristinæ Religionis ex integro reduceret. Denique Rex gloriosus Episcopum Bambergensem ex integro in suo domate fundauit, terminis videlicet ab adiacentibus Episcopatibus concambio legitimo commutatis. Eundem verò Episcopatum Apostolorum Principibus Petro & Paulo, & pretiosissimo Martyri Georgio attitulum, speciali iure sanctæ Romanæ Ecclesiæ contradidit, ut & primæ Sedi debitum diuinitus honorem impenderet, suamque plantationem tanto patrociniò firmius communiret.

Frater eius erat Bruno Augustensis sedis Episcopus, qui felicibus eius actibus inuidens,

dens, multas ei aduersitatum iniurias, in quantum potuit, inferabat; & vbi per se non potuit, inferentibus se adiunxit, aliosque ad inferendas exhortando stimulos suæ prauæ incitationis subiunxit. Cui Rex gloriosus non talionem reddebat, verum etiam instructus fraterna dilectione, omnia dissimulando & patienter sufferendo, illum bono vincere satagebat. Quanta autem eius munificentia, quanta erga Deum eius benignitas atque largitas extiterit tam in illa Bambergensi Ecclesia, quam in aliis compluribus locis, manifestis operum declaratur indicis: solum quippe Deum sibi elegit heredem, quatenus & ipse in consortium hereditatis æternæ illum assumere dignaretur. Liberos enim nec secundum carnem habebat, nec expectabat; quia eam quam pro coniuge habere videbatur, Chunigundam nomine, dicitur numquam cognouisse. Sed qualiter hoc innotuerit, ad communem ædificationem non est prætereundum, vt & castimonix exemplis erudiamur, & diuinorum secretorum admiratione moueamur, considerantes quemadmodum diligentibus Deum omnia cooperantur in bonum. tantis namque ac talibus bonis tentatio deesse non potuit. Inuidus enim omnium bonorum diabolus, cum totum immacula-

Y 3

tum

tum fauciare non potuisset, zelotypię liuore
 fœdare cogitauit, volens saltem famam
 eius ledere, cui non potuit corruptionis vul-
 nus infligere. facta est igitur auctore diabolo
 suspecta criminis, quæ non nouerat macu-
 lam corruptionis. Sed quia crudelis est qui
 infamiam negligit, expurgationis gratia sibi
 iudicium elegit; quod propter duritiam ho-
 minum institutum esse cognoscitur. Cùm-
 que Deo dilecta ad illud iudicium, velut
 ouis ad occisionem duceretur, ingemuit, &
 ait: Domine Deus creator cæli & terræ, qui
 probas renes & corda, iudica iudicium
 meum, & cripe me, te enim testem inuoco
 hodie & iudicem, quia nec hunc præsentem
 Henricum, nec alterum quemquam virum
 carnali commixtione vñquam cognoui.
 Hæc dicens, stupentibus ac flentibus vni-
 uersis qui aderant, vomeres candentes nudo
 vestigio calcavit, & sine adustionis molestia
 transiit. Ita Deus omnipotens vinculum
 castæ dilectionis seruauit, innocentiam
 comprobauit, integritati custodiam humi-
 litatis adhibuit.

Inter hæc, beatissimi Principis Henrici
 gloria magis ac magis proficiebat, & gratia
 Dei erat cum ipso. Non declinavit clypeus
 eius de bello, & hasta eius non est auersa.
 Apuliam à Græcis diu possessam Romano
 Imperio

Imperio recuperavit, & eidem prouinciæ Ismahelem ducem præfecit, qui postea in vrbe Bambergensi mortuus, & in Capitulo maioris Monasterij sepultus requiescit in Domino. Beneuentanum Monasterium condidit, & omni ornatus decore locupletauit. Cumque ciuitates Apuliæ pertransisset, & quæ ad vtilitatem & honorem Regni pertinebant, prudenter in eis disposuisset, cœpit in infirmitate calculi laborare. Cuius morbi molestiam vir sanctus tanta patientia sustinuit, vt passiones carnis ad custodiam humilitatis à Deo sibi collatas assereret, & flagellum correptionis certissimum signum dilectionis affirmaret: fomenta tamen curationum sibi fecit adhiberi, sed nulla Medicorum arte potuit liberari. Ingrauescente autem dolore, ascendit in montem Cassinum, petens beati Benedicti & sanctæ Scholasticæ sororis eius auxilium: & cum oraret, cœpit cogitare quæ de translatione sancti Benedicti eiusque sororis audierat, quia videlicet Reliquiæ eorum dicebantur furtim ablata, & in alium locum translata; ideoque cœpit de corporali eorum præsentia dubitare. Completa verò oratione ad hospitium se contulit, & lassatus ac debilitatus ex itinere, in lectulo se collocauit. Cumque obdormiuiisset, audit sibi sanctum

Benedictum assistere, & ferrum sectorium ad medicinales sectiones aptatum manu tenere. qui dixit ei: Quia sperasti in Deo & in Sanctis eius, ecce missus sum à Deo, ut per medicinam meam ab infirmitate tua libereris. Ecce ego, cuius ossa furtim ablata esse putaueras, præsentiam meam tibi exhibeo, & in argumentum veritatis passionem tuam curabo. Hæc dicens, partem illam corporis quæ calculum tenebat, ferro medicinali aperuit, & euulso molliter calculo, hiatum vulneris sanatione subita redintegravit, & calculum quem tulerat, in manu Regis dormientis reposuit. Quo facto, Christianissimus Imperator euigilans pertractavit secum, quæ circa se gesta fuerant per Confessorem Christi; vidensque calculum quem manu tenebat, vocavit satellites suos, qui more regio semper sibi assistebant, & dixit ad eos: Pontifices & Principes Regni nostri ad nos vocate, ut cognoscant & videant mirabilia Dei, quæ ineffabilis & inenarrabilis misericordia cum potentia eius fecerunt in me: at illi mandata Regis cursu celeri perferentes ad Principes, adduxerunt eos; & cum venissent ad eum, dixit eis: Fratres & commilitones mei, *magnificate Dominum mecum, & exaltemus nomen eius in idipsum*; quia ipse est *magnus Dominus, & laudabilis*.

Psal. 33.

Psal. 144.

dabilis nimis, & magnitudinis eius non est finis: ipse percutit, & medetur; flagellat peccatores, & pœnitentibus miseretur; hunc humiliat, & hunc exultat, quia calix in manu Domini vini meri plenus mixto. En ego, qui heri morti proximus fui, per misericordiam Dei hodie sanus vobis appareo, & aculeû mortis; quem heri gestaui inclusum corpori meo, hodie oculis vestris visibiliter ostêdo. His dictis ostendit eis calculum quem manu tenebat; & ostendens eis vulneris cicatricem, omnia quæ per sanctû Benedictum circa se gesta fuerant, cunctis audientibus ex ordine referebat. At illi videntes & audientes mirabilia Dei plus quàm possit credi, admirati sunt, & benedicentes Deum, diuque in laudem eius acclamantes, de incolumitate Regis gauisi sunt: rursusque Rex ad eos ait: Quas gratiarum actiones, aut quæ munera tantis beneficiis condigna medico nostro sancto Benedicto possumus rependere? At illi omnes iudicauerunt eum regia munificentia esse dignum. Rex verò consilio Principum suorum ingentia munera in prædiis, in auro, in argento, in ornamentis plurimis Ecclesiæ sancti Benedicti contulit, & valefaciens Fratribus eiusdem Ecclesiæ ministris, à Cassino monte hilaris & sanus recessit. Ab eo autem tempore &

deinceps quadam speciali dilectione & veneratione sancto Benedicto & omnibus Monasticæ religionis cultoribus studuit deseruire, & in amplificandis & rebus protegendis Ecclesiasticis benignus & deuotus pater existeret.

Inde iter faciens, Romam peruenit, vbi à Benedicto VIII. Papa benignè & honorificè susceptus; quantas miserationes & beneficia per sanctum Benedictum ei Dominus contulerit, indicauit. Apostolicus verò gratias egit Deo pro omnibus beneficiis suis, & pro salute Regis & totius populi Catholici obtulit sacrificium laudis. Eodem tempore Rex sanctissimus Bambergensem fundum cum omnibus pertinentiis suis beato Petro Apostolorum Principi contradidit, & Apostolico Præsuli in perpetuum defendendum commendauit; & in memoriam huius pactionis singulis annis album ambulatorem cum phaleris Romano Præsuli dari constituit. Hoc quoque humilitate & deuotione apud Dominum Apostolicum obtinuit, vt Alemaniam intraret, & Bambergensis Ecclesiæ nouam plantationem visiteret; quod & ita factum est. Nam in proximo Apostolicus aduenit Alemaniam, & omnibus ciuitatibus regionis illius peragratis, tempore quo condixerat urbem Bambergensem adire.

dispo-

disposuit. Venit ergo Feria quinta maioris Hebdomadæ, hoc est in Cœna Domini, hora sexta, sacris Pontificalibus indumentis indutus, sicut iam ad peragenda diuina mysteria & solemne diei illius officium processurus erat, & suscipitur gloriosissimè ab Imperatore, & vniuersis qui aderant Principibus, omniq̃ue Clero & populo, inæstimabili exultationis tripudio. Vt autem in aduentu tam insoliti tamq̃ue exoptati hospitis Deo nostro iucunda decoraq̃ue exhiberetur laudatio, Imperator prudentissimus in occursum eius quatuor choros psallentium decenter ordinauit; primum in vltiori ripa fluminis, secundum in citeriori, tertium ante portam ciuitatis, quartum in atrio Ecclesiæ, vbi primus omnium ipse Rex data manu Papæ in domum Domini introduxit, atque diuinis hinc inde hymnis canora suauitate resonantibus, in Episcopali Cathedra collocauit. Quid plura? debitum huius sacratissimæ diei cum duodenis Episcopis cooperatoribus Apostolicus Pontifex, & aliorum sequentium dierum summa cum deuotione celebrauit. In sancta autem Dominica Paschæ, cum in Matutinali officio Aquileiensis Patriarcha Lectionem primam, Archiepiscopus autem Rauennas secundam, ipse Apostolicus tertiam recitaret, cumq̃ue

cumque omni ornatu processio ageretur, sicut dignitatem Apostolicam condecuit in sancta solemnitate solemnitatum: quis non iudicet tam religiosam celebritatem, nostrisque in regionibus insitam, merito in memoriam omnium Bambergensis Ecclesie filiorum perpetuo haberi, & memoriale eius in seculum non derelinqui?

Vt autem ad superiora redeamus, unde paulisper digressi sumus; postquam vir sanctus à beato Benedicto calculi molestia sanatus Romam peruenit, ibique à venerabili Papa Benedicto omnia quæ petierat impetrauit; munitus Apostolica benedictione Alpes Apenninas transcendit; & dimisso exercitu in terram suam, Cluniacum causa orationis eius cum paucis familiaribus perrexit, eò quod multa de religione & statu loci illius audiret. Vbi cum multa religionis & sanctitatis signa vidisset, sancti Spiritus igne succensus, coronam auream preciosissimis gemmis adornatam, ad Missam quæ de Cathedra sancti Petri celebratur, obtulit; & Monachorum fraternitatem suscipiens, cum maxima humilitate & cordis contritione orationibus eorum se commendauit, & in supplementum rerum necessariarum optima prædia in Alsatia eidem Congregationi contradidit.

Inde

Inde iter faciens, per Leodium & Treuerim transiuit, & Congregationes inibi Deo famulantes plurimis largitionibus & prædiis ditauit. Et mirum, quòd homo Dei, qui circa vtilitates Ecclesiasticas & salutem animæ suæ tanto studio flagrabat, in nullo pro-uectum sui Regni neglexit; quinimò sine effusione sanguinis, pietate & sapientia terminos Regni sui dilatauit, & Imperialē dignitatem gloria & honore ampliavit & ornauit. Bohemiam vicit, Burgundiam subiugauit, Pannoniam quoque fidei Catholicæ & Romano Imperio coadunauit.

Victor ergo aliarum nationum, Apostolus fuit Hungarorum: cùm enim omnes adhuc infideles essent, ad fidei Catholicæ attraxit confessionem. Quod vt facilius fieret, sororem suam Gisilam Stephano Regi in matrimonium collocauit, secundùm Apostolum dicentem: *Sanctificatur vir infidelis per mulierem fidelem, & sanctificatur mulier infidelis per virum fidelem.* 1. Cor. 7. Stephano itaque Rege baptizato, vniuersa Pannonia recepit verbum vitæ: & miræ rerum nouitate, per Reges Apostolos Baptismi gratiam percepit. Quàm præclara tanti Apostolatus societas, quàm veneranda vtriusque sanctitas, per quos tot sunt saluati & sanctificati! Præfatus autem Rex Hungarorum religiosus,

cumque omni ornatu processio ageretur, sicut dignitatem Apostolicam condecuit in sancta solemnitate solemnitatum: quis non iudicet tam religiosam celebritatem, nostrisque in regionibus insitam, merito in memoriam omnium Bambergensis Ecclesie filiorum perpetuo haberi, & memoriale eius in seculum non derelinqui?

Vt autem ad superiora redeamus, unde paulisper digressi sumus; postquam vir sanctus à beato Benedicto calculi molestia fanatus Romam peruenit, ibique à venerabili Papa Benedicto omnia quæ petierat impetravit; munitus Apostolica benedictione Alpes Apenninas transcendit; & dimisso exercitu in terram suam, Cluniacum causa orationis eius cum paucis familiaribus perrexit, eò quod multa de religione & statu loci illius audiret. Vbi cum multa religionis & sanctitatis signa vidisset, sancti Spiritus igne succensus, coronam auream pretiosissimis gemmis adornatam, ad Missam quæ de Cathedra sancti Petri celebratur, obtulit; & Monachorum fraternitatem suscipiens, cum maxima humilitate & cordis contritione orationibus eorum se commendavit, & in supplementum rerum necessariorum optima prædia in Alsatia eidem Congregationi contradidit.

Inde

Inde iter faciens, per Leodium & Treuerim transiit, & Congregationes inibi Deo famulantes plurimis largitionibus & prædiis ditauit. Et mirum, quòd homo Dei, qui circa vtilitates Ecclesiasticas & salutem animæ suæ tanto studio flagrabat, in nullo pro-uectum sui Regni neglexit; quinimò sine effusione sanguinis, pietate & sapientia terminos Regni sui dilatauit, & Imperialē dignitatem gloria & honore ampliauit & ornauit. Bohemiam vicit, Burgundiam subiugauit, Pannoniam quoque fidei Catholicæ & Romano Imperio coadunauit.

Victor ergo aliarum nationum, Apostolus fuit Hungarorum: cùm enim omnes adhuc infideles essent, ad fidei Catholicæ attraxit confessionem. Quod vt facilius fieret, sororem suam Gisilam Stephano Regi in matrimonium collocauit, secundum Apostolum dicentem: *Sanctificatur vir infidelis per mulierem fidelem, & sanctificatur mulier infidelis per virum fidelem*. Stephano itaque Rege baptizato, vniuersa Pannonia recepit verbum vitæ: & mira rerum nouitate, per Reges Apostolos Baptismi gratiam percepit. Quàm præclara tanti Apostolatus societas, quàm veneranda vtriusque sanctitas, per quos tot sunt saluati & sanctificati! Præfatus autem Rex Hungarorum religiosus,

fus, Deoque deuotus, postea in executione
 bonorum operum permansit, quod diuina
 pietas post mortem eius euidentibus indi-
 ciis ad sepulturam eius factis signorum mi-
 raculis demonstraui. Burgundionum quo-
 que non humana, sed diuina fuit victoria:
 nam cum armis & omnibus belli copiis es-
 sent instructi viri ad bella doctissimi, ar-
 mis depositis, non hominis metu, sed nutu
 Dei, rogantes ea quæ pacis sunt, dextras
 dederunt.

Sicut enim ad declaranda beati Martini
 merita Dominus pacificum fecit exerci-
 tum, ita & nunc serui sui beati Henrici me-
 ritis consimilem virtutem dignatus est osten-
 dere: similem ergo fecit illum Dominus
 gloriæ Sanctorum. & sicut Moyses preci-
 bus magis quam armis triumphauit, ita glo-
 riosus Princeps per arma iustitiæ bella om-
 nia consummauit, & sine funere & absque
 cruore semper triumphauit. Denique con-
 summatæ huius vitæ laboribus, postquam
 bonæ opinionis odorem longè lateque ole-
 re fecerat, locumque sibi dilectum & cetera
 Monasteria ditando, & ornando, & exco-
 lendo ad perfectum adduxerat, ad perci-
 piendam immarcescibilem coronam à Do-
 mino vocatus est ab ergastulo carnis: qui
 cernens diem mortis sibi imminere, voca-
 tis

ris ad se parentibus, & cognatis beatissimæ Imperatricis Chunigundæ, necnon etiam quibusdam Regni primoribus, manu eam apprehendit, & commendavit eam illis, huiusmodi verbis memoria dignissimis: *Hanc ecce, inquit, mihi à vobis, immò à Christo consignatam, ipsi Christo Domino nostro & vobis resigno virginem vestram. Discite ergo diuites huius sæculi facere vobis amicos de* Luc. 16. *mammona iniquitatis; ut cum defeceritis, recipiant vos in aeterna tabernacula.*

Huius verò gloriosissimi Principis præconia linguam carnis tacere non conuenit, in cuius transitu confutatis dæmoniis, triumphantibus Angelis cælum exultauit. Defuncto itaque beatissimo Dei famulo Henrico anno Regni sui vigesimoquarto, Imperij vndecimo, vitæ verò suæ quinquagesimo secundo, corpus eius Bamberg in Ecclesia beatorum Apostolorum Petri & Pauli honorificè sepelitur; ac postmodum multis miraculorum virtutibus à Domino glorificatur. Post huius sanctissimi Principis excessum, Conradus vnus ex Regni Primoribus Regali folio sublimatus, consilio Brunonis Augustensis Episcopi, fratris sancti Henrici Imperatoris, qui semper, ut superius dictum est, eius felicibus actibus inuidebat; Episcopatum Bambergensem destruere

struere meditabatur, quia idem Bruno Episcopus promisit sorori suæ Gisilæ Reginæ Hungarorum omnia prædia hereditario iure ad se pertinentia, filio eius Henrico contradere. Locus ergo & tempus conuentui statuitur, vbi hæc res ad certum perducat. Nocte verò quæ diem huius negotij præcellerat, Eberhardus primus Bambergensis Episcopus ad tentoriū prædicti Brunonis clam accessit; lectoque eius assidens, multa super hac re monendo, obsecrando, memoriam fratris animo inculcando cum eodem sollicitus egit. Transacta verò multa hora noctis, Eberhardus Episcopus recessit; & cum Bruno Episcopus obdormiuiisset, visus est ei frater suus Imperator lecto suo astare, faciemque suam barba ex vna parte depilata deturpatam obiectare. Cui super hac re suspenso & admiranti, quis tam temerarios ausus in eum præsumeret; interroganti respondit, dicens: Tu hæc fecisti, qui me, & Sanctos Dei, quos ego rebus à Deo mihi concessis ditavi, despoliare disposuisti. Caue ergo vlteriùs super hac temeritate, ne incepta luas cum magna infelicitate. Ad hæc ille expergefactus, de visione nimium est perterritus, omniumque membrorum horrore ac tremore grauiter affectus. Manè autem facto, cum diu expectatus ad conuentum

uentum Procerum non veniret, Gisila Regina pro filio sollicita, missis nuntiis rogauit illum obnixè, vt adueniens in omnia perficeret. Ille verò affirmavit, se tanta infirmitate grauari, vt nec de lecto surgere, nec pedem posset quóquam mouere. Cumque rogaretur, vt se in lecto ad conuentum portari pateretur, quò vel sic promissio perficeretur; omnino abdicauit, seque in Deum & in Sanctos eius peccasse, libera tandem voce proclamauit. Sic itaque diuina pietas per merita famuli sui, ne spe quam in se posuit fraudaretur, omnia prauæ illius conspirationis machinamenta repressit; idq; quod ab eo benè cœptum est confirmando, semper exinde ad meliora prouexit.

Sed iam nunc ad miracula quæ post felicem transitum eius, ad declaranda eius meritorum insignia, ad sepulchrum illius operatus est Dominus, veniamus.

Mulier quædam contracta in ipsa manebat ciuitate, adeò incuruata, vt ad gradientum nullatenus erigi posset, sed potius manibus reptaret, quàm pedibus ambularet. Huic orationibus frequenter incumbenti, diuinitus inspiratum est, vt ad memoriam beatissimi viri accederet, atque omnipotentis Dei misericordiam obnixius imploraret: quod dum faceret in anniuersario die

Z

ipſius,

ipsius, subito cernentibus cunctis adstantibus, facta est quasi in extasi, ac postea nervi qui diriguerant, sensim dissolui, & omnia corporis membra crepitantia coeperunt extendi; mulierque erecta usum ambulandi & reliqua membrorum officia cum omni sanitate recepit.

Quidam ædituus in ordine laico ad custodiam deputatus Ecclesiæ, furtis coepit assuescere, & quæcumque poterat in ipsa Ecclesia clanculò decrustabat: sed cum iam inolita vitiorum consuetudine, ipsam consuetudinem peccandi iam quasi legem sibi fecisset, misericorditer à Domino corripitur. Quadam enim nocte, dum in eadem Ecclesia somnum caperet, servus Dei aspectu terribilis ei apparuit, & asperè inuectus in eum, dixit: *Species decepit te, & concupiscentia subvertit cor tuum*; quare hoc & hoc fecisti? scito quia rem iniquam operatus es. His dictis de stratu eum protraxit, & multis verberibus cæsum, cruentatum dereliquit. Hæc quidem somnians pertulit, sed expurgatus signa plagarum evidentia demonstravit, & verba verberum argumētis comprobavit. Taliter ab immani præcipitio retractus, in ministerio suo usque ad proventiorem ætatem in eadem Ecclesia permansit; & in eius correctione multi alij correcti sunt,

Dan. 13.

sunt, glorificantes Deum, qui per seruum suum iam coronatum in cælis, talia adhuc operatur in terris.

Quadam vice contigit incerto casu cuidam, vt dissociatis naturalibus instrumentis ab inuicem, mandibula loco suo dimota, & oris officium impediret, & naturalem humani decoris compositionem deformeret. Talibus circumuentus incommodis clamauit ad Dominum, & diuinæ pietatis obnixius implorauit auxilium: vt ergo manifestarentur opera Dei in illo, multis interuenientibus, ad tumbam beati Henrici accessit, & capite superimposito, tam diu precibus institit, quoadusque meritis ipsius sanitatem accepit.

Item alio tempore contigisse in veritate audiuius, vt quidam in paralyti adeò vexaretur, vt exinde vsum brachij iam perdidisset: nutu autem diuino admonitus est, vt ad sepulturam sancti corporis accederet, & prostratus in oratione, Dei omnipotentis misericordiam, & beatissimi viri ibidem requiescentis merita inuocaret. Toto itaque corpore prostratus orationibus incubuit, corde magis quàm ore decantans cum Propheta, *Adhesit pauimento anima mea, viuifica me secundum verbum tuum.* Psal. 118. Quid ergo? Christus filius Dei, qui super terram gra-

diens, manum aridam habentem sanauit; ibidem nunc sedens ad dexteram Patris, eodem inuocato miraculo, per merita dilecti sui supplicem istum liberauit. Sanus equidem ab oratione surrexit, & Deum propitiorem in commemoratione Sancti sui glorificauit. Clamor ad cælum attollitur, & cum debita gratiarum actione hymnus gloriæ omnipotentis Dei ab vniuersis assistentibus decantatur.

Hoc quoque successoribus nostris indicare curauimus, quod in diebus Rogationum ad sepulchrum prædicti Confessoris contigisse veraciter cognouimus. Quidam enim Sacerdos cum populo suæ procurationi commisso, in diebus Rogationum Crucem cum Hymnis & Canticis ad Monasterium sancti Petri & sancti Georgij deferabat, cum qua quidam cæcus alterius manu ductus veniebat. Is cum ad sepulchrum Confessoris Christi venisset, ex toto corde suo rogauit sanctum Henricum, ut per eius interuentum restitueretur ei lumen oculorum. Cumque diu precibus & lacrymis pulsaret ad ostium pij Confessoris, cunctis videtibus, & in laudem Dei acclamantibus, redditus est illi visus per gratiâ Omnipotentis; & mirum in modum, qui alterius mane ductus, Crucem Domini secutus fuerat

rat cæcus, modò propriis manibus Crucem ferens, cum laudibus ipsi populo domum redeanti ductum præbuit illuminatus.

Aliud quoque diuinę virtutis miraculum celebri commemoratione & certa fide cognitum est. Erat quidam languidus ipsa in ciuitate omnibus cognitus, cuius inferiora omnia à lumbis & infra, omnino præmorta fuerunt, adèd vt nec pedibus solo niti valeret, sed instrumento cuidam rotulis quatuor coaptato, pendulus inhærebat, sui-que corporis molem manibus propriis pro possibilitate artificis volutabat. Idem loculum sanctissimi corporis frequentius visitare solebat, & per Dei misericordiam ad declaranda serui sui merita tantam gratiam consecutus est, vt membra præmorta viuificarentur, ac deinde baculis vtrique humero suppositis, pedibus terram tangeret, & erectus incederet.

Modernis etiam temporibus, contractus quidam, qui adhuc in carne superest, in eodem loco sanatus est, & naturalem vsum recepit ambulandi.

Præter hæc, multa alia sanctitatis argumenta & experimenta frequenter loco in eodem visa sunt: debiles curati, cæci illuminati, dæmones ex obsessis corporibus visibiliter fugati, multi ex diuersis infirmi-

tatibus ibidem frequentissimè liberati sunt, Domino testificante quanta Sanctorum gloria in cælis sit, quos tantis miraculorum virtutibus in terris coruscare concedit, ne apud homines loco humili teneantur, qui apud Deum meritis excelsi esse comprobantur. Cum etenim miraculorum attestationibus sanctitatem Confessoris sui Dominus declararet, Bambergensis Ecclesiæ Prælati crebrescentibus signis cum mandatis & litteris Conradi Regis ac Principum Romam abierunt, & quàm magna mirabilia Deus per Cōfessorem suum operaretur, Domino Papæ Eugenio & Romanæ Curiaë nūtiaverunt: at illi gaudentes pro tantæ famæ dulcedine, Deum glorificantes, de canonizatione sancti Regis Henrici cœperūt sollicitè & diligenter ad inuicem conferre, quatenus in catalogo conscriberetur Sanctorum, qui virtutibus & signis probaretur esse assumptus in regnum cælorum. Cui canonizationi quidam Cardinalis Ioannes nomine cœpit vehementer obsistere, & proicecto Dei timore, in quibuscumque potuit non verecundatus est prædicto Confessori Christi detrahere: sed diuina ultio detrahentem cælesti repente verberare coërcuit, & dum famam beati viri laceraret, potestas Dei lumine oculorum eum priuauit: at ille
ad eò

adeò humiliatus & percussus cæcitatæ molestia, reatus sui conscientia cœpit torqueri; & quoniam hanc plagam ex Confessore Christi peccando meruisset, publica voce confiteri. Et mirum in modum quem priùs dentibus detractionis lacerabat, hunc modò laudibus & præconiis vsque ad sidera tollebat. Conuersus itaque ad pœnitentiam, celerem consecutus est indulgētiam, & per intercessionem Confessoris Christi denuò est illuminatus, ob cuius vltionem iusto Dei iudicio fuerat excæcatus.

Simili modo, cùm in loco Bambergensi, vbi prædictus Confessor tumultatus fuerat, de canonizatione eius celebris fama haberetur, Presbyter quidam, nomine Luipoldus, maioris Ecclesiæ Canonicus, de signis quæ per eum fiebant, cœpit dubitare, & de permutatione exequiarum, quæ in anniuersario eius celebriter fiebant, intra semetipsum dolere; qui mox adeò oculorum caligine est plagatus, vt postea per Confessorem Christi sanatus, quantum sanctitas eius apud Deum posset, in curatione ipsius experiretur. Et mirandum est valde, quòd de sanctitate tanti viri aliquis potuerit dubitare, cùm conuersationis sanctitatem, castitatis integritatem, eleemosynarum largitatem, humilitatis custodiam, & omnia ope-

Luc. 4.

ra iustitiæ vsque in finem vitæ suæ cum deuotione summa seruauerit. sed sicut scriptum est, *nemo Propheta acceptus est in patria sua*. Presbyter ergo prædictus grauatus defectu luminis, confugit ad patrocinia Sanctorum, deprecans, vt per suffragia eorum, sanitas sibi restitueretur oculorum. Et cum ex dolore, & labore, & assidua venarum incuruatione fatigatus fuisset, lassatum corpus somno reparauit. Cui dormienti sanctus VVolfgangus, eò quòd eum familiarem in orationibus suis habuerit, apparuit, & ait ei: Ora Confessorem Christi Henricum, & liberabit te, quia quòd eius sanctitati derogasti, idcirco hæc plaga cæcitatatis venit super te. Post hanc visionem expergefactus, ex conscientia delicti sui intremuit, & ad tumbam Confessoris Christi concito gradu & deuota mente properauit, & procumbens terræ, à Confessore Christi lacrymis & precibus suis excessibus veniam postulauit: qui statim exauditus, & pristinae sanitati restitutus, gratiarum actiones Deo & sancto Henrico retulit, & magnalia Dei, quæ circa ipsum Deus fecerat, religiosis viris, qui nobis retulerunt, ipse narrauit.

Caueant igitur habitatores sæculi, domesticis Dei & viribus Sanctorum detrahere; quia necesse est eos hîc & in æternum perire,

ire, qui Sanctorum bonis operibus solent obloqui & inuidere. Quamuis ergo nunc tempora miraculorum nō sint (signa enim debentur non fidelibus, sed infidelibus:) tamen cū aliqua nobis præter solitum cursum ordinemque naturæ eueniant, omni veneratione amplectenda sunt: quatenus & ipse qui in Sanctis suis mirabilis est honorificetur, & nostra tarditas ad meliora quæque tantis virtutibus accendatur, præstante Domino nostro IESU Christo, qui cum Deo Patre & Spiritu sancto viuit & regnat Deus, &c.

Additio ex Annalibus Card. Baronij, Tomo XI. anno Domini 1014. ex vita sancti Popponis Abbatis, scripta ab Everhelmo Abbate.

CONTIGIT etiam ludis histrionum Imperiales tunc fores occupari, atque eo spectaculi genere Regem (Henricum) cum suis oblectari: vrsis enim quidā nudus melle perunctus exhibetur, illo plurimum pro periculo suo timente, ne forte ab iisdem vrsis ad ossa sua, melle consumpto, perueniretur. Vnde super tam iniqua in Christianum illusione Regem beatus Poppo redarguit,

Z s

guit,

guit, eumque ab hoc spectaculo suis cum optimatibus mox compescuit; tum etiam à periculo vrforum virum liberauit; & ne id vltra fieret, arguendo & obsecrando obtinuit: Henricus enim Imperator tam obsecrationi quàm correptioni eius humiliter paruit. At nec id fatis, sed magna sollicitudine idem Imperator curauit, vt idem Poppo Abbas Stabulensis crearetur. Sic Imperator benè vti sciuit reprehensione, vt reprehensorem suum nouo beneficio sibi deuinciret.

Anno Domini 1020. ex Vita S. Heriberti

Episc. Colonienfis.

HENRICI Imperatoris animam timor Domini possidebat, neque scienter disponere aut iudicare in regno cupiebat, per quod cælestis offenderetur Maiestas. Denique cùm aliquid de regno disponere aut iudicare intenderet, dispositiones omnes siue iudicia sua precibus & eleemosynis præueniebat, quatenus mens eius & actus cælesti regimine gubernaretur, ne quando exorbitaret agendo vel iudicando, quod diuinis legibus contrairer.

Eodem

Eodem anno ex eadem Vita S. Heriberti.

INVIDI quidam animum Imperatoris
aduersus Archiepiscopum Coloniensem
vehementer concitauerant, sed postea diui-
nitus admonitus, quàm magnus Dei seruus
esset Heribertus, sic ad eum locutus est: Ex
quo ad regni fastigium Deo donante con-
scendi, detrahentiũ linguis nimium, fateor,
credulus, te, venerande Pater, exosum ha-
bui, & hanc odij trabem in oculo gerens, &
idedò nihil videns, iniquum de te iudicium
habui, tuamque iustitiam, immò Dei gra-
tiam in te fulgentem videre non merui. &
infra; Indulge ergo, precor te, quòd in te
malignatus sum, quia peccatum meum ag-
nosco, nec ampliùs addam aduersari sancti-
tati tuæ. His dictis, semel, iterum, ac tertio
sanctũ Pontificem deosculatus est. & paulò
infra: Sollicitus Imperator, neque præterita
reconciliatione contentus, nocte sequente
finitis Matutinorum solemniis, assumpto
vno ex Clericis, cubiculum sancti Pontificis
adiit; sed non ibi quiescentem, verum in
proximo sancti Ioannis Oratorio vigilan-
tem, vt solebat, & orationibus insistentem
reperit; protinus abiecta chlamyde solo stra-
tus, ante pedes eius in spiritu humilitatis &
in

Matth. 18.

in animo contrito se suscipi postulat, & ea potestate, quam Sacerdotibus suis Dominus contulit, veniam sibi dari cunctorum quæ in ipsum admiserat. Nec moratus omnipotentis Dei famulus, Imperatorem prostratum à terra subleuat, & Christo mediante, qui dixerat, *Quaecumque alligaueritis super terram, erunt ligata & in celo; & quaecumque solueritis super terram, erunt soluta & in celo:* absolutio culpæ secundum fidem Regis in cælo & in terra peracta est. Hæc ibi. Quid egisset hic piissimus Imperator, si Archiepiscopum reipsa & factis læsisset, quando ob solam cogitationem illi nocendi, & hanc à perditis hominibus animo illius, alioqui simplici & recto, inspiratam, tanta pœnitentiæ signa edidit?

Anno Domini 1022. ex Bonif. de rebus Hungaricis, Decade 2. lib. 5.

HENRICVS in omnibus rebus specimen reddidit Christianissimi Imperatoris, quippe qui sacratissima Eucharistia communire soleret exercitum, expiatione antea facta delictorum, cum prælium cum hostibus initurus esset, adhiberetque Patrones sanctos Martyres Laurentium, Georgium, & Adrianum, quos præuio Angelo præ-

præcedere confueuisse aliquando vidisset exercitum.

Obiit sanctus Imperator Henricus anno Domini 1024. cum vixisset annos 52. regnasset annos 24. & imperasset annos decem.

VITA S. STEPHANI
primi Regis Hungarorum,
qui eos ad Christi Religionem traduxit:

*Ab Episcopo Chartuitio conscripta, sed
stylo mutato per Fr. Laur. Surium.*

PRÆFATIO AUCTORIS
ad COLOMANNVM Regem.

DOMINO suo Colomanno, Regi excellentissimo, Chartuitius Episcopus spiritale ministerium Dei benignitate adeptus, post huius vitæ terminum, illud Euge precatur sempiternum. Aggredior nunc opus, Serenissime Rex, iussu tuo mihi demandatum, à quo hætenus ingenioli mei imperitia abhorruit, ob id præsertim, quod Priscianus Grammaticus mihi olim sat benè perspectus & cognitus, procul à me digressus, iam decrepito mihi, tam-

Is Colomannus est 8. Hungarorum Rex.

Mat. 25.

tamquam caligine quadam septus, faciem exhibet obscurissimam. Sed cum alia ex parte dignitatis tuæ attenderem auctoritatem, vicit tandem anxietas mentis dubitationem omnem, virtutum omnium lux & gemma, obedientia: cuius forti præsidio fretus, tametsi mihi vires cernerem haudquam suppetere, Operis inchoandi fiduciam concepi. Cum sint autem plerumque invidiæ obnoxia, quæ bona animi fiducia geruntur; supplex oro Regiam sublimitatem tuam, uti Opusculi huius suscipere ne grauetur patrocinium: nec offendatur parum commoda dictione, aut ordinis & rerum gestarum confusione. Quod si occurrat quippiam, quod fœdam habeat offensionem, malim codicem ignibus absumi, quàm liuoris materiam cuiquam offerri. Et quia bona omnia ad nos ex diuina misericordia proficiscuntur, ipsius munere sic libet Opusculum præsens auspicari.

V I T A.

Iac. 1.

OMNE datum optimum, & omne donum perfectum, desursum est, descendens à Patre luminum. Huius quidem Patris datum optimum & donum perfectum ad omnes largiter dimanans, (neminem enim spernit, sed vult omnes homines saluos fieri, & ad agnitio-

1. Tim. 2.

nititionem veritatis peruenire) ad Hungaros
 vsque, quos olim Christianorum flagellum
 fuisse constat, sese diffudit. Quod quemad-
 modum & quando factum sit, styli officio
 ad posteriorum notitiâ transmittere visum
 est. Ea quidem tempestate, qua Hungaro-
 rum gens Dei Ecclesiam populabatur, fuit
 in ea Princeps quidam, quartus ab eo qui
 Hungaris in Pannoniam ingressuris Ducem
 se præbuit: is Geisa dicebatur. seuerus sanè
 & crudelis homo in suos, potenter eis im-
 perans: erga alios verò, præsertim Christia-
 nos, humanus, misericors, & liberalis. Et si
 autem paganismi adhuc erroribus esset im-
 plicatus, attamen cælestis gratiæ luce spiri-
 tali appropinquante, cum omnibus vicinis
 circumquaque prouinciis de pace cœpit ac-
 curatè tractare; vt iam in illo liceret anim-
 aduerti, cuius optaret esse filius; dicente in
 Euangelio Domino Saluatore: *Beati pacifici,* *Math. 5.*
quoniam filij Dei vocabuntur. Edicto quoque
 proposito, iussit Christianis omnibus, in
 ipsius ditionem siue Ducatum ingredi vo-
 lentibus, hospitalitatis & publicæ fidei stu-
 dium & curam impendi. Porro Clericis &
 Monachis fecit potestatem in ipsius quoque
 conspectum veniendi, eosque propenso
 animo audiuit: atque ita factum est, vt
 Orthodoxæ fidei semen in pectoris eius
 horto

horto satum , in fruges erumpere gestiret.

Quid multa? Adest tempus cœlitus dispositum : credit ipse cum familiaribus suis. vndis salutaribus expiatus , omnes ditionis suæ homines pollicetur ad Christianismum perducturum. Cùm autem multum esset sollicitus de edomandis rebellibus , ritibus sacrilegis abolendis , ad sanctæ Ecclesiæ profectum pro sua æstimatione statuendis Episcopatibus, mira quadam visione nocte eum Dominus consolatus est. Misit enim ad eum iuuenem speciosissimum, qui diceret ei : Pax tibi Christi electe : faceßat cura isthæc & sollicitudo. Non fiet per te id quod meditaris: habes enim manus humano sanguine pollutas. Nascetur autem tibi filius, qui diuinæ prouidentiaæ consilio id efficiet, quod tu animo concepisti. Erit is Rex, & ex eorum Regum numero quos Dominus elegit , coronâ Regni temporarij æternâ commutaturus. Tu verò hominem spiritali legatione apud te functurum, honorificè excipito, exceptum reuerenter habeto , eius adhortationibus sincerū pij pectoris assensum adhibeto. Experrectus Princeps , stupens ad visionem, prius secum, deinde cum Christianis & suis hominibus pertractans, humi totus prostratus, expansis manibus humiliter gratias agit Deo, seque Principatumque

tumque suum cum filio nascituro curæ il- Psal. 120.
lius qui non dormit, neque dormitat, lacry-
mabundus commendat.

Admirante autem eo de viro diuinitus
ipsi prædicto, nuntiatur illi, beatum Adal-
bertum Bohemenſis Eccleſiæ Antiftitem
ad ipſum venire, ad Chriſtianâ Religionem
fidemque non fictam eum traducere, & ob
fidei profectum Domino laudis hoſtiam
immolare cupientem. Is nuntius nouis
Chriſti tironibus ineffabilem attulit læti-
tiam. Dux procedit obuiam ſeruo Chriſti
cum fidelibus quibuſque, honorificè eū ex-
cipit, & vt in viſione erat admonitus, modis
omnibus ſe obedientiæ filium fore demon-
ſtrat. Deinde iubente ipſo, fit vbique con-
gregatio indomitæ gentis; per ſanctum Epi-
ſcopum fiunt conciones, eius adhortationi-
bus mox illi conuertuntur & baptizantur,
multis locis Eccleſiæ conduntur: Lux enim
illa quæ illuminat omnem hominem, pro-
ſtigatis tenebris, cœpit in Hungaria enitere,
& completum eſt in ea quod Propheta ait:
Populus, qui ambulabat in tenebris, vidit lu- Iſai. 9.
cem magnam. Lux lucis inuiſibilis Chriſtus
eſt, quem tunc Gentiles videre meruerunt,
quando è tenebris reuocati, illum eſſe &
verum Deum & hominem verum perfectè
credidere.

Ierem. i.

Non est autem silentio prætereundum, ut omnis ambiguitas tolleretur è medio, & ne parum fidei habere videretur visio Duci oblata, etiam uxorem eius iam partui propinquam, eiusmodi diuinitus consolatione affectant: Apparuit illi beatus Leuita & Protomartyr Stephanus; Leuitici habitus insignibus ornatus; ita eam compellans: Confide mulier in Domino, & certa esto te filium parituram, cui primo huius gentis & Regnum & corona debetur. Tu verò illi nomen impones meum. Cùm autem femina non sine admiratione sciscitaretur ex eo, quisnam aut esset, aut vocaretur; sic respondit: Ego sum Stephanus Protomartyr, qui primus pro Christi nomine martyrium obiit: ijs dictis disparuit. Nascitur itaque, ut prædictum erat, filius Principi, notus Domino, secundum Prophetam, priusquam in utero conciperetur; & per Stephanum Protomartyrem à Domino appellatus antequam natus. Eum verò beatus & Deo dilectus Episcopus Adalbertus baptizauit, & nomen Stephani ei impositum est, non sine nutu & consilio Dei, ut nos quidem persuasum habemus: Stephanus enim Latine coronam significat. Et illum Deus voluit tum Regni temporarij, tum futuræ beatitudinis redimire corona, ut vita & gloria perfruatur

fruatursempiterna. Oppido quidē Strigoniensi natus est, & illic quoque puer præceptis Grammatices ad plenum imbutus est.

Intereà creuit accuratè educatus: cumque iam excessisset pueritiæ metas, pater eius conuocauit Hungariæ Procures & reliquos Ordines, communicatoque cum eis consilio, illum post se regnaturum constituit. Utque ea res firmior esset, singulos ad sacramentum adegit. Deinde iam grandæuus, anno à Christo nato noningentesimo nonagesimo septimo, vitæ huius ærumnas cum cælestibus gaudiis commutauit. Eodem autem anno beatus Adalbertus, cum in Prussiam, gentis eius conuertendæ causa, profectus esset, martyrij palmam adeptus est.

Post obitum patris, Stephanus adhuc adolescens, Principum & plebis fauore patri subrogatus, ardentiori animo in veritatis propagationem incubuit. Nam tametsi etiamnum esset adolescens, non tamen illi cor in ore, sed in corde os erat. Scripturarum diuinarum, quarum amore impensè flagrabat, non immemor, iudicium & iustitiam semper ob oculos versabat, & pulchrè quadrabat in eum illud Salomonis:

Audiens sapiens sapientior erit, & intelligens Prou. 1.
gubernacula possidebit. Cumque omnia Dei

præcepta sedulò obseruare conaretur, apud se pertractabat quemadmodum populum suum ad vnus Dei cultû adducere posset. Animaduertens autem, sine vicinarû gentium confœderatione id nequaquam fieri posse, cum exteris prouinciis pacem fecit, fidemque inchoatam egregiè confirmauit, vt posset eò securius id quod animo constituerat, in nouella plantatione efficere. Sed hostis totius boni & aduersarius diabolus, malignitate & inuidentia plenus, vt eius sanctum propositum disturbaret, intestina ei bellâ excitauit: eius enim instinctu populus gentilis Christianæ fidei iugo colla supponere noluit, & cum Principibus domini sui imperio subducere se moliebatur. Itaque depopulabantur eius vrbes, prædia vastabant, possessiones diripiebant, ministros cædebant, & vt cetera taceam, etiam ipsi insultabant. Cumq; ab huiusmodi improbitate reuocare se nollent, nec suo furori & amentix modum statuerent, Dux ipse, diuinæ virtuti confidens, ad edomandam illorum rabiem, cum sui exercitus copiis sub signis Deo dilecti Pontificis Martini, & clarissimi Martyris Georgij, mouit in hostes, qui tum fortè urbem obsidebant, quam vulgò Vesprinum vocant. Quod quidem illi in eius fecere contumeliam, vt quem ad
locum

locum ille familiariùs consueuisset accedere, ibi ipsi considerent; essetque ex eo loco facilior ipsis aditus ad alia præsidia occupanda. At ille diuina fretus ope & clementia, illos aggressus est: & illis quidem suis armis confidentibus; ipso verò fide armato, vtrimque congressi sunt. Victis tandem hostibus, & partim cæsis, partim captis, Dux victor abcessit. Et sapienter quidem de illorum villis & agris siue possessionibus statuens, non quemadmodum olim Saul, qui superatis Amalecitis, contrà quàm Dominus iusserat, ex eorum spoliis optima quæque seruauerat: sed quia Pannonia beatissimum Martinum apud se natum gloriatur, cuius etiam meritis vir Christo fidelis, ut iam dictum est, ex hostibus victoriam reportauit; nihil de rebus eorum in suos usus conuertit: sed ex Dei amantium consilio, iuxta eiusdem sancti Præsulis fundum, eo loco qui Sacer mons dicitur, vbi sanctus Martinus, cum in Pannonia degeret, precari solitus erat, sub eius nomine Monasteriũ construxit, possessiones & redditus sufficientes ei attribuēs. Idem verò de Episcopis cõstituit, ex illorum captiuorũ facultatibus decimas persolui volens, idque adeò exactè, ut si quis decem haberet proles, decimam prolem sancti Martini cœnobio daret.

1. Reg. 15.

Aa 3

Ita

Ita ergo hostibus sub iugum missis, Christi miles gaudio spiritali perfusus, omnem ingenij sui vim contulit ad consecrandam doctrinam Euangelicam. Itaque dabat operam eleemosynis, vacabat precibus, crebrò adhærens Ecclesiæ pauimento, cum lacrymis orabat Dominum, ut animi sui propositum ipse ad effectum perduceret: ut qui sine illo nihil posset efficere, eius opitulante providentia, bona quæ facere decreuisset, cum virtutum incremento etiam re ipsa exequi valeret. Cum autem facile intelligeret, ad hæc inchoanda & consummanda fidelium Christianorum consilium sibi esse necessarium, per nuntios & literas in partes omnes suum declaravit votum & desiderium. Multi igitur Presbyteri & Clerici, sancti Spiritus gratia compuncti, relictis sedibus suis, Christi causa peregrini esse voluerunt: Abbates & Monachi, nihil proprii habere cupientes, sub tam religioso Principe statuerunt ad sui instituti præscriptum vivere; in quibus fuit Astricus Abbas cum discipulis suis, è quibus Bonifacius loco patris Abbas postea creatus, & à beato Rege in inferiores Hungariæ partes causa prædicationis missus, in vertice gladio percussus, etsi superuixit, non est martyrij corona frustratus. Venerunt etiam duo è Polonia, eremiticæ
vitæ

vitæ contemplationis causa studiosi: ex ijs alter Andreas dictus, confessionis merito choris Angelicis est adiunctus, haud obscure id declarantibus miraculorum signis, quæ per eum Dominus effecit: alter Benedictus nomine, pro Christo sanguine fuso, insigniter est laureatus. Porro Altricus Abbas cum suis honorificè acceptus, ad radices Montis ferrei cœnobium in S. Benedicti honorem construxit, vbi hodieque Monachorum est congregatio, regulari disciplina pollens, temporalium rerum copiis ex Ducis liberalitate superabundans, nullius indigens, nisi vt ad Euangelij præscriptum, suos aliorumque pedes quotidianis precibus & lacrymis lauet. Cum his Dei seruis Princeps Christianissimus, modò communiter cum omnibus, modò separatim cum singulis colloquia miscens, vsque adeò diuinis conspectibus gratum & acceptum se præbuit, vt per eum omnes militiæ eius comites ad veri Dei cultum adducti sint. Quos autem alios deos colere animaduertit, eos & minis & terroribus subiugauit, & conuenienter doctrinæ Ecclesiasticæ illos instituens, in eorum ceruices disciplinæ iugum & legem imposuit, omnesque dæmonum spurcicias prorsus eliminauit.

Postea verò prouinciam in decem Epi-

Aa 4

scopatus

scopatus distribuit, quorum metropolim & magistram esse voluit Ecclesiam Strigoniensem. Non ignorans autem vir prudens Astrici Abbatis religionem, Episcopum Colocensem constituit canonica electione creatum. Deinde quarto à patris obitu anno, diuinitus permotus, eundem Astricum Præsulem, qui etiam Anastasius dictus est, ad sanctorum Apostolorum limina misit, à Petri Apostolorum Principis successore petiturum, ut recens conuersæ Pannoniæ largam benedictionem impertiret, Strigoniensem Ecclesiam sua auctoritate metropolim constitueret, reliquos Episcopatus sua benedictione muniret, & ipsum Ducem regio diademate cohonestaret: ut eo fultus honore, quæ diuinæ gratiæ adiutorio cœpisset, ea magis magisque promouere & constabillire posset. Per idem tempus etiam Miesca Polonorum Dux Christianam complexus fidem, legatos suos Romam miserat, ut Pontificis benedictionem, & Regium ipsi titulum impetrarent. Assenserat quidem Pontifex, & iam coronam egregio opere confici curarat, quam ei mitteret sua benedictione adiuncta, Sed quia nouit Dominus, qui sint eius; qui etiam duobus ab Apostolis propositis, Matthiam socio suo prætulit, & cum Apostolis annumerandum curauit;

1. Tim. 2.

Act. 1.

curauit: illa corona Stephanum ornari voluit, postea felicius gloria sempiterna coronandum. Nocte enim eius dici, quo statuerat Pontifex coronam Polonorum Principi dare perferendam, apparuit ei Angelus Domini, aitque ad eum: Noueris cras hora diei prima ignotæ gentis nuntios ad te venturos, suo Duci coronam regiam & Apostolicæ benedictionis munus abs te expetitu-
ros. Eam ergo coronam, quam parari iussisti, illis incunctanter tribue, ad ipsorum Ducem eam absportaturis: nec dubites illi eam cum Regni gloria pro vitæ eius meritis deberi. Itaque crastina luce, ea hora qua prædictum erat, Præsul Astricus ad Pontificem venit, demandatumque sibi officium prudenter exequens, sanctique Ducis res gestas ordine referens, à Sede Apostolica Regni coronam petiit, ostendens dignum esse Ducem eo honore & dignitate; quippe qui diuina fretus ope, multos sibi populos subiugasset, multosque infideles sua potentia ad Christum conuertisset.

Iis auditis, mirè exhilaratus Pontifex, precibus illis libenter annuit, Crucemque ante Regem, ceu Apostolatus insigne, gestandam adiunxit: Ego, inquiens, sum Apostolicus; at ille meritò Christi Apostolus dici potest, cuius opera tantum populum sibi

Aa 5

Chri-

Christus acquisiuit. Atque ea causa, quem admodum diuina gratia ipsum docebit, Ecclesias Dei vnà cum populis nostra vice ei ordinandas relinquimus. Omnibus impetratis quæ postularat, Antistes Astricus letus ad suos reuertitur, illud secum ferens, cuius causa iter illud emensus erat. Allatis verò Apostolicæ benedictionis literis cum Corona & Cruce, Præsules cum Clero, Comites cum populo, in laudes Dei prorumpunt, & Deo dilectus Stephanus Princeps vngitur in Regem, & diademate regio feliciter coronatur. Ea autè dignitate auctus, quam ille vitam egerit, qua prudentia & moderatione fuerit, illud satis declarat edictum, quod ab illo cum Episcopis & Hungariæ Primoribus promulgatum est; quo singulorum vitij singula adhibuit remedia: & vt pacis, qua Christus orbem coadunauit, se filium ostenderet, inter cetera cauit, ne quis alium hostiliter inuaderet, ne quis vicinum suum absque iudicis sententia læderet, ne quis viduas & pupillos opprimeret. Id verò decretum, perpetui fœderis subscriptione, ad posteros suos transmisit.

Vide Annotat. ad finem historię.

Porro consortem regni, præcipuè sobolis propagandæ causa, sibi adsciuit Henrici Imperatoris filiam Giselam: qui Imperator, ob morum comitatem & mansuetudinem,
Pius

Pius est appellatus. Ea autem Gisela Chri-
smate vincta, & corona regia insignita, qua-
lem se præbuërit erga Dei cultum ornan-
dum, quàm frequens & benigna ac liberalis
erga Christo seruientium congregationes
fuerit, multarum Ecclesiarum Cruces, vasa
sacra, & utensilia, miro opere effecta vel
contexta, in hunc vsque diem testantur:
præcipuè tamè Ecclesia Vespriniensis, quam
illa à fundamentis constructam, rebus om-
nibus quæ ad Dei ministerium sufficiant, in
auro, argento, multigenisq; vestibus præ-
clare ornauit. Ipse verò Rex nuper inchoa-
tos Episcopatus, id est, tam Metropolitam,
quàm ceteras cathedrales Ecclesias, amplif-
sima singulis assignata diœcesi, & idoneo
præfecto Antistite, Abbatias quoque, præ-
diis, cohortibus, familiis, & redditibus regia
planè munificentia instruxit; Crucibus, va-
sis sacris, aliaq; supellectile ad Dei mini-
sterium spectante, pro cuiusque necessitate
vel indigentia satis exornauit, annisq; sin-
gulis, quoad vixit, munera & oblationes
semper auxit, ne aliquid extrinsecus con-
quirere cogerentur, qui rebus diuinis per-
agendis præerant. Monachorum quoque
vitam & conuersationem modò per se ip-
sum, modò per alios accuratè inuestigans,
desides arguebat, alacres & vigiles charos
habe-

1. Cor. 9.

habebat. Canonorum ministerium, Episcoporum moderationi & circumspeditioni sub Christi & Ecclesiæ testificatione commendabat, cum Apostolo omnibus omnia factus, vt omnes lucrificeret.

Heb. 12.

Ea tempestate in Monasterio S. Martini erat Monachus quidam, Sebastianus nomine, cuius vita probabilis, & in Dei cultu religiosa deuotio habebatur. Eum venerabilis Rex miro cœpit amore complecti (quanto enim quisque esset religiosior, tanto illi quoque charior erat) atque ob vitæ eius merita dignum eum censens qui Episcopi dignitate polleret, Strigonienſis Ecclesiæ Archiepiscopum esse voluit. Sed quia *flagellat Deus omnem filium quem recipit*, Sebastianum illum, vt eius patientia probaretur, ad tempus vtriusque luminis orbitate afflixit. Ne verò nouellus grex, pastoris gubernatione destitutus, à recto itinere deflecteret & aberraret, Romano Pontifice assentiente, Astricum Colocensem Episcopum, cuius iam crebrò est habita mentio, in eius locum Rex substituit. Triennio inde euolutò, Sebastianus ex Dei benignitate recuperavit visum, & Pontifice Romano approbante, Astricus cum pallio rediit ad suam Colocensem Ecclesiam, Sebastianus Strigonienſem gubernandam recepit.

Erat

Erat sanè Rex ille fidelis & integer in omnibus factis suis, Deo toto pectore deditus & addictus; seipsum quoque & regnum suum per votum & oblationē in perpetuæ Virginis Mariæ tutelam assiduis precibus contulit. Cuius sacratissimę Virginis honor & gloria tam est celebris apud Hungaros, vt festum Assumptionis eius, tacito proprio nomine, sua lingua Diem Dominæ appellant. Atque vt Rex piissimus propensio- rem tantæ Virginis defensionem & patrocinium posset promereri, in ipsa regiæ sedis ciuitate, quam Albam vocant, in eiusdem perpetuæ Virginis laudem & honorem, grandem & insignem, atque in primis celebrem Basilicam condidit, opere sanè mirifico cælatis Chori parietibus, & pavimento marmore strato. Quam Basilicam qui vidit, testimonium perhibet dictis nostris, innumera illic haberi palliorum, & eorum quæ paramenta vocant, genera: tabulas altarium non paucas ex auro purissimo, pretiosissimorum lapidum ordinibus conspicuas: Eucharistiæ ædiculam, quam Ciborium dicunt, arte mirabili supra Christi mensam extructam: conclaue omni genere vasorum crySTALLINORUM, ONYCHINORUM, AUREORUM & ARGENTEURUM abundè refertum. Tantæ verò elegantię Ecclesiam vsqueadeò Rex sibi vni vendi-

vendicauit, adeoquē immunem esse voluit, vt nullus Episcopus quidquam in ea iuris haberet. Quibus autem diebus absolutio esset pœnitentibus impendēda, aut sacrum Chrisma conficiendum, eum Episcopum voluit in ea & absoluerē pœnitentes, & Chrisma conficere, quem ipse vel præsens id facere iuberet, vel quem absens eō mitteret. Diuina quoque Missarum solemnia, Rege illic præsente, eum dumtaxat Episcopum celebrare, cui Rex, consentiente cum Fratribus Præposito, id demandaret: absente autem Rege, absq; Præpositi & Fratrum bona venia, nullum Episcopum illic sibi vel Missas celebrandi, vel cuiuslibet Pontificalis ministerij exercendi licentiam vsurpare. Præterea eius Ecclesiæ populum tanta libertate & immunitate gaudere voluit, vt nulli omnino Episcopo decimas penderet: sed soli Præposito & Fratribus, prout ipse instituisset, seruitium exhiberet.

Quæcumque autem seruus Dei per id temus acquirere potuit, ea in Christum refundere studuit, à quo illa profecta non ignoraret, vt qui eum mundi huius gloria & honore dignum fecerat, etiam cælestis patriæ ciuibus clementer adscribere dignaretur. Et in Prophetis quidem de Apostolis scriptum legimus, *in omnem terram exiuisse*

Psal. 18.

sonum

sonum eorum, & in fines orbis terra verba eorum. Non debet autem hoc de solis illis duodecim accipi, sed de omnibus à Deo ad euangelizandum missis, quorum fide, verbis & moribus, Ecclesia suis augefcit incrementis. Ex eorum autem numero ille, de quo agimus, Christianissimus Rex non minimus fuisse putandus est, vt qui bonæ voluntatis & piorum operum famam, quam Ecclesiis in propriæ ditionis amplitudine construendis sibi peperit, in longinquas regiones & vrbes celeberrimas diffuderit ac propagarit. Extruxit enim in ipsa Ierosoly-
ma, vbi Dominus noster Iesus Christus in carne versatus est, Monachorum cœnobium, idemque prædiis & vineis, vnde eis quotidiani victus copia suppetat, ditauit. Romæ quoque, quæ est mundi caput, sub Protomartyris Stephani titulo, duodecim Canonicorum Collegium condidit, rebus necessariis & ad eiusmodi Collegium attinentibus abundans. Domos quoque & hospitia Hungarorum, qui orationis causa Romam ad beati Petri Apostolorum Principis limina venirent, exædificauit, muro ea lapideo circumdans. Tum quoque urbem Regiam Constantinopolim noluit suæ liberalitatis esse expertem, mirifici operis in ea condens Ecclesiam, rebus omnibus necessariis

cessariis ei adiunctis. Itaque non immeritò suæ ditionis Apostolus appellatus est. Et si verò ille sibi euangelizandi munus non sumpsit; attamen ceu quidam concionatorum dux & magister, defensionis & sustentationis solatia eis suppeditauit.

Inter omnia autem cælestis gratiæ muneribus beato Regi diuinitus collata, illa vel præcipuè admiranda & scriptis commendanda videntur, quæ etiam ad promerenda æternæ vitæ gaudia primarium locum obtinent; puta, misericordia & veritas. In cunctis enim felicibus factis suis hoc vel maximè sibi consecrandum existimabat, quod in Euangelio scriptum fidelibus interioris hominis oculis contemplatus erat, ipsa Veritate ita dicente: *Beati misericordes, quoniam ipsi misericordiam consequentur.* & alio loco: *Dante, & dabitur vobis.* Tanta igitur misericordia, benignitate & pietate pauperes Christi, imò in pauperibus ipsum Christum complectebatur, ut nullum umquam hospitem & peregrinum absque aliquo solatio à se discedere pateretur, & ad recreandos egenos quotidianas expensas absque intermissione fieri iuberet. Iam verò etiam nocturnis horis multa alacritate & hilaritate abluabat fidelium pedes, & in sinu pauperum abscondebat eleemosynas, Christum inopem

Mat. 5.

Luc. 6.

pem in membris eius consolari in hac vita cupiens, vt cum illo quandoque in illa cælesti domo, bonis omnibus refertissima, æternum exultare mereretur.

Quadam autem nocte diuino permotus instinctu, nemine sciente, crumenam nummis plenam accipiens, pusillum Christi gregem suo more solus inuisit. Et ecce pauperes cælestis thesauri distribuendæ pecuniæ nimium inhiantes, beati viri barbam euulserunt, eam improbitate illius meritis testimonium perhibentes. At ille gaudio perfusus ingenti, ad beatissimam Creatoris omnium Matrem se confert: humi prostratus gratias agens exclamat: Regina cælestis, & mea, en quem tu Regem contulisti, eum sic honorarunt milites tui. Quæ si mihi ab aliquo hoste illata esset iniuria, tuo fretus adiutorio, non sinerem eam inultam abire: at nunc sciens hinc mihi parari æternam felicitatem, impensè lætor, gratias agens illis pijssimi Saluatoris consolatoriis verbis, quibus discipulos suos confirmavit, *Capillus*, in-
Luc. 21.
 quiens, *de capite vestro non peribit*. His dictis, cum se vir Dei cælesti gratia & spiritali charismate perfusum sentiret, statuit numquam pectoris sui ostia opem poscentibus claudere: atque deinceps per seipsum & alios, præcipuè tamen Christi seruos & fa-

Bb

milia-

familiares, nempe Clericos & Monachos; cælitus sibi datas facultates pauperibus impertiit, in æternis thesauris per illorum manus reponendas. Eius rei permulti sunt testes, atque in iis beatus Guntherus, ex sæculari nobilitate conuersus, atque Eremita & Monachus effectus, cum illo nunc vitæ beatæ particeps. Is humanissimi Regis tanta liberalitate illectus, è Bohemiæ regione crebrò ad illum venire solebat. Quoties autem sua præsentia leius aulam illustraret, curam regni ei demandabat Rex. Tum ille rebus, quas in aula inuenisset, in peregrinos, egenos, viduas, pupillos, cœnobia, & Ecclesias erogatis, breui illam exinaniebat. Ad eius quoque nutum Rex Deo deuotus Monasterium, quod Beel vocant, inchoauit; bonis omnibus illud locupletans: in quo Gerardus Monachus, qui Venetiis eò venerat, vitam duxit contemplationi addictam: & postea diuina ordinatione creatus Episcopus, post obitum sancti Regis orta Christianorum persecutione, lapidibus oppressus, diuino munere Martyrum contubernio dignus effectus est. Nec hîc prætermittendum puto, quòd diuina virtus in beati viri vita demonstrare voluit, cuius meriti esset. Nam quoties ad aures eius peruenisset, quempià aduersa laborare valetudine,

ne, medicinæ loco misit ei siue panis, siue pomi, vel herbæ odoriferæ particulam, simul mandans, vt sanus surgeret. Mox verò diuinæ misericordiæ fauore eius sermonem prosequente, incolumis ille efficiebatur.

Post gloriosam in cælos ascensionem, & mirabilē in paterna dextra confessum, Saluator noster paucis corporaliter apparuisse legitur: per visionē autem multos cōsolans, de rebus futuris eos fecit certiores. Idem verò præstitit etiam huic sancto Regi. Quadam enim nocte ex reuelatione experrectus, veredarium quemdam intra diem & noctem iussit properè ire ad Albam Trásiluaniam, & omnes ruricolas, vt ad vrbes munitas celerrimè se conferant, admonere, quòd superuenturi essent Christianorum hostes Bessi, (qui tum Hungaris infensi & & infesti erant) eorumque res deprædaturi. Vix nuntius compleuerat quæ iussus erat, & ecce Bessorum inopinata incurtio & impetus incendiis & rapinis depopulatur omnia, corporibus hominum illæsis, quòd ex beati viri præmonitione in tutiora loca se recepissent.

Defuncto autem beati Regis amico Romanorum Imperatore Henrico, Conradus ei in Imperio successit. Is pacis tranquillitate interturbata, totius Germaniæ viribus

& copiis contractis, Pannoniæ infesta signa inferre conatus est. Tum verò Rex Stephanus, Episcoporum & Principum coacto conuentu, in patriæ defensionem totius Hungariæ exercitum euocauit. At prius tamen secum perpendens, se nihil posse sine Christi adiutorio, manibus & corde sursum erectis, Dominae suæ, perpetuæ Virgini & Dei genitrici, suas iniurias commendans, in eiusmodi prorupit voces: Si placet tibi, Domina mundi, tuæ partem hereditatis ab inimicis deuastari, & nouellam Christianismi plantationem dissipari, ne, quæso, sinas illud imputari diffidentiae meæ, sed potius dispositioni voluntatis tuæ. Si quid commeruit culpa pastoris, ipse luat: oues, quæso, insontes ne patiaris affligi. His dictis, tamquam accepta consolatione ab ea, fidenter mouit in hostes. Altera die nuntius venit ad singulos quosque Duces exercitus Germanorum, ab Imperatore literas adferens, quibus iuebantur pedem retrò referre. Illis ergo discedentibus, sanctus Rex diuina misericordia adiutum se sentiens, humi se abiicit, gratiasque agit Deo & sanctissimæ Genitrici eius, cuius protectioni seque Regnumque suum assiduus precibus commendare solebat. At Imperator suorum tam repentina defectione perterritus,

scisci-

sciscitatur quidnam rei ipsis accidisset : audiensque de nuntio , qui eos ipsius nomine redire iussisset, sciensq; illum à se haudquam missum fuisse, non dubitavit consilio & volúrate omnipotentis Dei rem gestam, ob fidelissimi Regis corroborandam spem; seque deinceps ab eius inuadendo regno, timore illius Iudicis æterni, cohibuit.

Porro Rex piissimus erga regni sui politicam gubernationem religiosa sollicitudine occupatus, diurnum tempus colloquiis & consultationibus impendebat ; nocturnis horis in vigilias , preces, lacrymas, rerum diuinarum cõtemplationem incumbibat, orans sedulò iustum Iudicem, vt ipse sua moderatione quotidie discutiendis rebus & ferendis sententiis adesse dignaretur. Quod quidem cum ille magno spiritalis desiderij studio frequentaret, nocte quadam procul à templo Dei (descenderat quippe cum illo suo magno & nobili comitatu) in loco campestri fixis tentoriis, in cordis sui cubiculum se recepit ; & flexis genibus, solo labiorum motu ad sempiternæ misericordiæ fores gemitibus & lacrymis pulsabat . cumque diutiùs precibus inhæreret , Domini sui, Regis æterni ministris ad suscipiendas preces eius aduenientibus, papilio super eum extensus, à terra sublatus est, atque tamdiu

in aëre mansit suspensus, donec vir Dei ad se reuersus ab illa contemplatione, spiritum à precibus relaxauit. Quod licet inuisibiliter illi soli, qui res nouit antequam fiant, & secretorum eius consciis Angelis esset cognitum: attamen etiam cuidam magnæ simplicitatis & innocentiae viro, qui tunc fortassis simili erat operi intentus, innotuit. Quem Rex, Dei spiritu id reuelante, arcani sui conscius sciens, ad se accersitum, blandis primùm verbis appellat, rogat, quidnam viderit: deinde seueriter interdicit, ne cui id, dum ipse sit in humanis, reuelaret.

Fama nominis eius in multas gentes diuulgata, & iudiciis oris eius cum multa laude ubiq; propalatis, sexaginta Bessi, quorum suprà meminimus, cum vniuerso apparatu suo, auri argentiq; copia, & multi variis ornamentis curribus onustis, è finibus suis egressi, ad Regem venire volebant. Cumque ad Pannoniæ fines accessissent, multi è seruis, quorum animi instar ceræ faciliè flectuntur in vitium, malignitatis suæ facibus inflammati, iis exiêre obuiam: & quosdam gladiis cedentes, illorum res omnes abstulerunt; eosque vacuos & semineces reliquerunt. At illi ea quæ passi erant, ad Regem relaturi, cepto pergunt itinere: cumque in Regis conspectu venissent, ad eius genua prouol-

prouoluuntur. Rex iis visis, percontatur quid mali perpeffi sint. Tum illi: Nos, in-
 quiunt, serui tui, domine Rex, nihil cui-
 quam mali machinantes, ad te properaba-
 mus, audituri iudiciorum tuorum discipli-
 nam. Quidam autem in nos incurrentes,
 pecuniam omnem quam apud nos habe-
 bamus, nulla culpa nostra abstulere: atque
 insuper quosdam apprehensos è nobis ce-
 ciderunt: denique vix compotes vitæ, huc
 accessimus, vt eam rem tibi indicaremus.
 Rex iis auditis, vt erat prudens, neque vul-
 tu neque verbis minatus est eis: sed conue-
 nienter illi sententiæ Salomonis, *Totum spi-* Prou. 29.
ritum suum profert stultus: sapiens differt, &
reseruat in posterum, misit ocyùs ad tribunal
 sub quo militabant illi, & ad certum diem
 iussit coram se sisti omnes. Factum est ita,
 & ad eius conspectum adducti sunt, ab illo
 discutiendi. Eos ergo sic appellat Rex: Cur
 posthabita & contempta lege diuina, non
 estis vfi misericordia, sed homines innoxios
 tam malè mulcistis? Sicut ergo fecistis, ita
 hodie vobis coram me faciet Deus: Legis
 enim transgressores feriri par est. Lata igi-
 tur in eos sententia, educti sunt, & ad om-
 nes Regni aditus bini suspensi. Quod ille
 credendus est zelo iustitiæ ita iussisse, vt
 exemplo suo perdit i illi homines alijs ter-

rorem adferrent. Cùm enim Regnum suum exteris omnibus in illud aduentantibus, ceu portum quemdam tutissimum & asylum esse vellet; liberum quoque in illud omnibus voluit patere ingressum, ita vt nemo ausus esset quemquam ex eis ledere, aut molestiam ei exhibere. Quod etiam sua auctoritate consecutus est, quando illo viuente nullus quemcumque hospitem in aliquo violare ausus fuit.

Act. 14.

Prou. 3.

Nec tamen beatus & pius Rex immunis fuit ab eo quod Apostolus dicit, *per multas tribulationes oportere nos introire in regnum Dei.* & quod habetur in Prouerbiis Salomonis: *Quem diligit Dominus, corripit; & quasi pater in filio complacet sibi.* Multis enim modis castigauit eum Dominus. Tribus annis perpetuò laborauit aduersa valetudine: quacùm tandem diuinæ misericordiæ medicina esset liberatus, in obitu filiorum suorum, quos adhuc infantes mors rapuit, æterni Iudicis flagella persensit. Attamen dolorem ex ea orbitate conceptum, amore filij superstitis, bonæ indolis pueri Emerici temperauit: quem sanè ceu vnicum impensius amans, quotidianis precibus Christo & eius Genitrici Virgini perpetuæ commendabat, eumque sibi superstitem & Regni heredem votis omnibus expetebat. Et vt idoneus ille foret

foret tanti Regni tenendis gubernaculis, Catholicorum virorum doctrinis quotidiana lectionis vsum, & vtrasque tam animi quàm corporis aures eum voluit adhibere: atque insuper paterni amoris impulsus stimulis, libellum ei composuit de morum institutione, in quo illum verbis spiritualis adhortationis fideliter & accuratè compellat; docens eum quemadmodum ante omnia debeat retinere Catholicam fidem, confirmare statum Ecclesiasticum, honorem habere Præsulum dignitati, Principes & milites amare, iudicij tenax esse, in cunctis suis actibus studere patientiæ, hospites benignè recipere, benignius alere & fovere, sine consilio nihil agere, maiores suos semper ob oculos exemplum sibi statuere, precibus crebrò vacare, pietatem & misericordiam ceterasque virtutes colere & consecrari. His & id genus aliis disciplinis præclarus ille iuuenis imbutus, ex diuinæ voluntatis moderatione, cui omnia parère necesse est, Dominicæ incarnationis anno millesimo trigésimo, vitam hanc corruptibilem cum sempiterna commutavit, supernorum civium choris adiunctus. Eius animam ea ipsa hora qua decessit, cuidam Græcorum Episcopo, sanctæ conuersationis viro, diuinitus reuelatum est, Angelicis manibus in

PROV. 21.

cælos deportari. Cùm autem pro sanctitatis suæ meritis summè ab omnibus diligeretur, omnium extitit luctus ingens, in primis verò Principum; inter quos pater, tanto accepto orbitatis vulnere, grauius suspirabat, & pietatis affectu ductus, dolebat se omni posteritatis spe destitutum. Attamen sciens scriptum esse; *Non est sapientia, non est prudentia, non est consilium contra Dominum: & illud in Canonibus, Neminem propter obitum charorum nimium debere contristari: posito animi mœrore, totum se contulit ad largam Dei misericordiam promerendam. Cœnobiorum enim & Ecclesiarum ministris, Monachis & Clericis multa elargitus est, multamque ea beneficentia attulit consolationem: quidquid verò ei superfuit, peregrinis, viduis & orphanis erogauit. Exterarum quoque prouinciarum Monasteriis Regiæ munificentiae dona innumera per nuntios suos crebrò misit. Eam, quam in iuuentute susceperat, morum grauitatem ad supremum usque vitæ diem præ se tulit. Vix vmquam ridere visus est, sciens scriptum: *Risus dolore miscebitur, & extrema gaudij luctus occupat*: semper ita se comparans, ac si staret ad tribunal Christi, eius præsentiam oculis interioribus sereno vultu contemplan. Christum in ore, Christum in corde,*

Chri-

PROV. 14.

Christum in cunctis actibus suis circumferbat. Extremum vitæ diem semper ob oculos mentis habebat, & magno cordis desiderio ad illam supernorum civium frequentiam adspirabat, quemdam Angelicæ conuersationis habitum præferens. Denique cunctis ornatus virtutibus, in sanctitate & iustitia coram Deo omnibus diebus vitæ suæ viuere cōstituerat, vt in eo iam quædam futuræ gloriæ species elucere videretur.

Nec diu pōst in morbum incidit, qui ei postea mortem attulit: diuturna quæ eius morbi molestia increcente, pedibus insistere non potuit. Quod vbi aduerterunt ex Palatinis nobilissimi quatuor, scilicet Regem diu grauitèrque laborantem, cum etiamnum cordis perfidia teneretur, iniquum inter se consilium inierunt, vt eum è medio tollerent. Iam die aduersperascente, antequam in domo Regis lucerna accenderetur, vnus ex ijs audacior, cælo obscuro ingressus est, nudum ensẽ sub chlamyde ferens, quo erat Regem piissimum iugulaturus. Sed cum eò inferret pedem, vbi Rex quiescebat, cælesti reuerà impulsu gladius ei excidit: quem Rex statim sentiens, quid is sibi velleret, perquisiuit, cum iam diuinitus id præsciret. Tum ille territus corruit, agnoscit consilium amentia plenum, dolet, accedit propius,

propius , procumbit in genua , Regis pedes amplectitur , se peccasse confitetur , petit tanti parricidij veniam. Rex pius ab eo faciem non auertit,propenso animo ignoscit. At verò iubet inquiri illos immanes parricidas,in repertos tanto scelericongruentem mortis profert sententiam.

Dignus tandem , qui centuplex cælestis Regni brauium consequeretur,febre correptus est : sentiensq; , adesse migrationis tempus , accersitis Episcopis & Primoribus palatij, Christiano nomine gloriantibus , primum tractauit cum eis de substituendo sibi Rege : deinde paternè monuit eos , seruare Catholicam fidem quam acceperant,amare iustitiam, fraternæ charitati studere, humilitati dare operam , ante omnia verò nouellæ Christianismi plantationi curam & sollicitudinem adhibere. His dictis , manus & oculos in cælum erigens, Regina cæli, inquit, mundi inclyta reparatrix,tuo patrociniio sanctam Ecclesiam cum Clero & Episcopis,Regnumque cum Primatibus & populo tuis precibus commendo: quibus ego nunc vltimum vale dicens , animam quoque meam tuis manibus committo. Instabat tunc præcipua solemnitas, celebris Angelis & hominibus , Assumptionis beatissimæ Mariæ dies:in cuius gaudiis , vt sui corporis

poris fieret dissolutio , precibus à Domino contendit, lacrymis & gemitibus impetrauit, sperans cumulationis misericordiæ se spem habiturum. Aderat ergo felix ille dies, eius obitu mox felicitatis aliquam accessiorem habiturus ; circumstabant cum Clero Episcopi, cum ministris Principes & Comites : Rex in medio iacens , sacram percepit vnctionem, sanctamque animam, Corporis & Sanguinis Christi recreatam viatico, anno Dominicæ incarnationis millesimo trigesimo quarto, in manus perpetuæ Virginis & sanctorum Angelorum , æternæ quietis beatitudini inferendam, tradidit.

Extitit mox planctus Sanctorum haud vulgaris, Angelis lætantibus: sed planctus ille postea mutatus in gaudium perenne tam præsentium quàm futurorum populorum. Ad exequias eius ex omnibus Pannoniæ plagis concursus est, corpus ad urbem regiam, puta Albam, perductum: sed cum Ecclesia beatissimæ Virginis ab eo constructa, necdum consecrata esset, communicato inter se consilio , prius Episcopi statuunt sanctificandam Basilicam , postea in ea corpus humandum. Absoluta igitur dedicationis solemnitate , sacrum corpus in media æde sarcophago è candido marmore confecto, impositum est , vbi compluribus annis ob
cuius

eius merita Dominus permultis malè habentibus, febribus vexatis, afflictionem & miseriam suam fatentibus, innumera præstitit beneficia. Sæpè quoque illic noctibus Angelicæ melodix auditæ sunt à multis, sæpè odoris suauissimi fragrantia per templum sese diffudit.

Iacuit in eo loco sacrum corpus annis quadragintaquinque, occulta quadam omnipotentis Dei dispositione, qui est mirabilis in Sanctis suis, marmoris pondere pressum, & in puluerem redactum, vt tempore præfinito digniùs declaretur, & in resurrectionis die gloriosiùs renouetur. Id verò quid significet, quando sine diuina ordinatione factum minimè putamus, libet oculis interioribus speculari. Fortassis nonnihil terreni pulueris, diuinæ examinationis igne purgandum in illo remanserat, sine quo Reges, magna potentia fulti, vitam præsentem vix quidem transigere possunt. Illis ergo euolutis annis quinque & quadraginta, cum ad præstanda per eum mortalibus suæ misericordiæ beneficia, Sancti sui iam vellet Deus merita declarare, Romani Pontificis literis mandatum fuit, vt eorum corpora eleuarentur, qui in Pannonia Christianæ fidei semina iecissent. & sua vel prædicatione vel institutione ad Dominum eam conuertissent.

tissent. Itaque Ladislaus Rex, qui tum ad Reipublicæ gubernacula sedebat, omni morum honestate conspicuus, & virtutibus illustris, diuino cultui & laudibus Dei totus addictus, sancto illum Spiritu permouente, communicato cum Episcopis & proceribus, totiusque Regni sapientibus viris consilio, triduanum cunctis ieiunium indixit; ut quod communi Catholicorum vtilitati, Spiritus sancti muneribus animarum & corporum salutem efficientibus profuturum videretur, id communi omnium deprecatione, ieiuniis & eleemosynis fulcita, per signorum manifestationem expeteretur. Sed ut ostenderet Dominus, quanta misericordia Rex adhuc manens in corpore præditus fuerit, quam etiam iam cum Christo regnans præ ceteris operibus se approbare declaret, cum triduo totis viribus in id incumberent, ut eius sacrum corpus eleuarent, nulla id arte loco mouere potuerunt. Eo namque tempore ob hominum culpas, inter eum quem diximus Ladislaum Regem, & fratrem eius Salomonem, grauis fuit orta simultas & seditio; cuius nomine captus Salomon, custodia tenebatur. Cum ergo in corpore eleuando frustra sudarent, quædam inclusa apud Ecclesiâ sancti Saluatoris, (Charitas ea dicebatur) cuius vitæ
tum

tum erat celebris opinio , ex diuina reuelatione mandauit Regi , conatus eorum omnes irritos & inanes fore, nec posse transferri sancti Regis corpus , donec Salomon venia impetrata, liber custodia dimitteretur. Illo igitur è carcere educto , & rursus triduo exacto ieiunio, cum ad sacras transferendas Reliquias tertio die ventum est , grande saxum sarcophago impositum, tanta facilitate sublatum est, ac si nihil ponderis haberet. Absoluto autem eius diei vespertino officio , cunctis diuinæ benignitatis beneficia per beati viri merita præstolantibus, subito Christo plebem suam visitante , per sanctæ ædis amplitudinem cælitus miracula coruscant. Quorum multitudo quoniam ea nocte numerum excessit , libet hîc illud ex Euangelio dicere , quod Saluator Ioanni per nuntios sciscitanti, an ipse esset qui venturus sit, voluit responderi: *Cæci vident, claudi ambulant, surdi audiunt, leprosi mundantur*, mali corriguntur , paralytici curantur. Sed tamen quando omnia non possumus, quædam ex eis annotabimus.

Math. 11

Iuuenis quidam, membris omnibus dissolutus, duodecim annis mansit paralyticus, manuum & pedum officio destitutus. Is parentum opera eò perductus, totius corporis est incolumitate potitus , atque ad altare

tare currens alacriter, omnium Christi laudes promentium gaudia cumulavit. Fuit hoc eius noctis primum miraculum.

Alius septennis puer, ab ipso ortu contractus, genibus & manibus reptabat. Eum parentes plena fide ad beati Regis sepulchrum adducunt, illicque prostrati, eius suffragia implorant. Mox voto potiti suo, mirantur contractos neruos in filij corpore laxari. Vident omnes eum solidatis plantis & genibus ambulantiem, & Christi nomen in beati viri meritis laudabili clamore concelebrat. Porro Rex pius, præ nimio gaudio lacrymans, puerum è terra leuatum ad altare adfert, & in Dei laudes erumpens, pro tanto beneficio illi puero collato, cum omnibus qui aderant, profusè gratias agit. Ita totam noctem illam Deus, pro famuli sui veneratione, multorum splendore signorum mirificè illustravit: & populus vigiliis & precibus vacans, singula miracula laudis & prædicationis vocibus prosequi non cessauit.

His verò illud quoque adiungendum videtur, non solum illic præsentibus, sed etiam procul positis, eius suffragantibus meritis celerem salutis effectum adeptos esse. Cum enim eius eleuandi fama passim increbuisse, variis afflicti morbis ex cunctis Pannoniæ finibus, quo quisque poterat modo, ad

Cc

sanctum

sanctum eius tumulum properarunt. Sed cum aliis præcedentibus, alij maiori morbo retardati, simul eò pertingere non possent, eadem tamen misericordia innumeri in ipso itinere sanati sunt. Quamobrem etiam ob perpetuam benefici Regis conseruandam & ad posteros propagandam memoriam, complures eius meritis salutem adepti, in iis ipsis, quibus curati sunt, itineris sui locis, grandes lapidum æceruos effecerunt, qui postea longo illic tempore permanserunt. Sed & mulier quædam exanime corpus vnicui filij sui, qui interim spiritum exhalarat, apud sancti Regis sepulchrum deposuit, Dei & Sancti eius opem imploraturam. Mira quidem res, & nostris temporibus stupenda: non prius femina orare destitit, quam viuentem cerneret filium suum.

Manè diei ab Assumptione beatissimæ Virginis quinti, conuenientibus in Ecclesiam cum Rege Principibus, cum Clero Episcopis, primum Missa pro defunctis celebrata est: deinde sublata tabula marmorea, quæ erat pauimento eminentior. Postquam autem ad sarcophagum peruentum est, tanta inde suauissimi odoris fragrantia in omnium nares dimanauit, ut sibi in paradysum deliciarum Dei rapti viderentur. Ipse verò sarcophagus plenus fuit aqua aliquantum

quantùm subrufa , & quafi oleo permixta, atque in ea, perinde atque balsami liquore, ossa pretiosâ quicuerunt. Quibus in mundissimum linteamen collectis, in ipso liquore diutissimè quâsierunt annulum sancti Regis dexteræ insertum. Sed cùm non inueniretur, iussu Regis aqua illa in argentea vasa effusa est, vt posset annulus certius reperiri. Sed modo sanè admirabili factum est, vt quòd plus exhauriretur aquæ, eò magis sarcophagus impleretur. Id vbi animaduersum est miraculi, aquam haustam suo restituere loco: nec tamen ea accedente, sarcophagus magis abundare visus est. Tum verò cooperto sepulchro, laudes & gratias egerunt diuinæ pietati. Porro interim dum ex inuento thesauro reparant beatissimæ Matris Dei & perpetuæ Virginis altare, Deus, qui est mirabilis in Sanctis suis, profusis benignitatis suæ muneribus, & euidentibus miraculorum signis se præsentem declarauit, in tantum, vt tempus illud quo Saluator vixit inter homines, rediisse videretur, de quo Scriptura diuina ait: *Omnes, qui habebant infirmos variis languoribus, ducebant illos ad Iesum, & curabantur.* Hæc verò omnia virtus diuina non solùm illo die, sed postea quoque longo tempore ob merita serui sui effecit, ita vt etiam ab exteris regionibus,

cognita beati viri fama, salutis recuperandæ causa permulti variis affecti morbis, ad sancti Regis imploranda suffragia cupidissimè aduolarent.

Comitissa Mithildis, eximiæ nobilitatis matrona, tribus annis perpetuo viscerum dolore laborans, iam morti proxima videbatur: à suis verò ad monumentum Regis beati allata, vbi illud attigit, paulatim cœpit habere meliùs: breuique recuperata pristina valetudine, magnalia Dei per famuli eius merita in se renouata diuulgauit.

Alia miracula cœlitus perpetrata non idcirco prætermisi, quòd ea fastidiam; sed cum non mihi vni pluat Dominus, *qui solem suum oriri facit super bonos & malos*; tantam beneficiorum eius copiam, omnium vtilitati consulere cupiens, innumeris sapientibus viris quos Hungaria fouet & complectitur, stylo prosequendam relinquo. Illud solum sub libelli finem adiicere libet, miro diuinæ benignitatis munere, diu quæsitum & minimè repertum annulum cum ipsius beati Regis dextera, post eius peractam translationem inuentum esse.

Nam monachus quidam, Mercurius nomine, (qui cum esset Clericus, thesauri beatissimæ semperque Virginis Mariæ custos fuerat, & iam amore cœlestis patriæ sæculo

culo valefecerat) ea hora qua sancti Regis tumulus apertus fuit, ne quid sacrarum Reliquiarum ad se raperet, obiurgatione Regis procul inde remotus fuit. Sedit igitur in choro tristi vultu, iuuenis quidam candido amictus habitu, pannum inuolutum tradidit, ita dicens: Hunc pannum tibi seruandum commendo, opportuno tempore in lucem proferendum. Sacro inde expleto ministerio, Monachus in quodam angulo domus explicat pannum, integramque pij Regis manum cum annulo mirifici operis cernens, expauescit, nulloque conscio, ad Monasterium suum cui præfectus erat, eam absportat, tempus à iuvene sibi memoratum præstolaturus. Et diu sanè thesauri illius in agro absconditi solus ipse custos peruigil fuit: deinde Monasterij eius fundatoribus rem aperuit: postremò, appropinquante iam tempore quo erat arcanum illud in publicum offerendum, ad Regis quoque notitiam perduxit. Is verò mox accitis Episcopis & Hungariæ primariis viris, cum multa interim Christus miraculorum beneficia exhiberet, celebrem præfixit diem beati Regis dexteræ eleuandæ. Sed quid sibi vult, fratres mei, quòd ceteris membris resolutis, & carne in puluerem redacta, solam dexteram manum cum eius cute, ossi-

bus & neruis , Deus integram conseruauit?
 Equidem sic sentio, diuini consilij altitudi-
 nem id hac re demonstrare voluisse , elee-
 mosynæ studium omnes virtutum gradus
 transcendere. Quamobrem etiam in Euan-
 gelio Dominus ait : *Beati misericordes , quo-*
niam ipsi misericordiã consequentur. itemque:
Date, & dabitur vobis. & alio loco Scripturæ
 diuinæ : *Ignem ardentem extinguit aqua , &*
eleemosyna resistit peccatis.

Matth. 5.

Luc. 6.

Eccli. 3.

Ioan. 13.

Merito igitur sancti Regis dextera cor-
 ruptionis mansit expers , quæ semper mise-
 ricordia floribus reuiuiscens , ad alendos
 pauperes numquam muneribus distribuen-
 dis vacua fuit: namque piissimus Rex opem
 tulit calamitosi & indigis, liberauit oppres-
 sos captiuitatis iugo, veltes & hospitalitatis
 officia impendit peregrinis , viduarum &
 pupillorum miseriam & inopiam, suam pa-
 tauit. Mandatum Saluatoris de lauandis
 aliorum pedibus, quotidie impleuit, paupe-
 rum pedes abluens : eleemosynas præstitit
 non ex rapinis, aut aliorum damnis , sed de
 suis facultatibus. Vt domos Dei locupleta-
 ret, sibi ipsi interdixit habendi voluntatem.
 Denique omnibus pro dignitate prodesse
 cupiens, carnem suam cum vitiis & concu-
 piscentiis crucifixit. Inde est ergo profecta
 corporis & dextræ manus eius admiranda
 & iu-

& iucunda veneratio ; inde suavis & beata
sempiternæ vitæ retributio ; inde optatissi-
ma supernorum ciuium cohabitatio , vbi
cunctos illustrat semper lucens , nec vn-
quam deficiens splendor vnus summæque
Diuinitatis, Patris, & Filij, & Spiritus sancti,
per infinita sæcula sæculorum. Amen.

A N N O T A T I O.

QUOD in hac historia dicitur , Gisilam
coniugem sancti Stephani fuisse filiam
sancti Henrici , & ab eo ductam cum iam
Christianus esset ; corrigendum est ex Hi-
storia Othonis Frisingensis : Gisila enim
non fuit filia, sed soror sancti Henrici, & in
coniugem data Regi Stephano cum ille
nondum Christianus esset. Hæc enim sunt
verba Othonis Frisingensis Historici nobi-
lissimi in libro sexto Chronici capite 27.
Henricus Imperator sorore sua Gisila Ste-
phano Hungarorum Regi in vxorem data,
tam ipsum , quàm totum Regnum eius ad
Fidem vocauit. Hunc Stephanum Hungari
hactenus fidem Christianam seruantes, vel-
ut principium fidei suæ , inter Sanctos co-
lendum dignum ducunt. At Henricus Im-
perator piissimus , vigesimoquarto Regni
sui, Imperij autem vndecimo anno , rebus

C c 4 huma-

humanis exemptus, in Ecclesia Bambergenſi humatur. Et, vt illa teſtatur Eccleſia, ſepulchrum eius vſque hodie crebris miraculis celebre habetur.

Obiit ſanctus Stephanus anno Domini 1034. & in Sanctorum numerum relatus fuit à Benediſto IX. anno Domini 1036.

S. E D V A R D I R E G I S V I T A,

Auctore Alredo Rhieuallo Anglo,
Monacho & Abbate Cifterciensis
Ordinis.

Floruit is Alredus anno Domini 1164.

GLORIOSI ac Deo Dilecti Regis Eduardi vitam literis tradituri, ex verbis beatiffimi Petri Apoſtolorum Principis ſumamus exordium, qui Centurionis vocationem admirans, ait: *In veritate comperi, quia non eſt perſonarum acceptor Deus, ſed in omni gente, qui timet Deum, & operatur iuſtitiam, acceptus eſt illi.* In omni enim gente, ordine, gradu & dignitate nouit Dominus qui ſunt eius, & miſeretur cui voluerit, & miſericordiam præſtat in quem ſibi

A&. 10.

2. Tim. 2.
Rom. 9.

sibi placuerit. Neque enim ex sui ipsius natura vel paupertas præstat, vel adimunt diuitiæ sanctitatem; nec perfectum obscuritas, nec reprobum claritas facit; nec claudit libertas, nec reseat seruitus paradisum. Primus Patriarcha Abraham & diues scribitur & perfectus, cuius fides admirabilis, & obedientia inimitabilis in rerum omnium copia prædicatur. Ioseph dominus Ægypti constitutus à Rege, vniuerso orbi præbuit castitatis exemplum. Sanctus Iob qualis in diuitiis fuerit, earum probauit ademptio, quam morbus corporis, tentatio vxoris, amicorum exprobratio, spectabili patientia reddidit clariorem. Rex Dauid, quo nemo ditior, sed nemo & sanctior, quo nullus sublimior, sed humilior nullus; & inter thesauros innumeros sepelitur, & inter Dei amicos ceteris gratior computatur, Nemo proinde miretur, si noster Eduardus & Rex dicatur, & sanctus, quem cernimus & in diuitiis egenum, & in deliciis sobrium, in purpura humilem, & sub coronâ aurea mundi contemptorem.

Cùm enim Rex Ethelredus ex filia Comitum Thoreti filium suscepisset Edmundum, cognomento Ferreum latus; ex Regina autem Emma Alfredum: beatus Eduardus intra viscera materna conclusus præfer-

tur vtrique, agente eo qui operatur omnia secundum consilium voluntatis suæ, qui dominatur in regno hominum, & cuicumque voluerit, dat illud. Fit enim coram Rege magnus Procerum & Episcoporum conuentus; & quia iam futuræ cladis indicia sæua processerant, agitur inter eos de Regis statu tractatus. Alij verò Edmundum ob inuictissimum robur corporis æstimant præferendum; alij ob virtutem Nortmannorum Alfredum promouendum tutius arbitrantur. Sed futurorum omnium præscius, prioris breuissimam vitam, alterius mortem immaturam prospiciens, in puerum necdum natum vniuersorum vota cōuertit; vtero adhuc clauditur, & in Regem puer eligitur: non natus natis præfertur, & quem necdum terra susceperat, terræ dominus designatur: & læti Proceres sacramentum fidelitatis illi iurant, qui vtrum nasceretur, ignorant. Paulò itaque post natiuitatem sancti Eduardi irruentibus in Angliam Barbaris, & maximam insulæ portionem cede incendioque vastantibus, Regina cum filiis in Nortmanniam transposita est. Viuebat in auita domo inter pueros puer, immunis tamen à vitiis, quibus ætas illa solet implicari. Castus erat corpore, sermone rarus, simplex actu, & purus affectu. Frequētare

tare Ecclesiam dulce habuit, crebrius orationibus incumbere, sacris Missarum interesse solemnibus, visitandis Monasteriis operam dare, & quos sanctiores sciebat, sibi Monachos in amicitiam copulare.

Sæuiebat interim gladius hostilis in Anglia, cædibus & rapinis omnia replebantur, vbique luctus, clamor, & desolatio. Incenduntur Ecclesiæ, Monasteria deuastantur, Sacerdotes à suis sedibus fugati, in locis desertis communem miseriam deplorantes delitescabant. Inter quos vir venerabilis Brithuualdus VVintoniësis Episcopus, cœnobium Glastoniense mœrens ac tristis ingressus, orationibus vacabat & Psalmis. Qui cum aliquando pro Regni plebisque liberatione preces lacrymasque profunderet, quasi in hæc verba prorumpens, ait: *Et tu* Psal. 12.
Domine vsquequò? Vsquequò auertis faciem 43. 87.
tuam? obliuisceris inopia nostra & tribulationis nostra? Sanctos tuos occiderunt, altaria tua Dan. 3.
destruxerunt, & non est qui redimat, neque qui saluum faciat. Scio Domine, scio, quia omnia, quæ fecisti nobis, in vero iudicio fecisti. *Sed numquid in æternum proiiciet Deus, &* Psal. 76,
non apponet ut complacitior sit adhuc? Erítne, Domine Deus meus, erítne finis horum mirabilium? aut in æternum tuus in nos mucro desæuiet, & percuties vsque ad inter-

terneccionem? Inter preces tandem & lacrymas fatigatum sopor suavis excepit, videturque per somnium beatum Petrum in eminentiori loco constitutum, & ante eum præclari vultus in forma decenti, regalibus insigniis amictum Eduardum. Quem cum propriis manibus Apostolus consecrasset & unxisset in Regem, monita salutis adiecit, præcipueque cælibem vitam commendans, quot esset annis regnaturus aperuit. Obstupefactus Præsul tanti miraculi novitate, petit sibi à Sancto huius visionis mysterium reuelari: de statu insuper Regni, & de instantis periculi fine Apostolicum exegit oraculum. Tunc placitum vultu intuitus intuentem se, ait: *Domini, ô Præsul, est regnum, & ipse dominabitur in filiis hominum.*

Ipse transfert regna, & mutat imperia, & regnare facit hypocritam propter peccata populi.

Peccatum peccauit populus tuus Domino, & tradidit eos in manibus gétium, & dominati sunt eorum qui oderunt eos. Sed non obliuiscetur misereri Deus, nec continebit in ira sua misericordias suas. Erit enim cum dormieris cum patribus tuis, visitabit Dominus populum suum, & faciet Dominus redemptionem plebis suæ. Elegit enim sibi virum secundum cor suum, qui faciat omnes voluntates suas, qui me opitulante regnum

Psal. 21.

Dan. 2.

Iob 34.

Psal. 76.

gnum adeptus Anglorum, Danico furori finem imponet. Erit enim acceptus Deo, gratus hominibus, terribilis hostibus, amabilis ciuibus, vtilis Ecclesiæ, laudabilemque vitam sancto fine concludet. Quæ omnia in beato Eduardo completa, rei exitus comprobauit. Cùm autem Episcopus de posteritate Eduardi quæreret, respondit sanctus Petrus: Regnum Anglorum, regnum Dei est; post istum prouidebit Regem ad placitum suum.

Stabat adhuc spiritus procelle, & exaltati Psal. 106.
sunt fluctus eius, externisq; malis accessit ciuilis discordia; adeò vt quis cui mentis suæ secreta committeret, nesciretur. Plena erat proditoribus insula; nusquam tuta fides, nusquam sine suspicione amor, sermo sine simulatione. Tandem eousq; proditio ciuilis, & astutia processit hostilis, vt defuncto Rege Ethelredo, magna pars insulæ, legitimis heredibus abdicatis, Canuto qui regnum inuaserat, manus darent: peremptoque inuictissimo Rege Edmundo, etiam filioseius adhuc in cunis agentes, Barbaris mitterent occidendos. Alfredus demum Eduardi frater in Angliam transuectus, inaudita crudelitate ab hostibus ciuibusque perimitur. Tunc Eduardus omni humano destitutus auxilio, exul patriæ, regni, & honoris,

noris, viuebat : impiorum insidias timebat, & ne à suis proderetur, vel ab hostibus ad mortem emeretur, plurimum formidabat.

Inuento autem consilio salutari, Deo prosternitur, talia prosequendo: Ecce Domine,

Iob 6. *non est mihi auxilium in me, & necessarij mei*

Psal. 37. *recesserunt à me: Amici mei, & proximi mei*

aduersum me appropinquauerunt, & steterunt:

pater meus post multos labores rebus humanis excessit, fratres meos crudelitas pro-

3. Reg. 19.

est: ita solus relictus sum, & quærunt animam meam. Sed tibi Domine derelictus

Psal. 9.

sum pauper: pupillo tu eris adiutor. Tu quondam Eduuinum morti expositum,

mirabili modo & vitæ reseruasti, & Regno.

Tu illud Angliæ decus, sanctum Osualdum ex exule Regem factum, per signum Cru-

cis reddidisti cunctis hostibus fortiorem. Si igitur fueris mecum, & custodieris me, &

Gen. 28.

reduxeris me in Regnum patris mei; eris tu mihi semper in Deum, & beatus Petrus A-

postolus in Patronum, cuius sacratissimas Reliquias in Vrbe Roma, te annuente, te

regente, te comitante, visitaturum me promitto. Exhinc autem factus fide robu-

stior, spe alacrior, expectans expectauit Dominum.

Canu-

Canuto autem Rege rebus humanis exempto, filiis eius immatura morte præreptis, Angli Danico iugo liberati, Eduardum in Regem elegerunt, & cum maximo honore consecrari & inungi fecerunt. Tunc Sacerdotes sapientia & sanctitate fulgebant, Monasteria omni religione pollebant, agebat Clerus in officio suo, populus stabat in gradu suo. Videbatur etiam terra fecundior, aer salubrior, maris vnda pacatior. Reges enim & Principes pro tanta rerum mutatione, admiratione perculsi, cum tanto Rege fœdus inire, amicitias iungere, pacem componere gauisi sunt. Sola tamé Dania adhuc spirans & anhelans cædes, Anglorum interitum minabatur. In his omnibus vir beatus in gloriam non est elatus humanam, sed hanc sibi viuendi formam proponens, suis se domesticis præbebat æqualem, Sacerdotibus humilem, plebi gratum, compatiens miseris, & largum egenis. Nulla apud eum personarum acceptio, sed iudicabat in iustitia pauperes, & arguebat in æquitate pro mansuetis terræ: eratque pater orphanorum, & iudex viduarum. Si quidquam petebatur, præbebat: si accipiebatur, tacebat. Nullus umquam eum vidit aut inflatum superbia, aut ira efferatum, aut gula dehonestatum. Supra humanum enim modum

modum pecuniæ contemptor, nec in earum amissione tristior, nec in adeptione videbatur hilarior.

Recumbente aliquando gratia quiescendi Rege in lectulo, Camerarius accessit ad thecam, in qua æs regium seruabatur, & reposito intus quod volebat, & illam claudere oblitus, foras egressus est. Animaduertit hoc quidam, & accedens ad thecam, pecuniam non modicam in sinum recondit, & abscedit. Reuersus denuò, Rege inspectante facinus iterauit. Quod cum tertio attentasset, cernens Rex in spiritu thesaurorum adesse custodem, ait: Importunè agis, ô homo, si mihi credis; tolle quod habes, & fuge; quoniam si venerit Hugolinus (hoc enim cubicularij nomen erat) nec vnum tibi nummum relinquet. Fugit ille, & vix pedem extulerat; & ecce minister Regis rediens, & thesaurum ablatum reperiens, timore & tremore concutitur: vnde non solum angustiam cordis, verumetiam & furorem mentis, clamor & suspiria prodiderunt. Surrexit, & quasi nesciens quid acciderit, perturbationis huius causam inquirat. Quam cum didicisset, ait: Tace, fortè ille qui cepit, plus nobis indiguit. Habeat sibi: nobis sufficit quod remansit.

Proceres autem terræ de successione solliciti,

liciti, Regem de vxore ducēda conueniunt. Stupet Rex, thesauro metuens suo, qui fictili vase reconditus, facilè poterat calore dissolui. Sed quid ageret? si obstinatus resisteret, timebat ne propositi sui proderetur dulce secretum: si suadentibus præberet assensum, naufragium pudicitiae formidabat.

Tandem importunè insistentibus cedere tutius ratus, huiusmodi verbis pudicitiam suam Domino commendabat: Iesu bone, tua quondam misericordia tres pueros inter flammās Chaldaicas illæsos seruauit.

Dan. 3.

Per te Ioseph, relicto pallio in manibus meretricis, cum titulo castitatis euasit. Admirabilis Susannæ constantia, tua virtute de impudicis presbyteris triumphauit. Sanctæ

Gen. 39.

Dan. 13.

Iudith 12.

Iudith castitas ab Holoferne nec lædi potuit, nec tentari. Ecce ego seruus tuus, & filius ancillæ tuæ: succurre mihi Domine, quatenus sic maritale suscipiam Sacramentum, vt pudicitiae periculum non incurram. Rege igitur Procerum voluntati cōsensum præbente, Goduini filiā duxit in vxorem. Erat autem Goduinus vir magnarum opum, sed astutiæ singularis, Regum Regniq̃ue proditor, qui doctus fallere, & quælibet dissimulare consuetus, facilè populum ad cuiuslibet factionis inclinabat assensum. Sed sicut spina rosam, genuit Goduinus

D d

Egdi-

Egdidam. Hanc dilecto suo præparauit Christus Eduardo, inspirans ei ab ipsa infantia castitatis amorem, odium vitiorum, virtutis affectum. Legere, aut operari manibus, otium fugiendo, consuevit lasciuiam vitare, & colloquia iuuenum declinare. Conuenientibus igitur in vnũ, Rex & Regina de castitate seruanda paciscuntur, nec huic fidei alium quàm Deum testem æstimant adhibendum. Fit illa coniux mente, non carne; ille maritus mente, non opere. Perseuerat inter eos sine actu cõiugali coniugalis affectus, & sine defloratione virginitatis, castæ dilectionis amplexus. Diligitur ille, sed non corrumpitur; diligitur illa, nec tangitur, & quasi noua quædam Abisag Regem calefacit amore, sed non dissoluit libidine; mulcet obsequiis, sed desideriiis non emollit.

Quadam verò die Pentecostes, cùm Rex diuinis interesset mysteriis, hora eleuationis Corporis Christi, subitò Rex vultu hilarior, & erectior oculis, in risum modicum, seruata tamen regia grauitate, dissoluitur. Mirari qui aderant cœperunt, nec sine causa, cùm præter consuetudinem id ei accidisse sciebant. Peractis autem Missarum solemniis, causam risus instanter adstantes sibi exponi petunt. Ille, vt erat miræ simplicitatis, simpliciter

pliciter quærentibus, simpliciter omnia confitetur, dicens: Conuenit Danis cum Rege suo antiquū facinus iterare, & quam nobis propitia diuinitas largita est, infestare quietem. In percussione quidem nostra, qua castigans castigauit nos Dominus, ignorantes Dei iustitiam, & suam extollentes virtutem, dixerunt: *Manus nostra excelsa, & non* Deut. 32.
Dominus fecit hac omnia. Quia verò Deus patribus nostris iratus, Danorum nos tradidit potestati, suis id viribus tribuentes, facile hoc ipsum & nunc fieri posse arbitrantur; nescientes quia qui percutit, ipse & sanat; & Ibidem.
 qui mortificat, ipse & viuificat; & qui ducit ad inferos, ipse & reducit. Igitur Rex Danie, coacto in vnum exercitu, hodierna die 1. Reg. 2.
 ventis pro voto flantibus, naues parari præcepit. Iam naues velis, & vela ventis fuerant committenda, & Rex iniquus ob nimiam superbiam quasi semetipsum non sustinens, dum de scapha in nauem conscendere vellet, pede lapso, inter vtramque in mare corruit, & statim abyssus vallauit eum, & pelagus cooperuit caput eius; sicque morte sua vtrumque populum, Danorum scilicet & Anglorum, à peccato pariter & periculo liberauit. Et spero in Domino Deo meo, & in dulcissima matre eius, quòd temporibus meis nullum habebit conatus eorum effe-

Gen. 21.

Etum. Hæc sunt, quæ Christo reuelante cognoui & vidi, & risi, & gauisus sum. Risum enim mihi fecit Dominus, & quicumque audierit, corridebit mihi. Notantur tempus & hora, mittuntur nuntij in Daniam, & omnia quæ beatissimo Regi cælitus nuntiata fuerant, vera & eadem hora accidisse reperta sunt.

Succedentibus itaque prosperis, Rex voti sui nequaquam oblitus, recogitans quanta sibi fecerit Dominus, qui ditauit egenum, sublimauit humilem, in glorium coronauit; parat reddere vota sua, parat sumptus, parat donaria. Vocatis autem Regni Proceribus, habuit cum eis de statu Regni, vel de sua peregrinatione sermonem, dicens: Non excidit vobis quomodo irruentibus in hereditatem nostram Barbaris, facti sumus opprobrium vicinis nostris, subfannatio & illusio his qui in circuitu nostro sunt. Aliis namque interfectis, aliis fugatis, aliis iugo ignominiosæ seruitutis oppressis, nihil ferè honoris, nihil gloriæ nostro generi reliquerunt. Tandem defuncto patre meo, peremptis fratribus, actis in exilium nepotibus, & cum hostibus nostris in omnibus fortuna fuerat, mihi profectò nihil spei superesse videbatur: ego verò contra spem in spem credens, & Domini mei misericordiæ me torum

tum dedens , peregrinationem meam ad
sanctorum Apostolorum limina voui , &
deinceps diuinæ me protectioni dispositio-
niq̃ue commisi. Ille autem respexit in ora-
tionem meâ, & non spreuit precem meam,
& abstulit opprobrium meum , & restituit
me in Regnum patris mei: insuper cumula-
tum diuitiis, auxit gloria , donis cælestibus
illustrauit : ipse sine sanguine rebelles sube-
git, hostes subuertit, & omnia nostra ama-
bili quidem pace composuit. Absit vt tot
& tantis eius beneficijs inueniamur ingrati;
quin potiùs de manu inimicorum nostro-
rum liberati , seruiamus illi in iustitia & ve- Luc. 1.
ritate , faciamusq̃ue quod ait Propheta,
Vouete, & reddite Domino Deo vestro. Psal. 75. Decer-
nite ergo mecum quomodo me peregri-
nante , Regnum subsistat Anglorum , qua
lege, qua pace, qua iustitia, quo iudice om-
nia disponantur ; quis castra, vrbes, priuata
& publica negotia procuret. Erit autem
vnus omnium custos & protector Deus , &
pacem quam dedit, ipse seruabit, nobiscum
proficiscens, & remanens, qui & vos custo-
diat, & me reducat. Tunc omnes in com-
muni vociferantes ad Regem , se non dese-
rendos, se non exponendos gladiis, patriam
hostibus non prodendam, nec pro vno , vt
putabatur , bono , tot admittenda pericula

D d 3

alle-

allegabant. Tunc Rex eorum vocibus & precibus vrgeri se sentiens, diu in animo fluctuabat ; quia & voto superfedere periculosum, & tantorum precibus fletibusque non cedere, inhumanum arbitrabatur. Tandem peregrinationem differens , expectabat donec Apostolico fultus consilio , aut votum redimeret, aut impleret.

Demum Pontifex Summus, consideratis præmissis & diligenter discussis , Regi epistolam subscripta continentem transmisit: Leo Episcopus seruus seruorum Dei , dilecto filio suo Eduardo Anglorum Regi salutem & Apostolicam benedictionem. Quoniam voluntatem tuam laudabilem & Deo gratam cognouimus, gratias agimus ei, per quem Reges regnant, & Principes iusta decernunt. Sed quia propè est Dominus in omni loco omnibus inuocantibus eum in veritate , & sancti Apostoli cum suo capite coniuncti , vnus spiritus sunt, & pias preces æqualiter audiunt ; & quia constat periclitari Anglicam regionem ex tua discessione, qui fræno iustitiæ seditiosos eius motus cohibes, ex auctoritate Dei & sanctorum Apostolorum absoluimus te à peccato illius voti, pro quo offensam Dei times, & ab omnibus negligentis & iniquitatibus tuis, ea potestate vsi , quam Dominus in beato Petro

Petro concessit nobis, dicens : *Quaecumque* Mat. 16.
solueris super terram, erunt soluta & in calis.

Deinde præcipimus tibi sub nomine sanctæ obedientiæ & pœnitentiæ, vt expensas, quas ad iter istud paraueras, pauperibus eroges, & cœnobium Monachorum in honorem sancti Petri Apostolorum Principis aut nouum constituas, aut vetustum emendes & augeas, & sufficientiam victualium Fratribus de tuis redditibus constituas; quatenus dum illi assidue inibi Deum laudauerint, & Sanctis augeatur gloria, & tibi indulgentia. Cui loco quidquid contuleris, vel collatum est, vel conferetur, vt ratum sit, Apostolica auctoritate præcipimus; & vt semper habitatio Monachorum sit, & nulli laicæ personæ nisi Regi subdatur, & quæcumque priuilegia ibi constituere volueris ad honorem Dei pertinentia, concedimus, & robustissima auctoritate confirmamus, & in fine fractores eorum æterna maledictione damnamus.

Responsalibus autem Regis & literis Pontificis oraculum cæleste concurrit. Erat enim vir quidam in Anglia, Deo dilectus & hominibus, qui in specu subterraneo multis annis inclusus, suorum erat meritorum stipendiis iam vicinus. Huic Petrus Apostolus in visione noctis assistens, ait: Rex Eduardus

pro voto quo se cū adhuc exularet adstrinxerat, pro Regni etiam pace, pauperūque necessitate preceq; sollicitus, Romanam Ecclesiam de omnibus credidit consulendam. Nouerit ergo se mea auctoritate ab hac obligatione solutum, & de Cœnobio ad mei nominis honorem construendo, à Summo Pontifice suscepisse mandatum. Incunctanter itaq; literis Apostolicis fidem habeat, præceptis obediat, consiliis acquiescat. A me enim egressus est sermo, quem sibi quondam patronum elegit, viæ comitem, gratiæ largitorem. Est autem mihi locus in Occidentali parte Londoniæ à me electus, mihi dilectus, quem quondam mihi propriis manibus consecraui, mea nobilitaui præsentia, diuinis etiam miraculis illustraui; Thorneia nomen est loci, qui quondam ob peccata populi, Barbarorum traditus potestati, pauperrimus ex diuite, humilis ex sublimi, ex nobili factus est contemptibilis. Hunc me Rex præcipiente, in habitaculum Monachorum suscipiat reparandum, sublimandum ædificiis, possessionibus ampliandum. Non erit ibi aliud, nisi domus Dei, & porta cæli: ibi erigenda est scala, per quam descendentes & ascendentes Angeli, preces & vota hominum perferant, & deferant gratiam. Inde
ascen-

Gen. 28.

ascendentibus referabo ianuas paradisi, ut ex officio, quod meus mihi Dominus ac Saluator iniunxit, & ligatos absolvam, & absolutos suscipiam; & quam eis delictum occluserat, iustificatis portam patriæ cælestis aperiā. Tu autem omnia, quæ audisti à me & didicisti, literis tradens Regi mitte, ut munere Dei duplicato, & de absolutione securior, & præcepti executione deuotior, in mei autem dilectione & obsequio repariatur propensior. His dictis, lux cum loquente disparuit. Scripsit itaque senex omnia audita, & Regi direxit. Eadem autem hora lecto Papæ scripto, beati senis apices recitantur. Tunc Rex lætus & alacris, pecuniam quam ad peregrinationem parauerat, pauperibus distribuit, & Monasterium ædificauit.

Tempore quo Rex Ethelbertus, qui regnauit in Cantia, prædicante Augustino Fidei sacramenta susceperat; nepos eius Sebertus, qui Orientalibus Anglis præfuit, fidem eodem Episcopo euangelizante suscepit. Hic Londoniis, quæ regni sui caput habebatur, intra muros Ecclesiam beati Pauli fabricauit, & Episcopali honore Melitum Episcopum instituens honorauit: extra muros verò in Occidentali parte, in honorem beati Petri Monasterium insigne

fundauit, & multis possessionibus ditauit. Nocte autem dedicationem eiusdem Ecclesiæ præcedente, piscatori cuidam Thamesis fluuij, qui idem Monasterium præterfluit, vltiori ripa in habitu peregrino beatus Petrus apparens, promissa mercede transponi se ab eodem & petiit, & promeruit. Egressus autem de nauicula, Ecclesiam piscatore cernente ingreditur. Et ecce subito lux cælestis emicuit, miroque splendore illustrâs omnia, noctem conuertit in diem.

Adfuit cum Apostolo multitudo ciuium supernorum, ingredientium & egredientium, melodiaque cælestis insonuit, indicibilis odoris fragrantia nares perfundebat. Peractis autem omnibus quæ ad Ecclesiæ dedicationem spectant solemniis, redit ad piscatorem piscium piscator egregius hominum. Quem dum diuini luminis fulgore perterritum, & alienatum pænè sensibus reperisset, blanda consolatione reddit hominem sibi, animum rationi. Ingredientes cymbam simul vterque piscator, ait Petrus: Numquid pulmentarium non habes? & ille, Inconsultè, inquit, lucis perfusione stupidus, & expectatione tui detentus, nihil cepi, sed promissam à te mercedem securus expectaui. Ad hæc Apostolus ait: Laxa nunc retia in capturam. Paruit imperanti piscator,

tor, & mox impleuit rete piscium maxima multitudo. Omnes erant eiusdem generis pisces, præter vnum miræ enormitatis esocium. Quibus ad ripam extractis, dixit Apostolus: Hunc, qui præ ceteris pretio & magnitudine præcellit, Mellito ex mea parte defer piscem Episcopo; pro nautica verò mercede, cetera tibi tolle.

Huius generis copia abundabis in vita tua, & longo tempore post te progenies tua, tantum ne vltra piscari audeatis in celebritate Dominica. Ego sum Petrus qui loquor tecum, qui cum meis conciuibus constructam in meo nomine Basilicam dedicaui, Episcopalemque benedictionem meæ sanctificationis auctoritate præueni. Dic ergo Pontifici quæ vidisti & audisti, tuoque sermoni signa parietibus impressa testimonium perhibebunt. Superseadeat igitur dedicatione, suppleat quod omisimus, Domini Corporis & Sanguinis sacrosancta mysteria, populumque sermone erudiens, notificet omnibus, hunc locum me crebrò visitaturum, hîc me fidelium votis & precibus affuturum, sobriè verò, piè, & iustè in hoc sæculo viuentibus cæli ianuam referaturum. His dictis, confestim ab oculis eius disparuit. Manè autem facto, Episcopo Mellito ad dedicandam Ecclesiam procedenti,

denti, cum pisce piscator occurrit, & omnia quæ sibi mandata fuerant, pandit. Stupet Antistes, referatisque Ecclesiæ valuis, videt pavimentum vtriusque Alphabeti inscriptione signatum, parietem bis senis in locis sanctificationis oleo linitum, totidem cereorum reliquias duodenis crucibus inhærere, & quasi recenti resperione adhuc cuncta madescere. Quod videns Episcopus, vnâ cum populo Deum benedicebat, & illi gratias referebat. Dat fidem miraculo piscatoris illius tota successio, quæ sicut à patre acceperat, totius emolumenti, quod ars illa deinceps ei conferret, beato Petro eique seruiantibus decimas offerebat. Vnus tamen semel fraudem ausus inferre, mox tam diu artis caruit beneficio, donec confessus reatum, & ablatum restitueret, & promitteret correctionem.

Hæc cum sanctus Eduardus relatione ac scriptis veterum didicisset, ad Monasterium illud ædificiis, possessionibus, & dignitatibus altius extollendum exarsit animus eius, & pro priuilegiis illius loci, ceterisque causis nuntios Romam transmisit, talem epistolam Papæ deferentes: Summo vniuersalis Ecclesiæ patri Nicolao, Eduardus gratia Dei Anglorum Rex debitam & subiectionem & obedientiam. Glorificamus Deum, quia

quia curam habet suæ electæ Ecclesiæ; quoniam in loco boni prædecessoris, vos optimum successorem constituit. Quapropter iustum iudicamus, apud vos velut ad solidam petram acuere & probare omnes bonas actiones nostras, & vestram notitiam atq; societate in bono habere, quatenus eas donationes & priuilegia, quæ obtinuimus apud prædecessorem vestrum, renouetis & augeatis nobis; videlicet, vt quod ille iniunxerat nobis sub nomine obedientiæ & pœnitentiæ, propter votum, quod voueram ire Romam, & in remissionem omnium peccatorum meorum construere cœnobium Monachorum in honorem Apostoli Petri, ratum faciat, & priuilegia possessionum & dignitatum eiusdem loci confirmetis, renouetis, & decernatis. Ego quoque pro modulo meo augeo & confirmo donationes & consuetudines pecuniarum quas habet sanctus Petrus in Anglia, & ipsas pecunias collectas cum regalibus donis mitto vobis, vt oretis pro me, & pro pace Regni mei, & cōtinuam ac solemnem memoriam instituatis totius gentis Angliæ coram corporibus sanctorum Apostolorum.

Rescripsit autem ei Papa in hūc modum: Nicolaus Episcopus, seruus seruorum Dei, gloriosissimo ac piissimo, omniq; honore dignif-

dignissimo , speciali quoque filio nostro Eduardo Anglorum Regi , visitationem omnimodam, salutem mellifluam, & benedictionem Apostolicam. Omnipotēti Deo referimus grates , qui vestram prudentissimam excellentiam in omnibus ornauit & decorauit erga beatum Petrum Apostolorum Principem, nobiscum habere dilectionem, & in omnibus Apostolicis consentire censuris. Literas igitur vestræ nobilitati transmittimus , & per eas sanctorum Apostolorum societatem & nostram vobis damus; orantes misericordiam illius qui est Dominus omnium, & Rex super omnia solus, vt ipse vos participem faciat ex omnibus, si qua sunt coram Deo, bonis operibus nostris, & fratres nos ac socios in sua dilectione cōstituatur in omni tempore ampliùs, ac non minorem partem obsequij nostri vobis in suo regno reassignet, quàm nobismetipsis prouenire optamus. Erimus etiam deinceps pro vobis sine dubio orantes assiduè, vt ipse Deus subiiciat hostes & inimicos, qui contra vos voluerint insurgere, & confirmet vos in paterno folio, & propria hereditate, ac beatus Petrus sit vobis custos & adiutor in omni tribulatione. Renouamus ergo, & confirmamus, ac augemus vobis priuilegia vestra, scilicet, vt absolui

soluti sitis ab illo voto quod timebatis, & ab omnibus aliis peccatis & iniquitatibus vestris, auctoritate illius, qui me, licet indignum, suæ sanctæ præesse voluit Ecclesiæ. Prætereà illi loco, quem sub nomine sanctæ poenitentiae construendum & meliorandum suscepistis, quoniam (vt fertur) primam antiquitus consecrationem à beato Petro accepit, cuius licet indigni, Vicarij sumus, & quia regia antiquitus sedes est; ex auctoritate Dei, & sanctorum Apostolorum, atque huius Romanæ Sedis, & nostra concedimus, permittimus, & solidissimè confirmamus, vt ampliùs in perpetuum regiae constitutionis locus sit, atque repositorium regaliū insignium, & habitatio perpetua Monachorum, qui nulli omnino personæ nisi Regi subdantur, habeantque potestatem secundū Regulam sancti Benedicti per successiones eligere ex se idoneos Abbates, neque introducatur per violentiam extranea persona, nisi quam concors congregatio ex se præelegerit. Absoluiamus etiam eum locum ab omni seruitio & dominatione Episcopali, vt nullus Episcopus illuc introeat ordinaturus, aut præcepturus aliquid, nisi ex petitione & consensu Abbatum & Monachorum. Et habeat idem locus liberum procinctum, id est, ambitum, & cœme-

cœmeterium mortuorum circa se, absque Episcopali vel cuiuslibet respectu vel exactione, & omnia, quæ ad libertatem & exaltationem illius loci ad honorem Dei pertinentia, per nostram auctoritatem accedere possunt, hilari & promptissima voluntate concedimus. Possessiones autem, quas antiqui Reges, seu quicumque alij homines, vos quoque & vestri Barones ad eundem locum cõtulistis, & chartas quæ ex eis factæ sunt, diuina & nostra auctoritate roboramus, & ratas ac stabiles esse decernimus, & infractores earum, vel inuasores, aut diminutores, aut disperfores, venditores etiam, æterna maledictione cum Iuda proditore damnamus, vt in beata non habeant partem resurrectione, sed à beato Petro Apostolo se iudicandos sciant, quando sedebit cum suis coapostolis, iudicans duodecim tribus Israel. Vobis verò & posteris vestris Regibus committimus aduocationem & tuitionem eiusdem loci, & omnium totius Angliæ Ecclesiarum, vt vice nostra cum consilio Episcoporum & Abbatum constituatis vbique quæ iusta sunt, scientes pro hoc vos recepturos dignam mercedem ab eo, cuius Regnum & Imperium nec desinet, nec minuetur in sæculum.

Sanctus autem Eduardus tributum illud
gra-

grauissimum, quod tempore patris sui classi Danicæ pendebatur, & postmodum Fisco regio inferebatur, regia liberalitate remisit, & ab hoc onere importabili in perpetuum Angliam absoluit. Cùm enim collecta illa pecunia ante illum delata esset, diabolum super cumulum sedentem & ludentem vidit; & ne amplius exigeretur præcepit.

Cùm in palatio iuxta Ecclesiam beati Petri Rex aliquando moraretur, superuenit quidam vir mirabilis, Hibernicus genere, pedis vtriusque priuatus officio: nerui enim in poplite contracti, ad posteriores corporis partes crura retorserant, tali natibus inhæferant, immersione carnibus pedum articuli à lumbis eius & deorsum corpus omne peruerterant. Porrectis ad terram manibus & scamnis suppositis repebat, & factus sibi metipsum grauis, trahebat se post se. Hic videns Regis cubicularium, ait ad eum: Hugoline, non me respicis, nec misereberis, nec mouebit te mea tanta calamitas? & ille: Quid me vis facere? Cui pauper: Sexies, inquit, Apostolorum limina repens (vt cernis) visitaui, & sanitatem necdum promerui. Quam tamen Apostolorum Princeps non negauit, sed distulit, socium in hoc miraculo habere volens Eduardum, quem sibi nouit esse deuotum. Ab ipso enim Apo-
Ee stolo

Gen. 49.

stolo in mandatis accepi, Regem adire, ut me suo sacro subuectum dorso ad Ecclesiam eius, quæ palatio vicina est, perferat, recepturum, si id fecerit, membrorum meorum integram sanitatem. Hæc ubi nuntiata sunt Regi, gratias agit Deo, & citatus mox æger accessit. Rex verò ut spiritalis ille asinus fortis, accubans in terminis, supposuit humeros suos ad portandum. Pendet de humero tanti Principis plenus sordibus pauper, squalidis manibus brachiisq; squamosis regium illud pectus collumque complectitur. Interea ex assistentibus ridebant nonnulli; alij à paupere Regem delusum iocabantur, alij simplicitatem iusti fatuitatem iudicabant. Cum itaque Rex paululum processisset, subito nervi extenduntur, rigantur ossa, carnes marcidæ recalescunt, emergunt à carne articuli, pedes à natibus solvuntur. Distendit homo crura, poplite iam flexibili, & sanie cum sanguine profluente, vestis Regia ornatur potius quam fœdatur. Iam nunc satis esse clamant omnes, sanatum languidum, onus ob sordes ulcerum deponendum. Ille verò memor præcepti quod susceperat, sirenarum cantus obturata aure pertransiit; ingressusque Ecclesiam, ante sanctum altare, holocaustum quod detulerat, Deo ac beato Petro resignat,

gnat , incolumemque dimisit . Suscepto autem à Rege itineris viatico, acturus gratias Deo & sancto Petro , Romam profectus est.

In Monasterio autem beati Petri ante altare sanctæ Trinitatis Missarum sollemniis sanctus Rex vice quadam cum Comite Leofrico assistebat . Et ecce speciosus ille forma præ filiis hominum Christus Iesus in ara consistens , oculis vtriusque visibiliter corporalis apparuit , sacraque dextera super Regem extensa, signum sanctæ Crucis eum benedicendo depinxit . At Rex demisso capite, diuinæ maiestatis adorabat præsentiam . Comes verò quid in animo Regis ageretur ignorans , volensque Regem tantæ visionis esse participem, cœpit velle ad ipsum vsque procedere . Verum Rex quid in mente Comitis voluebatur intelligens , Sta , inquit, Leofrice , sta : quod vides, video & ego. Post Missam verò dixit Rex ad Comitem: Per eius, quem vidimus, maiestatem , mi Leofrice , te obtestor, ne, quoadusque vixerimus, sermo iste profertur in publicum , ne vel nos in perniciem nostram ob fauorem vulgi pulset elatio , vel fidem derogat dictis infidelium æmulatio.

Sub faucibus autem quasi glandes mu-

Ec 2

lieri

lieri cuidam succreuerant, quæ totam faciem deformi tumore fœdantes, putrefactis sub cute humoribus, sanguinem in saniem verterant; inde nati vermes, odorem teterrimum exhalabant. Iubetur tandem in somnis adire palatium, & ex Regis manibus sperare remedium, quibus si lota, si tacta signata foret, meritis eius reciperet sanitatem. Cùm autem venisset ad Regem, & oraculum exposuisset: ille nec sordes cauit, nec fœtorem exhorruit; sed loca tumentia manibus contrectans, & aqua lauans, signum sanctæ Crucis impressit: & subito rupta cute, cum sanie vermes ebulliunt, recedit tumor, & dolor omnis abscessit.

Cæcus quidam docetur oraculo, lumen amissum sancti Regis meritis se adepturum, si lympa, qua manus ablueret, ipse faciem perfudisset. Cumque id cubiculario, & ille Regi retulisset, obstupuit ille, plurimum indignatus, illud phantasinatibus hominem, nihil tale de peccatore sperandum; Apostolicæ id esse virtutis; nec fidem somniis adhibendâ asseruit. Aqua manus lauit, & ad Ecclesiam processit. Cubicularius autem cæco receptam in pelui aquam illam tradit, cum qua oculos & faciem lauans, visum confestim percipere meruit.

Ciuis quidam Licolnienſis cæcitate percussus,

cuffus, ad palatium Regis veniens, aqua lotionis manuum eius, faciem & oculos lauat, mox tenebris diuturnis optata lux succedit.

Quidam cæcus Regem adire, & visum ab eo percipere monitus, Cubiculario, & ille rem Regi pandit. Cui Rex, Veniat, inquit. quis ego sum qui contrister, & non potius exultem, si meis manibus, licet indignis, promissum beneficium homini illi pietas diuina contulerit? Vocatus est autem vir, & à Rege tactus & signatur, & inter manus eius ab oculis vtrisque vbertim sanguis effluxit, pupillas serenauit, & tumorem palpebrarum deposuit. Et dixit homo ille: Video te, domine mi Rex, & facies tua tamquam facies Angeli stantis ante me.

Alia autem vice duo cæci cum vno monoculo, aqua lotionis manuum Sancti perfusi, visum percipere meruerunt.

Sedebat aliquando Rex ad mensam, & à latere eius Comes Goduinus. Huius duo filij adhuc pueri, Haraldus & Tostius, ludebant coram eis; cumque vnus ex illis acrius, quàm expetebat ludi suauitas, insurrexisset in alterum, ludum vertunt in pugnam. Et ecce Haraldus vehementius in fratrem irruens, capillis eius vtramque manum inserit, prostratumque, nisi citius eriperetur,

virtute superior suffocasset. Tunc Rex versus ad Ducem, ait: Nihil aliud, ô Goduine, nisi simplicem in his vel ludum puerorum, vel pugnam contemplaris? Et ille: Nihil aliud, domine mi. Tunc Rex dixit: Longè aliud mea mihi mens loquitur: & his quid futurum sit pueris, per hoc mihi bellum reuelatur. Emensis quippe puerilibus annis, cùm in virum vterque profecerit, tandem aduersus inuicem liuor vtrumque aduret: & primùm, circumuentione insidiisque priuatis quasi ludere videbuntur: ad vltimum fortior infirmiorē proscribet, rebel-lantem prosternet, & prioris mortem post modicum sequens alterius calamitas expiabit. Quæ omnia sic completa, tota Anglia teste probatur: nam Tostius ab Haraldo fugatus, cùm paulò in Regnum successisset Eduardo Haraldus, vnà cum Rege Noruegiæ Tostius prosternitur, & totus ferè exercitus delerur. Eodem anno Haraldus ipse Regno spoliatus Anglorum, aut miserè occubuit, aut, vt quidam putant, pœnitentiæ tandem seruatus, euasit.

Goduinus cùm in mensa Regi assideret, vnus ministrorum in obicem aliquem vno pede immoderatiùs impingens, pænè lapsum incurrit: quem tamen pes alius recto pede procedens, iterùm in statum suum
nihil

nihil iniuriæ passum erexit. De hoc euentu pluribus inter se loquentibus, & quòd pes pedi subuenerit gratulâtibus, Comes quasi ludendo intulit: Sic est frater fratrem adiuuans, & alter alteri in necessitate subueniens. Et ait Rex ad Ducem: Hoc meus mihi fecisset, si Goduinus hoc permisisset. Ad hanc vocem Goduinus expauit, & tristem præferens vultû, ait: Scio ego, Rex, scio, adhuc de morte fratris tui tuus me accusat animus: nec eis æstimas discredendum, qui me vel eius, vel tuum vocant proditorem; sed secretorum omnium conscius Deus iudicet, & sic buccellam hanc, quam manu teneo, guttur meum faciat pertransire, & me seruet illæsum, sicut nec tuæ prodicionis reus, nec de fratris tui nece mihi conscius existo. Cumque vir beatus buccellam manu benedicens signasset, miser ille eam ori inferens, vsque in medium gutturis pertraxit. Tentat interiùs trahere, nec valet, tentat emittere, sed firmiùs hæsit. Mox meatus, quibus ducebatur spiritus, obcluditur; vertuntur oculi, brachia rigescunt. Intuetur infelicitè morientem Rex, & vitionem in eum sentiens processisse diuinam, adstantes alloquitur, dicens: Extrahite canem istum: & factû est ita. Hic Goduinus simplicitate Regis abutens, multa in

Regno contra iustitiam & Deum faciebat. Cunctos ferè Regis cognatos & amicos, quos de Nortmânia adduxerat, fraude sua, dolo & circumuentione de patria exturbabat; credens, sibi cuncta processura pro voto, si Rex amicis nudatus, suis tantum consiliis vteretur. At Rex cuncta dissimulans, diuinis vacabat obsequiis, vltionemque Dei sibi futuram multis prædixit. Aliquando etiam ipsi Goduuino idipsum non tacuit.

Sanctus Eduardus nulli petenti in nomine sancti Ioannis Euangelistæ aliquid denegabat; hunc enim post Apostolorum Principem arctius diligebat. Vnde cōtigit, quòd quidam peregrinus, absente Camerario, in nomine sancti Ioannis Euangelistæ importunè à Rege eleemosynam postularet: cui Rex pretiosum annulum, cum nihil aliud in promptu haberet, dedit. Accidit post hæc, duos Anglicos ad adorandum Saluatoris sepulchrum Ierosolymam proficisci. Qui die quadam à publica strata declinantes, deuia quæque sectati sunt: & sole ruente, nox obscura adducta est. Et cum nescirent quid agerent, quò se verterent, apparuit eis senex quidam venerandus, qui eos ad ciuitatem reducit. Susceptis autem hospitio mensa paratur; lautissimeque refecti, dant membra quieti. Manè autem factò, egressis illis de ciui-

ciuitate, ait senex: Viri fratres, cum summa prosperitate vos repatriaturos non dubitetis, quoniam prosperum iter faciet vobis Deus; & ego ob amorem Regis vestri in omni via firmabo super vos oculos meos: ego enim sum Apostolus Christi Ioannes, qui Regem vestrum ob meritum castitatis summa dilectione complector. Hunc ergo annulum, quem mihi in habitu peregrino apparenti tribuit, reportate, denuntiantes obitus sui instare diem: quem infra sex menses visitans visitabo, vt mecum sequatur Agnum quocumque ierit. His dictis disparuit, & illi ad patriam prosperè redeuntes, quæ viderant & audierant, Regi seriatim retulerunt.

Cùm autem Rex infirmitate graui detineretur, in mentis raptus excessum, biduo ferè iacebat exanimis. Tandem quasi de graui somno euigilans, aperuit oculos, & sedit, & assumpta parabola, ait: Cùm adolescens in Nortmannia exularem, grata mihi semper extitit bonorum amicitia; & quicumq; sacræ Religionis meliores videbantur, hi mihi ceteris erant familiariores: inter quos duos Monachos speciali quadam deuinxerant charitate, conuersationis honestas, vitæ sanctitas, suauitas morum, verborum affabilitas. Hos frequentius visitabam,

Ec 5 quo-

quoniam dulcia faucibus meis eloquia eorum. Hos ante plurimos annos translatos ad cælum vidi mihi paulò antè in somnis assistere, quid genti meæ post obitum meum sit futurum, ex Dei mandato mihi referentes.

ISA. I.

Impletam dicunt Anglorum nequitiam, & iniquitas consummata iram prouocat, accelerat vindictam. Sacerdotes præuicati sunt pactum Domini, polluto pectore & manibus inquinatis sancta contrectant. Et hi non pastores, sed mercenarij, exponunt lupis oues, non protegent; lac & lanam quærunt, non oues, vt detrusos ad inferos mors & pastores depascant & oues: sed & Principes terræ infideles, socij furum, prædones patriæ, quibus nec Deus timori est, nec lex honori; quibus veritas oneri, ius contemptui, crudelitas delectationi. Itaque nec Prælati iustitiam, nec seruant subditi disciplinam. Et ecce Dominus gladium suum vibrauit, arcum suum tetendit, & parauit illum. Ostendit deinceps populo huic iram & indignationem, immissiones insuper per angelos malos, quibus traditi sunt anno vno & die vno, igne simul & gladio puniendi. Ego verò ob intentatam meæ genti calamitatem dolens atque suspirans, dixi: O cælestium secretorum conscij, si conuersi

conuerſi egerint pœnitentiam , numquid non ignoſcet Deus , & relinquet poſt ſe benedictionem ? Pœnitentia certè prolataIon. 3. Dei ore in Niniuitas ſuſpenderit ſententiam , quæ etiam imminentem impiſſimo Achab3. Reg. 21. debitam diſtulit ultionem. Suadebo igitur genti meæ vt pœniteant de præteritis, & caueant de futuris, & fortè miſerebitur Deus, vt non inducat ſuper eos malum hoc grande; ſed qui punire præparauit auerſos , recipiat in gratiam ſolita pietate conuerſos.

Nequaquã, inquiunt, hoc erit, quoniam induratum eſt cor populi huius, & excæcati oculi, & aures aggrauatæ, vt nec audiant corripientem, nec intelligant commonentem, nec terreantur minis, nec beneficiis prouocentur. His eorum verbis dum mihi maior accreſceret ſollicitudo, dixi: Num ita in perpetuum iraſcetur Deus, & non appoPſal. 76.net vt complacitior ſit adhuc? Quando ergo triſtibus læta ſuccedent, aut tot aduerſa qualis conſolatio temperabit? Quale ſperandum eſt in his malis remedium, vt ſicut illinc terret & contriſtat futura correptio, ita hinc aliquantulum mulceat diuinæ miſerationis promiſſio? Ad hæc Sancti tale mihi problema proponunt: Arbor quælibet viridis à ſuo trunco deciſa, ad triû iugerum ſpatium à radice propria ſeparetur. Quæ cum

cùm nulla hominis manu degente, nulla
vrgente necessitate, ad suum reuersa trun-
cum, in antiquam radicem sese receperit,
resumptoque succo rursus floruerit, & fru-
ctum fecerit; tunc sperandum est aliquod in
hac tribulatione solatium, & de ea quam
prædiximus aduersitate remedium. Hæc
cùm dixissent, ipsi cælo, vobis ego redditus
sum. Assidebant narranti visionem Regina,
Robertus sacri palatij custos, Dux Haral-
dus, Stigandus, & qui ascendit cubile patris
sui, & maculauit stratum eius, viuentem ad-
huc Roberto Archiepiscopo, cathedram
Cantuariensem inuadens, ob hoc à Summo
Pontifice suspensus, paulò post crepuit, &
effusa sunt viscera eius. Hic ad vocem nar-
rantis obduruit, nec terretur oraculo, nec
fidem habuit prophetati, sed potius Regem
senio confectum delirare submurmurans;
ridere maluit quàm lugere. Ceteri verò,
quibus mens sanior erat, flebant vbertim &
suspirabant, qui nihil secus quàm ipse dixe-
rat, aut à Sacerdotibus, aut à Principibus
fieri non ignorabant. Quidam enim præ-
missam similitudinem dicunt Regem pro
impossibili statuisset, illi maximè, qui totam
Anglorum nobilitatem sic deperisse luge-
bant, vt ex ea gente nec Rex, nec Episco-
pus, nec Abbas, nec Princeps quilibet vix in
Anglia

Anglia cerneretur. Mihi sanè alia mens est, consideranti sanctissimum virum Dunstanum & ipsam calamitatem prædixisse, & consolationem nihilominus promississe. Potest proinde sic non inconuenienter exponi: Arbor hæc regnum Anglorum significat, decorum gloria, deliciis, diuitiisque fecundum, excellentia regiæ dignitatis sublimè. Radix, ex qua totus honor iste processit, regium semen fuit, quod ab Alfredo, qui primus Anglorum à Summo Pontifice vnctus & consecratus fuerat in Regem, recta successionis linea vsque ad sanctum Eduardum descendit. Abscissa est arbor de trunco, quando regnū à genere regali diuisum, ad aliud semen translatum est. Ad spatium trium iugerum *hæc fama est separatio*, quia Locus ob-
scurus. in trium temporibus Regum, nulla fuit nouis cum antiquo semine regali coniunctio. Haraldus enim successit Eduardo, V Vilhelmus Haraldo, V Vilhelmus iunior priori V Vilhelmo. Accessit ad radicem, quando Rex Henricus, in quem totum regium decus transfusum est, nulla necessitate cogente, nulla spe lucri vrgente, sed ex infuso ei amoris affectu, abneptem Eduardi Mathildam duxit vxorem, semen regium Nortmannorum & Anglorum coniungens, & interueniente opere coniugali, de duobus

vnum

vnum faciens. Floruit sanè arbor , quando de vtroque semine Imperatrix Mathilda processit. Tunc verò fructum fecit, quando de ipsa Henricus exoriens, quasi lapis angularis vtrumque populum copulauit. Habet nunc certè de genere Anglorum Anglia Regem , habet de eadem gente Episcopos & Abbates, Principes & milites , ex vtriusque feminis coniunctione procreatos. Si autem alicui hæc displicuerit expositio, aut ipse aliter exponat, aut aliud tempus, quo hæc expleantur, expectet.

Sciens itaque Rex , quia appropinquauit hora eius vt transiret de hoc mundo, suum transitum mox in circuitu propalari iussit, ne mortis suæ agnitione dilata, orationum quoque suffragia differretur. Sicque senex, & plenus dierum ac bonorum operum, migravit ad Dominū. Obiit autem anno Domini millesimo sexagesimo sexto, cū regnasset vigintitribus annis, mensibus sex, & diebus vigintiseptē, pridie Nonas Ianuarij, cum quo tota pariter Anglorum felicitas ruit, periit libertas, vigor omnis interiit.

Contractus quidam ad sepulchrum eius veniens, membrorum sanitatem deuotis lacrymis & precibus postulabat. Et ecce vis quædam occulta subito neruos extendit, in naturalem statū crura pedesque retorquet, euul-

euulsisq̃ue à carne articulis sanguis profluit, paulatimq̃ue succo resumpto, arida priùs ossa pristinum robur recipiunt.

Sex quoque cæci vnum monoculum secuti, ad sepulchrum Regis properâtes, cùm alter ab altero traheretur, & vnus præcedēs oculus, viris septem ducatum præberet, Sancto cum lacrymis miseriam exponunt, opem flagitant, contra diuturnæ caliginis tædium sanctissimi Regis deposcunt auxilium. Nec mora; Beati meritis & precibus visum oculorumq̃ue claritatem percipere meruerunt.

Interea Haraldus filius Goduini, Regnum nec iure nec natura sibi debitum vsurpans, malum, quod Anglis secundum sancti Regis oraculum Dominus præparauerat, transgressione pacti cum duce V Vilhelmo, & fidei læsione accelerauit. Ut autem attenuatis viribus facilius ab his, quos iniuste prouocauerat, hostibus vinceretur, suscitauit ei Deus à parte Aquilonis inimicos, scilicet Haraldum Regem Noruegiæ, & Tostium fratrem suum, quem de Anglia expulerat: ipse quippe tempore Regis Eduardi exulabat in Flandria. Hi cum magna classe per Humbriam Eboracum properantes, cùm exercitum Northumbrensiū prælio exceperant, potiti victoria, magnam de obstantibus stragem dederunt. His Haraldo

nun-

nuntiatis, exercitum copiosum ex omnibus finibus Angliæ collegit.

Apparuit autem tunc sanctus Eduardus euidam Alexi, Abbati Ramesiæ, viro religioso, dicens: Vade, & dic Haraldo, vt homines, qui cōtra ius & fas Regni huius fines inuadunt, aggrediatur securè: ego enim ero Dux & protector exercitus; quoniam iustitiæ gentis huius deesse non possum. Per me enim reportabit vice hac de hoste triumphum. Et ne verbis tuis fidem deroget, secretum ei sui cordis ostende; vt cū ei, quæ nullo conscio mente voluebat, edixeris, non hæc tuæ adinventioni, sed meæ promissioni adscribat. Nocte quidem præterita, cū dolore femoris torreretur, licet eum non parum vrgeret imminens molestia, siluit tamen; reputans apud se, si publicaret languorem, quòd suis esset contemptui, & hostibus irrisioni. Verū quia nunc ab illa peste conualuit, de meo præsumens auxilio, contra Barbaros iustum bellum suscipiat, & ab imminente periculo suos eripiat. Quod cū Abbas Haraldo referasset, ex cælesti promissione factus audacior, in valida manu progrediens, apud Stamfordbrig hostibus occurrit, confertoque prælio, Dux vterq; prosternitur, scilicet Rex Noruegiæ & frater Haraldus Tostius, & pæ-
nè

nè totus eorum exercitus deletus est.

Anno trigesimo sexto post sancti Eduardi obitum, cum corpus eius de terra eleuaretur, integrum, incorruptum, & flexibile cum vestibus recentibus repertum est. Quod videns Episcopus Roffensis, pilum vnum deuotionis desiderio accensus extrahere, sibi que seruare conatur: sed ille firmitus hærens, effectum mentis Episcopi & voluntatem defraudauit. Mulier quædam in festo sancti Eduardi operibus vacans, paralysis morbo correpta, ad corpus Sancti deducitur, & sanitatem pristinam se recepisse lætatur. Tres viri febre quartana vexati, visitato Sancti sarcophago, quasi in momento curati sunt.

Obiit S. Eduardus anno Domini 1066. qui beatissimus Rex post annos circiter centum in Sanctorum numerum relatus fuit ab Alexandro Tertio Pontifice, anno Pontificatus quarto, & Christi 1163: vt Cardinalis Baronius in Notis ad Martyrologium, die quinta Ianuarij, & alij testantur.

SANCTI LEOPOLDI AVSTRIÆ PRINCIPIS

Canonizatio, & inter sanctos Confes-
sores adscriptio, cum suæ Festiuita-
tis institutione, pro die 15. Mensis
Nouembris.



INNOCENTIVS EPISCOPVS,
*seruus seruorum Dei, ad perpetuam rei
memoriam.*

§. I
Psal. 44.

Prou. 8.

SACROSANCTAM Matrem Ecclesiam
adstitisse à dextris Dei Reginam in ve-
stitu deaurato, circumdatam varietate,
non abs re per Prophetam traditur. Re-
gina equidem, quæ illi Regi Domino per
quem Reges regnant, & Principes iustitiam
faciunt, desponsata sit. Vnica eius colum-
ba, luna perfecta in æternum, Arcturus per
gyrum nocturna spatia perenni lumine il-
lustrans, lucifer qui nescit occasum; au-
rora hîc in crepusculo caligantis sæculi co-
ruscans, & in diem lucidum in Regno cæ-
lorum sese diffundens. Regina quæ illi ser-
uiat, cui seruire regnare est, illi fidem ha-
beat, illi se totam committat. Regina quæ
Chri-

Christi fideles sub vmbra alarum suarum
extremo carcere ad regna cælorum perdu-
cat, vberem de cælo pleno lactet atque ine-
briet, ex multis ærumnis nos eripiens, regni
cælestis cum Christo Domino participes
efficiat. *In vestitu*, inquit, *deaurato*. Vesti-
mentum Ecclesiæ sanctam fidelium vitam
esse profitemur. Nam sicut tota Ecclesia
vestimentum est Christi, ita fideles quoque
eiusdem Ecclesiæ vestimentum esse arbi-
trabimur. Vestimentum scilicet non ha-
bens maculam per peccatum, neque rugam
per duplicitatem; sed per iustitiam in Deū,
per simplicitatem cordis tensum vestimen-
tum innocentiae, quam homo plasmatus à
Deo accepit, malè à serpente persuasus per-
didit; ad quam recuperandam, pœniten-
tia & Dei misericordia induimur. Vesti-
mentum deauratum, splendore sapientiæ
aureo perlucens: *clara enim est sapientia quæ* Sap. 6.
numquam marcescit, facile videtur ab his qui
eam querunt. Doctrina est disciplina Dei, ele-
ctrix operum illius, qua nihil locupletius,
quæ operatur omnia, artifex omnium; quæ
apud turbas claritatem, & honorem apud
seniores præstat. Vestimentum deauratum
perfectione auri; id est iustitiæ, qua nihil
humano generi vtilius: dilectione discipli-
næ, ex qua custodia legum emanat; legum Ibidem.

1. Cor. 12.

autem custodia, consummatio est incorruptionis. At verò incorruptio facit nos esse Deo proximos, per quam beatitudo æternæ vitæ à nobis comparatur. *Circumdatus* Ecclesia dicitur *varietate* gratiarum, ministratorum, & officiorum, iuxta verbum Apostoli: *Diuisiones gratiarum sunt, idem autem Spiritus eas conferens; diuisiones ministratorum sunt, idem autem Dominus; & diuisiones operationum sunt, idem verò Deus qui operatur omnia in omnibus.* Circūdatus varietate potestatis, ordinis, status, & variarum Ecclesiarū decore, quæ veluti adolescentulæ, hanc de qua sermo est, Catholicam Ecclesiam quasi matrem obseruant, non vetustæ per culpam, sed nouellæ per gratiam; non senio steriles, sed ad spiritualem congruæ fecunditatem, & noua semper prole pullulantes: nam à iusto Abel, vnde Ecclesiæ exordia trahimus, in hanc vsque diem, quot Sanctos orbis terrarum habuit, tot quasi palmites protulit, ex quibus variij indies surgunt furculi in hac vinea nostra Sabaoth, quam licet immeriti, præstante Domino, fortiti sumus excolendam, seruntur: Circumdatus varietate; quòd alia triumphantis, alia militantis Ecclesiæ species existat. De triumphante Domini sponsione repromittitur, Ego ero eis, quidquid ab hominibus iuste

iuste desiderari potest: ero illis honor, gloria, salus, & vita, virtus & copia, pax, & omne bonum. Militans autem Ecclesia fundæ non ineptè assimilatur: nam sicut è funda in gyrum versata, lapides exeunt, quibus aduersarij feriuntur, & Goliath prosternitur; ita ex sancta Ecclesia dum per varias procellas & tempestates fluctuantes huius sæculi per tribulationum circuitum rotatur, fortes viri prodeunt, quibus quasi lapidibus iniquorum corda tunduntur, & de hoste humani generis nequissimo à Christi tyronibus triumphatur.

§. 2.

Hanc ipsam Ecclesiam Deus omnipotens mira quadam dispositione & potestate fundavit, pretioso vnigeniti filij sui Domini nostri Iesu Christi Sanguine dotatam esse voluit, multiplici Spiritus sancti gratia ornavit, Apostolorum simplicitate & fide roboravit: quos ignaros delegit, vt populos non tam serino illorum, quàm causa ad credendum adduceret. Martyrum tormentis, cruciatibus, constantia, & trophæis stabilivit, repressa paulisper, quinimò confusa infidelitatis seuitia, & inimico homine superfeminante zizania, crescente, multiplicataque hæreticorum prauitate, Doctorum cælesti doctrina illuminavit, & demum Confessorum, Virginum, aliorumque Sancto-

Ff 3 rum

rum intrepida confessione, solerti cura, exemplisq̃ue imitatione dignissimis, aduersus satanæ insidias circumdedit.

- §. 3. Inter autem alia saluberrima sanctitatis exempla, diuina misericordia fidus quoddam mundo fulgere dedit, beatum Leopoldum Austriæ Principem, Pium Marchionem cognomento appellatum; innocentiae, sapientiae, & iustitiae vestimentis, quibus vestiri Ecclesiam prædiximus, decorum, bonitate, mansuetudine, atque clementia conspicuum, simplicitate, continentia, & munificentia præclarum: cuius integritas, vitæ sanctimonia, humilitas, pietas, fides, adedò apud Christi fideles inualuerunt, ut vna omnium Germanorum voce pro Sancto hætenus celebratus fuerit. Christianæ Religionis cultum, & eius liberalitatem nonnulla Monasteria, & quidem celeberrima ab eo cum amplissimis censibus constructa, alia etiam magno sumptu illustrata, abundè testantur. Hic Princeps optimus, Sacerdotes & viros religiosos admodum coluit, summosq̃ue Pontifices tanta veneratione prosecutus fuit, ut ab Innocentio II. Romano Pontifice prædecessore nostro peculiaris S. Petri filius appellaretur: & Apostolica cõmendatione, atque ea plenaria, quam vulgò dicunt, absolutione dignus ab

ab eodem Innocentio etiam mortuus iudicatus fuerit. Hic vir Dei in summis opibus educatus, in magna peccandi licentia constitutus, coniugalibus curis implicitus, Principatus regimine impeditus; sedulò tamen pietatis & misericordiæ munera subibat, lassos roborans, vacillantes confirmans, oppressos subleuans, inopes fouens. Inter curas domus, inter coniugales anxietates, inter affectus pignorum, inter multiplices Principatus sollicitudines, inter studia tot laborum, immaculatum sese ab hoc sæculo custodiuit; & temporalia tractando, æterna disposuit.

Quadraginta annis Principatum Austriæ §. 4. regens, & quod maius est, illis præcipuè temporibus, quibus propter Henricorum patris & filij mutuas cōcertationes, & postea propter Henrici Quarti cum Lothario acerrimas contentiones, in Germania bellis, incendiis, & agrorum vastationibus tumultuatum est; summa cum iustitia, humilitate, & tranquillitate cuncta administravit: & aliis cæde & sanguine madentibus, creditam sibi Austriæ prouinciã in diuturna pace cōtinuit. Quibus ex meritis æternæ retributionis & pacis præmia à Deo optimo maximoque, qui centuplicato fœnore munera hominum pensat, est consecutus.

Ff 4 Præ-

perpetuitate gloriæ cœlestis non fraudemur; sed mundi molestias, illecebras, aut dignitates contemnendo, ad cœlestem patriam totis viribus contendamus.

§. 6.

Huius beati Leopoldi sanctimoniâ Deus omnipotens innumerabilibus miraculis ad eius inuocationem editis comprobauit: miraculis profectò, quæ tum in facti substantia, tum & ordine, vim & potestatem totius naturæ exceſſerunt. Quis enim non miretur, cum audiat, per Dei æterni misericordiam, implorato Leopoldi auxilio, paralyticos, arthriticos, febricitantem, podagra laborantem, pristinæ valetudini illicò restitutos? Quis non magnalia Dei in hoc Sancto agnoscat, cum videat, intercessionibus eius claudos rectè ambulasse, apostematibus mortiferis infectos liberatos, in carceribus constitutum, pedicis manicisque victum, per foramen vnde hominis impossibilis exitus erat, eductum euasisse? in variis vitæ periculis positos, illæsos seruatos esse? Quis non tota mente obtupeſcat, & Deo optimo maximoque præconia manifesta dicat, cum liquidò deprehendat, meritis ac precibus huius sancti viri mortuos suscitatos? mutos loquendi facultatem adeptos? cæcos illuminatos? surdis auditum restitutum esse? Maxima sunt hæc sanctitatis &

Ff 5

diuinæ

tum catalogo adscribere dignaretur.

Qui re perspecta, quàm sapientissimè de vita & miraculis ac fama eiusdè Leopoldi, ex more institutoq; maiorum, cum consilio sacri Senatus, inquisitionem tunc Archiepiscopo Pragensi & aliis collegis delegavit.

§. 9.

Verùm cum ea de re agi cœptum esset, morte Innocentij, surgentibusq; bellorum inter Australes & Pannonios diuersis turbibus, immensisque procellis in Ecclesia Dei exortis, vsque ad tempora Pauli Secundi prædecessoris nostri, inquisitio intermissa est.

§. 10.

Charissimo autem in Christo filio Fridrico Romanorum Imperatori Augusto, Prælati & Principibus Germaniæ apud eundem Paulum multis precibus tam sancti viri canonizationem absolui petentibus, tribus S. R. E. Cardinalibus de fratrum suorum consilio demandatum est à Pontifice præfato, vt solemnem inquisitionem ea de re adhiberent, & processus consuetos tum per se, tum per subdelegatos facerent, quod magna ex parte confectum erat, cum euocato ad Dominum Paulo sanctæ memoriæ, Sixtus Quartus prædecessor noster in hac sancta Sede, diuina prouidentia, constitutus est.

§. 11.

Iterandas ergo preces, & vehementiùs agen-

§. 12.

agendum apud Sixtum Imperator, Prælati, ac Principes prædicti duxerunt, vt tam sanctum opus canonizationis cœptæ perficeret.

§. 13. Is, vt certiori fide, quæ de miraculis & vita Leopoldi afferebâtur præciperet, venerabili fratri nostro Marco Episcopo Prænestinensi, tunc Tituli S. Marci Presbytero Cardinali, & in Germania Legato, vt præmissa percontaretur, iniunxit: qui locupletissimam de illis omnibus relationem per publica Acta & legitimos processus eidem attulit.

§. 14. Dehinc processibus & Actis publicis magna cum diligentia per venerabiles Episcopum Portuensem, Marcum prædictum Prænestinensem illo tempore Episcopum assumptum, ac F. S. Eustachij Diaconum Cardinalem, Commissarios discussis, priuata primò relatione eidem Sixto facta, postmodum in sacro Senatu, referente prædicto Venerabili fratre Episcopo Portuensi, dilucidè re examinata, & ex illorum sententia canonizatione conclusa, sicut Domino placuit.

§. 15. Sixto vita functo, nobis, qui eidem onere & honore per diuinam misericordiam, licet indigni, successimus, reseruatum est, vt supremam manum tam sanctæ approbationi appo-

apponeremus . Consilio itaque habito ,
rursus Venerabilium fratrum nostrorum
S. R. E. Cardinalium publica concione ,
omnia prout ex ordine gesta erant, Leopoldi;
vitam, miracula, & reliqua merita per
Aduocatū Consistorialem proponi curauimus.
Demum vocatis omnibus qui in Romana
Curia degunt Prælati, in frequenti
eorum confessu, assistentibus nobis eisdem
Venerabilibus fratribus nostris S. R. E. Cardinalibus ,
singulorum vota Prælatorum
scrutati sumus. Quibus Spiritus sancti gratia
cooperante , manibus pedibusque, vt
aiunt, in eam sententiam deuenientibus,
quòd Leopoldus meritò sanctus à nobis canonizandus
esset, hunc in locum, & publicum suggestum
hac ipsa die conscendere decreuimus, vt opitulante
Domino, votis precibusque fidelium adiuuantibus,
ipsum Leopoldum Sanctum definiremus, & pro
Sancto venerari debere ab vniuersis & singulis
Christianis mandaremus. Sicque hodie sermone
per nos habito, re diuina peracta, & reliquis
solemnitatibus adhibitis, ad hanc sacratissimam
canonizationem procedendum duximus. Cùm autem
verbo Sapientiæ Dominus affirmet homini, qui
eum laudauerit, & dilexerit Deum qui fecit
illum, quòd *in medio populi sui exaltabitur,* Eccli. 24.

*tur, in plenitudine sancta admirabitur, in multitudi-
ne electorum habebis laudem, & inter benedictos benedicetur;* mirumque in modum Leopoldus in medio populorum exaltatus sit, plenitudine cælestis gratiæ admirabilis refulgeat: restat ut nostra approbatione inter electos & Sanctos Dei laudetur, inter benedictos benedicatur, quæ illi abundè impartiemur, si eum inter Sanctos Ecclesiæ adnumerandum, pro Sancto venerandum, atque publicis & solemnibus supplicationibus votisque in Missarum celebrationibus, aliisque divinis Officiis inuocandum, Apostolica auctoritate iudicauerimus. Ad laudem igitur æterni Dei, indiuiduæ Trinitatis, Patris, & Filij, & Spiritus sancti, ad fidei Catholicæ robur & ornatum, ad Religionis Christianæ cultum augendum, auctoritate Domini nostri Iesu Christi, ac beatorum Petri & Pauli Apostolorum, & nostra, de Venerabilium Fratrum nostrorum consilio statuimus, diffinimus, & pronuntiamus, sanctum Leopoldum Austriæ Marchionem Sanctorum catalogo adscribendum, & publica veneratione pro Sancto obseruandum, sicut & nos illum in præsentiarum manifesta voce Sanctorum catalogo annectimus, ac minorum Confessorum numero adiungimus, publicè Sanctum

Etum diffinimus, profitemur, & veneramur.

Statuentes Festum eiusdem die 17. Kal. Decembris debere celebrari, & ipso Festo, eius sepulchrú quod in prædicto Monasterio existit visitantibus, & pro manutentione dicti Monasterij manus porrigentibus adiutrices, septem annos & totidem quadragenas indulgentiæ, in forma Ecclesiæ misericorditer perpetuis temporibus concedimus. Nulli ergo, &c. Si quis autem, &c.

§. 16.

Datum Romę apud sanctú Petrum, anno Incarnationis Dominicę 1485. octauo Idus Ianuarij, Pontificatus nostri anno primo. Hic S. Leopoldus obiit anno Domini 1136.

VITA S. LVDOVICI REGIS FRANCORVM,

Excerpta ex illa, quam conscripsit Gaudfridus de Bello loco, ipsius Regis Confessarius.

BEATVS Ludouicus Francorum piissimus Rex, patrem habuit Ludouicum Christianissimum Regem, qui in Albigeſio & Comitatu Tolosano hæreticos oppugnauit. In reditu autem letali correptus morbo, die decimo ad montem Pen-

Penferium exceffit è viuis menfe Oëtobri, anno ab orbe redempto millefimo ducen-
tefimo vigefimo feptimo; vir vtique benè
Catholicus & fanëtus. Numquam corporis
fui vllam admifit pollutionem, vnica vxore
legitima contentus. Corpus eius exanime
ad B. Dionyfij Ecclefiam apportatum, iuxta
patrem honorificè conditum eft. In eius
locum fuceffit filius primogenitus Ludo-
uicus, Rhemis ab Epifcopo Sueffionenfi,
quòd Ecclefia Rhemenfis tum pastore or-
bata effer, regia corona inſignitus & confe-
cratus; annos natus duodecim, aut circiter.
Eius coronationi complures è præcipuis
nobilibus, licet vocati effer, interefſe no-
luerunt; quòd propter dolorem defuncti
Regis & Regni defolati, lacrymis & luctui
illic potiùs, quàm lætitiæ & iucunditati fe
darent.

At puer fanëtæ indolis, ftrenuiſſimo pa-
tre orbatus, ſub tutela & moderatione ma-
tris Blanchæ, Regis Caſtellæ filiæ, permâſit:
quæ illum tenerrimè diligens, ex conſilio
Religioſorum hominum, præfertim Do-
minicanorum & Franciſcanorum, ſingula-
ri cuidam magiſtro tradidit moribus ac li-
teris inſtituendum. Ille verò pius puer, &
velut alter Salomon, ingenioſus, & bonam
ſortitus animam, præ ſuis coxtaneis mirè
pro-

profecit in vtrisque. A primis enim ætatis initiis deditus fuit pietatis & sanctitatis studiis, ferturque vitam omnem absque mortiferi peccati perpetracione exegisse. Eius verò sanctitati gratulans Blancha mater, Mallem, inquit, fili, te mortuum cernere, quàm Creatorem tuum mortali crimine offendentem. Quæ verba vsqueadè illius animo hæserè, vt diuina ipsum gratia protegente, numquam in se eiusmodi crimen admiserit.

Agente autem matre & Proceribus Regni, anno salutis millesimo ducentesimo trigesimo quarto, duxit vxorem Margaretam, Comitis Prouinciæ filiam, quæ Lutetiam venit intra Octauas Ascensionis Christi, cùm priùs esset coronata apud Senones. Anno proximo dira fames afflixit Gallias, præsertim in Aquitania, ita vt homines instar iumentorum herbis agrestibus vescerentur: nam frumenti sextarius apud Pictauos centum solidis veniebat. Sequenti anno Arfacidas senior Affacenorum, misit nuntios in Franciam, quibus id mandati dederat, vt Regem Ludouicum interficerent. Sed Deo animum eius ad pacem & humanitatem inclinante, crudelis mandati pœnitentia ductus, misit alios celeres nuntios, qui Ludouicum Regem admonerent, vt à

G g

primis

primis legatis sibi caueat. Cùm autem priores nuntij diligenter inquirerentur, inuenti, ad Regem Ludouicum adducti sunt. Iis conspectis, Rex lætatur, vtrosque nuntios muneribus afficit, Regi Arfacidæ non pauca magni pretij munera, quibus pacis & amicitia studiosum se declararet, per illos transmittit. Sed ab eo tempore plures suo corpori tuendo custodes adhibuit, qui perpetuò clauas æreas ferrent.

Anno millesimo ducentesimo quadragesimo secundo, Ludouicus Rex duxit exercitum in Hugonem Marchiæ Comitem, quòd is aduersus Regem rebellasset, Henrici Angliæ Regis, & Richardi fratris eius auxiliis fultus; qui ambo habebāt vxores filias Comitis Prouinciæ, sorores Reginae Franciæ; cùm Hugo Comes vxorem haberet ipsius Angliæ Regis matrem. Anno quidem superiori Ludouicus multam regni sui militiam ad Saliminum conuocans, Alphonsum fratrem illic militem creauerat, cui antea Ioannam, filiã Tolosani Comitis, vxorem dederat, cum Aruerniæ, Pictauorum, & Albigenſium terris quibusdam. Voluit autem Rex, vt Hugo Marchiæ Comes Alphonso se sacramēto deuinciret: quod cùm ille detrectaret, ab vxore persuasus, Regis in se animos concitauit, adeò vt is anno altero cum

cum numerosissimo exercitu in eius ditionem ingressus, aliquot oppida expugnaret, & nobiles amplius quadraginta captos cum multis aliis, partim Parisios, partim aliò mitteret in custodia asseruandos. Interea verò Comitis Marchiæ vxor quosdam è suis, muneribus & promissis illectos, ad Regis Ludouici aulam misit, qui Regem & fratres eius veneno tollerent è medio. Sed illi à Rege comprehensi, in carcerem abducti sunt. Commissum tandem est prælium non sine multa strage Anglorum, qui Hugoni Comiti suppetias ferebant. Nocte autem Angliæ Rex cum Hugone Comite, relictis Senonibus quò ex fuga se receperant, aufugere, ciuesque eius Urbis manè clauēs Ludouico Regi obtulerunt. Eodem die Hugo filius Comitis Marchiæ primogenitus, ad Ludouicum Regem venit, cū eo de pace tractaturus. Postera luce Comes Marchiæ cum vxore aduenit, cum lacrymis & suspiriis à Rege veniam petit, & impetrat.

Anno Christi millesimo ducentesimo quadragesimo tertio, natus est Ludouicus primogenitus Ludouici Regis, atque altero inde anno in lucem editus est Philippus secundus filius. Inde circa Idus Decembris Ludouicus Rex apud Pontisaram ex morbo decumbens, ad eò extra se raptus est, vt

G g 2 multi

multi putarent eum iam planè obiiſſe : ſed ad ſe reuerſus , mox tranſmarinæ militiæ Crucem petiit , & accepit . Operam ſanè dedit Rex ille piſſimus , vt proles ſuas & verbis & exemplis ad amorem Dei , ad mundi contemptum , ad ſui cognitionem inſtitueret . Cùm enim per otium liceret vacare ſibi , inuiſebat liberos ſuos , & inſtar Tobix monita ſalutis dabat eis : docebat ante omnia timere Deum , & ab omni ſemper peccato abſtinere . Serta è roſis aut floribus confecta , aut alia id genus , non ſinebat eos ſexta Feria in capitibus ferre ; quòd eo die Saluator noſter in ſuo capite tulerit è ſpinis contextam coronam . Cumquæ non ignoraret , à deliciis caſtitati , à diuitiis pietati , ab honoribus humilitati magna impendere pericula , ſobrietati , humilitati , miſericordiæ dedit animum , à mundi , carnis , & ſatanæ inſidiis ſolicitè ſibi cauens : atque cum Apoſtolo corpus ſuum caſtigans , & in ſeruitutem redigens , multo tempore intima veſte cilicina vtebatur : qua ſi non eſſet uſus , dehortante eum Confeſſario propter nimiam imbecillitatem , volebat vt idem Confeſſarius pro quadam compensatione diebus ſingulis quadraginta ſolidos Pariſienſes clanculùm in pauperes erogaret . Semper ieiunauit ſextis Feriis , nec iis diebus,

1. Cor. 9.

bus, præsertim in Aduentu & Quadragesima, piscibus aut fructibus vesci voluit, vigiliis, orationibus, & clandestinis abstinentiis perpetim se affligens.

Quanto autem maior erat, tanto humilior & summissior, instar Daudis Regis, se gerebat, & coram Deo propria existimatione vilior sibi videbatur. Quolibet Sabbato in loco secretissimo aliquot pauperum suis manibus abluebat pedes, lotos tergebat, terfos exosculabatur: deinde lauabat etiam illorum manus, & singulis certam pecuniæ portionem largiebatur. Crebrò etiam centum viginti pauperibus, qui in eius aula quotidie abundè reficiebantur, atque certis quibusdam diebus, & solemnibus Vigiliis, ducentis pauperibus, priusquam ipse cibum sumeret, suis manibus cibos apponebat. Semper & in prandio & in cœna prope se tres habebat senes inopes, iisque de appositis sibi ferculis humanissimè trans mittebat. Interdum scutellas & cibos, quos illi Christi pauperes manibus contrectauerant, offas præsertim, quibus libenter vescebatur, ut inde aliquid ederet, ad se reportari iubebat: Christum pauperem in eius pauperibus venerans, dum non abhorret à cibis, qui ipsis superfuerant. Vidit quandoque vnum ex tribus illis pauperrimis non benè edentem.

G g 3 Iussit

Iussit igitur pius & humilis Rex scutellam sibi propositam cum cibo ad illum senem deferri, eamque, cum satis ille inde comedisset, ad se referri. Ita nimirum, ut interior animi eius humilitas cunctis mortalibus poterat esse virtutis incitamentum. Purpurea, aut viridi, aut alioqui pretiosa veste, vel pellibus variis & magni pretij nolebat uti, maximè posteaquam primùm è locis transmarinis rediit. Fidei propagationem summo opere sitiebat. Itaque si quid ab inquisitoribus, quod ad fidem pertineret, esset ad eum relatum; id aliis negotiis omnibus posthabitis, audiebat, & instar Phinees, magno zelo in Christianæ fidei violatores animaduvertebat. Cuius quidam Parisiensis blasphemix reus, illo iubente, cauterio in labiis inustus fuit. Ea enim pœna decreta erat ab ipso in eos qui sceleratè iurarent & blasphemarent. Eam rem cum plerique carperent, & Regem tyrannidis insimularent; ille ait: Equidem in meis labiis libens eiusmodi inustionem perpetuò feram, tantùm ut impia iuramenta è regno meo profligentur.

Decreuit quandoque pius Rex septennio peregrinari, & Loca sancta inuisere. Venit igitur Perusium ad S. Ægidium Franciscanum instar pauperis peregrini & ignoti, vnà cum

cum sociis suis. Ostiario autem Monasterij indicante Ægidio, peregrinum quemdam ipsius expetere colloquium: ille Spiritu docente agnoscens quis esset, properè accurrit, pariterque flexis genibus in mutuos ruunt amplexus & oscula, sed nihil loquuntur, cum vtrique alterius cor pateret.

Anno salutis millesimo ducentesimo quadagesimo octauo Crux prædicabatur in diœcesis Colonienſis pago, quem vulgò Bedonfrisiū vocant. Ibi tum mense Maio, Feria sexta ante Pentecosten, tres Cruces visebantur in aëre; vna candida versus Aquilonem; altera eiusdem coloris ad Austrum; tertia colore medio, in qua cernebatur suspensi hominis effigies extensis brachiis & capite inclinato, atque in manus & pedes eius adacti clauī: eaque medium tenebat inter alias locum, in quibus nulla cernebatur hominis figura. Alio tempore in Enchusen Frisiz oppido, cum illic prædicaretur Crux, alia Crucis forma iuxta solem apparuit colore cæruleo, quam multi viderunt. In Traiectensi quoque diœcesi in Doccum, vbi S. Bonifacius Martyr trucidatus fuit, visa est in eiusdem Martyris festo die ingens sanè & albi coloris, perinde ac si trabi altera trabs transuersim artificiosè impacta esset. Creduntur autem bis apparuisse

se Cruces , ne quis ambigeret de prima apparitione : atque ita factum est, vt Coloniensis prouincia ad trecentas ferè naues appareret.

Anno Christi millesimo ducentesimo quadagesimo septimo, petente Ludouico Christianissimo Rege , magna Domini-
cæ Crucis portio Constantinopoli Parisios translata est. Proximo inde anno Rex Ludouicus, sexta FERIA à Pentecoste, iter transmarinum suscepit , multis eum è Lutetia cum processionibus vsque ad sanctum Antonium deducantibus.

Iuerunt cum eo Odo Tusculanus Episcopus Apostolicæ Sedis Legatus , & duo fratres Regis, Robertus Comes Atrebatensis , & Carolus Andegauensis Comes , cum vxoribus suis & multis Franciæ Episcopis & nobilibus . Erat quidem etiam Alphonsus Comes Pictauensis, Regis frater, Cruce signatus: sed eo anno cum Blancha Regina matre, ob regni tuitionem, māsit domi. Die quinta & vigesima Augusti Rex cum suis in nauim ingressus, biduo sustinuit ventos secundos . Vigesimo octauo Augusti die à portu soluens , Christo duce prosperè nauigans, paulò ante beati Matthæi ferias nocte ad Cyprum appulit . Comitissæ Atrebatensis coniux, quòd esset prægnans, ab Aquis mortuis

tuis in Franciam reuerſa fuit. Rex verò confilio nobilium ſuorum & Regni Cypri, quòd naues & triremes cum baliftis necdum adueniffent, tum etiam propter impendentem hiemem, & quaſdam alias res, uſque in Paſchales ferias diſtulit profectio- nem ſuam. Interim Rex Cypri, & omnes ferè regni eius nobiles, & Eccleſiarum præfecti ſive Prælati, Crucis ſignum accipiunt, & ſe cum Franciæ Rege, quocumque ipſos ducere velit, aduerſum Saracenos profecturos iureiurando confirmant.

Per id tempus Sultanus Ægypti, qui per ditiones Chriſtianorum Damalcum petere decreuerat, Regis Francorum cognito aduentu, confilium illud mutauit: interceſſerant enim illi inimicitia cum Damasci & Alapiæ Sultanis. Iſdem temporibus obiit Robertus Bellouacenſis Epiſcopus, & Comes Montis fortis, cum multis aliis eius expeditionis ſociis. Porro extremo ferè Decembri menſe venerunt ad Ludouicum regem nuntij à quodam Tartarorum Principe, qui ipſius nomine multa eum ſalute impertirent. Ij ipſo die Natiuitatis Chriſti fue- re cum Rege Ludouico ſub Sacrificio in Eccleſia, & ad prandium in aula eius: itidemque in feſto Epiphaniæ: nec poterat in eis animaduerti, quòd à Chriſtianorum

more discreparent. Literæ autem iussu Regis in sermonem Latinum conuersæ sunt. Cumque Rex diligenter de ipsorum Principe & rebus Tartarorum ex iis percontatus esset, tandem dimisit eos, adiunctis nuntiis cum literis & muneribus, quæ ad Tartarorum Regem & ipsorum Principem perferrentur. Misit etiam per eosdem nuntios suos Regi Tartarorum, quem Cham vocant, tentorium è purpura elegantissimè confectum, in quo res gestæ Saluatoris nostri graphicè expressæ visebantur. Addidit etiam particulas Crucis Dominicæ, literis humanissimè & Regem & Principem adhortans, ut qui per gratiam suam eos vocasset ad cognitionem nominis sui, illum accuratè colerent, & in eius amore semper permanerent. Misit unâ literas suas Odo Legatus Pontificis ad Regem Tartarorum & Principem supradictum, eorumque Prælatos; ostendens eis, sacrosanctam Romanam Ecclesiam cupidissimè eos ceu filios charissimos complexuram, modò Fidem orthodoxam constanter retinere, & Christi Vicario morigeros se præbere velint. Eius legationis primarij à Rege Francorum missi, fuere Frater Andreas Dominicanus cum duobus aliis eiusdem instituti Fratribus, itemque duo Clerici, & totidem ministri
Regis,

Regis ; profectique sunt octauo Kalendas Februarij cum ijs quos diximus nuntiis Tartarorum. Porro Frater Andreas, quem Rex illis præfecerat , non multò post ad Regem literas misit , quarum exemplum vnà cum Principis Tartarorum literis Rex matri suæ Blanchæ in Gallias perferendas curauit.

Interea Ægypti Sultanus , quem Babylonix vocant, vbi comperit Regem Ludouicum in Cypro hibernaturum, rursus Damascum ire contendit , per Ierosolymam proficiscens; in eam curam intentus, vt posset Alapiæ Sultanium & ei fœderatos ad se adiungere ; sed ille Ægyptij Sultani malitiam non ignorans , non fuit ausus ei fidem adhibere. Scripserunt autem Magister militum Templi , & Marestallus hospitalis Ludouico Regi , Sultanium Babylonicum cum magno exercitu venisse in loca Gazæ propinqua , eo animo , vt sibi conciliaret Damasci & Alapiæ Sultanos , metumque esse , ne Ioppem vel Cæsaream obsidione premat. Scripsit postea iterum Magister ille Regi , quemdam Sultani Babylonicus Admiraldum ad se venisse percontatum de voluntate Regis Francorum , quòd dominus ipsius cuperet cum eo pacem componere. Ea verò res & Regi & nobilibus eius valdè

valdè molesta fuit, maximè quòd Magister diceretur à Sultano petiisse, vt Admiraldum ad ipsum mitteret. Mandauit ergo Rex per literas Magistro, ne deinceps eiusmodi nuntios iniussu suo admitteret, vel cum eis colloqui ausus esset. Affirmabant enim omnes, eo ingenio Syros esse, vt quantumcumque oppressi, numquam primi velint induciarum mentionem facere, sed eousque id differre, donec multa instantia, vt eas faciant, inuitentur.

Eodem tempore quo Rex cum Regina Margareta coniuge sua in Cypro morabatur, Armeniæ Rex, eius aduentu comperto, ad eum spectabiles nuntios misit, Archiepiscopum Armenorum & alios aulicos, per literas eius se offerens voluntati: quos ille honorificè excepit. Cùm autem didicisset, inter eum & Antiochiæ Principem discordiam extitisse, misit ad vtrumque Legatos suos. Illis verò suos quoque ad eum Legatos mittentibus, duorum annorum pactæ sunt induciæ. Per id ferè tempus capti sunt quidam, qui se dicerent à Sultano Babylónico missos esse, vt Regem Ludouicum & primarios eius exercitus viros veneno enecarent. Tandem permultę venêre naues cum magna militum manu, qui in insulis hiemauerant. Inde Sabbato post Domini Ascen-

Ascensionem mandatum est, vt omnes ad Damiatam contenderent. Eodem die Rex soluit à Cypro, sed vi tempestatis bis in Cyprum reiectus est : vbi tum se iunxit illi Princeps Achaïæ cum magnis subsidiis, itemque Burgundiæ Dux. Tum verò dant vela ventis, & sexto die veniunt in Ægypti conspectum, ac paulò post etiam Damiatæ, in cuius portu nauës anchoris fixere. Sed cum viderent in eo portu magna esse Turcorum præsidia, Rex communicato cum Proceribus consilio, iussit vt die altero summo manè exirent in terram, eamque eo loco occuparent, vbi inter ipsos & urbem fluuius interesset. Eo ergo die, omnibus in triremes & alias naues sese recipientibus, Rex cum Legato Pontificis sacrosanctam gestans Crucem nudam & apertam, in cymba vehebatur; iuxta eum præcedentibus in alia cymba beati Dionysij vexillo, fratribus quoque illius & aliis nobilibus & sagittariis comitantibus: atque ita in terram egressi sunt, multis in hostes contortis telis, qui eos arcere magna vi nitebantur. In ea concertatione pænè nulli ex Christianis vulnerati sunt: permulti autem Saraceni, & eorum equi interfecti, & in ijs tres Proceres.

Eodem die, profligatis Saracenorum triremibus, Christianorum triremes fluuij ostia

ostia occuparunt. Hisce iam prosperis initiis feliciores etiam successus Dominus adiecit. Perterritis enim qui intra urbem erant Saracenis virtute diuina, omnes in fugā versi, ex urbe exceſſerūt, instructis prius ignibus, quibus urbs conflagraret. Multi itaque è castris Regis per pontem naualem, quem satis integrum reliquerant Saraceni, in oppidum ingrediuntur: Rex quoque certior factus, nonnullos è suis intromittit, fixis tentoriis suis ad pontem, ut si ita res posceret, suis suppetias ferret. Multus ibi comatus repertus est, ita ut multi affirmarēt, eam ciuitatem vi capi minimè potuisse: prospexerant enim sibi in longum tempus Saraceni, ita ut diuino potius miraculo ea victoria tribuenda sit. Deinde verò ea ciuitate à mortuorum cadaueribus repurgata, igneque extincto, Legatus Pontificis cum Patriarcha Ierosolymitano, cum Archiepiscopis, Episcopis, & magna parte eorum qui conuenerant, itemq; Ludouicus Rex cum permultis aliis, nudis pedibus, præſente Rege Cypri cum non paucis nobilibus, in urbem ingressi sunt: cumque Legatus ædem quamdam profanatam reconciliaſſet, & gratias egiſſent Deo, in honorem sanctissimæ Matris Dei ab eodem Legato Sacrificium oblatum est. Rex autem constituit,
Deo

Deo benè volente , illic Canonorum instituire collegium , qui Domino seruirent. Capta est Damiat , quam alij Heliopolim vocant, annò ab orbe redempto millesimo ducentesimo quadagesimo nono : mansitque illic Rex tota ætate cum exercitu Christiano , donec fluuius detumesceret, qui exercitui periculú allaturus videbatur.

Eodem anno sub finem mensis Iunij, Alphonsus Pictauorum Comes, & Regis Ludouici frater, matre Blancha ad Regni defensionem relicta, iter ingressus est cum copioso milite, & sub finem Octobris ad Damiatam applicuit. Inde die Nouembris vigesimo Rex Ludouicus , tam nauali quàm terrestri exercitu instructo, relicta Damiat , contra Saracenos mouit , qui tum apud Masseram ; quam quidam Pharamiam vocant, frequentes conuenerant. In eo itinere non parum detrimenti illatum est Saracenis. Deinde cùm ventum est ad pugnam paulò ante Christi Natalem , multi ex eis cæsi sunt , complures Nili aquis extincti. Postea transmissio flumine non sine ingenti periculo , rursus cum eis Christiani confligentes , multos trucidarunt , neque sexui neque ætati parcentes. At vbi Saraceni didicerunt nostros temerè progredi , resumunt animos, & in Christianos impetu facto,

cto, magnam etiam nobiliū edunt stragem, in quibus Robertus Atrebatensis Comes, frater Ludouici Regis. Tandem tamen nostris eo die victoria cessit. Proxima luce, iubente Rege, plures è Christianis flumen transgressi, Saracenorum euerterunt machinas, & pontes nauales instituerunt, vt possent nostri facilè fluuium transire. Non diu post Saraceni, collectis viribus, omni ex parte in Christianos summa vi & contentione irruunt; sed magno numero prosternuntur. Post dies aliquot in castra eorum venit Sultani Ægyptij filius, (iam enim pater eius obierat) quæ res auxit animos Saracenorum. At Christianorum res, occulto Dei omnipotentis iudicio, deteriores reddebantur, multis eorum morbo absumptis, ita vt ex triginta duobus millibus vix millia sex superessent. Magna enim commeatus penuria laborabant, nec pauci fame & inedia periere, Saracenis itinera obsidentibus, ne posset à Damiatam commeatus aduehi in castra Regis. Ea res coëgit eos Damiatam repetere. Die quinto Aprilis, illis iam proficiscentibus, Saraceni cum maximis copiis in eos incurrunt, ipsum Ludouicum sanctissimum Regem, & duos fratres eius Alphonsum & Carolum capiunt cum multis aliis, eosque in carceres coniiciunt, multo fuso

fuso Christianorum sanguine , Deo id fortassis propter quorundam peccata permitte-
tente , vel etiam vt piissimi Regis virtus &
patientia illustrior appareret.

• Porro autem sceleratissimi illi & impuri
Saraceni , præter contumelias in Saluato-
rem nostrum iactatas , Christianis inspe-
ctantibus , Crucifixi effigiem flagellis ver-
berarunt , & per summam ignominiam im-
piè eam conspuentes , in Christianæ religio-
nis dedecus , pedibus conculcarunt. Poterat
sanè facile elabi sanctus Rex , cùm illi ad
manum esset nauis , sed sponte illis se capien-
dum obtulit , vt posset captiuos Christia-
nos , quorum erat ingens numerus , redime-
re . Egìt postea apud Regem Sultanus mi-
nacibus verbis de paciscendis induciis , de
restituenda Damiata , de præstandis damnis ,
farcendisque sumptibus quos fecisset ipse à
capta Damiata. Tandem initæ sunt induciæ
decennales his conditionibus , vt Sultanus
Regem Ludouicum & captiuos Christia-
nos omnes è suis ditionibus liberos à se di-
mittat ; vt Christiani retineant loca aliquot
Terræ sanctæ : porro Rex Ludouicus resti-
tuat Damiatam , & pro factis in illud bel-
lum impensis , octo millia Byzantium ;
reddatque captiuos Saracenos omnes. His
confectis induciis , Sultanus , dum cum ex-

H h

ercitu

exercitu Damiatam proficiscitur , à quibusdam è suis frustatim gladiis conciditur: moxque grandi numero properant Saraceni ad Regis Ludouici tentorium , illum & Christianos omnes iugulaturi. Sed immensa Saluatoris virtus eorum animos fregit, mutataque scelerata voluntate, postulant à Rege vt stet pactis conuentis. Rex, cum nulla esset seruandæ Damiatæ spes , maluit pacisci cum illis inducias , quàm & se , & Christianos omnes perdere. Itaque ad certum diem Damiatæ illis redditur, Rex , & fratres eius, & nobiles Franciæ, ditionis Ierosolymitanæ & Cypri, è carcere dimittuntur. Sperabat iam pius Rex , fore vt etiam reliqui captiui, vt conuentum erat , à Saracenis dimitterentur: sed cum diu expectasset, ex duodecim millibus ægrè quadringentos recepit, impiis illis Saracenis fidem iureiurando firmatam violantibus: qui etiam de ceteris rebus nihil voluere remittere; & quod est longè immanius, egregios quosdam iuuenes Christianos è captiuis illis, coëgerunt impurissimi Mahometis profiteri sectam, Christiana religione abiurata. Imposuerant enim nudos enses ceruicibus eorum , & si qui nollent eis consentire , illos iugulabant. Ex iis quidam imbecilliores, à Christo ad Mahometem defecerunt:

alij

alij coronas martyrij , contempta morte, reportarunt.

Cernens autem Ludouicus Rex Saracenos venire contra induciarum fidem , consuluit nobiles suos & milites religiosos, quid agendum sibi ipsis videretur. Illis magna ex parte asserētibus, si quidem nunc recedant, terras illas & captiuos in summum discrimen venturos: sin autem maneant ad tempus aliquod , posse inde vtilitatis non nihil accidere Christianis, præsertim quòd inter Ægyptium & Alapianum Sultanos acerbæ extaret simultas: Rex pius maluit hærere in Syria, quàm res Christianorum & ipsius Christi in ea desperatione tantoque discrimine relinquere. Alphonsum verò & Carolum fratres suos ad Reginam matrem consolandam remisit in Gallias. Acta sunt hæc anno Christi millesimo ducentesimo quinquagesimo. Quis verò hîc non agnoscat stupendû præpotentis Dei miraculum, gentem illam ferocissimam parère tanto Regi? gentem cupidissimam Regem opulentissimum soluere captiuitate pro longè minori pretio quàm obtinere potuissent? Rex autem quinque deinceps annis mansit in Syria, nec otiosus sanè , sed multos Saracenos ad Christi Religionem traducens, multos captiuos redimens, & vrbes aliquot

& castra egregiè cōmuniens. Offendit tum apud Sidonem permulta cæſorum Chriſtianorum corpora iam putentia, non pauca à feris belluis lacerata: ea propriis manibus ſepeliuit humiliter & deuotè, vſus opera quorundam è ſuis, qui illorum foetorem vix ferre potuerunt. Quotidie autem manè flexis genibus Dauidicum Pſalterium recitabat. Poſtquam autem reſciuit de obitu matris Blanchæ, nobilibus ipſius id conſulentibus, in Gallias reuerſus eſt. Cùm ergo nauigarent, tertia nocte nauis quæ Regem habebat, bis tanta vi appulſa eſt ad rupem, vel terræ lingulam, vt nautæ & alij illicò ſubmerſum iri putarent. Ea concuſſione excitati Sacerdotes, Clerici, & ceteri, ſanctum Regem inuenerunt coram ſacroſancto Chriſti Corpore deuotè orantem: omneſque in ea fuere ſententia, mortis tam præſens diſcrimen, eius meritis & precibus ſe euafiſſe.

Inde in Franciam reuerſus Rex, ſumma omnium gratulatione excipitur, atque ab eo tempore magis magiſque de virtute in virtutem proficiens, ad omnimodam vitæ perfectionem peruenit. Etſi verò ab infantia cum illo creuerat miſeratio, deinceps tamen euidentiùs eam declarauit in afflictoſ & inopeſ, quibùs omnibus pro viribus opi-
tula-

tulabatur. Iussit enim extrui Doms hospitales, Monasteria Religiosorū, & in diuersis regni sui locis multas quotannis distribui pecunias ijs, qui maiori pressa inopia videbantur. Multa Dominicanorum & Franciscanorum condidit cœnobîa à fundamentis, multisq; aliis pauperibus Religiosis Ecclesias & ædificia opportuna construxit, largis additis eleemosynis. Cæcis in qualibet ferè ciuitate & castello regni sui, domos ipsis congruas & opportunas benignissimè attribuit, certos illis prouentus assignans. Non pauca diuersorum Ordinum monasticorum cœnobîa ex integro extruxit, & magnis ea redditibus instruxit, in quibus etiam non rarò miræ humilitatis & charitatis officia exhibuit, suis manibus humiliter ac deuotè seruiens ægrotis. Cùm veniret Parisios, aut ad alias vrbes, Doms hospitales, in quibus magna erat malè habentium copia, humanissimè inuisens, nulliusq; morbidî deformitatem aut sordes refugiens, infirmis omnibus, flexis genibus fercula offerebat. In Abbatia Regij Montis, Cisterciensis Ordinis, quam ille magnificè inprimis & condidit & ditauit, vt res ipsa testatur, crebrò id genus officia præstitisse fertur. Erat ibi Monachus quidam leprosus, quem fœdus ille morbus horridum & abo-

gnam sanctæ Crucis portionem, ferrumque lanceæ quod Saluatoris latus fodit, admodum reuerenter reposuit cum multis aliis Reliquiis, quas à Constantinopolitano Imperatore immenso labore & magnis impendiis acceperat. Cum in Ecclesia diuina officia persoluerentur, nullius admittebat colloquium, nisi aut necessitas cogeret, aut euidens vtilitas id poscere videretur: sed neque sic tamen, nisi breuiter & succinctè, ne ipsius lacrymæ & pietas siue deuotio interturbarentur: nam instar Ieremiæ, in precibus suis & exercitiis pietatis lacrymarum fontem sitiens, suo Confessario quandoque in familiari colloquio fatebatur, nonnumquam sibi oranti diuinitus datas fuisse lacrymas, quæ per genas in os influentes, non solum cor, sed etiam os ipsius gustu suauissimo affecissent.

Tanta reuerentia sanctæ Crucis signum prosequabatur, vt si illud humi expressum vidisset, calcare pedibus ausus non esset: exegitque à multis cœnobiis, ne deinceps in suis Monasteriis permitterent illud in pavimento effingi; & sicubi iam humi effictum esset, id penitus abolerent. Quàm verò reuerenter annis singulis in Parasceue ad adorandum sanctæ Crucis lignum, solutis capillis, flexis atque etiam nudis genibus ac-

alienum , balteo militari donare velim.

In Regni administratione eam prudentiam & auctoritatem adhibebat, vt sine acceptione personarum, controuersiis quorumcumque diligenter excussis, iustam ferret sententiam. Consiliarij eius & Regni Proceres, cernentes eum sapientia Dei præditum, & sincerè atque ex animo diligebant illum, & non mediocriter verebantur. Cum autem formidaret pius Rex, causas pauperum non magnæ illis curæ esse, vt minimum bis hebdomadibus singulis in loco publico residens, audiebat eorum querelas: & tum iustitia tum misericordia eas expendens, celeriter illos expediebat. Duella, vt quæ Iure essent vetita, ad nullius preces admittere voluit; sed alia ratione, quæ Iuri consentanea esset, etiam magnatum maleficia castigabat. Et vt vsurarum immanis vorago obstrueretur, statuit, vt eos qui per literas Iudæis aut aliis publicè vsuras exercentibus se obligassent, non cogerent ad solutionem Iudices. Et quia verissimè dixit Isaias, *Erit opus iustitiæ, pax*; Deus iusto & pio Regi pacem, & Regno tranquillitatem præstitit.

Isaiæ 32.

Habebat hoc peculiare à Deo munus, vt, qui inter se discordia laborarent, eos vt plurimum conciliaret. Quàm fuerit autem

H h 5

Deo

Deo grata tanti Regis summa humilitas ; Rex Regum omnium Christus Deus euidenti miraculo declarauit. Comes Gelriæ nuntium cum literis miserat Parisios, illicò rediturum. Ex eo reuerſo ſciſcitabatur Comes, num Regem Franciæ Ludouicum vidiffet. Tum ille ſubſannans , collumq̃ue contorquens ; Vidi, inquit, vidi illum miſerum papilardum Regem , ad ſcapulas capitiū geſtātem. Vix verba finierat, & facies eius retrorſum acta, ita contorta permanſit. Tandem poſt multorum annorum curricula, quibus ſe in omni virtute exercuit ſanctus Rex, certa ad eum fama allata de vaſtatione & periculis Terræ ſanctæ, inſtar Ma-

1. Mach. 2. thathiæ cum filiis ſuis, mala gentis Chriſtianiæ & Sanctorum ferre non ſuſtinens, Deo ipſum permouente , alteram ſuſcepit nauigationem cum tribus filiis ſuis comitibus, itemq̃ue cum Regni Proceribus & nobilibus, multaq̃ue populi frequentia. Cumq̃ue iam naues conſcenſuri erant , filios ſuos blando vultu adſpiciens, & primogenitum ſpeciatiim appellans , ait : Vide , fili , vt ego iam grandæuus ſecundò hoc iter capeſſam, quando iam etiam Regina mater tua prouecta ætate eſt, & nos Regnum noſtrum, fauente Deo , abſque vlla perturbatione obtinemus, diuitiis , deliciis , & honoribus, quan-

quantum fas est, affluentes. Vide, inquam, vt Christi & Ecclesiæ eius causa, non parcam senectuti meæ, nec me flectat desolatio matris tuæ, delicias & honores cōtemnam, opesque meas pro Christo impendam. Vide, vt te & fratres tuos & sororem primogenitam mecum ducam, simul etiam quartum filium ducturus, si aliquanto maturiori esset ætate. Hæc verò idcirco te audire volui, vt cum post obitum meum ad Regnum pertigeris, pro Christo & Ecclesia atque fide Catholica tuenda, nulli rei parcas, non vxori, non liberis, non Regno. Volui enim & tibi & fratribus tuis de me ipso præbere exemplum, vt si res postulet, vos similiter faciatis.

Itaque anno Domini millesimo ducentesimo septuagesimo, Kalendis Martiis, Ludouicus Rex Christianissimus, nihil fractus superiorum temporum laboribus & expensis, quas in priori expeditione fecerat, cum tribus liberis, Philippo, Ioanne, Petro, è Massiliæ portu soluit, adiuncto etiam sibi Nauarræ Rege, & permultis Ecclesiarum præfectis & nobilibus. Vt autem facilius Terram sanctam recuperare possent, consultiſſimum eis visum est, vt Regnum Tūnetanum, quod magna in Syriam nauigantibus obiceret impedimenta, ante omnia
in

in suam redigerent potestatem . Iam ceperant portum Carthaginis , qui Tuneto haud procul abest; & ecce morbus, qui illo anno iis in locis mirè grassabatur, in Christianorum exercitum inuadit, ex Regis filiis tollit Ioannem , tollit ipsum quoque sanctissimum Regem cum multis è nobilitate & plebe . Quàm sanctè autem & piè à vita migrarit Christianissimus Rex , gener eius Nauarræ Rex Tusculano Episcopo perscripsit . Nam correptus morbo , non cessauit laudare Deum, sæpè illam orationem interserens : *Fac nos Domine prospera mundi despicere, & nulla eius aduersa formidare .* Et pro illis quos secum adduxerat, ita orans : *Esto Domine plebi tue sanctificator & custos.* Morti propinquus , voluit se Corporis Christi Sacramento muniri . Cumque Sacerdos id ei ostenderet , perquireretque, num crederet ibi esse Filium Dei , respondit , minus apud se habere dubij,quàm si videret Christum in ea forma qua ascendit in cælos. Iam supremum trahens spiritum , suspiciens in cælum ait : *Introibo in domum tuam Domine, adorabo ad templum sanctum tuum, & confitebor nomini tuo.* Quibus dictis, felicissimè obdormiuit in Domino.

Psal. 5.

Eius morte non mediocriter consternato Christianorum exercitu , & Saracenis lætan-

tantibus, Carolus Siciliae Rex in bellis strenuus, cum multo milite aduenit, animosque Christianorum confirmavit. Etsi autem longè plures essent Barbarorum quàm Christianorum copiae, non tamen ausi fuere cum nostris instructa utrimque acie committere, sed leuibus praeliis & crebris excursionibus non mediocriter vexarunt Christianos. Tandem obsidione pressi à nostris, coacti sunt pacem petere, quæ his potissimum conditionibus confecta est, ut omnes Christiani, qui in eo Regno captiui tenebantur, abirent liberi: & ut Dominicanis & Franciscanis, atque aliis libera esset facultas toto illo Regno Christum prædicandi; credentesque baptizandi, utque Rex Tunetanus Regi Siciliae annum tributum quadraginta millium aureorum persolueret.

Obiit autem piissimus Rex Ludouicus vigesima quinta Augusti, & tum in vita, tum post obitum multis claruit miraculis. A Bonifacio Pontifice, eius nominis octauo, in Sanctos relatus est. Robertus Gaguius libro septimo de gestis Francorum testis est, in archiuis Caroli Quinti Regis Gallorum, repertam esse chartulam præceptorum, quæ hic sanctus Rex filio suo primogenito, dum Tunetum obsideret, dictauit & scripsit: eamque ex Caroli thesauro receptam,

ceptam, Girardum de Montaguto regium scribam, Carolo exhibuisse anno salutis millesimo trecétesimo sexagesimo quarto. Ea præcepta & institutiones habentur etiam in manuscriptis codicibus, vnde nos ea stylo mutato descripsimus.

Institutiones sanctissimæ, Philippo primogenito filio à S. Ludouico Rege sub mortem propositæ.

FILI mi, ante omnia diligenter in eam curam incumbe, vt diligas Deum: nemo enim potest esse saluus, nisi Deum amet.

Caue ne vñquam admittas peccatum mortiferum: sed omnia potius ferre velis genera tormentorum; quàm aliquam talem perpetrare culpam.

Cùm aduersa accidunt, feras æquo animo, & cogita te commeruisse: atque ita lucrum tibi inde accedet.

Cùm rebus prosperis frueris, humiliter agas gratias Deo, ne inde animo elatus efficiaris deterior, vnde te oportuit fieri meliorem.

Crebrò confitearis peccata tua, deligasque tibi sapientes Confessarios, qui te possint instituere & docere, quid agere, quid vitare oporteat: & coram illis ita te compares,

pares , vt audeant sincerè te reprehendere,
& vitia tua indicare tibi.

Officium diuinum deuotè auscultes :
faceſſant ibi fabulæ & nugæ, nec oculi huc
atque illuc circumferantur : ſed ores Deum
ore , & etiam meditando corde , idque
præcipuè ſub Sacrificio poſt peractam con-
ſecrationem.

Animo ſis pio & humano erga pauperes
& calamitoſos homines, illiſque pro viri-
bus opituleris.

Si quid angat animum, id mox explices
Confefſario tuo , aut alicui viro bono : ita
fiet , vt faciliùs id feras.

Da operam , vt quorum vteris conſue-
tudine & familiaritate, ij ſint homines pro-
bi & integri , ſiue Religioſi illi ſint , ſiue ſæ-
culares , & cum illis libenter miſce collo-
quia: porrò nequam & improborum viro-
rum commercia deuita.

Sermones , qui ſunt de Deo , publicè &
priuatim lubens audias, preces quoque &
condonationes ſiue Indulgentias ſtudioſè
expetas.

Amato bonum, odito malum omne.

Vbicumque fueris, nemo auſus ſit quid-
quam eiufmodi te præſente eloqui , quod
alliciat ad mortiferum peccatum, aut alte-
rius famæ deroget: nec tu vumquam de vllò
malè

malè loquaris obtrectandi animo :

Non patiaris quemquam, te audiente, peruersè de Deo aut Sanctis eius loqui, nec id finas impunè abire.

Crebrò gratias agas Deo pro bonis omnibus tibi ab illo collatis, vt dignus fias potioribus eius beneficiis affici & augeri.

In administrâda iustitia sis rectus & seuerus, & ita vt leges præscribunt, eam exerceas erga subditos, neque ad dexteram neque ad sinistram deflectens, pauperumque querimonias non reiicias, donec veritas innotescat.

Si quis habeat aduersum te querelam aut controuersiam, semper ab illo stes contra te ipsum, donec rem certam comperias. Ita enim fiet, vt Consiliarij tui fidentiùs iustam ferant sententiam.

Si quid possideas rei alienę, etiam si id acceperis à maioribus tuis, incunctanter restituas iusto possessori, vbi certò id constiterit. Sin autem dubia res est, cura vt viri sapientes accuratè & sine mora inquirant. Id enim vel maximè studere debes, vt qui sunt in ditione tua, pace & iustitia fruantur, in primis homines Religiosi, & qui in Clero sunt.

Parentibus tuis debes amorem, reuerentiam & obedientiam. Beneficia Ecclesiastica non conferas nisi benè dignis, & qui nul-

la

la eiusmodi beneficia habeant, idq; ex consilio bonorum virorum.

Bellum, præsertim aduersus quemlibet Christianū, sine multo consilio vide ne suscipias. Si necessitas cogat suscipere, Ecclesias & infantes nullo patiaris damno affici.

Si qua existat vel tibi vel subditis tuis contentio, vel bellum, quoad poteris, componere & sedare coneris.

Vide vt bonos habeas Prætores & Magistratus, & de illis solerter inquiras, vti se gerant.

Semper sis addictus & deuotus Romanæ Ecclesiæ, eius Pontifici haud secus atque spiritali patri te morigerum præbeas.

Da operam, vt impensæ tuæ moderatæ sint, & rationi consentaneæ.

Sub finem hortor & adiuro te, fili mi, si me contigerit ante te migrare ex hac vita, vt toto Regno Franciæ pro anima mea cures offerri Deo preces & Missæ sacrificia.

Ad extremum, fili charissime, quidquid boni potest bonus & pius parens precari filio suo, id ego precor tibi: sacrosancta Trinitas & Sancti omnes seruent te ab omni malo, præstetque tibi Deus gratiam rectè semper agendi, & ipsius faciendi voluntatem; ita vt ille per te honoretur, & nos possimus post hanc vitam pariter esse cum illo,

Li cum-

eumque contemplari & laudare per infinita sæcula sæculorum. Amen.

Sanctus Ludouicus natus est anno Domini 1214. obiit anno 1270. regnavit annis 44. in Sanctos relatus anno 1296.

V I T A B. A M A D E I

Tertij Ducis Sabaudia.

AM A D E V S Sabaudia Dux tertius, natus est ex Ludouico Duce Sabaudia secundo, & Anna filia Iani Regis Cypri, anno à partu Virginis millesimo quadringentesimo trigesimoquinto. Hic nondum infantiam egressus, sponsus designatus fuit Ioladae filiae primogenitae Caroli septimi Christianissimi Galliarum Regis. Adolescens, ac pæne puer, initium operum suorum semper ab oratione ducebat: neque antea cum hominibus agere solebat, quam diuino Missae Sacrificio audiendo, & conciliando sibi Numini operam dedisset. Et quoniam in itinere spiritualis vitae multa occurrunt pericula, partim à naturae fragilitate, partim ab inuidia & astutia demonum, ducem elegit non minus sanctum quam doctum, eumque perpetuo sibi adesse voluit, ut eius consilio & admonitione regeretur.

geretur. Is fuit Magister Ioânes Fauzonius, Ordinis sancti Francisci, ex Monte regali, vir æquè doctus ac sanctus. Hunc virum vt parentem coluit, vt magistro fidem habuit, & cum eo negotia animæ suæ omnia liberimè communicabat. Quod verò attinet ad naturalia, siue Dei dona, siue naturæ vitia; cum venustate corporis coniunctam habebat incredibilem facilitatem & comitatem: sed cum his bonis admiscuit diuina prouidentia morbum incurabilem & foedum, qui dicitur epilepsis, siue morbus comitialis: quod flagellum vir Dei non vt flagellum, sed vt frænum ad peccata multa vitanda, sibi à Deo patre amantissimo datum existimabat & fatebatur. Cùm enim subirent animû quæ illum extollere potuissent, opes, honores, potestas, imperium; mox aderat medicina à Deo parata, morbus epilepticus, qui tumorem animi comprimebat, & ipsum totum hominem abiiciebat. Itaque non rarò famulos suos ipsi compatiētes dulcissimè consolabatur, dicens, Deum magis homini propinquare cùm eum flagellat, quàm cùm consolatur. Id quod est consentaneum Diuinis literis, in quibus legimus dictum fuisse Tobix ab Angelo sancto: *Quia acceptus eras Deo, necesse fuit vt tentatio probaret te,* & in Psalmo

Tob. 12.

Ii 2

legimus:

Pfal. 90. legimus: *Cum ipso sum in tribulatione.* & A-
 Heb. 12. postolus dicit: *Quem diligit Dominus, casti-*
 gat; *flagellat autem omnem filium, quem reci-*
 Iacob. 1. *pit.* & alius Apostolus addit: *Omne gaudium*
existimate fratres mei, cùm in tentationes va-
rias incideritis. Sed his omissis, ad historiam
 reuertamur.

Cùm ad annum ætatis octauumdecim-
 um peruenisset Amadeus, hortante patre,
 Iolandam sibi olim desponsatam accepit
 vxorem; sed ad Sacramentum coniugij non
 sine multis precibus se præparauit, vt eius
 solita pietas, & patris spiritualis admonitio
 & doctrina requirebant. Vixit autem cum
 vxore tam pacificè & concorditer toto vitæ
 suæ tempore, vt planè intelligi posset, aucto-
 rem huius coniugij non alium fuisse, quàm
 Deum. Interim accidit permissione diuina,
 vt virtus optimi Principis magis elucesce-
 ret, vt fratres eius videntes eum à patre plus
 omnibus diligi, inuidentiæ morbo adure-
 rentur. Et res in apertum bellum erupisset,
 nisi Ludouicus Dux & pater cum Rege
 Gallix egisset, vt Philippus, vnus ex fratri-
 bus, & ceteris ardentior, carceri mancipare-
 tur. Sed sicut fratres Amadei imitati sunt
 fratres Iosephi Patriarchæ, in ipso Iosepho
 sine vlla causa iniusto odio prosequendo;
 sic & pius Amadeus imitatus est incredibi-
 lem

lem charitatem sanctissimi Iosephi, in red-
dendo bona pro malis, & vincendo in bono Rom. 12.
malum, vt Apostolus iubet. Vix enim Lu-
douicus pater obierat, & Amadeus in Du-
catu successerat; cùm Philippum fratrem è
carceribus liberari curauit: nec per Legatos
id effecit, sed ipse in Gallias profectus, cum
Rege non solùm egit vt Philippus è carcere
educeretur; sed etiam curauit, vt Margareta
filia Ducis Borbonij fratri suo Philippo in
matrimonium coniungeretur, & ipse par-
tem imperij sui eidem donauit. Heroica
planè charitas, & Christianissima virtus, sic
diligere inimicos; hoc est esse verissimum
Christi discipulum & imitorem: nam ne
ipse quidem Patriarcha Iosephus ad hunc
apicem charitatis peruenit, vt fratres suos, à
quibus venditus ac pænè necatus fuerat, ad
partem sui Principatus admitteret.

Sed ea quæ dicta sunt de charitate san-
ctissimi Ducis Amadei erga fratres ingratos
& malos, ab ijs quæ dicenda restant, supe-
rantur. Philippus Ducis Amadei germanus,
non contentus honore quo cum Dux affe-
cerat, iterùm in hostem ex fratre mutatus,
coacta militum armatorum multitudine,
arcem, in quam se Dux contulerat, circum-
dare, eamque vi capere aggreditur. Sed
Amadeus verissimè Deum amans, & pro-

pter Deum inimicos etiã diligens , & assuetus reddere bona pro malis , atque in adiutorio Dei confidens ; aperiri iussit portas arcis , & ad se fratrem armatum & minacem vocans, sic piẽ, sic amanter, sic diuinẽ locutus est , vt fratrem ab odio & furore hostili ad pacem & charitatem verẽ Christianam & verẽ fraternam conuerterit. Sic triumphauit triumpho nobilissimo de hoste generis humani, cuius proprium est serere inimicitias etiam inter amicos & fratres.

Extincta inimicitia cum fratre, exorta est sinistra quãdam opinio inter Magnates de imperitia Ducis ad regendos populos ; propterea quod nimium sollicitus videretur de spiritualibus exercitiis , & de pauperibus subleuandis . Sed hanc sinistram opinionem prudẽtissimo consilio facilẽ superauit & extinxit. Instituit enim iter in Gallias, vt cognatum Regem videret: atque ad hoc iter inuitauit maiorem partem Principum suorum. In eo itinere multis in locis honorificentissimẽ exceptus fuit vt cognatus Regis; & cum ad Regem peruenisset, incredibile est, quantis honoribus affectus fuit tum ab ipso Rege, tum etiam ab omnibus Principibus nobilissimi illius Regni. Ex ea reddiderunt aulici Ducis, quàm magnificere deberent Ducem suum, quem tanti fieri ab vniuerso

uerso Galliæ Regno ipsi vidissent. Itaque ab eo tempore nemo ausus fuit reprehendere pietatem Principis sui, quam admirari, & de qua gloriari, si quid saperent, omnino deberent.

Quod autem Amadeus non abhorreret ab armis, quando iusta causa bellandi se offerret, docuit infelix exitus Constantini vltimi Imperatoris Græcorū. Ferunt enim tunc Amadeum Ducem magno zelo misisse in Peloponnesum exercitum satis copiosum, vt ea regio à Turcarum furore defenderetur. Et cum paulò post Pius Secundus Pontifex Maximus in Concilio Mantuano præsidens, vocaret Principes Christianos ad bellum sacrum contra Mahometanos, ipse in primis adfuit, promptus ad opes & vitā, si opus esset, pro Christi Religione profundendas. Quod etiā facilè cognosci potuit, quando Iacobus Nothus Nicosiæ Episcopus, dimissa dignitate Episcopali, adhæsit Soldano Ægypti, & Ludouico à Sabaudia Rege legitimo expulso, Regnum Cypri inuasit. Tunc enim magno ardore animi Amadeus coëgit exercitum, vt Regnum, si posset, recuperaret; præsertim cum Carlotta Regni heres ad eum venisset. Sic enim decebat, vt piissimus Princeps proprias offensiones ex fraterna charitate facilè condona-

ret; sed offensiones Dei & Reipublicę Christianę pro viribus vlcisceretur.

Sed. vna in re videtur hic sanctissimus Princeps planè excelluisse: ea est misericordia erga pauperes. Non enim surda aure audiuit Dominum dicentem, *Venite benedicti Patris mei: esuriui enim, & dedistis mihi manducare.* & quę sequuntur: & Salomonem, qui ait: *Fæneratur Domino, qui miseretur pauperis.* & Angelum dicentem ad Tobiam: *Eleemosyna à morte liberat, & ipsa est quę purgat peccata, & facit inuenire misericordiã, & vitam eternam.* & denique beatum Apostolum admonentem diuites vt faciliè tribuant, & communicent opes suas, & thesaurizent sibi fundamentum bonum in futurum, vt apprehendant veram vitam. His & aliis id genus Spiritus sancti oraculis eruditus optimus Princeps, in pauperes alendos & vestiendos liberalissimus erat; neque contentus erat solo ministerio famulorum in pauperibus reficiendis, sed ipse propriis manibus ad mensam illis ministrabat; certus, se Christo in pauperibus ministrare, cum Dominus dixerit: *Quod uni ex minimis fratribus meis fecistis, mihi fecistis.* Accidit aliquando, vt Legatus quidam à nescio quo magno Principe missus, cum Duce Amadeo colloquens, peteret, an non aleret magnam

gnam copiam canum venaticorum, de more aliorum Principum; respondit Amadeus, ingentem omnino numerum canum optimorum à se nutriri; quos si placuerit videre, sequenti die, tali hora adesset. Adfuit ille ad horam indicatam; & Dux introduxit Legatum in proximum triclinium, vnde in subiectam aulae planiciem prospectus erat. Ibi mensam illi admirabundo oblongam, stratam, & cibus omnis generis refertam, accumbentesque ad eam mendicos quamplurimos ostendit, atque hisce hominem verbis affatur: Isti, vir amice, canes sunt, quibus in vita hac, cuius brevis incertaque periodus est, cælum ego venor, alimenta que mihi comparo, quæ manna omni præstantiora famem mihi in perpetuum sistant. Ac dicenti inter alia Legato, inueniri sæpius homines improbos inertesque, qui paupertatem simulent, & mendicando, quàm manibus laborando quæ ad victum necessaria sunt, comparare sibi velint; respondit Dux, Nolim, inquit, tam anxie ista inquirere: nam si in actiones nostras sic inquireret Deus, malè omnino nobiscum ageretur; sed ille pius & clemens *solem suum oriri facit* Mat. 5. *super bonos & malos, & pluit super iustos & iniustos.* sic & nobis melius est, in tanta multitudine bonorum eleemosynam diui-

Ii 5. dere

dere in aliquos indignos, quàm dum paucos indignos repellere à nostra liberalitate curamus, plurimis verè pauperibus iniuriam faciamus.

Neque verò solùm in pauperes singulos liberalissimus erat pius Princeps, sed etiam in publicis ædificandis hospitalibus & Monasteriis, & in ornandis & pretiosa suppellectile ditandis Ecclesiis, magnificentiam suam & pietatem ostendit. Usque ad hanc diem conseruari dicuntur Vercellis pretiosissima sacerdotalia indumenta, quæ piissimus Dux Amadeus Ecclesiæ sancti Eusebij dono dedit. Suscepit etiam aliquando peregrinationem ad Urbem, ut videret loca sancta, quibus Romana ciuitas abundat. Profectus est autem non ut magnus Princeps, sed ut homo incognitus, & cum vestibis peregrinantibus accommodatis, & incredibili humilitate & religione Ecclesias & sanctuaria Urbis obiuit. In eleemosynis solùm largiendum pauperibus singulis, tum xenodochiis & Ecclesiis, non se pauperem peregrinum, sed opulentum Principem demonstrauit: siquidem magnam argenti & auri copiam in eiusmodi sancta loca effudit, ac potissimum ad memoriam Principis Apostolorum, non aurum solùm & argentum, sed etiã gemmas pretiosissimas dimisit. Obiuit
postea

postea & aliam peregrinationem cum vxore Iolanda ad sacrosanctum linteum , in quo passionis Dominicæ vestigia , non sine insigni miraculo impressa cernuntur. Obiuit autem eam peregrinationem non sine magno labore & fatigatione semper pedes, vt passionis Dominicæ cum ipsa sua coniuge particeps fieret.

Porro ad eleemosynas & peregrinationes, adiungebat etiam frequentes orationes & ieiunia : neque desunt qui existiment, frequentia ieiunia in causa fuisse , vt rariùs morbo illo suo familiari vexaretur. Neque verò religiosæ & piæ exercitationes impediebant eum, quominùs conseruaret maiestatem Principis , qualis eum decebat tum in alenda numerosa familia, tum in stipendiis militibus numerandis : nouerat enim Patriarcham Iosephum moderatorem Ægypti, & Dauidem Hebræorum Regem, & nostros, Henricum Imperatorem Romanum, & Ludouicum Regem Francorum, sine detrimento pietatis potuisse Regna & Imperia debita cum auctoritate gubernare. Illud tamen pij Principes, & in eis noster Amadeus, diligenter curabant, vt ab aula exularent mimi, parasiti, gnathones, inutilia terræ pondera, & multò magis blasphemis vel periuriis addicti, neque ij soli, sed etiam
men-

mendaces, detractores, rixosi, & alij id genus improbi. Illud autem admirabile est, & proprium eleemosynarum emolumentum, quòd cum tam liberalis & quasi prodigus videretur Dux Amadeus in eleemosynis largiendis, tamen fratribus plurima largitus est, & sororibus dotes statui ipsarum congruentes dedit; & nulla noua populis vectigalia vel tributa imposuit: sic tamen ærarium, quod inane repererat cum regnare inciperet, repleuit, vt iurisdictiones varias redemerit, quas Principes superiores coacti alienauerant. Itaque verum est, non solum in vita futura, sed etiam in præsentì, quod

Prou. 19. Sapiens scriptum reliquit, Qui miseretur pauperum, fœneratur Deo.

Ad has virtutes sancti Ducis accessit diligentissima cura præponendi in omnibus ciuitatibus optimos Iudices, quos videlicet ipse nosset simul valdè peritos & valdè probos: nam & probitas sine scientia parum prodest, & scientia sine probitate multum obest. Denique accessit eximia patientia in aduersis. Quæ virtus virtutes omnes perficit, quod sanctus Iacobus docet cum ait: *Patientia opus perfectum habet*: cuius rei rationem reddit sanctus Cyprianus, cum demonstrat, sine patientia nullam virtutem, ac ne ipsam quidam charitatem, diu tiùs posse sub-

Iacob. 1.
Serm. de
Patientia.

subsistere. Donavit Deus seruo suo Amadeo filios sex, & filias tres; quæ felix proles dici potuisset, nisi Carolus primogenitus, qui solus idoneus per ætatem erat ad regimen populorum, & in cuius virtute pater non parum acquiescebat, paucis mensibus ante obitum Ducis raptus fuisset. Flagellum hoc Dei non potuit non sentire Dux pater, sed ita sensit, ut continuò diuinæ voluntati acquiesceret.

Agebat iam Princeps optimus annum trigésimumseptimum ætatis, cùm Vercellis in morbum incidit: & quamvis stella crinita quæ paulò antè in cælo apparuerat, significare crederetur mortem magni alicuius Principis, ipse tamen ab alio diuiniore lumine illustratus, constanter prædixit finem vitæ suæ iam propinquare: quin etiam, ut ferunt, diem ipsum signavit, in quo de hoc mundo migraturus esset. Itaque tamquam certò breui moriturus, sepulchrum sibi delegit, non excelsum neque pretiosum, sed congruens vitæ suæ, quam semper duxerat, humile & vulgare, infra gradus videlicet aræ maioris sacræ ædis sancti Eusebij, quæ est Vercellis, ut non possent Sacerdotes ad aram sacram ascendere, quin sepulchrum Principis pedibus calcarent. Quod ego de industria factum reor, non solum ob amorem

rem humilitatis, sed etiam vt Sacerdotes
faciliùs meminissent animæ ipsius, cùm in
ipsa ara pretium nostrum Domino Deo of-
ferrent. Itaque propinquante die ab ipso
prædicta, susceptis de more fidelium san-
ctissimis Sacramentis, nominauit vxorem
Iolandam tutricem filiorum, qui tres tan-
tùm supererant, & natus maximus septennis
erat. Deinde vocatis ad se vxore, & filiis, &
præcipuis Magistratibus, commendauit illis
quæ ipsi præcipuè semper cordi fuerant, his
verbis: *Facite iudicium & iustitiam, & dili-
gite pauperes: & Dominus dabit pacem in fi-
nibus vestris.* Hæc locutus, paulò post san-
ctæ fiduciæ plenus migravit ad Dominum,
die trigesimo Martij, anni millesimi qua-
dringentesimi septuagesimi secundi. Mor-
tem eius gloriosam indicauerunt Vercellis
vbi mortuus est, lumina visa supra arcem
accensa diuinitus, & cantus Angelici supra
eamdem arcem auditi. Apud Taurinos au-
tem, vbi fiebant publicæ supplicationes ad
Deum pro vita Ducis grauiter ægrotantis,
visa est in aëre coram multis millibus ho-
minum, sedes sublimissima, ac ipsi Soli æ-
qualis, in qua sedere conspiciebatur Dux
Amadeus, luce candidissima circumdatus.
Secuta sunt postea miracula plurima & ma-
xima, quæ gloriam beati Ducis testificaban-
tur.

tur. Sed & dum viueret hic beatus Princeps, miraculis claruisse dicitur, præsertim cùm in ciuitate Parisiensi pridie natiuitatis sancti Ioannis Baptistæ, solemni ritu ad honorem sanctissimi Præcurсорis facem ad-mouisset rogo lignorum, vnde magnus ignis excitabatur. Quam quidem cærimo-niam Rex ipse peragere solebat; sed eo anno, cùm adesset Dux Amadeus, Rex illi pium hoc officium cessisse dicitur, ac paulò post à Duce aliquos ægrotos præsentés solo tactu curatos ferunt. Quia verò Episcopi, qui ad funus Ducis defuncti celebrandum conuenerant, neque audebant sine bene-placito Apostolico optimum Principem sacris cærimoniis honorare: & tamen iniu-riam sibi videbantur facere animæ illi san-ctæ, si pro ea Domino supplicarent: elegerunt mediam quamdam viam. Hæc fuit, vt prima die & nona Episcopus Vercellen-sis caneret solemnem Missam de Spiritu san-cto: Pontifex Taurinensis Missam de beatissima Virgine Maria: Archiepisco-pus Tarantasiensis Missam pro defunctis generatim.

Si quis miracula singula cognoscere cu-piat, consulat librū Italica lingua scriptum de Vita B. Amadei, Ducis tertij Sabaudix, à R. P. Donno Petro Francisco Maletto Ca-nonico

nonico Regulari Lateranensi , anno Domini 1613.

Obiit beatus Princeps anno Domini 1472. cum vixisset annos 37.

VITA S. CASIMIRI REGIS POLONIÆ FILII.

*A Venerabili viro Gregorio Suueticiski
Eccles. Cathedr. Vilm. Canonico, ex bonis
Auctoribus cum fide descripta.*

Prou. 8.

IMMENSA atque inexplicabilis Dei sapientia, quæ habitat in consilio, eruditisque interest cogitationibus, cuius est æquitas, prudentia, & fortitudo, per quam Reges regnant, Principes imperant, & legum conditores iusta decernunt; sic mundum nostris subiectum oculis gubernat, rebusque consulit humanis, ut pro temporum necessitate viros Ecclesiæ suæ idoneos, sanctimonix notis insignes, ac omni virtutum genere conspicuos diu ersis sæculis assignet. Ita mundi nascentis exordio, ante Legem exaratam, Patriarchas, progressu temporis, ante gratiæ statum, Prophetas; demum

demum post Filij sui salutarem in terras
 aduentum , fidei antesignanos & primos
 sacri Euangelij præcones Apostolos ; eius- ^{Ephes.4.}
 demque acerrimos propugnatores, inuictos
 Martyres; item optimos Reipublicè diuinis
 à Christo formatæ legibus Præsides & Re-
 ctiores, tum singulari sapientia præstantissi-
 mos Episcopos & Doctores, denique ex aliis
 hominibus multitudinem propè innume-
 rabilem suffecit, qui posteris & rectè vitam
 instituendi norma, & duces æternæ felici-
 tatis capeffendæ existerent. Ex hoc postre-
 mo numero, vnus est immortalitate di-
 gnus, inclytæ potentissimorum Regum stir-
 pis Iagelloniæ diuus Casimirus, quem sum-
 ma rerum omnium effectoris bonitas tute-
 larem ac Patronum Poloniæ Lithuanixq;
 veluti quoddam specimen, totiusque pro-
 bitatis pulcherrimam effigiem, contem-
 plandum imitandumque proposuit. Natus ^{Cromer.}
 is est Cracouiæ, nobili in primis ac primaria ^{lib.44. non}
 Regni Poloniæ vrbe, anno partæ salutis ^{procul à}
 millesimo quadringentesimo quinquagesi- ^{principio,}
 mo octauo, tertio Nonas Octobris, ipso di- ^{& Striyko-}
 luculo: qui dies tum victoriæ quâ pater eius ^{uius lib.19.}
 Casimirus in Prussia de Crucigeris insignè ^{cap.6.}
 reportauit, arcemque Papouiam vi oppu-
 gnando cepit; tum Georgij Podiebradij
 Bohemorum Regis legatione iure amicitix

efflagitantis , Regniq̃ue Bohemici insignia eidem Casimiro Regi Poloniæ yltrò deferrentis, fuit illustris.

Cromer.
lib. 14. non
procul à fi-
ne.
Striyko-
uius lib. 6.
c. 4.

Agebatur iam tunc annus sexagesimus quartus , ex quo Iagello Dux Lithuanix bellicosissimus Olgerdi filius , Gedimini nepos , ab Vitenne Romano viro Principe genus ducentium , Urbano Sexto Pontifice Max. Ecclesiæ Romanæ clauum tenente , Christi fidem amplexus , & sacro Baptismatis fonte initiatus, VVladislai nomen sortitus est. Hic in Regem Poloniæ electus, ex Scenza (pòst Maria dicta) Kitouiensis Ducis filia, stirpem ac spem familiæ, VVladislaum videlicet, post felicem progenitoris sui obitum , simul Hungariæ ac Poloniæ Regem; & Casimirum, diui Casimiri, (de quo nobis sermo est) patrem suscepit: penes quem dum post immaturum VVladislai fratris decessum Regni Poloniæ administratio esset, nupta ei Elisabetha Alberti Austriaci Romanorum, Hungariæ, & Bohemiæ Serenissimi Regis filia, sex ei liberos, nimirum VVladislaum, qui Bohemiæ & Hungariæ Rex fuit; deinde diuum Casimirum, pòst Ioannem Albertum, Alexandrum, & Sigismundum Reges Poloniæ , & Fridericum tituli sanctæ Lucie Cardinalem Archiepiscopum Gnesnensem,

fem, partu edidit secundo. Inter omnes di-
 uus Casimirus, velut inter clarissimas gem-
 mas speciosissimus carbunculus enituit. Ab
 incunabulis enim summa cura diligentique
 educatus, vnà cum lacte ea semina virtutis
 imbibit, quæ deinceps per reliquam ætatem
 adhæserunt. Sexennis adhuc puer, præclaris
 moribus bonisq̃ue literis erudiendus opti-
 mis præceptoribus à parentibus traditus,
 tantum profecit, vt in omnibus progressum
 eius quàm oculis quàm auribus accipientibus
 non mediocrem admirationem excitauit,
 Erat in eo rara indoles animi, egregia cor-
 poris forma, mores candidi, suauēs, sine fa-
 stū; quibus assequebatur, vt quibus vtere-
 tur, carus acceptusq̃ue esset. Certè molliter
 & in deliciis educatus diues ac opulentus
 Princeps, in maxima affluentia rerum, iu-
 uentæq̃ue licentia, præclara specie habitu-
 q̃ue corporis adolescens, sui potens fuit; &
 cū transgredi potuerit, non est transgres-
 sus, nec mala gessit in vita sua. Labentis Eccli. 31.
 huius sæculi gloria contempta, post aurum
 non abiit; & in thesauris pecuniæ non spe-
 rauit; dum hīc non habere se ciuitatem per- Heb. 13.
 manentem contemplan, diuini amoris fa-
 cibz inflammatus, omne studium ad futu-
 ram inquirendam non manufactam in cæ-
 lo conuertit, vbi thesauros nec ærugo neque Matth. 6.

tinea demolitur, nec fures effodiunt. Perpetuò autem memoriæ eius inerat diuinum illud oraculum, quod Regius Vates cæleste domicilium adire cupientibus inculcat; ni-
 Psalm. 23. mirum, in montem Domini neminem ad-
 scensurum, nec quemquam in loco sancto
 eius fixurum pedem, nisi qui fuerit inno-
 cens manibus & mundo corde, qui non
 acceperit in vanum animam suam, nec iu-
 rauit in dolo proximo suo. Quamobrem
 vehementi ille gloriæ perennis æstuans de-
 siderio, vt iucundissimâ Beatorum patriam
 consequeretur, ad eam regulam omnes
 actiones suas conformauit, quam præfato
 oraculo vniuersis vitæ Christianæ sectatori-
 bus præscribi animaduertebat. Nec est du-
 bium, vitam eius omnium virtutum orna-
 mentis conspicuam Regni Proceribus a-
 liisq̃ue cuiusuis ordinis hominibus, vitæ be-
 nè ac laudabiliter instituendæ fuisse exem-
 plar. Vitiorum omnium fuga talis ac tanta
 in eo fuit, vt etiam quamuis eorum speciem
 diligentissimè cauere. Proinde luxum ve-
 stium & lecti molliem, tamquam peccan-
 di fomitem declinans, vti nuda humo pro-
 cubili, & ex horridis equorum setis compa-
 rato cilicio, aliisq̃ue verberum asperitatibus
 velut cupiditatum moderatricibus, tene-
 ram carnem, non minùs sæpè quàm auidè,
 Christi

Christi cruciatuum salutis nostrę causa susceptorum memorem affligere solebat. Diuis omnibus, ac præcipuè beatę Marię Dei Parenti, benignissimęque hominum Patronę maximè addictus erat, quam à se metris singulari artificio elaboratis, & pulchro schemate, pænè omnia Incarnationis Dominicę mysteria claudentibus, quotidie in terram fulis genibus pio affectu salutabat. Ceteris porro religiosis officiis piisque ritibus cùm in æde sacra peragerentur, aded frequens intererat, vt eum sæpiùs in templo quàm in Palatio, sæpiùs in Patrum lintearum piorumq; Sacerdotum choro, quàm amicorum regionumque aulicorum cœtu videres. Quo tempore sæpenuerò à sensibus abalienatus, atque extra se positus, cō animi ardore precibus vacabat, vt cibi atque potus immemor, nisi sæpiùs sub prandij aut cœnæ horam à parentibus missis nuntiis, domum corporis reficiendi causa reuocaretur, totos dies sine epulis esset transacturus. Sed neque tamen diurna hac orandi assiduitate contentus erat; nisi etiam intempesta nocte è strato persæpè consurgeret, è cubili se clàm efferret, & pedes discalceatus, nullo teste, precandi causa ædem sacram aditaret. Et quoniam plerumque (id quod moris est) obseratis ostiis ab ingressu

prohibebatur; fatis Religioni, fatis Deo, si-
biq̃ue factum putabat, si nimirum sacras
valuas salutasset, lacrymis religiosa limina
rigasset; atque hoc pacto in precibus pernox
ad fores templi perdurasset.

Quo loco sæpissimè sub auroram à no-
cturnis custodibus atque vigilibus humi,
toto corpore prostratus, precibusq̃ue inten-
tus, est repertus. Verum enim verò, parui
hanc corporis molestiam æstimans. verè
egregius ac sanctus iuuenis, adeò in sese ipse
sæuebat, adeò multis in rebus innocentem
ac delicatam carnem suam vexabat, vt eum
non carnem spiritui subiugare, quod ab
Rom. 8. Apostolo traditum esse Diuinæ literę perhi-
bent; sed penitus in carne sine carne viuere
voluisse putares. Equidem in respuendo &
contemnendo blandissimas dominas cupi-
ditates constantissimus, in refrænando om-
nes illicitæ voluptatis illecebras vigilantissi-
mus, in abstinentia à cibo & potu religiosissi-
mus, in somno ceterisq̃ue rebus eiusmodi,
atque carnis commoditatibus parcissimus
fuit. Adeò in aula regia non aulicum aut
stirpem regiam degere, verùm in claustro
religiosæ disciplinæ assuetum Christi athle-
tam vitam instituere arbitrarere. Ac de hoc
rigore vitæ, etiam dum morbi vis eum lecto
aliquando affixisset, nihil omnino remitte-
bat.

bat. Quadam vice, dum à Medicis iubere-
 tur diebus interdictis ab Ecclesia, lacte, &
 similibus vesci; adduci nullo pacto potuit vt
 obsequeretur eorum consilio, & recuperan-
 dæ sanitatis gratia, vel latum vnguem à san-
 ctissimæ Matris Ecclesiæ placitis descisce-
 ret. Quam tam raram nobilissimi iuuenis,
 atque singularem erga sanctissimam Chri-
 sti Sponsam obseruantiam, ea est ratione
 diuina bonitas remunerata, vt nihil neque
 abstinentiæ rigor inualetudinem corporis
 promoueret; neque huius imbecillitas ani-
 mi alacritatem atque perfectę vitæ studium
 retardaret. Quippe qui Numine reuelante
 iam didicerat, neque infirmitatem istam
 menti nocituram, & humana remedia, si
 quæ essent, nequidquam profutura. Ad
 hæc eius eximias virtutes, summa quoque
 ægritudinis tempore patientia, & dolorum
 omnium cōtemptus accedebat. Et quidem
 semper, siue dum morbo laborabat, siue
 dum corpore benè habebat, cum in alijs re-
 bus omnibus, tum præcipuè à sermone, etsi
 aliàs esset disertus, modestissimus extitit.
 Et verò, si loquendum quidpiam erat, id
 nequaquam faciebat, nisi vel de rebus piis
 ac cælestibus, vel de ijs quæ documento aut
 emolumento ceteris essent, loquendi co-
 piam haberet. Hinc nihil vñquam ipse

quod alios offenderet, in colloquium inducebat ; & si in aliquem eiusmodi fermocinationibus occupatum incideret , amice corripiebat , pertinaciter peccantes etiam seuerioribus verbis castigabat : ac si non à proposito desisterent , vt quamprimùm eiusmodi mortales aula regia prohiberentur, apud optimum parentem nullo negotio efficiebat. Huic igitur tantæ nobilissimi & sanctissimi Principis virtuti par in Deum religio , in assertorem ac vindicem salutis nostræ Christum fides, in sanctam Ecclesiam Catholicam & Romanam orbis magistratam extitit reuerentia. Quarum rerum habemus etiam hodie in Cathedrali Ecclesia Vilnæ luculentum testimonium , diploma, inquam, illud ipsum habemus, quo huius impulsu Rex seuerissimè cauerat, ne qui è gente rustica ab vnione Catholicæ & Romanæ religionis descuerunt , templa vel noua erigere , vel vetustate collapsa restaurare possent. Longum est dicere , quot aliis in rebus quamque sollicitè diuus Casimirus integritati Religionis, ac Ecclesiasticarum legum obseruantix se totum impenderit. Cuius tam singulari industria effectum est, vt nullæ eo tempore diuersarum opinionum atque errorum Lernæ capita erigeret, quin confestim vigilantissimi Principis acinace

acinace demeterentur. Huic porrò tantæ in Deū religioni & charitati, non inferior parte altera in proximū amor & commiseratio respondebat. Quanta enim hic diligentia egentes quosuis ac inopes subleuabat, iacentes erigebat, afflictos recreabat, oppressos liberabat, omnes denique quibuscumque aduersæ fortunæ telis expositos iuuabat. Hunc enim viduæ tutorem, pupilli parentem, egeni & afflicti consolatorem vocitabant. Namque ea erat humanitate in singulos, beneuolentia in miseros, clementia in subditos, facilitate in vniuersos, vt vltro si quid à se præstitum vellent, obuios quosuis interrogaret, causas susciperet, ageret, atque perageret. Qua tam incredibili atque inusitata charitate atque prudentia, singularem ab omnibus gratiam inibat; & cum has aliasque ob res ad Regnum administrandum iudicaretur aptissimus, id non modò non ambiebat, sed etiam à parente aliisque Regni Proceribus oblatum constantissimè respuebat. Ceterum, ea semper integritate & animi & corporis fuit, vt complures viri grauissimi, qui nobilissimo Principi vel à secretis, vel à cubili fuerunt, (vt interim Medicorum spiritualium, quibus ille animæ suæ salutem concedidit, testimonium taceam) constanter asseuera-

re minimè dubitarent, eum & toto quo vixit tempore castum vixisse, & castum virginem mortem obiisse. Quod illorum testimonium ipsa mors videtur admirabili quadam diuinæ providentiæ dispensatione comprobasse; constat enim, eum potius vitam, quàm hunc inuiolatæ castimonix nitidum florem amittere voluisse. Qua vna in re, non solum à Medicorum præceptis, verùm etiam parentum suorum monitis, quorum imperio ceteri parebant omnes, vni sibi discedere licitum esse existimabat. Et cum illi in hoc negotio pertinaciter sese gererent, cum instantissimè ab eo efflagitarent, vt vitæ tutandæ causâ, tori virginalis consortium admitteret, (id enim vnicum Medicorum consilio morbi remedium supererat,) illos hic castissimus iuuenis pie increpabat, seque cum iactura virginæ castitatis vitam mortalem prorogare molle, constantissimè assererat. Quocircâ ingrauescente indies morbo, postquam diem obitus sui præsensisset, eumque coràm astantibus prædixisset, sanctissimus ac verè Regius adolescens armis spiritualibus sese ritè communiit, Sacramenta inquam, quæ morituris administrari solent, religiosè percepit, ac demum Christi Crucifixi effigiem manu tenens, intentisque oculis intuens,

tuens, dum solemnia illa Regij Vatis sæpiùs iteraret verba, *In manus tuas, Domine, commendo spiritum meum*, dum in extrema illa vitæ & mortis lucta precibus lacrymas misceret, voce pariter ac vita deficiente, in Vilneni. arce, anno à virgineo salutifero partu millesimo quadringentesimo octogesimo quarto, die quarta Martij, illucescente aurora (qui etiam annus Xysti Quarti Pontificis Maximi vitæ simul & Pontificatus ultimus fuit) æquissimo animo obdormiuit in Domino. Cuius eodem tempore ab omni immunem peccati labe animam, complures fide dignissimi homines, à beatis mentibus in cælum clarissima circumdata luce deportari conspexerunt: Vixit annos viginti quatuor, menses quinque. Sepultus est quàm decuit Regis natum honorificentissimè in æde Pontificia Vilnæ sancto Stanislao Martyri sacra, in Sacrario beatæ Mariæ Virginis, quem ipse sibi viuis sepulturæ locum designarat.

Mat. Mic.
chou.

Erat sanctissimus iuuenis & nobilissimus Princeps Casimirus statuta mediocris, cæfariem gestabat subnigri coloris, naso æquali, temperati ruboris, facie venusta & eleganti, incessu graui & ad omnem modestiam composito, ac moribus cum primis affabilis comisque, vt non obscurè interio-
rem

rem animi statum, exterior oris, vultus, totiusque corporis habitus & figura videatur prodidisse. Hic iam, beneuole Lector, eius gloriam & celsitudinem, qua ipsum supremus rerum omnium Conditor cumulatissime decorauit, libeat animo voluere, suspicere, admirari. Qua enim putas iuuenem hunc natalium splendore clarissimum, diuitiarum, potentiaque magnitudine polentem, virentis adolescentiae decore floridum, venustate corporis, & mentis sublimitate insignem, eruditione conspicuum, sapientia, probitate, aliisque omnibus virtutibus ornatissimum; qua, inquam, putas iuuenem hunc diuina bonitas gloriae amplitudine est remunerata? Quia breuem hanc, caducam, & incertam vitam flocci pendit, vitam illi nullis circumscriptam mortalitatis limitibus tribuit: quia inanem mundi fastum contempsit, veram illi in caelo gloriam donauit, ab exilio illum in patriam reuocauit, è naufragio in portum subduxit: labores eius salutis adipiscendae gratia susceptos, perenni dulcissima quiete; & mœstiam qua Christo in cruce pendenti condolens saepe saepius tenebatur, indeficienti gaudio compensauit. Faxit ergo ille animorum Parens, ut huiusce felicitatis optatissimae, huius mercedis, qua nec umquam haberi

beri nec cogitari amplior potest, capti desiderio, totos nos ad eius imitationem conuertamus; qui & vitæ laudatissimæ exemplo, & ineffabilis præmij magnitudine, coronæ immarcescibilis spe certa, ad sui nos imitationem inuitat.

De miraculis per eum post mortem editis.

ET SI quidem nemo fuit eo etiam tempore, quo huius lucis vsura fruebatur Casimirus, qui de eius vitæ integritate, innocentia, & sanctitate dubitaret; eo defuncto tamen, incredibile dictu est, quantis eius virtus est & vitæ sanctimonia ab ipso piorum omnium fidelissimo Agonothete & remuneratore Deo illustrata prodigijs: adeò, vt difficulter admodum eorum numerus iniri possit, qui rerû admirandarum fama exciti, se ad ipsius sacratissimum tumulum recuperandę sanitatis gratia contulerint, ac quæ voluerant, recuperarint. Videre hîc enim sæpenuerò fuit, non solum cæcis oculorum vsu, surdis aurium, mutis linguæ, claudis pedum; sed quod mirabilius est, nõnullis quos malorum extremum mors vita & sensu priuauerat, & vitæ & sensus bonum quasi postliminiò, diui Casimiri ope fuisse restitutum.

Cromer.
lib. 23.
Mat. Michouius
hif. lib. 2.
cap. 73.
Iodoc. Ludouic. Decius lib. 2.

Nam

I.

Nam erat puella Vilnæ, Vrsula nomine, quæ superstitionibus adhuc parentibus diem obiit supremum. His mors filix adedò molesta accidit & grauis, vt à sensibus pænè ipsi alienati, præter mortalium communem consuetudinem, magis de vita filix restituenda, quàm de iustis mortuæ soluendis cogitarent. Quo in negotio quid agerent? quò se verterent? cùm hanc ad rem nulla humana vis aut industria sufficeret, ad diuinam se conuerterent; atque ibi primùm diui Casimiri memoria mentem subiit, visi sunt ambo nonnihil respirare. quid multa? votum faciunt, sacrosancta adyta vbi quiescebat Casimirus adeunt, luctu & lacrymis omnia complent, clamore ac precibus sidera feriunt, Casimiri numen & nomen ingeminant, opem implorant, spiritum defunctæ filix restitui flagitant. Audiit Casimirus precantes, lacrymas piorum parentum ac fidem respexit, puellamque mortuam vitæ simul ac mœstis parentibus diuinitus restituit.

II.

Addo hoc loco & alterum, quod etsi isto inferius admiratione, ad Casimiri sanctitatem

tem demonstrandam, nihilo tamen minus. Etenim anno millesimo quingentesimo decimo octauo Moschorum Dux, nostris nihil cogitantibus, atq; ex improviso arcem Polocensem non paruis copiis oppugnare aggreditur. Quo tempore Sigismundo Primo inclyto Poloniæ Regi, aliis multis grauibufque rebus intento, miles in promptu exiguus admodum erat. Rex igitur optimus, bina solùm millia ductoribus Gastoldo & Ioanne Boracynski aduersus hostes, manum tumultuariam potius quàm exercitum, expedit. Abeunt illi, diuinis magis quàm humanis nixi viribus, præcipuè diuo Casimiro (quem miraculorum fama celeberrimum effecerat) sua vota prostrationesque dicando, & certaminis dubium euentum committendo. Pòst, multis fufis ad eum precibus, auxilium illius benignum experiuntur: quippe in illa expeditione, confecto multorum dierum itinere, ad Dunam fluium perueniunt, vadoque irreperito, vniuersi in littore subsistunt: dumque nimium de transitu sunt solliciti, ecce tibi iuuenis quispiam albis amictus, forma decorus & spectabilis, candido vectus equo, iis se spectandum obiicit, bonoque omnes esse animo iubet, seque ducem sequantur, imperat. Quæ vbi dixisset, confestim subditis

ditis equo cui infidebat calcaribus ; primus in flumen insiliit, vadumque demonstrans, superatoque nullo negotio amne, ad ripam alteram saluus, ceteris inspectantibus, peruenit. Quo viso Poloni milites, rei nouitate attoniti, iisdem in vestigiis diu hæserunt, neque quousque ille iteratò, vt se duces intrepidi sequerentur, commonefaceret, loco mouerunt. Tandemque rem diuinitus agi animaduertentes, pleni fide & fiducia, se cateruatim rapidissimi fluminis, qua parte ille monstrabat, discrimini committunt, atque incolumes transeunt. Quod cum Duces Regiusque equitatus conspexisset, iuuenisque interea oculis eorum sese subduxisset, Casimirum, Casimirum omnes clamitant, eundemque, quem itineris duces, etiam prælij imminentis, supplicibus pro se quisque votis promotorem & fautorem exoptant. Neque in vanum militum piorum cecidere preces: nam cum primo signo dato, in hostes tantò viribus superiores impetum fecissent, illos terga vertere, & obsidione etiam inuitos soluere coegerunt, multosque internecioni dederunt, neque pauciores in seruitutem Moschos abduxerunt. Victoria parta, Poloni diuinam opem agnoscere, solemnem hymnum Te Deum laudamus canere, Casimiri

vir-

virtutem extollere, remque Regi simul cum captiuis Moschis diuinitus gestam conscrip-
tamque transmittere. Quæ aded Regem
commouit, vt non solum ad ædem sacram
agendarum Deo & Casimiro gratiarum
causa se subitò conferret; verum etiam se-
riam se de Casimiro in Diuorum numerum
referendo cogitationem suscepturum pro-
mitteret. Verum quid euenit? isthæc minùs
sedulò fortasse agente,

III.

En tibi anno sequenti Moschus superio-
ri clade immanior ferociorque effectus, in-
gentem in ipsam Lithuaniam exercitum
inducit, omniaque nullo antè indicto bello
flammis & ferro latè vastat. Quo tam pe-
riculoso turbine ac insperata tempestate
perculsis Lithuanis, neque consilium ne-
que auxilium suppetebat. Cùm alios hosti-
lis gladius è medio tolleret, alios vorax
flamma anima & spiritu priuaret, alios de-
nique in miserrimam seruitutem crudelis
hostium barbaries, & barbara crudelitas,
malè priùs mulctatos abduceret. Hisce re-
bus animaduersis, è Lithuanica nobilitate
nonnulli, patriæ cladem miserati, quoscum-
que eo tempore tam difficili poterant, con-
ueniunt, seque ad arma sumenda, patrios-
que lares & focos, etiam cum vitæ disci-

LI

mine

mine tutandos inuicem incitant. Atque paucitas quidem suorum & hostium multitudo nonnihil quosdam initio est remota: at ubi memoria repeterent, quòd anno superiori diuo Casimiro duce subsidium diuinitus sub Polocia experti fuerant; eiusdem patrocínio freti, eius opem omnes implorare, quòd segniùs honorem ipsius curassent, agnoscere, culpam deprecari; se, si eis hoc tempore auxilio futurus esset, eius cultum cælestemque honorem apud Sedem Apostolicam diligenter procuraturos spondere. Nec irrita cecidere vota: nam tantus subito animos omnium ad pugnas incessit ardor, ut nemo esset qui temerarium putaret, duo millia (tot enim ex Lithuanis nobilibus conuenerant) aduersus sexaginta millia hostium obicere. Itaque signum certamini editur, Lithuani Dei diuique Casimiri numine sæpiùs ingeminato, pugnam ineunt. Nec mora, ut primum in hostes nostri irruerunt, adest Casimirus, suisque Dux factus & Archistrategus, in aëre, eodem quo anno superiore & oris & corporis habitu, sublimis conspicitur. Lati tali Duce Lithuani, acriterque cædendo hostes, urgent, instantque. Neque diu aduersa pars diuinam Indigetis Lithuani vim & numen sustinuit; sed cum ingens

gens aduersarios pauor inuasisset, in fugam conuerſi, victoribus Lithuanis terga dedere; ex ſuis amiſſis pluribus millibus, è noſtris Dei beneficio, deſiderato nullo. Quæ cum Rex pientiffimus intellexiſſet, eamque tam prodigioſam victoriam vni poſt Deum Caſimiro ab omnibus qui rei intererant adſcribi viſiſſet; ceteras etiam, quas aliis diuerſis in locis, eodem tempore, exiguo vbique milite victorias reportaviſſet, fauori & patrocinio eiufdem ſancti Caſimiri acceptas referre minimè dubitauit. Quare in gratiarum actionem, re diuina in templo ſolemni ritu procurata, Rex optimus nulla interiecta mora ad Romanum Pontificem legationem deſtinauit, curam vt de Caſimiro in Diuorum numerum aſſciſcendo ſubeat, omnibus modis contendit. Pontifex æquiſſimis Regis Catholiciffimi poſtulatibus non inuitus annuit, remque Nuntio Apoſtolico in Poloniam miſſo, ipſique Archiepiſcopo Gneſnenſi Ioanni, & Petro Poſnanienſi Antiſtiti, Regni Procancellario demandauit; qui mira omnia opera diui Caſimiri nutu patrata diligenter inquiſiuerunt, inquiſita fide dignis teſtibus ſtabiliuerunt, atque ſic ſtabilita Pontifici Maximo Leoni X. anno milleſimo quingenteſimo vigeſimo tranſmiſerunt. Qui-

bus Pontifex sequenti anno in augustissimo purpuratorum Patrum consensu diligenter reuifis, examinatis, tandemque approbatis; diuum Casimirum in numerum Sanctorum adscripsit, quem postea Clemens Papa Octauus per totum Poloniæ Regnum, & magnum Lithuanix Ducatum, aliasque omnes Prouincias ipsorum ditioni subiectas, duplicis Officij ritu ab omnibus publicè priuatimque coli & celebrari, anno millesimo sexcentesimo secundo concessit, vt latiùs in Breui Apostolico de hac re authenticè profecto licet videre.

Hæc de vita S. Casimiri ex Auctore suprà nominato hoc loco referenda esse censuimus. Cetera quæ ad sola miracula pertinent, libenter omisimus: quæ tamen ab ijs, qui ea cognoscere cupiunt, ab Auctore suo facile peti poterunt.



FINIS.

SVMMA PRIVILEGII.

ALBERTI & ISABELLÆ
CLARAE EVGENIAE,
Archiducum Austria, Ducum Burgun-
dia, Brabantia, &c. Serenissimorum Bel-
gica Principum Privilegio cautum est; ne-
quis, De Officio Principis Christia-
ni Libros tres, Auctore ROBERTO
S. R. E. Card. BELLARMINO è
Societate IESV, præter Balihafaris Mo-
reti voluntatem intra sexennium impri-
mat, aut alibi excusos in Inferioris Ger-
mania ditiones venales importet; vti la-
tiùs patet in litteris datis Bruxellæ, VI. Iu-
nij, M. DC. XIX.

Signat.

De VVitte.

ANTVERPIÆ,
EX OFFICINA PLANTINIANA
BALTHASARIS MORETI.
M. DC. XIX.



6-3-1

+

1000



